

Ellen G. White Estate

# KATAMELO HO KRESTE



ELLEN G. WHITE



---

**Eo Bohle Esaleng Ba Mo  
Nyoreloa**

---

**Ellen G. White**

**1993**

**Copyright © 2021  
Ellen G. White Estate, Inc.**



## **Information about this Book**

### **Overview**

This eBook is provided by the [Ellen G. White Estate](#). It is included in the larger free [Online Books](#) collection on the Ellen G. White Estate Web site.

### **About the Author**

Ellen G. White (1827-1915) is considered the most widely translated American author, her works having been published in more than 160 languages. She wrote more than 100,000 pages on a wide variety of spiritual and practical topics. Guided by the Holy Spirit, she exalted Jesus and pointed to the Scriptures as the basis of one's faith.

### **Further Links**

[A Brief Biography of Ellen G. White](#)  
[About the Ellen G. White Estate](#)

### **End User License Agreement**

The viewing, printing or downloading of this book grants you only a limited, nonexclusive and nontransferable license for use solely by you for your own personal use. This license does not permit republication, distribution, assignment, sublicense, sale, preparation of derivative works, or other use. Any unauthorized use of this book terminates the license granted hereby. (See [EGW Writings End User License Agreement](#).)

### **Further Information**

For more information about the author, publishers, or how you can support this service, please contact the Ellen G. White Estate

at [mail@whiteestate.org](mailto:mail@whiteestate.org). We are thankful for your interest and feedback and wish you God's blessing as you read.



## ***HOBANENG O TŠOANETSENG HO BALA BUKA ENA?***

Batho kaofela ba na le takatso eo ba sitoang ho e hlalosa, ka lipelong tsa bona, ea ho iphumanela ntho e ‘ngoe eo ba sitoang ho e fumana ka mokhoa oa tlhao. Takatso ena e kentsoe ka lipelong tsa bona, ke Molimo O lerato, empa Satane o e mpefalitse, O etsa hore batho ba be le tumelo ea hore tlala ena e kholo e ka kholisoa ka menate, maruo, boiketlo, botumo kapa matla. Empa bao a ba thetsitseng ka mokhoa o joalo, ba fumana hore tsena tsohle li sia motho a ntse a sa khotsofala.

Molimo O entse sena, hore bohloki bona boo motho a bo utloang, bo mo lebise ho E mong, Eo E leng Eena feela ea ka bo kholisang. Takatso ena ke e Mo batlang, e le hore e lebise motho ho Eena, e leng ea tletseng, le mophethi oa takatso eo. Tlalo eo e fumanoa ho Jesu Krete, Mora oa Molimo O sa feleng. Haggai o Mo bitsa “takatso ea lichaba tsohle,” ‘me rōna re ka Mo bitsa “takatso ea mengoaha eohle,” Mora oa Molimo ea rōmiloeng ke leholimo ka lerato.

Buka ena e hlahisa Jesu Krete e le Eena ea ka khotsofatsang takatso e ‘ngoe le e ‘ngoe e tebileng ea pelo. Leha ho le joalo, ha se sepheo sa buka ena, ho bontša kamoo li-Gospel li lumellanang ka ona, kapa hona ho bontša kamoo lietsahala tsa bohlokoa le lithuto tse hlollang tsa bophelo ba Krete li latellanang ka ona. Sepeo sa eona, ke ho hlahisa lerato la Molimo, kamoo le senotsoeng ka teng ho Mor’a Ona, le botle ba boMolimo, ba bophelo ba Krete.

Ka maqepheng a latelang, mongoli o phetlollela ‘mali maruo a es’o kang a nahanoa a tsoang bophelong ba Jesu. E hlahisa leseli le lecha, ‘me le bonesa liratoana tse ngata tse tloaelehileng tsa mangolo. Jesu Krete O senoloa e le sephetho sa bo-Molimo, e le Mopholosi ea sa feleng, ea mohau ho baetsalibe, e le letsatsi la ho loka, e le Moprasta ea Phahameng ea mohau, e le mohlala o susumetsang oa batho, e le Mofolisi ea folisang mafu le maloetse ‘ohle a batho, e le Motsoalle ea bonolo ea mohau, e le Morena oa



khotso, e le Morena ea tlang, e le qetello, tholoana ea litakatso le tšepo ea mengoaha eohle.

Re rōmella buka ena re rapela hore Moca o Halalelang O fetole [6]  
mantsoe a eona mantsoe a bophelo ho limillione tsa batho bao tabatabelo tsa bona le litakatso li esong ho khotsofatsoe.

*Bangoli*

[7]

## **Tfe Ka Hare**

# Contents

Information about this Book .....	i
<i>HOBANENG O TŠOANETSENG HO BALA BUKA ENA?</i> .....	iv
Tfe Ka Hare .....	vi
<b>KHAOLO EA 1—KRESTE PELE A E-TLA LEFATŠENG</b> .	xvii
Molao Ona O Ile Oa Rojoa Leholimong .....	xviii
Sehlabelo Sa Boithaopo .....	xix
A Tšoaroa Ka Tsela E Tsoanetseng Rona .....	xxi
<b>KHAOLO EA 2—BATHO BA NENG BA TŠOANELA</b>	
<b>HORE EBE BA MO AMOHETSE</b> .....	xxiii
Tsela Eo Ba Ileng Ba Mpefatsa Litšebeletso Tsa Sehalalelo	xxiv
Ba Lebella Mesia Eo Eseng Eena .....	xxv
<b>KHAOLO EA 3—SEBE SA MOTHO HA NAKO LI</b>	
<b>PHETHEHILE</b> .....	xxvi
Ba Bangata Ba Ne Ba Laba-labela Mopholosi .....	xxvii
Tsela Eo Ka Eona Satane A Batlileng A Atleha .....	xxviii
Molimo O Utloela Lefatše Le Timelang Bohlōkō .....	xxix
<b>KHAOLO EA 4—O HLAHETSE SETALENG</b> .....	xxx
Ke Balisana Feela Ba Ileng Ba Hlokomela .....	xxxii
<b>KHAOLO EA 5—JOSEFA LE MARIA BA HLAHISA</b>	
<b>JESU TEMPELENG</b> .....	xxxiv
Simeone Ea Hlomphang Molimo O Lemohile Jesu .....	xxxv
Bohlōkō Boo ‘Ma-Kreste A Tsoanetseng Ho Bo Tseba ..	xxxvi
Kamoo E Mong Le E Mong A Tlang Ho Ikahlola .....	xxxvii
<b>KHAOLO EA 6—“RE BONE NALELI EA HAE”</b> .....	xxxviii
Leeto La Bosiu .....	xxxix
Mōna Oa Heroda Oa Tsoha .....	xxxix
Ha Ho Balebeli Ba Ntlo Ea Borena .....	xli
Polao E Sehloho Ka Heroda .....	xlii
<b>KHAOLO EA 7—NGOANA JESU</b> .....	xliv
Tlholeho E Tlatsa Bibebe .....	xlv
Kreste, E Le ‘Metli, A Bontša Bokhabane Ba Mosebetsi ..	xlvi
Sebini Se Thabileng .....	xlvii
<b>KHAOLO EA 8—LEETO LA PASEKA</b> .....	xlix
Batsoali Ba Hae Ba A Ngongoreha .....	li

Jesu O Thusa ‘M’ae . . . . .	liii
<b>KHAOLO EA 9—MATHATA A JESU HA E LE NGOANA . .</b>	<b>liv</b>
Jesu O Ne A Hlompha Batho Bohle Ka Ho Tšoana . . . . .	lv
Mathata A Jesu Le Lelapa Labo . . . . .	lvi
Hobaneng A Neng A Sa Tšoane Le Ba Bang. . . . .	lvii
<b>KHAOLO EA 10—LENTSOE LE HOANG FEELLENG . . . . .</b>	<b>lx</b>
Sakariea A Belaela . . . . .	lxi
Thuto Ea Johanne E Sa Tloaelehang . . . . .	lxii
Molaetsa Oa Esaia O Hlakileng . . . . .	lxiv
Moeling Oa Phetohelo . . . . .	lxiv
Khalemelo E Bohale Ea Johanne Ho Baikaketsi . . . . .	lxv
<b>KHAOLO EA 11—KOLOBETSO EA JESU . . . . .</b>	<b>lxviii</b>
Jesu Ea Senang Sebe Oa Kolobetsoa. . . . .	lxix
Tiiso Ea Leholimo . . . . .	lxx
<b>KHAOLO EA 12—MOLEKO FEELLENG . . . . .</b>	<b>lxxii</b>
Satane A Rera Ho H151a . . . . .	lxxiii
O Ile A Nka Tsohle Tse Neng Li Loketse Batho . . . . .	lxxiv
Moleko O Tlisang Khoao . . . . .	lxxv
Ho Hloka Boithibo Ho Bolisa Mekhoa. . . . .	lxxvii
<b>KHAOLO EA 13—TLHOLO . . . . .</b>	<b>lxxix</b>
Ho Bapalla Mabaleng A Satane . . . . .	lxxx
Kreste O Ne A Ke Ke A Rekoa . . . . .	lxxxi
Satane E Ntse E Le Sera Se Hlōtsoeng . . . . .	lxxxii
<b>KHAOLO EA 14—RE FUMANE MESIA . . . . .</b>	<b>lxxxiv</b>
Ba Bangata Kajeno Ba Sitoa “Ho Bona” Kreste . . . . .	lxxxvi
Ho Hlaha Ha Kreste Ho Ne Ho Sa Khetheha . . . . .	lxxxvii
Johanne O Supisa Balateli Ba Hae Ho Jesu . . . . .	lxxxviii
Thapelo Ea Nathanaele Ea Sephiri Ea Arajoa . . . . .	lxxxix
Bopaki Bo Matla Ka Ho Fetisisa . . . . .	xc
<b>KHAOLO EA 15—JESU O EA MOKETENG OA LENYALO</b>	<b>xciii</b>
Tumelo Ea Maria Ea Putsoa . . . . .	xcv
Kreste O Thuha Marako A Karohano A Ho Shebelana	
Tlaase . . . . .	xcvi
<b>KHAOLO EA 16—KRESTE O LOANTSA BOBOLU</b>	
<b>TEMPELENG . . . . .</b>	<b>xcix</b>
Tšenyeho Ea Ho Qetela Har’a Mosebetsi Oa Molimo . . . . .	c
Tempele E Hloekisoa Ke Boteng Ba Morena. . . . .	cii
Tšoantšiso Ea Kahlōlo Ea Ho Qetela . . . . .	ciii

Qaleho Ea Hore Kreste O Tla Qetella A Hannoë . . . . .	cv
KHAOLO EA 17—NIKODEMA O TLA HO JESU BOSIU . . . . .	cvi
Mohlolo Oa Tsoalo E Ncha Oa Hlalosa . . . . .	cx
Nikodema O Qala Ho Bona Leseli . . . . .	cx
KHAOLO EA 18—“EKA KHONA EENA A HŌLA ‘ME ‘NA KE BOBE’” . . . . .	cxv
Mohlala Oa Jesu Oa Ho Qoba Likhohlano . . . . .	cxvii
KHAOLO EA 19—JESU LE MOSALI EA NANG LE BANNA BA BAHLANO . . . . .	cxviii
Thahasello Ea Mosali Ea Tsosolosa . . . . .	cxix
Sephiri Se Setšo Sa Bophelo Ba Hae Bo Fetileng . . . . .	cxx
Sakana-la-nkope La Kotulo Ea Evangeli . . . . .	cxxiii
Kreste O Thuha Marako A Ho Nahanelana . . . . .	cxxiv
KHAOLO EA 20—“NTLE LE HORE LE BONE MEHLOLO” . . . . .	cxxvi
KHAOLO EA 21—TSA BETHESTHA LE LEKHOTLA LA SANHEDRINE . . . . .	cxxix
Lekunutu La Pholiso Ea Moea . . . . .	cxxx
Melaoana E Senang Thuso . . . . .	cxxxi
Batho Ba Phuthehela Ho Jesu . . . . .	cxxxii
Jesu O Itšetlehile Ka Matla A Ntat’ae . . . . .	cxxxiv
Tsōho Ea Bophelo . . . . .	cxxxvi
Lekhotla Le Sitoa Ho Tsosa Jesu . . . . .	cxxxvii
KHAOLO EA 22—JOHANE O KENA TERONKONG; LEFU LA HAE . . . . .	cxxxix
Tšoabo E Kholo . . . . .	cxl
Jesu O Nehelana Ka Bopaki . . . . .	cxli
Ha Ho E Moholo Ho Eena . . . . .	cxlii
Ea Fetang Moporofeta . . . . .	cxliii
Lebaka Leo Jesu A Sa Kang A Lokolla Johanne . . . . .	cxlvi
KHAOLO EA 23—KAMOO DANIELE A ILENG A TSEBAHATSA HORE JESU KE KRESTE . . . . .	cxlviii
Moporofeta Daniele O Ile A Porofeta Ka Mosebetsi Oa Kreste . . . . .	cxlix
KHAOLO EA 24—“NA HASE MORA OA ‘METLI OA MAPOLANKA?’” . . . . .	clii
Jesu A Ba Bonša Boemo Ba Bona Ba ‘Nete . . . . .	cliv
KHAOLO EA 25—PITSO LEOATLENG . . . . .	clviii

Ho Se Halalele Hoa Totobatsoa . . . . .	clix
Boitelo Boa Putsoa . . . . .	clx
Kamoo Basebetsi Ba ‘Nete Ba Rupeloang . . . . .	clxi
<b>KHAOLO EA 26—MATSATSING A PHATHAHANENG</b>	
A THABISANG KAPERENAUMA . . . . .	clxiii
Ha Ho Pelaelo Kapa Ho Qea-qea . . . . .	clxiv
Satane O Sebetsa A Ikhakantse . . . . .	clxvii
Tšepo E Teng Ho Mang Kapa Mang Ea Lahlehileng . . .	clxviii
<b>KHAOLO EA 27—MOLEPERA OA PELE EA ILENG A</b>	
NTLAFATSOA KE KRESTE . . . . .	clxxi
Tsela Eo Krete A Hloekisang Motho Sebeng . . . . .	clxxiv
Moroalo Oa Sebe . . . . .	clxxv
Pholiso Ea Moea Hangata E Etella Pele Pholiso Ea ‘Mele	clxxvii
<b>KHAOLO EA 28—MATHEU: EA NENG A</b>	
BOKELLA LEKHETHO JOALE KE	
MOAPOSTOLA . . . . .	clxxviii
Boitlhahiso Ba Kantle Ha Bo Bolele Letho . . . . .	clxxix
Teko Ea Ho Arola Barutuoa . . . . .	clxxx
Lefifi Le Letšo-Letšo . . . . .	clxxxii
Makuka A Macha A Veine E Ncha . . . . .	clxxxiii
Kotsi Ea Maikutlo A Ratoang . . . . .	clxxxiv
<b>KHAOLO EA 29—JESU O PHOLOSABA SABATHA . . . . .</b>	
Lipontšo Tsa Tsokoloho Ea ‘Nete . . . . .	clxxxvi
Thuto Ea Sabatha . . . . .	clxxxvii
Ka Bomo Jesu O Folisa Ka Sabatha . . . . .	clxxxviii
Tlhokomelo E Kholo E Bontšoa Ho Liphoofole . . . . .	clxxxix
<b>KHAOLO EA 30—KRESTE O TLOTSABA APOSTOLA</b>	
BA LESHOME LE METSO E ‘MELI . . . . .	cxc
Ea Liehang Ho Lumela . . . . .	cxci
Judase A Hloka Boitatolo . . . . .	cxciv
A Ba Tlotsetsa Mosebetsi O Halalelang . . . . .	cxcv
<b>KHAOLO EA 31—THUTO EA THABENG</b>	
— MAHLOHONOLO . . . . .	cxcvii
Kreste O Felisa Tsepo Ea Boholo Ba Lefatše . . . . .	cxcviii
Moea O Nang Le Khutso O Rorisa Molimo . . . . .	cxcix
Matšoele-tšoele A Ne A Maketse . . . . .	cc
Hlomphe E Lebisa Thabong . . . . .	ccii
Botebo Le Bophara Ba Molao Oa Molimo . . . . .	cciii

Liteko Hase Boitšireletso . . . . .	cciv
<b>KHAOLO EA 32—MOLAOLI OA LEKHOLO O</b>	
<b>KOPELA MOHLANKA OA HAE THUSO . . . . .</b>	<b>ccvii</b>
Ho Tsosoa Motho Ea Shoeleng . . . . .	ccix
<b>KHAOLO EA 33—JESU LE MATHATA A LELAPA . . . . .</b>	<b>ccxi</b>
Matla A Macha A Ea Busa . . . . .	ccxiii
Baena Ba Jesu Ba ‘Nete . . . . .	ccxiv
<b>KHAOLO EA 34—JOKO EA HAE E BONOLO,</b>	
<b>MOROALO OA HAE OBOBEBE . . . . .</b>	<b>ccxvi</b>
Ke Eng Se Etsang Hore Re Khathale Hakaale? . . . . .	ccxvii
Kamoo Joko Ea Hae E Bebofatsang Mosebetsi . . . . .	ccxviii
<b>KHAOLO EA 35—HO KHUTSISOA SEFEFO . . . . .</b>	<b>ccxx</b>
Jesu O Ne A Tsoella . . . . .	ccxxi
Tumelo Tsa Lefeela Li Tlisa Tsabo . . . . .	ccxxiv
<b>KHAOLO EA 36—KAMO EA TUMELO E TLISA</b>	
<b>PHOLISO . . . . .</b>	<b>ccxxvii</b>
Tumelo E Phelang Ea Folisa . . . . .	ccxxix
<b>KHAOLO EA 37—BA-EVANGELI BA PELE . . . . .</b>	<b>ccxxx</b>
Re Tlameha Ho Kopana Le Khanyetso . . . . .	ccxxxii
Se Tsoanelang Ho Etsuo Ha Litlhoriso Li Fihla . . . . .	ccxxxiii
<b>KHAOLO EA 38—KRESTE LE BA LESHOME LE</b>	
<b>METSO E ‘MELI BA PHOMOLA . . . . .</b>	<b>ccxxxvi</b>
Ba Khatholoha . . . . .	ccxxxvii
Eba Le Nako Ea Ho Buisana Le Molimo . . . . .	ccxxxviii
<b>KHAOLO EA 39—“BA FEPENG E LE LONA” . . . . .</b>	<b>ccxl</b>
Thuto Ea Bohlokoa Ea Ho Baballa . . . . .	ccxlii
Hangata Re Hloka Tumelo Joaloka Andrease . . . . .	ccxliii
<b>KHAOLO EA 40—BOSIU LEOATLENG . . . . .</b>	<b>ccxlv</b>
Sefefo Lipelong Tsa Barutuo . . . . .	ccxlvii
Ho Iphahamisa Le Ho Oa Ha Peterose . . . . .	ccxlviii
<b>KHAOLO EA 41—BOEMO BA TSITSIPANO GALELEA . . . . .</b>	<b>ccl</b>
Tšepo Tsa Boithati Ha Li Phethahatsoe . . . . .	ccli
Ha Leholimo Le Qaleha . . . . .	ccliii
Bophelo Lentsoeng . . . . .	ccliv
Mantsoe A Krete A Mo Furallisa Bongata . . . . .	cclvi
‘Nete Ha E Thabeloe . . . . .	cclvi
Lerato Litšebeletsong Tsohle Tsa Hae . . . . .	cclvii

KHAOLO EA 42—KRESTE O POROFETA HO FOTHOLOA HO HOHOLO . . . . .	cclix
Khalefo Ea Lihloela . . . . .	cclx
KHAOLO EA 43—KRESTE O HELE TSA MARAKO A MERABE . . . . .	cclxii
Tumelo Ho Kreste E Mo Etsetsa Molemo O Moholo . . .	cclxiv
KHAOLO EA 44—PONTŠO EA ‘NETE . . . . .	cclxvi
Babusi Ba Eisa Kreste . . . . .	cclxvii
Bopaki Ba ‘Nete Ba Hore Kreste O Theohile Ho Molimo	cclxviii
Boithetso Ka Lebaka La Boikhabo . . . . .	cclxix
KHAOLO EA 45—SERITI SA SEFAPANO . . . . .	cclxxi
Kreste Ke Lefika . . . . .	cclxxiii
Barutuo Ba Ne Ba Sa Nahana Sefapano Se Tlang . . . .	cclxxiv
Satane O Ne A Leka Ho Fihlela Kreste . . . . .	cclxxv
KHAOLO EA 46—JESU A FETOHA . . . . .	cclxxviii
Petrose Ha A Hlile Ha A Utloisise . . . . .	cclxxix
KHAOLO EA 47—NTOA LE MEEA EA SATANE . . . . .	cclxxxii
Tumelo E Re Kopanya Le Leholimo . . . . .	cclxxxiv
KHAOLO EA 48—E MOHOLO KE MANG? . . . . .	cclxxxvi
Khang Bakeng Sa Boholo . . . . .	cclxxxviii
Ntho Efe Le Efe E Isang Sebeng E TSoanela Ho Tlosoa . .	ccxc
Bohloki Ba Kamo E Mosa . . . . .	ccxcii
KHAOLO EA 49—“EA NYORILOENG, A KE A’ILE” . . . . .	ccxciv
Mabaka A Boithati A Hlahatsoa . . . . .	ccxcvi
Mokhathala Oa Barapeli Oa Hlokomelaha . . . . .	ccxcvii
KHAOLO EA 50—HAR’A MARABA . . . . .	ccxcix
Khopolo Tse Fosahetseng Ka Mesia Le Hotla Ha Hae . . . .	ccc
Matla A Ho Arola Pakeng Tsa Ho Nepahetseng Le Ho Fosahetseng . . . . .	ccci
Jesu O Sebetsa Nyeoe Ea Bofebe . . . . .	ccciii
KHAOLO EA 51—LESELI LA BOPHELO . . . . .	ccciv
Taba Ea Tlhahlamano Ea Baapostola . . . . .	cccvi
Ha Ho Sebe Ho Jesu . . . . .	cccviii
Monna Ea Hlahileng E Le Sefofu . . . . .	cccix
Mohlolo Ka Sabatha . . . . .	cccxi
Mohlolo O Ne O Ke Ke Oa Latoloa . . . . .	cccxi
KHAOLO EA 52—MOLISA EA MOLEMO . . . . .	cccxi
Boikarabelo Ba Molisa Ea Tsepahalang . . . . .	cccxi



Ke Hobaneng Ha Linku Tsa Hae Li Mo Latela Ka Thabo	cccxvi
Kreste E Ntse E Le Molisa Oa Motho Ka Mong . . . . .	cccxvi
<b>KHAOLO EA 53—LEETO LA HO QETELA LA HO</b>	
<b>TSOA GALELEA . . . . .</b>	<b>ccc xviii</b>
Basamaria Ba Amohela Lerato La Kreste . . . . .	cccxx
Baetapele Ba Tumelo Ba Khelosa Ba Bangata Ho Kreste	cccxxi
Lekunutu La Matla A Bo-'na . . . . .	cccxxii
<b>KHAOLO EA 54—MOSAMARIA EA MOLEMO . . . . .</b>	<b>cccxxiv</b>
Leleka Lefifi Ka Ho Amohela Leseli . . . . .	cccxxv
<b>KHAOLO EA 55—E SENG KA HO IPONAHATSA . . . . .</b>	<b>cccxxviii</b>
<b>KHAOLO EA 56—LERATO LA JESU HO BANA . . . . .</b>	<b>cccxxxi</b>
Mohlala Ho Bo-'mè le Bo-ntate . . . . .	cccxxxii
<b>KHAOLO EA 57—MOHLANKANA OA MORUI O</b>	
<b>NE A HLOKA NTHO E LE 'NGOE . . . . .</b>	<b>cccxxxv</b>
Na Jesu O Na Batla Ntho E Thata? . . . . .	cccxxxvii
<b>KHAOLO EA 58—TSOSO EA LASARO . . . . .</b>	<b>cccxxxix</b>
<b>KHAOLO EA 59—BAPRISTA LE BABUSI BA</b>	
<b>TSOELA PELE HO RERA . . . . .</b>	<b>cccxlvii</b>
Kamoo Moea O Halalelang O Lekileng Ho Ba Thusa	cccxlviii
<b>KHAOLO EA 60—KE SEFE SETULO SE</b>	
<b>PHAHAMENG HO FETA TSOHLE? . . . . .</b>	<b>cccli</b>
Muso Oa Tsamaiso E Fapaneng . . . . .	cccliii
<b>KHAOLO EA 61—MOTHOANA EA FETOHILENG</b>	
<b>MOTHOHALI . . . . .</b>	<b>ccclv</b>
<b>KHAOLO EA 62—MARIA O TLOTSA JESU . . . . .</b>	<b>ccclviii</b>
Ke Hobaneng Ha Judase A Ile A Teneha . . . . .	ccclix
Maria O Ile A Mamela Tšusumetso Ea Moea O Halalelang	ccclxi
Judase O Tloha Mokateng Ho Ea Hlopha Tsa Ho Eka Jesu	ccclxii
Jesu O Ne A Hlile A Sa Amohelaha . . . . .	ccclxiii
Kamoo Molimo O Sebetsang Ka Teng . . . . .	ccclxiv
Kamoo Boiphahamiso Ba Simone Bo Ileng Ba	
Kokobetsoa . . . . .	ccclxv
<b>KHAOLO EA 63—JESU O ETSETSOA LITLATSE</b>	
<b>SEKA MORENA OA ISERAELE . . . . .</b>	<b>ccclxvii</b>
Ke Hobaneng Ha Jesu A Ile A Lumella Pontšo Ee . . .	ccclxviii
Ho Ne Ho Se Mokoloko Oa Ba Llang Tlhōlong Ena . . .	ccclxix
Jesu Oa Lla . . . . .	ccclxx
<b>KHAOLO EA 64—SECHABA SE EANG TIMELONG . . . . .</b>	<b>ccclxxiv</b>

Hobaneng Sefate Sena Se Ile Sa Rohakoa . . . . .	ccclxxvi
KHAOLO EA 65—TEMPELE E HLOEKISOA HAPE . . . . .	ccclxxix
Baprista Le Babusi Ba Ea Khutsisoa . . . . .	ccclxxxii
Lejoe La Mohlolo Le Emetseng Kreste . . . . .	ccclxxxiv
Kamoo Re Ka Hahuoang Ka Hore Re Tamukane . . . . .	ccclxxxvi
KHAOLO EA 66—KRESTE O TSIETSA LIRA	
TSA HAE . . . . .	ccclxxxviii
Tsoho Ea Bafu, Thuto E Bakileng Khang . . . . .	ccclxxxix
Maikutlo A Motho Ka Molimo A Bopa Semelo Sa	
Motho Ea Joalo . . . . .	cccxc
KHAOLO EA 67—JESU O ETELA TEMPELENG	
LEKHETLO LA HO QETELA . . . . .	cccxciv
Kabelo Ea Mosali Oa Mohlolohali E Theko E Thata . . . . .	cccxcvi
KHAOLO EA 68—BAGERIKE BA BATLA HO BONA JESU	cdii
Lentsoe La Molimo Lea Utloahala . . . . .	cdiv
KHAOLO EA 69—LIPONTŠO TSA HO TLA LA	
BOBELI HA KRESTE . . . . .	cdvii
Lilemo Tse Lefifi Tsa Litlhoriso . . . . .	cdix
Lipontšo Maholimong . . . . .	cdx
Bokhopo Bo Boholo Ba Matsatsi A Ho Qetela . . . . .	cdxi
Ntho E Ka Pheleloang . . . . .	cdxii
KHAOLO EA 70—KRESTE O IKAMAHANYA LE	
MAFUTSANA LE BA MATSOENYEHONG . . . . .	cdxv
Mokhoa Oa Ho Se Tsotelle Kreste . . . . .	cdxvii
KHAOLO EA 71—MOHLANKA OA BAHLANKA . . . . .	cdxix
Mohlolo O Moholo Oa Lipelo Tse Fetohileng . . . . .	cdxxi
Ke Hobaneng Kreste A Ileng A Qala Tsebeletso Ena	
Ea Borapeli . . . . .	cdxxii
KHAOLO EA 72—SELALLO SA MORENA SEA THŌOA	cdxxv
Mohlala Oa Kreste O Hanela Khethollo . . . . .	cdxxvii
Mabaka A Ho Keteka Selallo Sa Morena . . . . .	cdxxviii
KHAOLO EA 73—“LIPELO TSA LŌNA LI SE	
FEREKANE” . . . . .	cdxxxi
Tokelo E Makatsang Ea Thapelo . . . . .	cdxxxiii
Moea O Halalelang O Phethahatsa Mosebetsi Oa	
Kreste Ho Rōna . . . . .	cdxxxiv
Sepheo Se Seholo Sa Moea . . . . .	cdxxxv
Sebe Sa Petrose Se Epetsoeng . . . . .	cdxxxvii

<b>KHAOLO EA 74—NTOA E TŠOSANG GETHESEMANE</b>	<b>cdxlii</b>
Moleko O Tšabehang . . . . .	cdxliii
Jesu O Ne A Lapatse Kutloelo Bohlōkō Ea Botho . . . . .	cdxliv
Ha Boemo Ba Lefatše Bo Tetema Sekaleng . . . . .	cdxlv
Kamoo Thapelo Ea Kreste E Arabiloeng . . . . .	cdxlvi
<b>KHAOLO EA 75—JESU O QOSOA HO SA IPAPISOA</b>	
<b>LE MOLAO</b> . . . . .	<b>cdxlix</b>
Mangeloi A Ka Be A Lopolotse Kreste Ka Thabo . . . . .	cdli
Kaifa A Batla A Kholiseha . . . . .	cdliv
Ho Hloka T5ka Ha Qoso Ea Kreste . . . . .	cdlv
Petrose Oa Hlōloa . . . . .	cdlvi
Liteko Tse Matla Tsa Ho Tsoa Jesu . . . . .	cdlvii
<b>KHAOLO EA 76—KAMOO JUDASE A</b>	
<b>LAHLEHETSOENG KE MOEA OA HAE KATENG</b> .	<b>cdlix</b>
Ho Sebetsa Khahlanong Le Kreste . . . . .	cdlx
Monyetla Oa Judase Oa Ho Qetela Oa Ho Baka . . . . .	cdlxi
Mahlomola A Maholo A Pako Ea Judase . . . . .	cdlxiii
<b>KHAOLO EA 77—KRESTE O QOSOA KAPELE HO</b>	
‘MUSISI OA ROMA . . . . .	cdlxiv
Pilato A Lemoha Leqheka . . . . .	cdlxvi
Jesu O Leka Ho Pholosa Pilato . . . . .	cdlxvi
Ba Bang Ba Thōthōmela Pel’ a Jesu . . . . .	cdlxix
Monyetla Oa Ho Qetela Oa Pilato . . . . .	cdlxx
Pilato O Ne A Sa Hlokomele Se Tla Etsahala . . . . .	cdlxxi
Tumellano E Isang Tsenyehong . . . . .	cdlxxii
Mohau Oa Jesu Ho Pilato . . . . .	cdlxxiii
<b>KHAOLO EA 78—JESU A SHOA SEFAPANONG</b> . . . . .	<b>cdlxxvii</b>
Kahlōlo E Sepharanyana . . . . .	cdlxxviii
Mahlomola A ‘Mè Oa Kreste . . . . .	cdlxxix
Lesholu Le Le Leng Le Thakhisitsoeng La Lumela . . . . .	cdlxxxii
Boima Bo Tsabehang Boo Kreste A Bo Jereng . . . . .	cdlxxxiv
Monyetla Oa Ho Qetela Oa Ho Bontša	
Kutloelo-bohlōkō Ea Botho . . . . .	cdlxxxv
Jesu O Shoa A Hlotse . . . . .	cdlxxxvi
<b>KHAOLO EA 79—KAMOO LEFU LA KRESTE LE</b>	
<b>HLOTSENG SATANE</b> . . . . .	<b>cdlxxxvii</b>
Lefatše Ke Sethala, Leholimo Ke Phutheho . . . . .	cdlxxxviii
Tōka E Tsoakoa Le Mohau . . . . .	cdxc

Leshano La Satane “Le Lecha” . . . . .	cdxcii
<b>KHAOLO EA 80—JESU O PHOMOLA LEBITLENG</b>	
<b>LA JOSEFA</b> . . . . .	cdxciii
Ho Nyahama Ha Barutuo . . . . .	cdxcv
Ba Fumana Thuso Moo Ba Sa Lebellang . . . . .	cdxcvi
Ba Bangata Ba Ithuta Bibebe . . . . .	cdxcvii
<b>KHAOLO EA 81—MORENA O TSOHILE</b> . . . . .	di
Kaiafa A Ba Susumetsa Ho Bua Leshano . . . . .	dii
Bopaki Ba Hore Le R5na Re Tla Tsoha . . . . .	diii
Ba Bangata Ba Ile Ba Tsosoa Le Jesu . . . . .	diii
<b>KHAOLO EA 82—“MOSALI, U LLELANG NA?”</b> . . . . .	dv
<b>KHAOLO EA 83—LEETO LA HO EA EMMAUSE</b> . . . . .	dix
Jesu O Hlalosa Mangolo Hona Hoo . . . . .	dx
Pelo Tsa Bona Tsa Hoheloa Ke Motho Enoa Eo Ba Sa Mo Tsebeng . . . . .	dxii
<b>KHAOLO EA 84—KRESTE EA TSOHILENG O</b>	
<b>ITLHAHISA HO BŌNA</b> . . . . .	dxiii
Re Tla Tseba Baratuo Ba Rona . . . . .	dxiv
Ke Molimo Feela O Ka Tsoarelang . . . . .	dxv
<b>KHAOLO EA 85—LEBŌPONG LA LEOATLE HANG</b>	
<b>HAPE</b> . . . . .	dxvii
Petrose O Boetse A Khothatsoa . . . . .	dxviii
Kreste O Mo Bolella Mokhoa Oo A Tla Shoa Ka ‘Ona . . .	dxix
<b>KHAOLO EA 86—E-EANG LE RUTE LICHABA</b>	
<b>TSOHLE</b> . . . . .	dxixiii
Moea O Halalelang O Atlehisa Mosebetsi Oa Bona . . . . .	dxixv
Moo Re Ka Qalang Teng . . . . .	dxixvi
Melao Ea Bophelo Bo Botle Ke Karolo Ea Molaetsa O Molemo . . . . .	dxixvii
<b>KHAOLO EA 87—KRESTE O KENA LEHOLIMONG</b>	
<b>KA TLHŌLO</b> . . . . .	dxixx
o Amoheloa Ke Makoloi A Mangeloi . . . . .	dxixxi
Tsabo E Ne E Felile . . . . .	dxixxii

## KHAOLO EA 1—KRESTE PELE A E-TLA LEFATŠENG

Ho tloha mengoaheng e sa qaleng Morena Jesu Krete e ne e le Eena ea neng A e-na le Ntate; E ne e le Eena setšoantšo sa Molimo, Eena ea neng A khanya ka ho fetisisa ka khalalelo ea Hae. O tlile lefatšeng le silafalitsong ke sebe ho pepesa khanya le ho senola leseli la lerato la Molimo. E, ho ile ha porofetoa ka Eena, “O tla reoa lebitso la Emmanuele,...Molimo o na le rōna.” Matheu 1:23 le Esaea 7:14.

Jesu e ne e le “Lentsoe la Molimo” - e le Mohopolo oa Molimo O tsebahalitsoeng. Tsenolo ena ea mohopolo oa Molimo ha ea ka ea fuoa bana ba Hae feela ba hlahetseng lefatšeng. Lefatšenyana la rōna ke buka e baloang ea mafatše le maholimo. Bohle ba pholositsoeng le ba sa oelang sebeng ba tla fumana bohla le pina ea bōna sefapanong sa Krete. Ba tla bona hore khalalelo e khanyang sefahlehong sa Jesu ke khanya ea boitelo, ea sehlabelo sa lerato. Ba tla bona hore molao oa bophelo oa lefatše le leholimo, ke molao o pakang boitelo ba ‘nete bo senolang lerato la Molimo. Lerato le sa “ikhopoleleng,” le tsoa mohloling oa pelo e lerato ea Molimo, ‘me le bontšitsoe ho Jesu, Eena ea bonolo, ea ikokobelitseng.

Tsimolohong, Krete O ile A bopa lefatše. Ka letsoho la Hae le matla, A leketlisa mafatše sepakapakeng, ‘me A etsa lipalesa tsa naha. A tlatša lefatše ka botle, ‘me moea oa tlatsoa ka pina. Sheba Lipesalema 65:6; 95:5. Ka holim’a tsohle A ngola molaetsa oa lerato la Ntat’ae.

Eaba sebe se silafatsa mosebetsi o motle oa Molimo, empa mongolo o ngotsoeng ona o ntse o setse. Ke pelo e mano ea motho feela e iphelelang bo-eona. Sefate se seng le se seng le sehlahla, le makhasi, li fana ka boleng ba bophelo boo ho seng motho le ha e le phoofolo e ka phelang ntle le bōna. Ka mokhoa o tšoanang motho le phoofolo ba phelela ho thusa lifate, lihlahla le makhasi. Leoatle le fumana metsi melatsoaneng e tsoang masimong, empa le amohela hore le tie le fane. Le moholi o nyolohang, o tsoang leoatleng, o etsa

[12]

mafafatsane a noesetsang lefatše, le tie le tsebe ho thusa litholoana ho mela, le etse lipalesa. Mangeloi a khanyang a fumana thabo ka ho fana. A tlisa khanya e tsoang leholimong, ‘me a fofa holim’a moea oa motho ho tlisa ba lahlehileng kopanong-’moho le Kreste.

Empa ha re furalla litšoantšiso tse tlase re bona Molimo ho Jesu. Re ea bona hore ke tlōtla ea Molimo ho fana. “‘Na ha ke ipatle tlōtla,’” ho rialo Kreste.” Johanne 8:50; 7:18. Kreste O ile A amohela ho Molimo, e le hore A tie A tsebe ho fana. Bohle re fumana bophelo bo tsoang ho Ntate ka Mora; Ka Mora bophelo bōna bo khutlela ho Mofani bo le joaloka tšebeletso ea lerato, e tlang joaleka leqhubu le khutlelang moo le qalileng teng. Ho joalo, ka Kreste selika-likoe sa melemo ea Molimo sea phetheha.

### **Molao Ona O Ile Oa Rojoa Leholimong**

Sebe se qalile ka boipatlo. Lucifera, eo e neng e le lengeloi le okametseng areka ea Molimo, la qala ho ba le takatso ea hore e be eena ea moholo leholimong. A qala ho leka ho hohella mangeloi a leholimo hole le ‘Mopi oa bōna, ‘me a ikhapele hlompho. A leka ho etsa hore libōpeho tsa hae tse litšila eke ke tsa ‘Mopi ‘me a hohella mangeloi hore a belaelle lentsoe la Molimo, ‘me a be a hloke tšepo ho lokeng ha Molimo. Satane a susumetsa hore ba bone Molimo e le motho ea bohale, ea se nang tšoarelo. Ka tsela ena a thetsa mangeloi. Ka eona tsela eo a thetsa batho ‘me lefifi la bosoto la lula holim’a lefatše.

Lefatše la e ba lefifing ke ho se utloisise Molimo. Hore lefatše le tie le khutlele ho Molimo hape, matla a mashano a Satane a tlameha hore a thuhoe. Ketso ena e ne e ke ke ea etsoa ka likhoka. Molimo O batla tšebeletšo ea lerato, ‘me lerato le ke ke la hapuo ka matla kapa ka borena. Ke ka lerato feela lerato le ka tsosolosoang. Ho tseba Molimo ke ho Mo rata; semelo sa Molimo se tlamehile ho totobatsoa se le khahlanong le sa Satane. Semelo sa Molimo se ka senoloa ke Motho a le mong feela. Ke Ea tsebang bophahamo le botebo ba lerato la Molimo.

[13]

Leano la topollo ea rōna ha lea ka la thehoa kamora’ hore Adama a etse sebe. E ne e le tšenolo ea “sephiri se neng se patehile ho tloha tšimolohong.” Baroma 16:25. E ne e le ho manolla tsamaiso ea ho tloha mengoaheng e sa baloeng eo e saleng e le mothèo oa terone ea

Molimo. Molimo O ile oa bona e sa le pele hore sebe se tla ba teng, ‘me A etsa leano la topollo, hore ha kotsi ea sebe e fihla, e fumane ho se ho e-na le leano la topollo le tla khahlametsa tlokotsi eo. Molimo Oa etsa selekane hore O tla fana ka Mor’a Oona ea inotsi, “hore e mong le e mong ea lumelang ho eena, a se ke a timela, a mpe a be le bophelo bo sa feleng.” Johanne 3:16.

Lucifera o ne a itse, “Ke tla nyolohela leholimong, ke phahamise terone ea ka, ke e phahamisetse kaholimo ho linaledi tsa Molimo,...ke itekanye le Ea Phahametseng tsohle.” Empa Krete, “Eena o ne a e-na le boleng ba Molimo,...empa o ile a iketsa lefeela, a inkela boleng ba lekhoba, a tšoana le batho, a phela joaloka motho.” Esaea 14:13,14; Bafilipi 2:6,7.

### Sehlabelo Sa Boithaopo

Jesu A ka be A ile A ipolokela khanya ea leholimo. Empa O ile A ikhethela ho theohela tlase, A theoha terone ea maholimo le mafatše, hore A tl’o fana ka bophelo ho ba timelang.

Khale koana, lilemong tse ka bang likete tse peli tse fetileng, lentsoe le ile la utloahala leholimong le re, “Sehlabelo le nyehelo ha u li batle, feela u ntōkiselitse ‘mele....Bona, ke ‘na enoa, eo ho ngotsoeng ka eena bukeng ea Molao. Ke tlile, Molimo, ho phetha thato ea hao.” Baheberu 10:5-7. Krete O ne A se A le haufi le ho tla lefatšeng la rōna, ho tla nka boleng ba motho. Hoja ebe Krete O ile A hlaha lefatšeng ka khanya ea Hae eo A neng A ena le eona pele lefatše le theoa, re ka be re sa ka ra mamella khanya ea boleng ba Hae. Ele hore re tie re tsebe ho boha khanya eo, ‘me re se shoe, khanya eo ea Hae e ile ea tširoa, bo-Molimo ba Hae ba tšireloa ke botho boo A ileng A bo nka.

Leano lena le leholo le ne le ile la tšoantšoa ka mekhoha le lipa-piso. Sehlahla se tukang, seo Krete A ileng A hlaha ho sona ha A buoa le Moshe, se ne se senola Molimo. Ea-sa-feleng A ikoahela ka sehlahla se fokolang, se neng se sena ho hohela mang kapa mang. Molimo O ile A koahela khanya ea Hae hore Moshe a tle a tsebe ho e sheba empa a ‘ne a phele. Hape ka leru motšoare, le mollo bosiu khanya ea Molimo e ile ea tšireloa hore batho ba fokolang ba tle ba tsebe ho e talima. Ka mokhoa o joalo Krete O ne A tšoanetse ho tla, “a tšoana le batho.” E ne e le Molimo O apereng boleng ba

[14]

botho empa khanya ea Hae ea tširoa hore A tle A tsebe ho atamela ho batho ba mahlomoleng, ba litekong.

Ha Baiseraele ba ntse ba lelera lehoatateng, ba khathetse, sehalelelo, eleng pontšo ea boteng ba Molimo, se ne se le har'a bōna. Sheba Phallo 25:8. Krete O ile A hloma tente ea Hae mabapi le litente tsa batho, hore A tle A tsebe ho re tloetsa semelo sa Hae se halalelang le bophelo ba Hae bo halalelang. "Lentsoe ea e-ba motho, le aha har'a rōna, 'me ra bona tlōtla ea Iona, e tletseng mohau le 'nete, tlōtla e kang eo Mora ea tsoetsoeng a 'notši a e fumaneng ho Ntate." Johanne 1:14.

Erekaha Jesu A tlile ho tla lula le rōna, mora le morali e mong le e mong oa Adama a ka utloisisa hore 'Mopi oa rōna ke motsoalle oa baetsalibe. Ho sohle sa boMolimo se hohelang bophelong ba Mopholosi mona lefatšeng, re bona Molimo O e-na le rōna.

Satane o etsa hore molao oa Molimo oa lerato o hlahe eka o tletse boithati. O re ho thata ho rōna hore re ka bōlōka litaelo tsa Molimo. O re ho oa ha batsoali ba rōna ba pele Edene ke molato oa Molimo, 'me o etsa hore batho ba shebe Molimo e le Eena ea qalileng sebe, le bohlokō le lefu. Jesu O ne A tšoanela ho hlakola leshano leo la Satane. O ne A lokela hore e be e mong oa rōna 'me boemong boo A fane ka mohlala oa ho mamela. E le hore A tie A etse hona A lokela ho nka sebōpeho sa rōna, 'me A feta har'a maiphihlelo a rōna. "Kahoo o ne a tšoanetse ho etsoa ea tšoanang le bana babo kahohle." Baheberu 2:17. Haeba re ne re tšoanetse ho mamella ntho e 'ngoe eo Jesu A sa kang A e mamella, Satane o ne a tla re matla a Molimo ha a re lekane. Kahoo Jesu O ile a lekoa ka [15] litsela tsohle joaloka rōna. Baheberu 4:15. O ile A mamella liteko tsohle tseo le rona re leng tlas'a tsona. Ha A ka A itšebelisetsa matla ao le rona re ke keng ra a fuoa. O ile A thulana le liteko e le motho, 'me O ile A hlōla ka matla ao A ileng A a fuoa ke Molimo. O ile A totobatsa semelo sa molao oa Molimo, 'me ka bophelo ba Hae O ile A paka hore ho bonolo hore re bōlōke molao oa Molimo.

Ka botho ba Hae, Krete O ile A ama motho, ka boMolimo ba Hae, A tšoara terone ea Molimo. Joaloka mor'a motho, O re file mohlala oa ho mamela taelo. Joaloka Mora oa Molimo A re fa matla a hore re mamele. O re ho rona, "Ke neiloe matla 'ohle leholimong le lefatšeng." Matheu 28:18. Boqosa bo reng, "Molimo o na le rona,"



ke tiiso ea hore re lopolotsoe sebeng, tiiso ea hore re fuoe matla a ho bōlōka molao oa leholimo.

Kreste O senotse semelo se fapaneng le sa Satane. “A tšoana le batho, a phela joaloka motho. O ile a inyeneyefatsa, ea e-ba ea mamelang ho isa lefung, le hona lefu la sefapano.” Bafilipi 2:7,8. Kreste O ile A nka sebōpeho sa bohlanga, ‘me A iketsa sehlabelo, Eena moprista, Eena ea beiloeng nku ea sehlabelo. “A tetetsoa ka baka la libe tsa rōna, kotlo e re tlišetsang khotso ea mo oela holimo.” Esaea 53:5.

### A Tšoaroa Ka Tsela E Tsoanetseng Rona

Kreste O ile A tšoaroa ka tsela e tsoanetseng rōna, e le hore re tie re tšoaroe ka tsela e tšoanelang Eena. O ile A tsuo a ka lebaka la libe tsa rōna, tseo A neng A sa ka A li etsa, e le hore re tle re beoe ba lokileng ka ho loka ha Hae, empa re ne re se na kabelo ho lokeng. A utloa bohlokō ka lefu leo e neng e lokela ho ba la rōna, e le hore re tie re fumane bophelo boo e neng e le ba Hae. “Ra folisoa ke maqeba a hae.” Esaea 53:5.

E ne e le mano a Satane ho arohanya Molimo le motho ka ho sa feleng; empa hoba Mopholosi A nke sebōpeho sa rōna, A itlamahanya le batho ka senyepa se ke keng sa khaoha. “Hobane Molimo o ratile lefatše hoo a le neileng Mora oa hae ea tsoetsoeng a ‘notsi.” Johanne 3:16. A fana ka Eena eseng feela ho tla re shoela e le sehlabelo sa rona; O fane ka Eena hore E be E mong oa lelapa la [16] botho, ka ho sa feleng, A nkile tlhaho ea botho ka ho sa feleng.

“Rōna re tsoaletsoe Ngoana, rona re filoe Mora, puso e tla ba mahetleng a hae.” Molimo O ile A nka tlhaho ea botho ka Mor’a Hae; ‘me A nkela tlhaho eo maholimong a holimo-limo. “Mor’a Motho” O tla bitsoa, “Ralimakatso le Moeletsi, Molimo ea matla, Rabosafeleng, Khosana ea Khotso.” Esaea 9:6. Eena “ea halalelang, ea se nang bobele leha e le sekoli, ea sa amaneng le baetsalibe,” ha A na lihlong ho re bitsa baena. Baheberu 7:26; 2:11. Leholimo ke lena le khurumelitsoe ka botho, ‘me botho bo sikiloe sefubeng sa Molimo O lerato!

Ho phahamisoa ha ba lopolotsoeng e tla ba bopaki bo sa feleng ba mohau oa Molimo. “Mehle e tlang” O tla “bonahatsa mohau oa hae o moholo ka ho fetisisa, ka mosa oo a re etselitseng oona

ho Krete Jesu” le hore, “bohlale ba Molimo ka mefuta eohle” bo tla tsebahala ho “mee a e busang, le e laolang sephiri.” Baefese 2:7; 3:10.

Ka mosebetsi oa Krete ‘muso oa Molimo o lutse o sireletsehile ka tōka. Ea-matla-ohle O tsebahatsoa e le Molimo oa lerato. Liqoso tsa Satane li shanofalitsoe le semelo sa hae se pepesitsoe. Sebe se ke ke sa hlōla se kena maholimong le lefatšeng. Ka mengoaha ea bo sa feleng bohle re tla be re tširelelitsoe bokoenehing. Ka lerato la boitelo leholimo le lefatše li tlamahantsoe le ‘Mopi ka ketane e ke keng ea khaoha le khale!

Moo sebe se neng se atile, mohau oa Molimo o atile ka ho fetisisa. Lefatše leo Satane a neng a le phatlalalitse e le la hae, le tla beoa kaholimo-limo ho tsohle tse hioliloeng. Ke hona mona moo Morena oa khanya A ileng A phela, A ba A utloisoa bohlōkō, A ba A shoella teng; hona mona ke moo leaho la Molimo le tla aha har’a batho “me Molimo ka sebele a be le bona, e le Molimo oa bona.” Tsenolo 21:3. Ho isa mehleng e sa baloeng ba pholositsoeng ba tla rorisa Molimo ka mphohali ena e kholohali eleng -Emmanuele, “Molimo o na le rona.”

## KHAOLO EA 2—BATHO BA NENG BA TŠOANELA HORE EBE BA MO AMOHETSE

[17]

Bajuda ha esale ba leta ho tla ha Mopholosi nako e fetang lilemo tse sekete. Empa ho fihleng ha Hae ha ba ka ba Mo tseba. Ha ba ka ba boha botle ho Eena, hore ba tie ba khahloe ke Eena. Sheba Esaea 53:2. “Le ne le tlile hahabo Iona, empa ba habo Iona ha baa ka ba le amohela.” Johanne 1:11.

Molimo O ile Oa khetha Iseraele ho bōlōkela lefatše lipontšo le boporofeta bo supang pele ho Mopholosi, e tle ebe liliba tsa topollo ho lefatše. Baheberu ba ne ba lokela ho ba sechaba se tlang ho senola Molimo ho lichaba. Ha A bitsa Aborahama, Morena O ile A re, “Ka uena lichaba tsohle tsa lefatše li tla hlohonolofatsoa.” Tšimoloho 12:3. Morena A phatlalatsa ka Esaea “hobane ntlo ea ka e tla bitsoa ntlo ea thapelo, ea lichaba tsohle.” Esaea 56:7

Empa Iseraele a tsepamisa tšepo eohle ea hae holim’a botumo ba lefatše, ‘me a latela litsela tsa bohedene. Ha ho a thusa letho leha Molimo O ile Oa romella molaetsa oa tlhokomeliso ka baporofeta ba Hae; leha A se A bile A ba shapa ka hore ba sotloe ke bahedene. Tsosoloso e ‘ngoe le e ‘ngoe e ile ea lateloa ke bokoenehi bo tebileng ho feta.

Hoja e be Iseraele o ile a tšepahala ho Molimo, a ka be a ba entse hore ka “thoriso, le ka botumo, le ka hlomphe, o tla le phahamisetsa kaholimo ho lichaba tsohle tseo a li bōpileng.” “Mahlong a lichaba tse tla utloa melao ena eohle, ‘me li re: ‘Ruri sechaba sena se seholo ke sechaba se bohlae, se nang le kutloisiso.” Lipolelo 26:19; 4:6.

Empa ka ho se tsepahale ha bona, leano la Molimo le tsebile ho phethoa; feela tlas’a maemo a thata le matšoenyeho. Ba ile ba tlisoa Babilona, ‘me ba hasana le linaha tsa bahedene. Eare ho Ileng ha bona, ha ba llela tempele e halalelang e entsoeng lithako, ka bona tsebo ea Molimo ea phatlalla ho lichaba. Tsela eo bahedene ba neng ba etsa litšebeletso tsa bona tsa mahlabelo, e ne e le mokhoa oo Molimo A ileng A o khetha, feela o se o etsoa ka mokhoa o fetellelitsoeng ke bahedene. Eaba bongata bo ithuta moelelo oa

[18]

‘nete oa litšebeletso tse halalelang tsa Molimo ho Baheberu bana, ‘me ka tumelo ba itsoarella litšepisong tsa Mopholosi.

Batšoaruoa ba bangata ba ile ba lahlehelo a bona hobane ba ile ba hana ho roba Sabatha, leha e le ho bōlōka mekete ea bohedene. Eare ha bakhumameli ba melimo ea litšoantšo ba phahama ho ripitla ‘nete, Morena A tlisa bahlanka ba Hae pel’a marena le babusi, hore marena ana hammoho le batho ba ona a tle a fumane leseli. Marena a maholohali a qetella a rōka Molimo O neng o khumameloa ke batšoaruoa ba bona ba Baheberu.

Lilemong tse makholo tse latelang nako ea bokhoba ba Babilona, Baiseraele ba ile ba phekoeha borapeling ba melimo e betliloeng, ‘me matsoalo a bona a ba kholisa hore ba tsepamise katleho ea bona hore e itsetlehile feela ha ba mamela molao oa Molimo. Empa ba bangata ba ne ba sebeletsa Molimo tlas’a maikutlo a boikaketsi ba lefeela. Ba ne ba etsa litšebeletso tsa Molimo e le feela hore chaba sa habo bona se hlomphehe. Ha ba ka ba eba leseli la lefatše, empa ba itšeka thajana ka morero oa ho baleha meleko. Molimo O ne O ba thibetse ho ikopanya le barapeli ba litšoantšo e le hore ba se ikamahanye le liketso tsa bahedene. Empa lithuto tsena li ile tsa tolokoa ka mokhoa o sele. Li ile tsa sebelisoa e le ho haha lerako pakeng tsa Baiseraele le lichaba tse ling. Haele hantle Bajuda ba ne ba le mōna ba re esere Molimo oa hauhela le bona Balichaba

### **Tsela Eo Ba Ileng Ba Mpefatsa Litšebeletso Tsa Sehalalelo**

[19] Eitse hoba Baiseraele ba khutle Babilona, ba haha matlo a thapelo, hohle kahar’a naha, eleng moo baprista le bangoli ba neng ba hlalosa molao. Hone hothoe likolo li ruta melao ea ho loka. Leha hole joalo, nakong eo Iseraele a leng kholehong, batho ba bangata ba ne ba se ba antse mekhoha ea bohedene, ‘me mekhoha ena e ne e se e kenelletse har’a litšebeletso tsa bolumeli tsa Bajuda.

Litšebeletso tsa mahlabelo li ile tsa theoa ke Krete ka boEena. Litšebeletso tsena li ne li e-na le botle ba borapeli le matla a Moea. Empa Bajuda ba lahlehelo ke bophelo ba Moea bo neng bo reretsoe litšebeletso tsa bona, ‘me ba tšepa mahlabelo le melaoana ea bona, ho e-na le ho sheba eo litšebeletso tseo li neng li supa ho Eena. Ho tlatsetsa ho se ba lahlehetseng, baprista le baruti ba phaella litšebeletso tse ling hape tseo ba iqapatsena tsona. Eare ha ba ntse

~~ba thatafala, eaba lerato la bona ho Molimo le ea le ntse le qepha, le ho bonahala la se ke la hlōla le bonahala.~~

Ba neng ba leka ho bōlōka melao eo ea bona e boimahali, e thata ho bōlōkoa, ha ba ka ba fumanela matsoalo a bona a khathatsehileng phomolo. Ka tsela ena Satane a sebelletsa ho nyahamisa batho, ho etsa hore ba be le kutloisiso e sa nepahalang ka Molimo, le hore tumelo ea chaba sa Iseraele e tellehe. O ne a tšepile hore o tla haha leqheka le bontšang hore melao ea Molimo ha ho motho ea ka tsebang ho e bōlōka. O bile a bua a re, “Esita le Iseraele e hlōtsoe ho bōlōka molao.”

### **Ba Lebella Mesia Eo Eseng Eena**

Bajuda ba ne ba sena tsebo ea ‘nete ea hore na boromuoa ba Mesia ke bofeng. Ba ne ba sa lebella topollo sebeng, empa ba ne ba lebelletse ho ntšuo bokhobeng ba Baroma. Ba ne ba lebeletse Mesia ea tla phahamisa Iseraele hore e buse lefatše ka kakaretso. Ntho ena ea etsa hore Mopholosi A tie A hanoe.

Nakong eo Krete A hlahang sechaba se ne se le tlas’a puso ea melata ‘me ho ne ho se na botsitso nakong eo ka lebaka la qhobeshano kahar’a sechaba.

Moprsta e moholo o ne a khethoa le ho theloa setulong ke Baroma, ‘me setulo sa moprista se ne se fumanoa ka tjo tjo le ka ho bolaeana. Kahoo boprsta ba ‘na ba khohlahala. Batho ba ne ba le tlas’a bobusi bo se nang mohau, ebile ba khafisoa haholo ke Baroma. Ho ne ho atile ho se khotsofale, meharo, lintoa, bōlōtsana, ‘me sechaba se ne felloa ke lipelo ke ho nyahama.

Lefifing le mathateng a khatello ao batho ba neng ba le har’a ona, ba laba-labela ho fumana motho ea tla khutlisetsa muso oa Iseraele malulong. Ba ne ba ithuta boporofeta, empa ba ne ba se na kutloisiso ea Moea. Ka baka lena ba toloka boporofeta ka tsela e khotsofatsang maikutlo, a bona a tletseng boipatlo.

[21] **KHAOLO EA 3—SEBE SA MOTHO HA NAKO LI  
PHETHEHILE**

Mohla Adama le Eva ba neng ba qala ho utloa tšepiso ea Mopholosi ea tlang, ba ne ba lebelletse phethahalo e potlakileng ea ho tla ha Hae. Ba amohela mor'a bona oa letsibolo ka tšepo ea hore ke Eena eo e leng Mopholosi. Empa bao ba ileng ba fumana tšepiso pele ba ile ba shoa ba sa ka ba bona e phethahala. Tšepiso e ile ea 'na ea phetoa ke bapatariareka le boporofeta ba ntse ba tsosolosa tšepo ea ho tla ha Hae, empa ha A ka A tla. Boporofeta ba Daniele ba fana ka nako ea ho tla ha Hae, empa hase bohle ba ileng ba bo hlalosa ka nepo. Makholo-khoho a mengoaha a feta, letsoho la batlatlapi la 'na la e ba boima holim'a Iseraele, 'me bongata bo ne bo ka bua ba re, "Matsatsi aa lelefala, pono e 'ngoe le e 'ngoe e fetoha lefeela." Ezekile 12:22.

Joaloka linaleli tse sepakapakeng tse entseng selikalikoe, tse khethetsoeng tsela ea tsona, leano la Molimo ha le potlake kapa hona ho lieha. Lekhotleng la leholimong, nako ea ho tla ha Krete e ne e se e lumellano. Ha nako e fihla, Jesu A hlahela Betlelehema.

"Empa ha nako e baliloeng e se e fihlile, Molimo o ile a rōma Mora oa hae." Bagalata 4:4. Lefatse le ne le loketse ho tla ha Mopholosi. Lichaba li ne li kopane, 'me li le ka tlas'a puso e le 'ngoe. Puo e le 'ngoe e ne e le eona e buuoang hohle. Bajuda ba ne ba phuthehela Jerusalema ho ea keteka mekete ea selemo le selemo ba hlaha linaheng tseo ba hasaneng har'a tsona. Ha ba khutlela mahae, ba etsoa maketeng ena, ba ne ba tla phatlalatsa lefatšeng ho fihla ha Mesia.

[22] Litšebeletso tsa bohedene li ne li se li sa hohele batho. Batho ba ne ba laba-labela bolumeli bo tla khotsofatsa lipelo. Batho ba ne ba batla leseli, ba ne ba nyorotsoe tsebo ea Molimo o phelang, ba batla se ka ba kholisang hore ho na le bophelo ka nq'ane ho lebitla.

## Ba Bangata Ba Ne Ba Laba-labela Mopholosi

Tumelo ea Bajuda e ne e se e fifetse, ho se ho se tšepo e bonesang bokamoso. Ho ba bangata lefu e ne e le sephiri se tšabehang; ka nq'ane ho lebitla ho ne ho se na tšepo, 'me ho le hotšo! Batho ba lutse bolutung le nqalong ea lefu. Ba lebeletse ka tlholohelo ea tlang ho ba lopolla mohla sephiri sa bokamoso se tla pepesoa.

Kantle ho sechaba sa Bajuda ho ne ho e-na le batho ba batlang 'nete, 'me ba ile ba fua tsosoloso ea Moea. Mantsoe a bona a boporofeta a ile a hotetsa tšepo lipelong tsa likete lefatšeng la Balichaba.

E ne e se e le makholo a lilemo Mangolo a halalelang a ne a fetoleloe puong ea Segerike, eo e neng e le puo e buuoang hohle nakong ea puso ea Roma. Bajuda ba ne ba qhalakane hohle, 'me tebello ea bona ea ho tla ha Mesia, e ile ea tsebahala ho Balichaba. Har'a batho bao Bajuda ba neng ba re ke bahedene ho ne ho e-na le banna ba utloisisang Mangolo a buang ka boporofeta ba Mesia ho feta baruti ba Iseraele.

Ba bang ba neng ba lebeletse ho tla ha Hae e le Mopholosi ea ba lopollang sebeng, ba leka ho ithuta sephiri sa bophelo ba Baheberu. Empa Bajuda, kaha ba ne ba rata ho ipoloka ba arohane le lichaba tse ling, ba ne ba sa rate ho arolelana tsebo eo ba neng ba e-na le eona ka litšebeletso tse supang pele ho Mesia. Mohlalosi oa 'nete, Eena eo litšebetso tsena li neng li supa Eena, A tšoanela ho tla, 'me A tlo hlalosa moelelo oa tsona. Lithuto tsa tšoanela ho neoa batho ka puo ea batho. Krete A lokela ho tla bua mantsoe ao batho ba tlang ho A utloisisa, 'me A arole 'nete ho 'mōko o e sitisitseng ho ba le molemo oa letho.

Har'a Bajuda ho ne ho sa na le ba bang ba tiileng ba ntseng ba bolokile tsebo ea nete ea Molimo. Bana ba ile ba tiisa tumelo ea bona ka ho lula tšepisong e fanoeng ke Moshe e reng, "Har'a bana babo Iona, o tla le hlahisetsa Moporofeta ea kang 'na. Le tle le mo mamele linthong tsohle tseo a tla li bua ho Iona." Liketso 3:22. Ba ile ba bala, ba utloa kamoo Morena A tla tlotsa E mong hore A tle A bolelle ba malimabe taba tse molemo, "ho bolella mafutsana, molaetsa o molemo. O nthōmetse ho thoba pelo tsa ba soabileng, ho phatlalletsa bathōpuoa tsa tokoloho le hore ba chankaneng ba tla lokolloa; ho phatlalatsa selelmo sa Morena, lemo sa mehauhelo."

Esaea 61:1,2. O ne A tla beha ho loka lefatšeng, ‘me lihlekehleke li ne li tla tšepa molao oa Hae. Sheba Esaea 42:4. Lichaba li ne li tla tsamaea leseling la Hae, ‘me marena a tie khanyeng ea mahlaseli a Hae. Sheba Esaea 60:3.

Mantsoe a Jakobo nakong ea ho shoa ha hae a ile a ba tlatsa tšepo ha a re, “Lere la bokhosi le ke ke la tloha ho Juda, le lere la bolaoli ho litlōhōlō tsa hae, ho fihlela mong’a lona a fihla.” Tsimoloho 49:10. Ho qepha ha matla a Iseraele ho ne ho bontša hore ho tla ha Mesia ho haufi. Kahohle ho ne ho lebelletsoe khosana e matla e tla theha ‘muso oa eona Iseraeleng ‘me e lopolle Iseraele bokhobeng.

### **Tsela Eo Ka Eona Satane A Batlileng A Atleha**

Nako e baliloeng e ne e fihlile. Botho, boo ka lilemolemo bo neng bo theohetse tlase-tlase, bo ne bo hloka hore Mopholosi A tle. Satane o ne a entse hore khohlo e be e tebileng, e ke keng ea tšelo a lipakeng tsa lefatše le leholimo. A etsa hore batho ba betefale sebeng. E ne e le leano la hae hore Molimo O tle O fellowe ke mamello, ebe O tlohella lefatše tsamaisong ea Satane.

Teko ea Satane ea ho ba ‘mampoli e ne eka e tla hle e atlehe. Ke nete hore molokong o mong le o mong, esitana le ho bahedene, ho ‘nile ha eba le batho bao Kreste A neng A sebetsa ka bona ho nyolla ba bang sebeng. Empa batho bana ba ne ba hlouoe. Bongata bo ile ba shoa sehlōhō. Moriti o motšo oo Satane a okametseng lefatše ka ona oa ‘na oa eketseha ka botšo ba ona.

Moo Satane a ileng a nka sekola sa tlhōlo ke ha a senya tumelo ea Baiseraele. Bahedene ba ne ba se ba sa tsebe Molimo, ‘me ba ntse ba silafala ho ea pele. Ha eba joalo le ho Iseraele. Taba e reng motho a ka ipholosa ka mesebetsi ea hae ke mothèo oa tumelo tsohle tsa bohedene, ‘me e ne e se e le karolo ea bolumeli ba Bajuda.

[24] Bajuda ba thetsa lefatše ka ho le nea evangeli esele. Ba ile ba hana ho inehela ho Molimo hore ba tle ba pholose lefatše; eaba joale ba fetoha ba sebetsang le Satane ho le timetsa. Batho bao Molimo O ileng oa ba bitsa hore e be litšiea le mothèo oa ‘nete, ba ne ba etsa mesebetsi o batloang ke Satane, ba hlahisa semelo sa Molimo hampe, ‘me ba etsa hore lefatše le shebe Molimo e le motlatlapi. Baprista ka tempeleng ba ile ba lahlehelo ke moelelo oa litšebeletso tseo ba neng ba li etsa. Ba ne ba etsa ketso ea papali. Litšebeletso



tseo Molimo O li entseng tsa fetoha tsela ea ho fifatsa menahano le ho thatafatsa pelo. Mecha ena Molimo O ne O se O ke ke oa e sebelisa ho fihlela batho ka eona.

### Molimo O Utloela Lefatše Le Timelang Bohlōkō

Lisebelisuo a tsohle tsa diabolosi li ne li phathahane. Mora oa Molimo A sheba lefatše ka kutloelo-bohlōkō. A bona kamoo batho ba tšoasitsoeng lerabeng la Satane la bokhopo. Ka pherekano le thetso, ba ne ba tsamaea tseleng e lefifi, e isang lefung moo ho se nang tšepo ea bophelo, ba ferekane, ba thetsehile; ba kene botšong bo senang leseli.

‘Mele ea batho e ne e fetohile liahelo tsa bademona. Menahano, methapo-kutlo, le litho tsa ‘mele ea batho li ne li sebelisoa ke meea e bōlōtsana ho ikhotsofatsa litakatsong tse litšila-tšila. Setempe sa bademona se ne se bonahala lifahlehong tsa batho! A pono e tšabehang eo Mopholosi oa lefatše A ileng A e bona!

Sebe se ne se fetohile tsela ea ho phela; bokhopo e le eona tumelo. Botloko-tsebe le manganga li loantsana le leholimo. Mafatše a sa oelang sebeng a ne a talimile ho bona ha Molimo A fiella libōpuoa tsa lefatše koana! Empa haeba a ka etsa joalo, Satane o ne a tla leka ho ipokellela batšehetsi makhotleng a leholimo. O ne a se a ile a re melao ea ‘Muso oa Molimo ha e lumelle tšoarello ho etsahala. Hoja e be lefatše le ne le ka la ritloa, Satane a ka be a ile a beha Molimo molato eaba o tlatse bofetoheli ba hae mafatšeng a sa kang a oela sebeng.

Empa ho e-na le ho timetsa lefatše, Molimo A rōmela Mor’a Hae ho le pholosa. A fana ka tsela ea ho le lopolla. “Ha nako e baliloeng e se e fihlile,” bo-Molimo ba tšela holim’a lefatše khapu-khapu ea mohau o folisang, o ke keng oa sitisoa, kapa oa tlosoa ho fihlela leano la topollo le ka phethahatsoa. Jesu O tšile ho khutlisetsa motho setšoantsong sa ‘Mopi oa Hae, le ho tebela bademona ba neng ba se ba laola thato ea motho, ho re phahamisa leroleng, le ho betla bocha semelo se ileng sa senngoa hore se boele se tšoane le semelo sa Molimo o Halalelang.

[26]

## **KHAOLO EA 4—O HLAHETSE SETALENG**

*[E itšetlehile ka khaolo ea Luka 2:1-20.]*

Morena oa Khanya A ikokobeletsa tlase-tlase hore A tle A tsebe ho nka sebōpeho sa botho. Khanya ea Hae ea apesoa, a qhelela ho ipontšahatsa ha kantle thōko. Jesu A etsa hore batho ba se hohelloe ho Eena ke ntho efe kapa efe eo eleng ea bolefatše. E mpe e be bo tle ba ‘nete ba leholimo bo tla hohela ba tlang ho Mo latela. A lakatsa hore batho ba mo amohele e le ha ba fumane bopaki ba lentsoe la Molimo.

Mangeloi a lebella ho bona kamoo batho ba Molimo ba tlang ho amohela Mor’a Hae ha A apere kōbo ea botho. Mangeloi a ile a tla lefatšeng leo khanya ea boporofeta e le khantšitseng. A tla a sa bonoe Jerusalema le ho baruti ba ntlo ea Molimo.

E ne e se e ile eare ha Zakaria, moprista, a etsa tšebeletso ka pel’a aletare eaba ho tla ha Krete, ho haufinyane, ho a boleloa. E, moetelli-pele o ne a se a tsoetsoe, ‘me litaba tsa ho hlaha ha hae le bohlokoa ba borōmuoa ba hae bo ne bo se bo phatlalalitsoe hohle. Empa Jerusalema e ne e sa itōkisetse ho amohela Mopholosi oa eona. Molimo O ne O ile oa bitsa sechaba sa Bajuda ho bolella lefatše hore Krete O tšoanetse ho hlaha lelokong la Davida, empa ba ne ba sa tsebe hore ho tla ha Hae ho se ho le haufi.

[27] Ka tempeleng mahlabelo a neng a etsoa hoseng le mantsiboea a ne a supa ho konyana ea Molimo, empa le hona moo ho ne ho se litokiso tsa letho bakeng sa ho Mo amohela. Baprista le baruti ba ne ba pheta-pheta lithapelo tsa bona tse senang moelelo, ‘me ba etsa le litšebeletso tsa borapeli, empa ba ne ba sa itokisetsa ho hlaha ha Mesia. Hona ho se tsotelle hona ha ho se itokisetse Morena ha tlala naha ea Iseraele. Thabo e ileng ea tlala leholimong ha ea ka ea ama lipelo tsa batho ba tletseng boithati le bolefatše. E ne e le ba fokolang feela ba neng ba labalabela ho boha ea sa bonoeng.

Mangeloi a ile a lebela Josefa le Maria ha ba ne ba eta ho tloha Nasaretha ho ea motseng oa Davida. Taelo ea Roma e reng batho

bohle ba ngoloe, e mong le e mong motseng oa habo, e ile ea phatlalla ho ea fihla le maralleng a Galelea. Sesare Augusto a sebelisoa ke Molimo ho isa 'Mè-Jesu Betlelehema. Maria e ne e le oa leloko la Davida, 'me mor'a Davida a tšoanetse a hlahele motseng oa Davida -"Ha e le uena Betlelehema," ho rialo moporofeta, "ho uena ho tla tsoa 'musi oa Iseraele, eo leloko la hae le qalehileng khale, la qaleha mehleng ea baholo-holo." Mikea 5:2.

Empa motseng ona oa leloko la borena, Josefa le Maria ha ba ka ba tsotelloa, le ho fuoa tlotla. Lehoja ba khathetse, ba se na lehae, ke bao ba kutla tsea e tšesanyane ho ea nq'a bochabela qetellong ea motse, ba ntse ba batla sebaka sa ho phomola bosiu, empa ba hlōloa ho se fumana! Ho ne ho se sebaka tlung e tletseng ea baeti. Ntlong ea serutha, moo ho neng ho koaletsoe liphoofolo, ke hona moo qetellong ba ileng ba fumana sebaka sa tšireletso, 'me ke hona moo Molopolli A ileng A hlahela teng!

Litaba tse molemo tsa tlatsa leholimo ka thabo. Libōpuoa tse halalelang, tse tsoang lefatšeng la khanya tsa theohela lefatšeng. Ka holim'a maralla a Betlelehema lekhotla la mangeloi le ne le emetse taelo e a laelang ho phatlalletsa lefatše litaba tse molemo. Baetapele ba Iseraele ba ka be ba ile ba nka seabo sa thabo ea ho phatlalatsa molaetsa oa thabo ea tsoalo ea Jesu. Empa ba ile ba fetoa feela. Mahlaseli a khanyang a tsoang teroneng ea Molimo a tla khanya ho ba batlang leseli, 'me ba le amohele ka thabo. Sheba Esaea 43:3, le Pesalema 112:4.

### **Ke Balisana Feela Ba Ileng Ba Hlokomela**

Naheng eo ho eona moshanyana Davida a neng a kile a lisetsa teng, balisana ha ba alositse mehlape ea bona bosiu, 'me ba buisana 'moho ka Mopholosi ea tšepisitsoeng, ba ne ba rapella ho tla ha Hae. "Lengeloi la Morena la fihia ho bona....Lengeloi la re ho bona: 'Se tšabeng. Bonang, ke le bolella molaetsa o molemo oa thabo e kholo, eo e tla ba ea batho bohle. Kajeno, motseng oa Davida, le tsoaletsoe Mopholosi, e leng Krete Morena.'" [28]

Ka mantsoe ana lipono tsa khanya tsa tlatsa likelello tsa balisana ba mametseng. Mopholosi O fihlile! Matla, tlōtla le tlhōlo li tsamaea 'moho le ho tla ha Hae. Empa lengeioi la ba lokisa hore ba bone Mopholosi oa bona A le bofutsaneng 'me A ikokobellelitse tlase-

tlase. “Le tla fumana lesea le phuthiloeng ka masela, le robetse ka sejelong.”

Leqosa la leholimo le ne le kokobelitse tšabo ea bona. Le ne le ba boleletse hore na ba tla fumana Jesu kae. Le ba file le nako hore ba tloaele khanya ea leholimo. Eaba thota eohle e tlala khanya ea Molimo. Lefatseng ha thola ha re tu! ‘me leholimo la kobotela ho mamela pina:-

“Tlōtla e be ho Molimo  
maholimong a holimo-limo,  
khotso e be lefatseng  
ho batho ba mo khahlang!”

Eka kajeno batho ba ka ela pina eo hlōko! Mololi o neng o qale ka nako eno o tla ‘ne o utloahale ho isa bofelong ba nako, ho fihlela bofelong ba lefatše.

Hoba mangeloi a tlohe, lefifi la bosiu la boela la aparela lithota tsa Betlelehema. Empa setšoantšo se khanyang ho feta tsohle tse kileng tsa bonoa ke mahlo a motho, sa sala mehopolong ea balisana. “Ba buisana, ba re: ‘A re eeng Betlelehema, re e’o bona taba eo e etsahetseng, eo Morena a re tsebisitseng eona.’ Ba ea ka potlako, ‘me ba fumana Maria le Josefa, le lesea le robetseng ka sejelong.” “Bohle ba utloang ba makalla tseo ba li bolelloang ke balisa.”

Hase hore leholimo le lefatše li se li arohane hakaalo kajeno ho feta nakong eo balisana ba neng ba mametse pina ea mangeloi. Mangeloi a tsoang makhotleng a leholimo a tla tataisa mehato ea batho ea letsatsi le letsatsi.

[29] Paleng ea Betlelehema ho phuthetsoe “borui, le bohlale, le tsebo ea Molimo.” Baroma 11:33. Re makatsoa ke sehlabelo sa Mopholosi ha A tlohela terone ea leholimo, ‘me A ea sejelong. Ka ketso ena boikhōhōmōso ba motho bo sala bo khalemetsoe pel’a sefahleho sa Hae.

Empa hona e ne e le qalo feela ea ho itheola ha Hae! Ekasitana e ne e-ba Mora oa Molimo O ne A nkile sebōpeho sa motho ha Adama a e-s’o etse sebe, A ka be A ntse A itheotse. Empa Jesu A amohela botho, ha leloko la botho le se le fokolisitsoe ke sebe ka lilemo tse likete tse ‘ne. Joaloka ngoana e mong le e mong oa Adama O bile tlas’a tšusumetso ea lefutso. Tholoana tsena tsa lefutso li bonahetse

paleng ea baholo-holo ba leloko la habo. O tlile ka lefutso le joalo ho tla nka karolo litekong, ‘me A re fe mohlala oa bophelo bo se nang sebe.

Satane o ne a hloile Krete. A hloea Eena Ea ileng A itlama ho pholosa baetsalibe. Athe hona lefatseng leo Satane a reng ke ‘musong oa hae, Molimo A lumella Mor’a Hae ho tla, e le lesea le hloakang thuso, A le boemong bo fokolang ba batho, ho tla thulana le mathata a bophelo joaleka motho e mong le e mong, A loane ntoa eo ngoana e mong le e mong oa motho a e loanang -A ba tsietsing ea hore A ka ‘na A hlōloa ke ntoa ‘me eaba O timella run.

Pelo ea ntate mona lefatseng e sheba sefahlehong sa ngoana oa hae e monyenyanane, ‘me e thothomele ha e nahana mathata a bophelo. A lakatse ho mo tšireletsa melekong le likhohlanong tsa bophelo. Molimo Eena A fana ka Mor’a Hae ea ‘notsi hore A tl’o thulana le likhohlano tse bohale ho feta le ho bea bophelo ba Hae kotsing ho feta.

“Seo lerato le leng sona ke sena.” 1 Johanne 4:10. Makalang lōna maholimo! ‘me le hlōlloe, lona ba lefatseng!

[30]

## **KHAOLO EA 5—JOSEFA LE MARIA BA HLAHISA JESU TEMPELENG**

*[E etšetlehile ka khaolo ea Luke 2:21-38.]*

Nako e ka bang matsatsi a mashome a mane kamora' tsoalo ea Kreste, Josefa le Maria ba Mo nka ho ea Jerusalema ho Mo hlahisa ho Morena, le ho nehelana ka sehlabelo. Kreste, e le Eena ea tlil'o nka sebaka sa motho, O ne a tšoanetse ho phetha ka hohle kamoo molao o laelang ka teng. O ne A se A bōlōtse, e le ha A bontša kutlo ea molao.

Nyehelo e etsetsoang 'mè, ka molao e ne e lokela ho ba konyana haeba e le nyehelo ea secheso, le leeba kapa leebana-khoroana haeba e le nyehelo ea sebe. Linyehelo tsena li ne li tšoanetse hore li hloke letheba le sekoli kaha li ne li emetse Kreste. E ne e le “konyana e se nang sekoli, leha e le letheba.” 1 Petrose 1:19. E ne e le mohlala oo Molimo A ileng A rerela batho hore ba be sona ha ba utloa melao ea Hae.

Ho beha bana ba matsibolo e le bakhethoa ba Morena ho qalile mehleng ea khale. Molimo O ne A ile A tšepisa ho fana ka letsibolo la leholimo ho tla pholosa moetsalibe. Mpho ena e ne e tšoanetse ho amoheloa ntlong e 'ngoe le e 'ngoe ka ho khethela Molimo mora oa letsibolo. O ne a tsoanetse ho khetheloa boprista, e le moemeli oa Kreste har'a sechaba.

Ke moelelo o moholo hakaakang oo ho hlahisoa ha Jesu tempeleleng ho neng ho o bontša! Empa moprista ha a ka a bona ka nq'ane ho lesira. Letsatsi le letsatsi a tsoela pele ho beha bana matsoho a sa natse hakaalo batsoali kapa bana, ntle le haeba a bona hore enoa ke oa boruing kapa oa ntlo e tšoinyana. Josefa le Maria ba ne ba futsanehile, 'me moprista a bona feela Mogalelea oa monna le mosali, ba aperetseng kammoho.

[31]

Moprista a sika ngoana lialleng tsa hae, a Mo phahamisetsa pel'a aletare. Kamorao hore a Mo khutlisetse ho 'ma'e a ngola lebitso “Jesu” bukeng. O ne a sa nahane, ho hang ha lesea le le matsohong

a hae hore o ne a ngola lebitso la Motlotlehi oa leholimo, Khosi ea Khanya; Eena eo e leng mothei oa litšebeletso le tsela ea bophelo ba sechaba sa Bajuda.

Lesea lena e ne e le lōna le ileng la ipolela ho Moshe e le “EA-LENG-TENG”, Eena eo topallong ea leru le mollo A ileng A tataisa Iseraele. E ne e le Eena Takatso Ea Lichaba tsohle, Motso le Lehlomela la Davida, Naleli e khanyang ea Meso. Lesea leo le neng le hloka thuso e ne e le Eena tšepo ea batho ba oeleng. O ne A tla lefa topollo ea libe tsa lefatše lohle.

Leha moprista a sa ka a bona kapa hona ho utloa ho hong ho sa tloaelehang, tšebeletso eo ha ea ka ea feta feela ho sa ka ha hlokomeleha hore lesea ke Krete. “Ho ne ho e-na le Monna Jerusalem ea bitsoang Simeone...’ me Moea o Halalelang o ne o le ho eena. O ne a senoletsoe ke Moea o Halalelang hore a ke ke a shoa a e-s’o bone Motlotsuo oa Morena.”

### **Simeone Ea Hlomphang Molimo O Lemohile Jesu**

Ha Simeone a kena ka tempeleng, o ile a ameha haholo hobane lesea le neng le tlišoa ho Morena ke Eo e sa leng a Mo lebella. Moprista ha a sheba Simeone a ‘mona a tletse thabo ea mofuta oa eona feela ‘me a hlōlloa. A Mo nkela matsohong a hae, ‘me thabo eo a sa kang a e utloa ha e sale e le eena, ea tlatsa moea oa hae. Eare ha a phahamisetsa lesea, leo e leng Mopholosi, nq’ a leholimong a re “Morena, joale u ka lokolla mohlanka oa hao ka khotso, ho ea ka polelo ea hao; hobane mahlo a ka a bone ho pholosa ha hao, hoo u ho lokisitseng pontšeng ea lichaba tsohle; leseli le bonesetsang balichaba le tlōtla ea sechaba sa hao sa Iseraele.”

Eare ha Josefa le Maria ba ntse ba eme, ba makalitsoe ke mantsoe a hae, a re ho Maria, “Bona, ngoana enoa o baletsoe ho oa le ho tsoha ha ba bangata Iseraeleng le ho ba pontšo e tlang ho hanyetsoa, hore maikutlo a lipelo tse ngata a senolehe. Le uena ka sebele lerumo le tla u hlaba moea.”

Hape Anna moporofeta oa mosali a tla le eena, a tiisa bopaki ba Simeone. Sefahleho sa hae sa khanya ka khanya ea leholimo, eaba o leboha ka pelo ea hae eohle hore ebe le eena o fuoe sebaka sa ho bona Krete Morena.

Barapeli bana ba batho ba ne ba ithutile boporofeta. Empa babusi le baprista bona, leha ba ne ba ena le boporofeta ba bohlokoa matsohong a bona ba ne ba sa tsamaee tseleng ea Morena, ‘me mahlo a bona ha a ka a buleha ho bona khanya ea Leseli la bophelo.

Ho sa ntse ho le joalo. Maikutlo a leholimo a shebile lintho tseo baetapele ba tsa bolumeli ba sa li eleng hlōkō. Batho ba hlokometse hore Kreste O bile teng nalaneng ea lefatše; empa haele Kreste oa mafutsana le basotlehi, ea buellang bahloki, ea sebeletsang toka har’a ho sonngoa le bofutsana, O ntse A sa amoheloe feela joalokaha ho ne ho etsahala lemong tse ka bang kete tse peli tse fetileng.

Ha Maria a talima lesea ka matsohong a hae, ‘me a hopola mantsoe a buuoeng ke balisana, a tlaloa ke tšepo e khanyang. Mantsoe a Simeone a mo hopotsa boporofeta bo ngotsoeng ke Esaea bo reng, “Sechaba se neng se phela lefifing, se bone leseli le leholo; se neng se phela lefifing le letšo-letšo, joale se chabetsoe ke leseli....Rōna re tsoaletsoe Ngoana, rōna re filoe Mora, puso e tla ba mahetleng a hae, o tla bitsoa Ralimakatso le Moeletsi, Molimo ea matla, Rabosafeleng, Khosana ea Khotso.” Esaea 9:2-6.

### **Bohlōkō Boo ‘Ma-Kreste A Tsoanetseng Ho Bo Tseba**

Le ha ho le joalo Maria o ne a sa utloisise barōmuoa ba Kreste. Simeone o ile a porofeta ka Eena e le leseli le tla khantšetsa Balichaba, ‘me mangeloi a ne a boletse hore tsoalo ea Mopholosi ke litaba tse molemo ho batho bohle. Molimo O lakalitse hore batho ba bone Jesu e le Molopolli oa lefatše. Empa lilemo tse ngata li tšoanetse ho feta le pele le ‘MaJesu ka boena a ka utloisisa.

Maria ha a ka a bona kolobetso ea mahlomola eo Mesia a lekanang ho hapa terone ea Davida ka eona. Mantsoeng a Simeone ho Maria a reng, “Lerumo le tla u hlaba moea,” Molimo, ka mehauhelo ea Hae, e bonolo, O ne A omela Maria ka bohlōkō boo a seng a tla bo utloa le ho bo mamella ka lebaka la Hae.

[33] “Bona,” Simeone a rialo, “Ngoana enoa o baletsoe ho oa le ho tsoha ha ba bangata Iseraeleng.” Ba tlang ho tsoha ba lokela ho oa. Re tšoanetse ho oela holim’a lefika, ‘me re robehe pele re ka phahamisoa ho Kreste. Bo-’na bo tšoanetse bo theoloe teroneng. Bajuda ba ne ba ke ke ba amohela tlotla e fumanoang ka ho ikokobetsa. Kahoo ba ile ba hlōleha ho amohela Molopolli oa bona.



“Hore maikutlo a lipelo tse ngata a senolehe.” Leseling la bophelo ba Mopholosi, mehopollo ea lipelo tsa bohle, ho tloha ho ‘Mopi ho isa ho khosana ea lefifi, e senotsoe. Satane o bontšitse Molimo e le motho ea nang le boikhabo. Empa ho fana ka Krete ho paka hore leha lehloeo leo Molimo O le hloileng sebe le le matla joaloka lefu, empa lerato la Hae ho moetsalibe le matla ho feta lefu. Haele mona Krete A se A qalile topollo ea rona, Molimo A ke ke A qenehela letho le hlokehang hore A tle A e phethahatse. O bokelletse matlotlo a leholimo le mafatše, A a fa Krete, ‘me A re, “Sebelisa limpho tsena ho kholisa motho hore ha ho lerato le fetang la Ka. A ka fumana thabo e phahameng ka ho fetisisa ha feela a Nthata.”

### **Kamoo E Mong Le E Mong A Tlang Ho Ikahlola**

Sefapanong sa Gologotha, lerato le boipatlo tsa tjamelana. Krete O ile A phelela ho tšelisa le ho hlohonolofatsa feela, ‘me ka ho ‘molaea Satane o bontsise lehloeo la hae ho Molimo. Seo e neng e hlile ele sephèo sa hae e ne e le ho liha ‘muso oa Molimo le ho rititla Eo lerato la Molimo le ileng la bontšoa ka Eena.

Ka bophelo le lefu la Krete menahano ea batho le eona e ea pepesoa. Bophelo ba Jesu e ne e le pitso ea boitelo le ho nka karolo mahlomoleng. Bohle ba neng ba mamela Moea o Halalelang ba ile ba huleloa ho Eena. Ba rapelang bo-’na e ne e le ba ‘muso oa Satane. Bohle ba ne ba tla bontša ka mekhoa ea bona hore na ba reng ka Jesu, me ka hona ba supe hore na ba lehlakoreng lefe. Ka mokhoa o joalo e mong le e mong o a ikahlola.

Ka letsatsi la kahlolo ea ho qetela, sefapano se tla hlahisoa, ‘me moelelo oa ‘nete oa sona o tla chabela kelello ka ‘ngoe. Pel’a pono ea “Gologotha” le ea thakhisitsoeng teng, baetsalibe ba tla ema ba be molato. Batho ba tla bona seo khetho ea bona e bileng sona. Potso e ‘ngoe le e ‘ngoe e kileng ea botsoa ha ho ntse ho phehisanoa e tla be e hlakisitsoe hantle. Molimo O tla ema A hlakile, A se na [34] letheba ka boteng ba sebe leha e le ho tsoela pele ha sona. Ho tla bontšoa hore ‘muso oa Molimo ha O a ka oa e-be le sepha, le ho se khotsofatse. Bohle ba tšepahetseng le ba Mo fetohetseng ba tla phatlalatsa, ba re, “Litsela tsa hao li lokile, ke tsa ‘nete, uena Khosi ea lichaba....Likahlōlo tsa hao li bonahalitsoe.” Tsenolo 15:3,4.

[35] **KHAOLO EA 6—“RE BONE NALELI EA HAE”**

*[E etšetlehile ka khaolo ea Matheu 2]*

Hoba Jesu a tsoalloe Betlelehema e Judea, mehleng ea khosi Heroda, ha fihla Jerusalema Ba Bohlale ba tsoang bochabela, ba re: ‘E kae khosi ea Bajuda e tsoetsoeng? Re bone naleli ea eona ha e hlaha, ‘me re tlil’o e khumamela.’”

Banna ba bohlale ba tsoang bochabela e ne e le ba sehlopha sa batho ba ruileng, ba rutehileng. Har’a bona ho ne ho e-na le ba neng ba lokile, ba neng ba ithuta ka liketsahalo tse bontšang letsoho la ‘Mopi tlholehong, ‘me ba ne ba hlompshoa ka bonnete ba tsebo e batsi le ka semelo se setle. Har’a bona ho bile le banna ba bohlale ba ileng ba tla ho Jesu.

Ha banna bana ba bohlale ba ntse ba ithuta ka linaledi tsa leholimo, ba bona khanya ea ‘Mopi. Ereka ha ba ne ba batla tsebo e hlakileng, ba phetla Mangolong a Halalelang a Baheberu. Naheng ea bona ho ne ho e-na le mangolo a boporofeta a boletseng pele ka ho tla ha moruti ea halalelang. Boporofeta ba Balame bo ile ba ‘na ba neheletsanoa ho tloha mengoaheng ho isa mengoaheng. Testamenteng ea Khale ba bohlale ba ile ba ithuta ka thabo hore ho tla ha Mopholosi ho haufinyane. Lefatše lohle le ne le tla tlala tsebo ea khanya ea Morena.

[36] Banna ba bohlale ba ne ba ile ba bona khanya ea mohlolo maholimong bosiuang ba mohla khanya ea Molimo e aperelang maralla a Betlelehema. Naleli e phatsimang ea hlaha, ‘me ea solla leholimong. E ne e le pono e tsosang thahasello e kholo bathong. Naleli eo e ne e le sehlopha sa lekhotala la mangeloi a khanyang, empa sena ba bohlale ba ne ba sa se tsebe. Le ha ho le joalo ba ile ba makatsoa ke naleli ena, ‘me ba ba le maikutlo a hore naleli eo e na le moelelo o khethehileng ho bona.

Ana ekaba naleli ee ea mohlolo e rōmetsoe e le selelekela sa Ea tšepisitsoeng? Sheba Lipalo 24:17. Ba bohlale ba bochabela ba amohela khanya ena e le ‘nete e rōmetsoeng ke leholimo; eaba e tla

holim’ a bona ka mahlaseli a khanyang ho feta. Ka litoro ba laeloa hore ba tsamaee, ba batla Khosana e qetang ho hlaha.

Naha e ka Bochabela e ne e atlehile ka lintho tse ntle, ‘me ba bohlale ba bochabela ha ba ka ba tsoa ba ipopile matsoho. Ba nka limpho tse theko e boima tsa naha ea habo bona e tle ebe nyehelo ho Eena, Eena eo malapa ‘ohle a lefatše a tlang ho hlohonolofalletsoa ho Eena.

### Leeto La Bosiu

Ho ne ho hlokahala hore leeto le nkuoe bosiu hore ba tle ba bone naleli. Tseleng, ha ba phomotse, batsamai bana ba ne ba phetla mangolo, ba batlisisa tsa boporofeta. Ba ‘na ba kholiseha hore ba tataisoa ke Molimo. Leeto leha le ne le le le lelele le ne le le monate.

Ba fihla naheng ea Iseraele, Jerusalema ea bonahala. Ke ha ba bona naleli e ema holim’ a tempele. Ka likhato tse tatileng ba hatela pele, ka tšepo e tiileng ba lebeletse ho utloa motho e mong le e mong a bua ka tsoalo ea Mesia. Empa ho makaleng ha bona ba fumana lipotso tsa bona li sa tlietse ba utloang thabo, e bile batho ba botsoang ba ne ba makala, ba tšoha, ba bile ba teneha.

Baprista ba ne ba rorisa tumelo le litšebeletso tsa bona, feela ba re Bagerike le Baroma ke baetsalibe. Ba bohlale ba bochabela ba ne ba sa rapele melimo ea bohata, ‘me mahlong a Molimo ba ne ba phahametse ka holimo-limo ho feta bao ba ipitsang barapeli ba Molimo; empa Bajuda ba ba bona e le bahedene. Lipotso tsa bona tse labalabelang tsebo ha li ea ka tsa fumana kutloelo-bohlōkō ho baprista.

### Mōna Oa Heroda Oa Tsoha

Leeto la ba bohlale ba bochabela la etsa tšisinyeho har’ a sechaba sa Jerusalema, tšisinyeho e ileng ea kenella, ea ba ea fihla lapeng la Morena Heroda. Mo-Edomo ea mano a tšosoa ke tsebiso e bontšang hore ho ka ‘na ha eba le ea tla mo tsekisa setulo sa borena. Ereka [37] Heroda e ne ese Mojuda, sechaba se ne se mo hloile ‘me tšireletso ea hae e ne e le e tsoang ‘musong oa Roma. Empa Khosana ena E ncha E ne E e-na le litokelo tse phahameng — O ne A hlahetse lelokong la ntlo ea Borena.

Heroda a nahanela baprista ka hore ba mo rerile le baeti bana hore ba tsose lerata la pherekano, la ntoa, la ho mo tlosa setulong sa borena. A etsa qeto ea hore a loantše leano lena. A bitsa boprista ‘me a ba botsa sebaka seo Mesia a hlahetseng ho sona.

Potso ena e tlišoang ke ea iphamoletseng borena ‘me e etsoa ka kōpo ea basele, ea utloisa baruti ba Bajuda bohlokō. Heroda a halefisoa ke monyebe oo ba neng ba batlisisa mangolo ka ona. A nahana hore ba leka ho pata tsebo ea bona. A ba laela ka thata, a sa ba qeke, hore ba etse lipatlisiso tse nepahetseng, ‘me ba bolele sebaka seo Morena oa bona, eo ba mo lebeletseng a tla tsoalloa teng. “Ba re ho eena: ‘Betlelehema e Judea, hobane ho ngotsoe joalo ke moprofeta, ha a re:

“Ha e le uena, Betlelehema,  
 e naheng ea Juda,  
 ha u hlile ha u monyenyanane haholo,  
 ha u monyenyanane  
 har’a batsamaisi ba Juda  
 hobane ho uena ho tla tsoa  
 motsamaisi ea tla alosa Iseraele,  
 sechaba sa ka.”

Heroda a memela ba bohlale ba bochabela sephiring ho ba botsisisa. Khalefo le tšabo li ne li loantšana pelong ea hae, empa a beta pelo, ‘me a bontša eka ha a khathatseha, ‘me a ipolela a thabile haholo ka tsoalo ea Krete. A re ho baeti ba hae, “E-eang, le batlisisa tsa ngoana ka hloko; ere ha le se le mo fumane, le ntsebise, le ‘na ke tle ke e’o mo khumamela.”

[38] Baprista e ne e se batho ba hloakang tsebo joalokaha ba ne ba ikhakanya. Tlaleho ea lengoloi le neng le etetse balisana e ne e ile ea fihla Jerusalema, empa Borabi ba e nka e le ntho e sa tsebisahaleng, ba se ke ba e tsotella. Baprista e ka be e le bona ba ileng ba etella ba bohlale ba bochabela pele, ho ba isa moo Jesu a hlahetseng teng, empa ba bohlale ke bona ba ileng ba lemosa baprista hore Mesia O tsoetsoe.

Haeba tlaleho e tlišitsoeng ke balisana le banna ba bohlale e ka netefala hona ho tla bolela hore baprista hase bahlalosi ba ‘nete ea Molimo joalokaha ba ipolela. Barutehi-hali bana ba baruti ba ne ba

ke ke ba ikokobetsa hore ebe ba tlil’o rutoa ke bahedene. Ba buisana ba re ho ke ke ha etsahala hore ebe Molimo O ba fetile feela, eaba O buoa le lithoto tsa balisana kapa Balichaba ba maqai. Ha ba ka ba leka le ho ea Betlelehema ho bona hore na efela lintho li lutse joalo. Ba faposa batho hore ba nke taba tsa tsoalo ea Jesu e le ntho ea bosaoana feela. Ena e bile qaleho ea ho nyatsoa ha Jesu ke baprista le Borabi. Boikhōhōmōso le manganga a bona a hola ‘me lehloeo la bona ho Mopholosi la setlela.

Banna ba bohlale ba tloha ba le bang Jerusalema, ‘me meriti ea bosiu ea fihla. Empa thabong ea bona e makatsang ba ile ba bona naleli hape, ‘me ea ba etella pele ho ea Betlelehema. Ba ile ba soabisoa ke boikhakanyo ba baetapele ba Bajuda, ba tloha Jerusalema tšepo ea bona e le tlase ho feta ha ba ne ba fihla teng.

### Ha Ho Balebeli Ba Ntlo Ea Borena

Ha ba le Betlelehema ha ba ka ba fumana balebeli ba ntlo ea borena ba tlil’o tšireletsa Morena ea qetang ho hlaha. Ho ne ho se na batho ba hlomphehang ba lefatše ba neng ba il’o bona lesea. Jesu O ne A beiloe sejong, batsoali ba Hae e le bona feela ba Mo lebetseng. Ebe enoa ke Eena ea tšoanetseng hore A “khutlise merabe ea Jakobo,” A be ‘leseli ho balichaba,” le “ho pholosa ha ka pheletsong tsa lefatše?” Esaea 49:6.

“Ha ba fihla ka tlung, ba bona ngoana le ‘m’ae Maria; ba itihela fatše, ‘me ba khumamela ngbana, ba nt’o bula matlōle a bona, ba mo nyehella ka limpho: khauta, mokubetso, le ‘mira.” A tumelo e hlollang ea bona!

Banna ba bohlale, ba sa kang ba ela hloko mehopolo ea Heroda, ba itokisetsa ho pota le ho eena, Jerusalema, ho ‘molella ka katleho ea leeto la bona. Empa torong ba senoleloa ke Molimo hore ba se hlolle ba fapohela ho Heroda ho ‘molella litaba tseo. Ba koekoetla Jerusalema, ba khutlela lefatšeng la habo bona ka tsela e sele.

Ka tsela e tšoanang, Josefa a fumana temoso, ka toro, hore a nke ngoana le Mae Maria ba balehele Egepeta. Josefa a mamela taelo hang-hang, a tsoha bosiu hore ba se tšohe ba oeloa ke kotsi.

Lipatlisiso tsa banna ba bohlale Jerusalema, le thabo e thahasellisang e ileng ea anela hohle, esitana le mōna oa Heroda, tsa sisinya thahasello ea baprista le borabi, ‘me ba lebisa menahano ea bona

mangolong a boporofeta a buoang ka Mesia, le tse kholo tse tsoa etsahala.

Satane, a ikemiselitse ho thibela khanya ea leholimo ho khanyetsa lefatše, a sebelisa maqiti ohle ho bolaea Mopholosi. Empa Ea sa otseleng leha e le ho robala, A lokisetsa Maria le ngoana Jesu tšireletso lefatseng la bahedene. Hape ka limpho tse tsoang ho banna ba bohlale, ba tsoang lefatšeng la bohedene, Morena A tlatsetsa ka tseo ba tla li hloka ho ea Egepeta esita le nakong eo ba tla e lula ele bajaki teng.

### **Polao E Sehloho Ka Heroda**

Mane Jerusalema Heroda o ne a se a hloka mamello, a emetse ho khutla ha banna ba bohlale ba bochabela. Ha linako li ntse li ea, ba sa fihle, khoao ea hae ea hola. Na ekaba borabi ba hlokometse merero ea hae, eaba ba bohlale ba se be mo koekoetla ka boomo? A utloa e ka oa hlanya ke tseo. Ka matla a hae o tla mo supisa ngoana enoa oa Morena!

Masole a rōmelo Betlelehema ka thomo ea ho bolaea bana bohle ba lilemo tse peli ho ea tlase. Malapeng a khutsitseng a mo tse oa Davida ha pakahala pono e ileng ea hlahela moporofeta lilemong tse 600 pele ho moo ha a tla re: “Mohoo o utloahetse Rama, seboko le sello sa ‘mokotsane’ Ragele o llela bana ba hae, ‘me o hana ho tšeliseha, hobane ha ba sa le eo.”

Ha e le tlokotsi ena Bajuda ba ne ba ipitselitse eona. Ba ne ba latotse Moea o Halalelang, e leng Eena feela setšabelo sa bona. Mangolong ba batlisisitse boporofeta bo ka tolokoang ho phahamisa bona, ‘me bo bontše kamoo Molimo O nyatsang lichaba tse ling. Ba ne ba ikhora moea ka hore Mesia O tla tla e le Morena oa bona, ‘me A hatikele bahedene ka khalefo ea Hae. Kahoo ba ile ba tsosa [40] lehloeo la babusi ba bona. Ka ho etsa hore ba se utloisise borōmuoa ba Krete, Satane o ne a rerile ho bolaea Mopholosi; empa ho etsahetse hore kotlo e oele holim’a bona.

Kamora’ hore ho fenethoe ba se nang molato, Heroda a shoa lefu le tsosang. Josefa, ha a ntse a le Egepeta, a laeloa ke lengeloi ho khutlela lefatšeng la Iseraele. Kaha a ne a sheba Jesu e le Eena Mojalefa oa terone ea Davida, Josefa a lakatsa ho ea haha Betlelehema; empa hoba a utloe hore Arkelausa o busa Judea, tulong tsa

ntat’ae Heroda, a tšaba ho ea teng, a nahana hore mano a Heroda a ka ‘na a ntšetsoa pele ke mor’a hae.

Josefa o ile a lebisoa sebakeng se tšireletsehileng, eleng Nazaretha, lehaeng la hae la pele. Mona ke moo Jesu A ileng A phela lilemo tse ka bang mashome a mararo, “ho tie ho phethahale ho boletsoeng ke baporofeta hore o tla bitsoa Monasaretha.” Galelea e ne e e-na le mefuta e mengata ea melata ho feta Judea. Ka baka lena taba tsa Sejuda li ne li sa ba tšoenye haholo.

E bile joalo kamohelo ea Mopholosi ha A fihla lefatšeng. Molimo A sitoa ho tšepela Mora oa Hae ho batho leha A bile A tlil’o etsa mosebetsi oa ho ba pholosa! A laeletsa Jesu ho mangeloi ho Mo tšireletsa ho fihlela A phetha borōmuoa ba Hae, ‘me A shoa ka matsoho a bao A tlileng ho ba pholosa.

## KHAOLO EA 7—NGOANA JESU

*[E itšetlehile ka Luka 2:39,40.]*

Lilemo tsa bongoana le bocha ba Hae Jesu O li qetile motsaneng o maloting. A feta malapa a borui le a baratehi ba tumileng, A ea lula Nazaretha, motseng o nyatsehang.

“Ha e le ngoana a ‘na a hōla, a matlafala, a tlala bohlae, ‘me mohau oa Molimo oa ‘na oa e-ba le eena.” O ne A bonesetsoa ke mahlaseli a khanya a tsoang sefahlehong sa Ntat’ae ‘me “Jesu a ‘na a tsoela pele bohlaeng, le ho holeng, ‘me a khahleha pel’ a Molimo le pel’ a batho.” Luka 2:52. Kelello ea Hae e ne e le chatsi ‘me e tebile, A e-na le boinahano le bohlae bo fetang lilemo tsa Hae. Matla a kelello le a ‘mele a hōla butlebutle, joalekaha ho etsahala ho bana.

Bongoaneng Jesu a bontša botlehali ba tšekamelo linthong tsa bohlokoa, le mamello e ke keng ea sisinngoa ke letho, ea eba motho ea buang ‘nete, ea sa sutheng botšepeling. O ne A tiile joaloka lefika, ‘me bophelong ba Hae A bontša mohau o se nang boipatlo.

‘M’a-Jesu a lebella ha matla a Hae, a ntse a hlahella poaneng ‘me a a hlaolela. Ka thuso ea Moea o Halalelang A fumana bohlae ba tšebelisano-’moho le makhotla a leholimo kholisong ea ngoana enoa Ea neng A re Ntat’ae ke Molimo feela.

Matsatsing a Krete tsela ea ho ruta bacha litaba tsa tumelo e ne e hlophiloe. Sebakeng sa Mangolo a Halalelang boholo ho ne ho rutoa taba tse neheletsanoang. Likelello tsa bana li ne li tlatsoa ka lintho tse sa amoheleng makhotleng a leholimo. Baithuti ba ne ba se na lihora tseo ba ka li qetang boikhutsong le Molimo, ho [42] utloa lentsoe la Hae le ho bua le pelo tsa bona. Ba ne ba furalletse Mohloli oa tsebo. Ho neng ho nkuoa e le thuto e kaholimo e ne e le tšetiso e kholohali tsoelopeleng ea sebele ea bacha. Likelello tsa bona tsa nyenyefala, ‘me tsa sesefala.

Ngoana Jesu ha A ka A fumana lithuto tsa Hae likolong tsa masinagoge. O ile A ithuta lintho tsa leholimo ho ‘m’ae le mangolong a boporofeta. Ha A ntse A hōla-hōla, ha A ka A batla ho ea likolong



tša borabbi. O ne A sa hloke thuto e fumanoang mehloling e joalo. Tsebo ea Hae ea Mangolo e bontša kamoo A qetileng lilemo tša bocha A ithuta Mangolo ka thahasello kateng.

### Tlholeho E Tlatsa Bibe

Ka pele ho Eena ho ne ho alehile letlotlo la tsebo la mesebetsi ea tlholeho e entsoeng ke Molimo. Ea entseng lintho tsohle ke Enoa O ithuta lithuto tse ngotsoeng ke letsoho la Hae lefatšeng le leoatleng le leholimong. A bokella litsebo le bohlale bohle nthong tša tlholeho eleng -limela, liphoofole, le motho. Litšoantšo tseo A neng A li sebelisa ha A ruta lithuto tša 'nete, li bontša ka moo A ileng A bokella lithuto tša moea tlholehong le linthong tse pota-potileng bophelo ba Hae ba letsatsi le letsatsi.

Ha Jesu A ntse A leka ho utloisisa lebaka la lintho tse teng, libōpuoa tša leholimo e ne e le tsona bathusi ba Hae. Ho tloha ha A qala ho lemoha lintho, A hōla moeeng, mohaung le tsebong ea 'nete.

Ngoana e mong le e mong a ka ruoa tsebo joalokaha ho bile ho Jesu. Ha re leka ho tsebisisa Ntat' a rōna ea Maholimong, mangeloi a tla re atamela, likelello tša rōna li matlafale, limelo tša rōna li phahamisoe, 'me li ntlafatsoe. Re tla eketsa ho tšoana le Mopholosi oa rōna. Ha re boha botlehali bo phethahetseng ba tlholeho, lerato la rona le leba ho Molimo. Moea o tlala tlhompho, 'me o fuoa matla ka ho kopana le Rabosafeleng ka mesebetsi ea Hae. Ho buisana le Molimo ka thapelo ho haha matla, kelello le boitšoaro.

Ha Jesu e ne e sa le ngoana, O ne a nahana e bile a bua joaloka ngoana, empa ha ho a ka ha e-ba le ha e le letheba la sebe le ileng la silafatsa setšoantšo sa Molimo ka ho Eena. Hase hore O ne A sa lekoe. Baahi ba Nasaretha ba ne ba tumile ka ho khohlahala ha bona. Sheba Johanne 1:46. Ho ne ho hlokahala hore Jesu A itlhokomele ka nako tsohle ho tšireletsa le ho baballa bohloeki ba Hae. A thulane le meleko eohle eo le rōna re kopanang le eona, hore e tle e be mohlala ho rōna bongoaneng, bocheng, esitana le boholong.

Ho tloha A sa le monyenyanane haholo, Jesu O ne A hlokomeloa ke mangeloi a leholimo, empa bophelo ba Hae e bile ba ntoa e telele, e loanang le matla a lefifi. Khosana ea lefifi ha ea siea le ha e le

monyetlanyana o monyenyane feela, e sa o sebelisa, ho lihela Jesu melekong.

Jesu O ne A tseba hore na bofutsana ke eng, le boitelo, le mathata a amang bophelo. Maiphihlelo ana a ile a Mo sireletsa. O ne A se na nako eo A lutseng feela eleng moo A neng A ka fumana metsoalle e ka Mo khelosang. E bang ke katleho kapa boithabiso, thoriso kapa ho nyatsuo, li ne li ke ke tsa Mo khannela ho etsa bobo. Krete, Eena ea inotsi ea se nang sebe ho ba kileng ba phela lefatseng, O phetse lilemo tse ka bang mashome a mararo har'a baahi ba Nasaretha ba neng ba tumme ka bokhopo. Taba ena e khalemela bao ba nahanang hore bona ba tla itšetleha ka sebaka, katleho kapa borui, hore ba tle ba tsebe ho phela bophelo bo se nang sekoli.

### **Kreste, E Le 'Metli, A Bontša Bokhabane Ba Mosebetsi**

Jesu e ne e bile molaoli oa leholimo, 'me mangeloi a ne a thahasella hore Eena A laele joale bona ba phethahatse lentsoe la Hae. Ke enoa joale e se e le mohlanka ea laeloang le mora ea ratehang, ea mamelang. Ka matsoho a Hae A sebetsa ntlong ea 'metli le ntat'ae Josefa. Ha A ka ba A sebelisa bo-Molimo ho ipebofalletsa mathata kapa mosebetsi.

Jesu O ile A sebelisa matla A Hae a 'mele ka mokhoa oo A neng A tla phela hantle 'meleng e le hore A tle A tsebe ho etsa mosebetsi o babatsehang.

[44] O ne A sa rate hore ho be le letho le khesehang leha A tsoara lisebelisuo tseo A sebetsang ka tsona. O ne A phethehile mosebetsing oa Hae, joalokaha A ne A phethehile semelong sa Hae. Ka Mohlala oa Hae O ile A ruta hore mosebetsi o tsoanetse ho etsoa ka nepo le ka ho phetheha, hape mosebetsi o hlomphehe. Molimo O khethile mosebetsi e le lehlohonolo, 'me ke feela motho ea sebetsang ka thata ea fumang thabo bophelong. Molimo O thabisoa ke bana le bacha, ba thusang mosebetsing oa lapeng, ba imolla moroalo oa ntate le 'mè.

Jesu e ne e le motho ea sebetsang ka matla, 'me e le motho oa sebele. O ne A lebeletse katleho e matla mosebetsing ka hoo O ne A ikitlaetsa mosebetsing. O itse "Eka khona re etse mesebetsi ea ea

nthōmileng e sa ntsane e le motšhare; bosiu boa tla, boo ka bona ho seng ea ka sebetsang.” Johanne 9:4.

Jesu O ne A sa tsoafe boikarabello le mosebetsi joalokaha ba bangata ba etsa, ba ipolelang hore ke balateli ba Hae. Kaha ba batla ho balehela boikoetliso bona ba bangata ba ea fokola, ha ba na mofolo-folo, ha ba na thuso, ha ba thulana le mathata. Matla a semelo a senotsoeng ho Krete a tšoanetse hore a bonahale ho rōna, ka boikoetliso boo le Eena A ileng A ba le bona. Mohau oo A o fuoeng ke oa rōna.

Mopholosi oa rona O ile A nka karolo bofutsaneng. Bao ba utloisang bophelo ba Hae kannete ba ke ke ba fumana ho tšoaneleha ho hlompha barui empa mafutsana ona a khelloa fatše.

### Sebini Se Thabileng

Hangata Jesu O ne A bontša thabo ea pelo ea Hae ka ho bina lipesalema le lipina tsa leholimo. Hangata baahi ba Nasaretha ba ne ba ee ba utloe lentsoe la Hae le phahame le rorisa Molimo ka pina. Ha metsoalle ea Hae e ne e belaela ka mokhathala, ba ne ba tsosolosa ke meloli e monate e tsoang molomong oa Hae.

Ka lilemo tseo tsa boikhutso tsa bophelo ba Hae tseo A li qetileng Nasaretha, bophelo ba Hae bo ile ba phalla ka melatsoana ea kutloelo-bohlōkō le mehauhelo. Maqheku, ba soabileng, ba imetsoeng ke libe, bana ba bapalang, libōpuoa tse ‘nyane tse phelang merung, liphoofole tse bofang — kaofela tsa thabisoa ke boteng ba Hae. Eena eo lentsoe la Hae le tsoereng mafatše, O ne A inamela fatše A thuse nonyana e tsoileng kotsi. Ho ne ho se letho le tlase hoo A ke keng A le hlokomela kapa A le thusa. Ka tsela e joalo O ile A hola [45] hlalefong le boemong le molemong pel’a Molimo le batho. O ile A ipontša hore O na le mohau ho bohle. Moea o Mo pota-potileng oa tšepo le sebete oa Mo etsa lehlohonolo ho bohle bao A ba sebeletsang. Hangata ka letsatsi la Sabatha O ne A kopjoa ho tla bala thuto e tsoang mangolong a baporofeta, ‘me lipelo tsa ba mametseng li ne li thabisoa ke ha leseli le lecha le khanya ho tsoa Mangolong a Halalelang.

Empa lilemong tseo A neng A le Nasaretha, ha A ka A bonahatsa matla a mohlolo. Ha A ka A batla mabitso a boemo. Bophelo ba Hae bo khutsitseng, bo tlase, ba fana ka thuto ea bohlokoa: bophelo

ba ngoana bo phutholohileng bo se nang boithabiso ba lefeela, bo tsamaeang-'moho le tlholeho, ke bona bo tsebang ho atleha 'meleng le matleng a kelello le a moea.

Jesu ke mohlala oa rōna. Bophelong ba Hae lapeng ke mohlala oa bana le bacha lohle. Mopholosi A ile A ikokobetsa bofutsaneng, hore A tle A tsebe ho re ruta hore na rōna ba tlase re ka ba haufi hakaakang le Molimo. Mosebetsi oa Hae o qalile ka ho hlohonolo-fatsa mesebetsi ea batho ba tlase ba hulang ka thata ho fumana bohobe ba tsatsi le leng le le leng.

Ha A ne A sebetsa setulong sa 'metli, O ne A hlile A etsa mesebetsi oa Molimo ho tšoana hantle le nakong eo A neng A etsa tsa boruti, A etsa mehlolo har'a matšoele. Mocha e mong le e mong ea latelang mohlala oa Krete oa botšepahi le hlomphe le boikokobetso lelapeng labo le eena a ka ikukela mantsoe ana a ileng a buuo ke Ntate: "Bonang, Mohlanka oa ka eo ke mo khethileng, ke eo, mokhethoa oa ka ea nkahlang." Esaea 42:1.

## KHAOLO EA 8—LEETO LA PASEKA

[46]

*[E itšetlehile ka buka ea Luka 2:41-51.]*

Hara Bajuda selemo sa leshome le metso e ‘meli e ne e le sona se arolang bongoana ho bocha. Ho ea ka moetlo ona, ha A fihletse lilemo tseo tse hlokahalang, Jesu A nka leeto ho ea Jerusalema, pasekeng, le Josefa le Maria.

Leeto le tlohang Galelea le ne le nka matsatsi a ‘maloa, ‘me batsamai ba ne ba kopana ka lihlopha tse kholo sebakeng sa ho tsamaisana-’moho le sebakeng sa tšireletso. Basali le banna-baholo ba ne ba kalama likariki kapa lipokola, litseleng tse methèo, tse majoe. Banna ba matla le bacha ba ne ba tsamaea ka maoto. Naha eohle e ne e khabile ka lipalesa ‘me e natefisoa ke lipina tsa linonyana. Tseleng, bo-ntate le bo-’me ba ne ba phetela bana ba bona ka mehlolo eo Molimo O e etselitseng batho ba ‘Ona mengoaheng e fitileng. Ba ne ba bina ba etsa mehoo.

Poloko ea Paseka e qalile nakong eo sechaba sa Baheberu se neng se qaleha. Bosiung ba ho qetela kholehong ea bona Egepeta, Molimo A laela Baheberu ho bokella malapa a bona ka matlung a bona. Ha ba qeta ho fafatsa menyako ea mamati ka mali a konyana e hlabiloeng, ba ne ba tšoanela ho ja nama ea eona e besitsoe, ka bohobe bo sa lomoang le litlama tse babang. “Ke eona Paseka ea Morena.” Phallo 12:11. Hara khitla ea bosiu matsibolo ‘ohle a Egepeta a bolaoa. Eaba Baheberu ba tloha Egepeta e le sechaba se lokolohileng. Ho tloha molokong ho isa molokong o mong pale ena e makatsang ea ho tsoa litlamong e ne e lokela ho phetoaphetoa.

Paseka e ne e lateloa ke mokete oa matsatsi a supileng oa mahobe a sa lomoang. Litšebeliso kaofela tsa mokete ona e ne e le tšoantšiso ea mosebetsi oa Krete. Konyana e hlabiloeng, bohobe bo sa lomoang, ngata ea lilopotsiea kaofela li ne li emetse Mopholosi. Empa ho batho ba bangata, mehleng ea Krete, mokete ona o ne o se o hloka moelelo ke ho etsoa ntho ea moetlo feela. Ho Mor’a Molimo tšebeliso ena e ne e e-na le moelelo o mokaakang!

[47]

E ne e le khetlo la pele ngoana Jesu A bona tempele. A bona baprista ba apereng liaparo tse tšoeu ba etsa litšebeletso tsa boruti tse mahlonoko, konyana e lutlang mali e le holim'a aletare ea sehlabelo. A bona tšebeletso e mahlonoko ea paseka e hapang maikutlo. Letsatsi le letsatsi ha A bona tsebeletso ena moelelo oa eona oa hlaka ho feta. Ketsahalo e 'ngoe le e 'ngoe ea bonahala e tlamahana le bophelo ba Hae. Maiphihlelo a macha a tsosolosa kahare ho Eena. Ha A ntse a thotse, O ne A bonahala A ithuta bothatahali bo boholo. Sephiri sa borōmuoa ba Hae se ile sa senoleloa Mopholosi.

Maikutlo a Hae a ne hapehile haholo ke litšebeletso tsena, hoo ha li fela A ileng A 'na A ea holimo le tlase ka liphapusing tsa tempele, 'me ha ba tlileng moketeng ba tloha Jerusalema A ileng A salla ka tempeleng.

Leetong lena la ho tla Jerusalema e ne e le takatso ea batsoali ba Jesu ho Mo tlisa hore A tlo tseba baruti ba baholo ba Iseraele. Ba ne ba hopola hore mohlomong A ka qala hore A hlomphe litichere tsena tse rutehileng, 'me A e le hloko lithuto tsa bona. Ka mane ka tempeleng Jesu O ile A rutoa ke Molimo. Seo A ileng a se rutoa, A qala ho se bolela hang-hang.

Kamore e kopaneng le tempele e ne e khethetsoe sekolo se halalelang. Ngoana Jesu A kena ka kamoreng eo, 'me A lula maotong a borabbi ba rutehileng. Eaba e mong ea batlang tsebo, O botsa baruti bana ka tse amang boporofeta le liketsahalo tsa mehla eo tse neng li supa ho tla ha Mesia.

[48] Lipotso tsa Hae li ne li ba lebisa ka linneteng tse tebileng, tseo esaleng li sirela, feela e le tsa bohlokoa topollong. Ka lipotso tseo tsa Hae A ba bontša, ka makhethe, kamoo tsebo ea bona eo ba reng ba bohlale e leng nyenyane kateng, empa A bile A tlisa moelelo o mocha litabeng tseo A libotsang. Baruti ba ne ba supa kamoo sechaba sa Bajuda se tla phahama kateng ha Mesia A fihla, empa Jesu A supa boporofeta ba Esaea, 'me A ba botsa hore na mangolo ao a halalelang a bolelang ha a re Konyana ea Molimo a tla utloisoa bohloko; ebe e bolaoe. Sheba Esaea 53.

Lingaka tsena tsa barutehi tsa reteleha ka ho Eena ho 'motsa lipotso, 'me tsa makatsoa ke likarabo tsa Hae. Ka boikokobetso ba ngoana, A fa ka mantsoe a tsoang Ma-ngolong a Halalelang moelelo le hlaloso e tebileng eo banna ba bohlale ba neng ba e-so ka ba e utloa pele ho mona. Hoja taba eo A neng A e hlalose e ne e kile ea

lateloa e ka be e ile ea tlisa phetoho bolumeling ba nako eo; ‘me e ne etlare ha Jesu A qala borōmuoa ba Hae ba bangata ba be ba itokiselitse ho Mo amohela.

Moshanyaneng enoa ea nahanang ka ho teba, oa Mogalelea baruti ba lemoha motho ea tšepisang haholo. Ba ne ba batla hore ba hle ba Mo ise likolong, A rutoe ke bona. Ba re, “kelello e tsebang ho iphumanela lintho joaleka ena e lokela ho ba tlas’a tataiso ea bona.”

Mantsoe a Jesu a sisinya lipelo tsa bona ka tsela eo ba neng ba e-so sisinngoe ke lipuo tse tsoang molomong oa motho pele. Molimo O ne O leka ho fana ka leseli ho baetapele bao. Hoja Jesu O ne A ile A leka ho ba ruta, ba ka be ba ile ba nyefola, eaba ha ba Mo mamele. Empa ba etsa eka ba A Mo ruta kapa ba hlahloba tsebo ea Hae ea Mangolo a Halalelang. Boikokobetso ba bocha le mohau o ho Jesu oa ba hlobolisa boikaketsi. Likelello tsa bona tsa bulehela lentsoe la Molimo, ‘me Moea o Halalelang Oa buisana le lipelo tsa bona.

Ba ile ba bona hore tebello eo ba lebelletseng Mesia ka eona ha e tšehetsoe ke boporofeta, empa ba ne ba sa lumele hore ha ba ea utloisisa Mangolo ao ba reng ba a ruta.

### **Batsoali Ba Hae Ba A Ngongoreha**

Ha tsena li ntse li etsahala Maria le Josefa ba ne ba lahlehetsoe ke Jesu. Thabo ea ho tsamaisana tsela le metšoalle ea hapa maikutlo a bona, ‘me ha ba a ka ba bona bosieo ba Hae ho fihlela shoalane e tšoara. Ba lahlehelo ke letsoho le thusang la ngoan’a bona. Ka ho nahana hore O ntse A e-na le bona sehlopheng, ha ba ka ba ikutloa ba khathatsehile. Empa joale ba tšoha. Ba thothomela ha ba hopola hore Heroda o kile a leka ka matla ho Mo ritla nakong ea bosea ba Hae. Menahano e nyarosang ea tlala lipelo tsa bona.

[49]

Ba khutlela Jerusalema ho ea batlisisa ka Eena. Ka letsatsi le hlahlamang ba utloa lentsoe le tloaelehileng, ka tempeleng. Ba ne ba ke ke ba le fosa -le ne le tiile, le tsepame, empa le tletse meloli. Ba fumana Jesu sekolong sa baruti.

Ha a se a ena le bona hape, ‘m’ae a buoa ka mantsoe a bontšang khalemelo, a re: “Ngoan’a ka, u re etselitse’ng tjee? Bona, rōna le ntat’ao re ne re ntse re u batla re tšoenyehile.”

“Le ne le mpatlela’ng?” Jesu A araba. “Na le ne le sa tsebe hore ke tšoanetse ho ba mosebetsing oa Ntate?” Ba shebahala eka ha ba utloisise. Eaba O supa holimo. Sefahleho sa Hae sa khanya. bo-Molimo ba phatsima kahare ho botho. Ba ne ba ile ba mamela ha Jesu A ntse A buisana le borabbi, ‘me ba makatsoa ke lipotso le likarabo tsa Hae.

Jesu O ne A phathahane ke mosebetsi oo A neng A o tletse lefatseng ho tla o phethahatsa empa Josefa le Maria ba ne ba lahlile oa bona. Molimo O ba file tlōtla e phahameng ea ho tšepela Mor’a Hae ho bona. Empa letsati lohle ba ne ba lahehetsoe ke Eena, ‘me eare hoba ho tšoha ha bona bo kokobele ha ba ka ba ipona phoso empa ba qosa Eena.

E ne e le tloaelo ho batsoali ba Jesu ho nka Jesu e le ngoana oa bona. Bophelo ba Hae linthong tse ngata bo ne bo tšoana le ba bana ba bang, ‘me ho ne ho le thata ho hlokomela hore Jesu ke Mora oa Molimo. Khalemelo e bonolo eo mantsoe a Hae a ileng a fetisa a ne a reretsoe hore e tiise maikutlong a bona hore ba tšepetšoe se halalelang.

Karabong ea Hae ho ‘m’ae, Jesu O ile A bontsa, e le khetlo la pele, hore O utloisisa likamano tsa Hae le Molimo. Maria ha ka utloisisa mantsoe a Hae, empa o ne a tseba hore Jesu O hlakisitse hore ha A amane le Josefa, empa ke Mora oa Molimo.

[50] Ha ba tloha Jerusalema Jesu A khutlela hae le batsoali ba Hae ba lefatše, ‘me A ba thusa bophelong ba bona ba mosebetsi. Ka lilemo tse leshome le robeli A amohela setlamo se Mo tlamahantseng lehaeng la Nasaretha, ‘me A phetha mesebetsi joaleka mora, moena, motsoalle le mohai oa moo.

Jesu O ne A lakalitse ho khutla Jerusalema ka khutso le ba tsebang sephiri sa bophelo ba Hae. Ka litšebeletso tsa Paseka Molimo O ne A batla ho hopotsa sechaba sa Hae ka mosebetsi oa Hae o makatsang oa ho ba lokolla bokhobeng ba Egepeta. Ka mosebetsi ona A lakatsa hore ba bone tšepiso ea tokoloho sebeng. Mali a Krete A ne A tšoanetse ho pholosa meea ea bona. Molimo A lakatsa hore ba tle ba ithute, ka thapelo, ka tse amang boqosa ba Krete. Empa hangata ha bongata bo tloha Jerusalema thahasello ea leeto le lipuisano tse monate tseleng li ne li ba lebatsa litšebeletso tseo ba tsoa li bona. Mopholosi ha A ka A hoheloa ke meqoqo ea bona.



### Jesu O Thusa ‘M’ae

Ha ba khutla Jerusalema, Jesu A tšepa hore O tla thusa Josefa le Maria ho ithuta boporofeta bo buang ka litlhoriso tsa Mopholosi. O ne A batla ho bebofaletsa ‘m’ae bohloko boo a neng a tla bo utloa ha A le Kalfari, O ne A nahana ka eena ka nako ena. Maria o ne a tla ba paki ea mahlomola a Hae a ho qetela, ‘me Jesu A rata hore ‘m’ae a utloisise ka boqosa ba Hae, e le hore a tie a mamelle ha lerumo le hlaba pelo ea hae. Ho ka be ho bile bobebe hakaakang ho Maria ho tiisetsa mahlomola a lefu la Hae, haeba a ne ile a utloisisa Mangolo a Halalelang, ao Jesu A neng A leka ho tebisa maikutlo a ‘m’ae ho ona.

Ka bohlasoa ba letsatsi le le leng Josefa le Maria ba ile ba lahlehelo ke Mopholosi, empa ho ile ha ba nka matsatsi a mararo a patio ea matsoalo ho Mo fumana. Ho joalo le ho rōna, ka lipuo tsa lefeela, ho bua ba bang hampe, kapa ho se tsotelle thapelo, le rōna ka letsatsi le le leng re ka lahlehelo ke boteng ba Mopholosi, ‘me ho ka re nka matsatsi a mangata re Mo batla, pele re fumana thabo le khotso eo re ileng ra e lahla.

Re tsoanetse re falimehe e se re mohlomong ra lebala Jesu, ‘me ra feta feela re sa hlokomele hore ha A na le rōna. Ha re hapuo ke lintho tsa lefatše re ikarohanya le Jesu le mangeloi a leholimo. Libōpuoa tsena tse halalelang li ke ke tsa lula moo boteng ba Mopholosi bo sa ratoeng, le moo bo-sieo ba Hae bo sa lemohuoeng.

Ba bangata ba ea litšebelatsong tse halalelang, ‘me ba tsosolosa ke Lentsoe la Molimo, empa ka ho sa tsotelle thapelo le ho ithuta Lentsoe, ba lahlehelo ke mahlohonolo. Ha ba ikarohanya le Jesu, ba koalla khanya ea boteng ba Hae ka ntle.

[51]

E ka ba taba ea bohlokoa ho rōna ha re ka ba le hora ea boikhutso bo mahlonoko, tsatsi le leng le le leng, re nahana ka bophelo ba Krete. Re tsoanetse re nke ntlha ka ntlha, ‘me re lumelle menahano ea rona ho bona karolo ka ‘ngoe ea bophelo ba Hae haholo-holo tse amang litaba tsa ho qetella tsa bophelo ba Hae. Ke ka tsela eona ena tšepo ea rona ho Eena e tlang ho matlafala, lerato la rona le tla sisimoha, ‘me re tla tlatsoa ka moea oa Hae. Ha re ntse re bohile botle ba semelo sa Hae, ha A re “fetola hore re tšoane le eena; re ntse re atloa ke tlōtla ho-eaho-ile.” 1 Bakorinthe 3:18.

[52]

## **KHAOLO EA 9—MATHATA A JESU HA E LE NGOANA**

Tlas'a baruti ba sinagoge bacha ba Bajuda ba ne ba koetlisoa melaong e mengata-ngata eo, joaloka Baiseraele ba sebele-bele e neng ekakhona ba e bōlōke. Empa Jesu ha A ka A ba le thahasello ho melao eo. Ho tloha bongonaneng ha A ka A ikamahanya le melao ea borabi. Mangolo a halalelang e ne e le ao a ithutang ona kamehla, 'me mantsoe a reng, "Ho itsalo Morena," a ne a lutse nako eohle lelemeng la Hae.

A bona hore, batho joale ba sutha lentsoeng la Molimo, 'me ba mamarela mekhoha e se nang bonnete. Bolumeling ba bona ba litšebeletso tse se nang tumelo ba ne ba hloka khotso. Ba ne ba sa tsebe bōlōkōlōhi ba moea bo tlang ka ho sebeletsa Molimo ka 'nete. Leha Jesu A sa ka A amohela ho tsoakoa ha lintho tse ipatleloang ke batho le melao e halalelang, ha A ka A futuhela melao kapa mekhoha eo ea baruti ba rutehileng. Ha A ne A nyatsuo a ka tsela ea Hae e senang boipatlo, O ne A itšetleha ka lentsoe la Molimo ho bontša ho hloka molato ha boitšoaro ba Hae.

Jesu O ne A leka ho khahlisa bao A neng A teana le bona. Erekaha A ne A le bonolo A sa ipehe holimo, bangoli le baholo ba nahana hore O tla hapeha habobebe ke lithuto tsa bona. Empa A ba botsa ka matla a bona Mangolong a Halalelang. O ne A tla mamela mantsoe ohle a tsoang molomong oa Molimo, empa O ne A ke ke A mamela maiqapelo a batho. Jesu O ne A bonahala A tseba Mangolo ho tloha qalong ho isa qetellong, 'me A a beha ka moelelo oa 'ona oa 'nete. Borabbi ba ipolela e le mosebetsi oa bona ho hlalosa mangolo 'me Eena ha Hae e le ho amohela bohlahosi ba bona.

[53]

Ba ne ba tseba hore mekhoha ea bona ha e tšehetsoe ke Mangolo. Le ha ho le joalo ba 'na ba halefela Jesu ka ho se mamele seo ba se ngotseng. Ha ba se ba hlōtsoe ba batla Josefa le Maria, 'me ba ba hlalosetsa hore Jesu O hana ho lumellana le bona. Kahoo A khalemeloa le ho nyatsuo a.

Lilemong tsa bocha ba Hae, Jesu A qala ho ikoetlisetsa ho bopa semelo sa Hae. Esitana le lerato la batsoali ba Hae le ne le ke ke la Mo tlosa ho hlompheng lentsoe la Molimo. Empa tšusumetso ea borabbi ea Mo sulafaletsa bophelo. O ile A tšoanela ho ithuta thuto e thata ea ho thola le ho mamella mathata.

Bana babo, (kamoo bara ba Josefa ba neng ba bitsoa kateng) ba ea ka lehlakoreng la borabbi. Ba ne ba hlompha melaoana ea batho haholo ho feta lentsoe la Molimo, ‘me ba nyatsa tlhompho ea Jesu e tsepameng ea molao oa Molimo ba re O manganga. Ho makaleng ha bona ka tsebo eo A neng A e bontša, ha A araba borabbi, ba bona hore ke Eena eo e leng moruti oa bona. Ba hlokomela hore thuto ea Hae e phahame ho feta ea bona, empa ha ba ka ba hlokomela hore O na le monyeta oa mohloli oa tsebo oo bona ba sa o tsebeng.

### **Jesu O Ne A Hlompha Batho Bohle Ka Ho Tšoana**

Kreste A fumana bolumeli bo lika-likelitsoe ka marako a malelele a khethollo, e le ntho e halalelang hoo e sa keneng linthong tsa bophelo ba tsatsi le leng le le leng. Sebakeng sa hore Jesu A ikhetholle, A ikoalle A le mong phapusing ea Hae, ho bontša semelo sa Hae sa leholimo; ho fapana le hono A sebetsa le batho ka botšepahi. A ba ruta hore bolumeli ha se ntho ea linako tse itseng le libaka tse itseng. Hona e bile khalemelo ho Bafarisi. Ha bonahala hore boikitlaetso ba bona bo kulang ba thahasello ho batho bo ne bo le hole le bonnete ba bo-Molimo. Hona ho ile ha tsosa lehloeo la bona, kahoo ba leka ho tlamella melao ea bona hore e phethoe.

Jesu O ne A ena le chelete e nyenyane hore A ka e fana, empa kamehla O ne A tela lijo tsa Hae e le hore A imolle ba bohloking ho Mo feta. Ha bana babo ba buoa ka khalefo le ba futsanehileng, ba nyelisoang, Jesu O ne A buoa le bona mantsoe a khotatso. Ho ba hlokang, O ne A fana ka mohope oa metsi a pholileng, ‘me A ntse

[54]

A itholetse, e be O beha lijo tsa Hae liatleng tsa bona.

Tsena tsohle tsa khentša bana babo. Kaha ba ne ba le baholo ho Eena ba ikutloa ba tšoanela hore ba Mo laele. Ba Mo qosa ka hore O inahana A phahame ho ba feta, ‘me O ipeha ka holimo ho baruti, baprista le babusi. Hangata ba ne ba leka ho Mo kenya matsoalo, empa A tsoela pele ho itšehetsa ka Mangolo a Halalelang.

## Mathata A Jesu Le Lelapa Labo

Bana babo Jesu ba ne ba Mo shoela mona 'me ba bontša ka ho otloloha khanyetso le nyeliso ea bona ho Eena. Ba ne ba sa utloisise boitšoaro ba Hae. Ho ne ho le teng lintho tse kholo tse hanyetsanang bophelong ba Jesu. E ne e le Mora oa Molimo ea halalelang, empa ebile e le ngoana ea senang matla. Joaloka 'Mopi lefatše e ne e moruo oa Hae, empa maiphihlelong a bophelo ba Hae e ne e le mofutsana. Ha A ka A laba-labela botumo ba lefatše 'me esitana le boemong bo tlase boo A neng A le ho bona bophelong, O ne A khotsofetse. Sena se ile sa halefisa bana babo. Ba ne ba sa utloisise ho khotsofala ha Hae ho nang le botsitso, le thabo ea Hae tlas'a meleko le bohloki.

Jesu ha A ka A utloisisoa ke bana babo, hobane O ne A sa tšoane le bona. Ka ho talima bathong, ba ne ba furaletse Molimo, 'me ba ne ba se na matla a Hae maphelong a bona. Sebopeho sa bolumeli seo ba neng ba se bōlōka se ne se sa fetole semelo. Mohlala oa Jesu ho bona e ne e le ntho e tšoenyang, e sa khaotse. O ne A sa rate sebe, 'me A ke ke A bona bobbe bo etsoa ebe Ha A utloe bohloko bo ke keng ba iphapanyetsoa. Kaha bophelo ba Jesu bo ne bo nyatsa bobbe, A nyatsuo. Batho ba ne ba soma botšephehi ba Hae. Mamello le mosa oa Hae hathoe ke bokoala.

[55] Har'a bohloko bo kileng ba oela batho, ha ho le karolo feela eo Krete A sa kang A e latsoa. Ba bang ba Mo nyelisa ka lebaka la tsoalo ea Hae. Esitana le bongonaneng O ile A kopana le litšebo tse nyelisang, tse mpe, le lifahleho tse nyatsang. Hoja O ne A ile A iphetetsa ka lentsoe la ho teneha kapa chebo ea nyeliso kapa ketso e le 'ngoe e mpe, A ka be A ile A hlōloa ho ba mohlala o phethahe- tseng. Kahoo A ka be A ile A hlōloa ho ntšetsa-pele leano la topollo ea rōna. Hoja le teng A lumela hore lebaka le teng le ka behoang bakeng sa sebe, Satane a ka be a hlōtse, 'me lefatše le ka be le lahlehile. Hangata O ne A qosoa ka bokoala ba hore O ne A sa kopane le bana babo liketsong tse sa lumelloang, empa karabo ea Hae e ne e re, Ho ngoliloe ho thoe, "Ho tšaba Morena ke bona bohla; ho furalla bokhopo ke eona kutloisiso." Jobo 28:28.

Ba bang ba ne ba ikutloa ba phutholohile botenng ba Hae; empa ba bangata ba ne ba mo koekoetla, hobane ba ne ba nyatsoa ke bophelo ba Hae bo se nang letheba. Metsoalle ea bacha e ne e thabela

ha a le teng har'a bona, empa e tenoa ke ho tiea ha Hae, 'me ba mo hlalosa e le eo kelello ea Hae e leng tšesanyane, hape A koalehile. Jesu O ne A araba A re, "Ho ngoliloe ho thoe, 'Mohlankana a ka hloekisa metsamao ea hae joang? Ka ho hahela lentsoe la hao lesaka....Ke bōlōkile tšepiso ea hao, ka e bōlōka ka pelong ea ka, hore ke seke ka u siteloa.'" Pesalema 119:9,11.

Hangata o ne a botsoa hore na ke'ng ha A ikhelosa A sa rate ho tšoana le ba bang kaofela? Ebe O araba A re, ho ngoliloe ho thoe: "Ho lehlohonolo ba latelang litemoso tsa hae,...ba sa etseng tse sa lokang, ba mpang ba tsamaea litseleng tsa hae." Pesalema 119:2,3.

Ha A botsoa hore na ke'ng A sa ikamahanya le masaoana a bacha ba Nasaretha, A re, ho ngoliloe ho thoe, "Ke thabela ho phetha thato ea hao, nke ke ka lebala lentsoe la hao." Pesalema 119:16.

Jesu ha A ka A tseka litokelo tsa Hae. Ha A ka A iphethetsa ha A ne A sebelisoa hampe, empa A jara mahlapa ohle ka mamello. Hangata O ne A botsoa, hore na ke hobaneng A inehella hore A sebelisoe hampe le hona ke bana babo? A arabe A re, ho ngoliloe ho thoe, "Mora oa ka, se lebala thuto ea ka, pelong ea hao melao ea ka u e boloke....E-ba le lerato, u be le botšepahi, molaleng oa hao u itlame ke tsona; u li ngole tlapeng la pelo ea hao. U tla ratoa ke Molimo le batho, u iketsetse lebitso mahlong a bona." Maele 3:1-4.

### **Hobaneng A Neng A Sa Tšoane Le Ba Bang**

Tsela eo Jesu A ileng A e nka e ne e le sephiri ho batsoali ba Hae. O ne A bonahala e le ea khethetsoeng ka thoko. Lihora tsa Hae tsa thabo li ne li fumanaha feela linthong tsa tlhaho, bonnotsing le Molimo. Meso e ne e Mo fumana A le tulong e khutsitseng, 'me A tebisitse maikutlo, A bala Mangolo a halalelang, kapa A le lekunutung le Morena ka thapelo. Kamora' lihora tse khutsitseng O ne A tloha, ho ea hae, ho ea etsa mesebetsi ea lelapa hape.

Maria o ne a kholoa hore ngoana ea halalelang, ea tsoetseng ke eena, ke Mesia, empa a se ke a bontša hore o lumela joalo. Bophelong bohle ba Jesu, Maria o ile a nka karolo mahlomoleng a Hae. Ka masoabi, ea e-ba paki ea mahlomola, le liteko tseo A fetileng ho tsona ha e sa le ngoana le bocheng ba Hae. Ka ho ema le Eena linthong tseo a neng a tseba hore li nepahetse boitšoarong ba Jesu, le Maria o ile a kena maamong a liteko. Maria a sheba

likamano tsa lehae le boikarabello ba ‘m’a ha a hlokometse bana ba hae e le ntho ea bohlokoa ho haheng semelo. Bara le barali ba Josefa ba ne ba tseba sena, ‘me ba leka ho khothalletsa Maria ho leka ho lokisa mekhoha ea Jesu hore e tšoane le ea bona.

Hangata Maria o ne a le khahlanong le Jesu, ‘me a mo khothaletsa hore A ikamahanye le ho latela mekhoha ea borabbi. Empa A hana ho fetola mekhoha ea Hae eleng ho nahana mesebetsi ea Molimo le ho thusa ba kulang. Ha baprista le baruti ba kōpa Maria ho ba thusa ho laola Jesu, a tšoenyeha haholo; empa khotso e fihle pelong ea hae, ha Jesu A hlahisa Mangolo a Halalelang a tšehetsang tsela ea Hae ea tšebetso.

Ka nako e ‘ngoe Maria o ne a tenyetseha lipakeng tsa Jesu le bana babo -bao ba neng ba sa lumele hore O rōnngoe ke Molimo; empa bopaki bo ne bo le bongata hore O ne A e-na le boleng ba Molimo. Bophelo ba Hae e ne e le tomoso, bo sebetsa har’a sechaba. A hloekile A tsamaea har’a batho ba sa tsotelloeng, ba khopo, ba sa hlompheng, har’a balekhetso ba senang tōka, le mahlasoa a sa tsotelleng, har’a ba senyang, Basamaria ba khopo, masole a bahedene, batho ba motse ba khopo, le matšoele a kopa-kopaneng. O ne A bua mantsoe a khothatso ho ba khathetseng, ba mpang ba tlamelloa ho jara meroalo e boima. A ba phetela lithuto tseo a ithutileng tsona tlhahong -tsa lerato le ho loka ha Molimo.

[57] A ruta bohle hore ba italime e le ba abetsoeng litalenta tsa bohlokoa. Ka mohlala oa Hae A ba ruta hore nako tsohle li lokela ho nkoa e le tsa bohlokoa ‘me li sebelisetsoe mererong e halalelang. O ne A sa fete motho feela, A mo nka e le ea se nang thuso, empa O ne A kenya khothatso le tšepo ho batho ba sa tsebisahaleng, A ba khothatsa hore ba ka fihlela semelo se tla bontša hore ke bana ba Molimo. Hangata O ne A kopana le ba neng ba se na matla a ho itšoasolla marabeng a Satane. Ho ba nyahameng, ba kulang, ba lekoang le ba oeleng, Jesu O ne A bua mantsoe a bonolo, a kutloelo-bohlōkō e fetisisang.

Ba bang ho bao A neng A kopana le bona ba ne ba le ntoeng le sera sa meea ea batho. Ba joalo O ne A ba khothatsa hore ba tiisetse, hobane mangeloi a Molimo a lehlakoreng la bona, ‘me a ba fa tlhōlo. Bao A ileng A ba thusa ba ile ba kholiseha hore Enoa ke Eena eo ba ka Mo tšepang ka tšepo e phethahetseng.

Jesu O ne A ena le thahasello mahlōkōng ka ho fapakana, ‘me ho e mong le e mong ea tšoenyehileng A tlisa pheko. Mantsoe a Hae a ne a ena le sehlare se folisang. Ho ne ho se motho ea ka reng O entse mohlolo. Empa matla a folisang a lerato a ne a tsoa ho Eena. Ho tloha bongoaneng ba Hae, ha A ka A ipeha pele ha A ne A sebeletsa batho.

Empa bongoaneng, bocheng le bohlananeng Jesu O ne A tsamaea A le mong. Bohloeking le botšepeling ho ne ho se le ea mong lehlakoreng la Hae. Sheba Esaea 63:3. O ne A tseba hore ntle le hore ho fetoloe mekhoha le tsela tsa batho, bohle ba tla lahleha. O ne A tletse merero e matla, e meholo ‘me A tsoela pele ka leano la bophelo ba Hae hore Eena E tle e be Leseli la batho.

[58]

## **KHAOLO EA 10—LENTSOE LE HOANG FEELLENG**

*[E itšetlehile ka Luka 1:5-23, 57-80; 3:1-18; Matheu 3:1-12;  
Mareka 1:1-8.]*

Har'a ba tšepahalang ba Iseraele ho ile ha hlaha pulamaliboho ea Krete. Moprsta ea holileng e leng Sakariea le mosali oa hae Elisabetha “ba ne ba lokile pel'a Molimo,” bophelong ba bona bo bonolo leseli la tšepo le ile la khanya joaloka naleli har'a lefifi. Lelapa lena le tšepelang ho Molimo la fuoa mora ea tšepisitsong eo a tlang ho ho etella Morena pele, le ho mo lōkisetša tsela.

Sakariea o ne a ile Jerusalema ho ea etsa litšebeletso tempeleng nako ea beke. Ha a ntse a eme pel'a aletare ea khauta ka sehalelong sa tempele, hang-hang a bona lengeloi la Morena “le eme lehlakoreng le letona la aletare.” Ka lilemo tse telele o ne a ntse a rapella ho tla ha Mopholosi; ‘me lithapelo tsena li ne li se li le haufi le ho arabeloa.

O ile a lumelisoa ka tšepiso e monate e reng, “‘se tšabe, Sakariea, hobane thapelo ea hao e utloiloe, mohats'a hao Elisabetha o tla u tsoalla mora, ‘me u tla mo rea lebitso la Johanne...hobane o tla ba moholo pel'a Morena; ha a ka ke a noa veine leha e le seno se tahang, o tla tlala Moea o Halalelang...O tla etella Morena pele ka moea le ka matla a kang a Elia, ho boelanya lipelo tsa bo-ntata le bana ba bona, le ba sa utloeng, maikutlong a ba lokileng, ho lokisetša Morena sechaba se mo lokelang.’ Sakariea a re ho lengeloi: ‘Ke tla tseba taba eo ka'ng, kaha ke hōlile, le mohats'a ka a tsofetse?’”

Motsotsoana feela moprista oa leqheku a lebala hore seo Molimo O mo tšepisitseng sona O ka se etsa. A, phapang e kaakang pakeng tsa ho se lumele ha hae le tumelo ea Maria, eo karabo ea hae ha a araba molaetsa oa lengeloi a ileng a re “Ke lekhabunyane la Morena; a ho be joalo ho ‘na ho ea ka polelo ea hao!” Luka 1:38.

[59]

Tsoalo ea mor'a Sakariea, joaloka ea ngoana oa Aborahama le ea ngoana oa Maria e ne e ruta ‘nete e tiileng ea hore, seo re sitoang



ho se etsa se tla etsoa ke matla a Molimo ho motho e mong le e mong ea lumelang. Ka tumelo bophelo ba moea bo ea tsoaloe, ‘me re tseba ho etsa mesebetsi e lokileng.

Lilemong tse makholo a mahlano tse fetileng, lengeloi Gabariele le ne le ile la tsebisa Daniele linako tsa boporofeta tse ileng tsa fihlela nakong ea ho tla ha Krete. Tsebo ea hore linako tsa boporofeta bona li se li le haufi le qetello e ile ea tsitsinya Sakariea ho rapella ho tla ha Mesia. Lona lengeloi leo le ileng la fana ka boporofeta ke lona le ileng la tsebisa ka ho phethahatsoa ha bona.

### Sakariea A Belaela

Sakariea a bontša pelaelo mantsoeng a lengeloi. O ne a sa tšoanela ho buoa ho fihlela mantsoe ao a lengeloi a phethahatsoa. “‘Me bona u tla ba semumu, u sitoe ho bua, ho be ho fihle matsatsi ao litaba tseo li tla etsahala ka ‘ona, kahobane u sa ka oa lumela lipolelo tsa ka, tse tla etsahala nakong ea tsona.’” E ne e le mosebetsi oa moprista litšebeletsong ho rapella tšoarello ea libe le ho tla ha Mesia. Empa ha Sakaria a re o leka ho rapella ho tla ha Mesia a sitoa ho bua leha e le lentsoe. Ha a etsoa ka sehalalelong, sefahleho sa hae se ne se khanya ka khanya ea Molimo, ‘me batho “ba lemoha hobane o bone mohlolo tempeleng.” Sakaria “a lula e le semumu” empa ka “lipontso” a buisana le bona ka seo a se boneng le seo a se utloileng.

Hang ka mor’a tsoalo ea ngoana ea tšepisitsoeng, leleme la ntat’a ngoana la raroloha; “litaba tseo tsa hasana kahohle maloting a Judea, ‘me bohle ba li utloang ba li boloka lipelong tsa bona, ba re ha ho le joalo ngoana eo e tla ba eng?’” Tsena tsohle tsa hapela maikutlo ho tleng ha Mesia.

Moea O Halalelang oa lula holim’a Sakaria, ‘me a porofeta ka bonqosa ba mor’a hae:

Ha e le uena, lesea u tla bitsoa moporofeta oa ea  
Holimo-limo:

Hobane u tla etella sefahleho sa Morena pele ho  
lokisa litsela tsa Hae;...

U tie u nee sechaba sa Hae tsebo ea poloko,  
Tsoarelong ea bona.

“Ha e le ngoana, a ‘na a hola, a ipha matla moeeng; a ‘na a lula mafeelleng, ha ba ha fihla letsatsi leo a hlahileng pel’a Iseraele ka lona.” Molimo O ile oa bitsa mor’a Sakaria mosebetsing o moholo oo e sale A o abela batho. ‘Me Moea oa Molimo O ne O tla ba le eena haeba a ne a ka boloka litaelo tsa lengeloi.

Johanne o ne a tsoanetse ho tliša leseli la Molimo ho batho. O ne a tsoanetse ho bontša batho bohlokoa ba ho hloka ho loka ha Hae. Moromuoa ea joalo o tsoanetse a halalele e be tempele moo Moea oa Molimo O lulang teng. O tsoanetse a phele hantle ‘meleng, ‘me a be le matla kelellong le moeeng. Kahoo ho ne ho hloka hore a itšoare hantle a se khalle tse mpe.

Nakong ea Johanne mokolobetsi, ho khalla maruo le lerato la boithabiso le boikakaso li ne li atile haholo. Litakatso tse hapang maikutlo, mekete ea boithabiso le lino li ne li tetebetsa maphelo a batho, li thothofatsa pono ea semoea, ‘me li nyenyefatsa hore motho a be le pono e chatsi sebeng. Johanne a tšoanela hore a tiee, a eme e le ea lokisang bocha. Ka bophelo ba hae ba boitimo le seaparo se tlaase, o ne a tšoanela ho khalemela boitšoaro bo feteletseng ba nakong ea ho phela ha hae. Kahoo thuto ea boitimo e ile ea fuoa batsoali ba hae ke lengeloi le tsoang teroneng ea Molimo.

Bongoaneng le bocheng matla a boitšoaro a ne a hloka hore. Mekhoa e theoang lilemong tse qalang e fana ka qeto hore na motho e tla ba ea hlolang kapa ea hloloang ntoeng ea bophelo. Bocha ke nako ea ho jala, ke bona bo fanang ka semelo se kotuloang bophelong bona esitana le bophelong bo tlang.

Ha ho lokisetsoa ho tla ha Krete lekhetlo la pele, Johanne e ne e le moemeli oa ba bang ba neng ba eletsa batho ka ho tla labobeli ha Morena. Lefatše ne le inehetse linthong tsa lefeela ‘me liphoso le mashano li atile. Bao ba phethahetseng khalalelong ka ho tšaba Molimo ba tsoanetse ho ithuta boitimo le boitšoaro. Sheba 2

[61] Bakorinthe 7:1. Litakatso le ho khala li tsoanetse ho ba tlas’a taolo e matla ea kelello. Boitšoaro bona ke ntho ea bohlokoa matleng a kelello le pono ea moea ka linnete tsa lentsoe la Molimo.

### **Thuto Ea Johanne E Sa Tloaelehang**

Ho ea ka tšoanelo mor’a Sakaria o ne a tsoanetse ho rutoa likolong tsa borabbi. Empa lithuto tseo tsa borabbi li ne li ke ke tsa

tsamaea-moho le mosebetsi oa hae. Molimo O ile a ‘mitsetsa nahathote hore a tle a ithute lintho tsa tlholeho le tlholeho ea Molimo.

Johanne a fumana lehae la hae lithoteng tse feela, liphuleng tse hlaha le mahaheng. Se mo pota-potileng sebakeng sena se ne se hlaolela litakatso tse ratehang, tse monate, tsa boitelo. Feelleng mona o ne a ka ithuta lithuto tsa tlholeho, tsa tšenolo ea ho itokisetsa nako e tlang. Ho tloha bongoaneng borumuoa ba hae bo ne bo beiloe ka pel’a hae ke batsoali ba hae ba tšabang Molimo, ‘me a amohela mosebetsi oo ka bokhethahi. Ho ba inotši lehoatateng e ne e le ntho e ntle e Mo tlosang sechabeng se silafalitsong ke ho hloka tumelo le bohloeki. O ile a tšaba ho thetsa bobele e le hore a se ke a lahlehela ke kclello ea ho elelloa sebe.

Empa bophelo ba Johanne ha bo ea qetoa bolutung moo a leng mong. Nako le nako o ne a ee a iteanye le batho ba bang ho buisana le bona, hape e le motho ea thahasellang ho boha se etsahalang lefatšeng. Ka tataiso ea Moea o Halalelang O ile A ithuta le ho utloisisa batho hore na a ka ba thusa joang hore ba amohele molaetsa oa leholimo. Moroalo oa thomo ea hae o ne o le mahatleng a hae. Boikhutsong le thapelong a ipeha pel’a Molimo hore A mo matlafatse mosebetsing oo a tlang ho o phetha bophelong ba hae.

Ha a le feelleng ha a ka a qheleloa ka thoko ho liteko. O ile a hlaseloa ke moleki, empa pono ea moea oa hae e ne e hlakile, ‘me ka lebaka la Moea o Halalelang O ile A tseba ho bona le ho hanela lithetso tsa Satane.

Joaloka Moshe ha a le har’a lithaba tsa Mediane, Johanne o ne a koaletsoe ke boteng ba Molimo. Lehae le lehoatateng le masoabi le chebahalo ea tlhaho li ne li bontša bocmo ba Iseraele. Tsimo ea morara ea Molimo e ne e fetohile lesupi. Empa holimo maru a matšo a bontša a potapotiloe ke mookoli oa tšepiso. [62]

Boinotsing, bosiuung bo khutsitseng, a bala tšepiso ea Molimo eo a ileng a e fa leloko la Abrahama le se nang palo joaloka linaleli. Leseli la meso, la ‘molella ka Eo ea tlang ho ba joaloka “Leseii la meso, ha tsatsi le chaba ha meso e se na maru.” 2 Samuele 23:4. Har’a mpa ea motšoare a bona botlehali ba khanya ha “Khanya ea Jehova e tla bonahala, nama eohle e tla e bona hammoho.” Esaia 40:5.

Ka boikokobetso ba hlompho, empa moea o phahame ke thabo, a batlisisa mangolong a boporofeta tšenolo ea ho tla ha Mesia. Shilo

o ne a tsoanetse ho hlaha pele terone ea Davida e hloka eo eleng oa leloko la hae. Joale nako e fihlile. ‘Muisi oa Roma o lutse ntlong ea borena thabeng ea Sione. Ka lentsoe le tiileng le tsoang ho Jehova, Krete O ne A se A hlahile.

### **Molaetsa Oa Esaia O Hlakileng**

Lithuto tsa Esaia tse hlakileng tsa khanya ea Mesia, Johanne o ne a ithuta tsona bosiu le motšoare. Sheba Esaia 11:4; 32:2; 62:4. Ea lutseng nahathothe, a le bolutung, pelo ea hae ea tlatsoa ke pono e halalelang. A bona Morena a le khanyang, ‘me bo-eena ba le baleha. A boha Motlotlehi ea Halalelang; ‘me a ikutloa a le feela, a sa tšoaneleha. O ne a se a itokisetsa ho hahamallela pele ho ba lenqosa la leholimo, a sa ferekanngoe ke batho, hobane o ne a tšepamisitse maikutlo a hae ho ea halalelang. O ne a ka ema pel’a babusi ba lefatše a sa tšabe letho, hobane o ile a khumama ka boikokobetso pel’a Morena oa marena.

Johanne ha a ka a utloisisa ka ho phethahala boemo ba ‘Muso oa Mesia empa, ho tla ha Morena le ho loka ha Hae, le ho thehoa ha sechaba sa Iseraele e le se halalelang e ne e le eona tšepo ea hae e kholo.

O ile a bona batho ba habo ba khotsofetse, ‘me ba robetse libeng tsa bona. Molaetsa oo Molimo A ileng A o fa Johanne, o ne o tšoanetse ho ba nyarosa mokhathaleng oa bona. Pele peo ea evangeli e ka fumana tulo, mobu oa pelo o tšoanetse hore o thuo, o lokiso e hantle. Pele ba ka fumana pheko ho Jesu, ba tšoanetse ba tsosoe kotsing eo e ba bakelang maqeba a sebe.

[63] Molimo ha O romele maqosa ho koeetsa ba sa halaletsoang hore ba ee lefung. O beha meroalo e boima letsoalong la ea etsang bobee, ‘me A hlabe moea ka litsenene tsa kholiso. Maqosa a mangelo a beha kahlolo ea Molimo e le e tšosang hore batho ba bone bohloki ba bona. Seatla se kileng sa ikokobetsa leroleng se phahamisa ba bakang.

### **Moeling Oa Phetohelo**

Ha boqosa ba Johanne bo qala, sechaba se ne se le moeling oa phetohelo. Ha Arkelausa a tlosoa, Judea e ile ea beoa tlas’a puso ea

Roma. Boqhekelli le bohatelli ba ‘muso oa Roma, le liteko tsa bona tsa ho tliša litšoantšo le meetlo ea bohetene li ile tsa tsosa bora bo ileng ba tšolla mali a linatla tse ngata-ngata tsa Iseraele.

Hara marata le mofere-ferere, lentsoe la utloahala le tsoang feel-leng, le tiileng le matla, empa le tletse tšepo: “Bakang hobane ‘muso oa Maholimo o haufi.” Ka matla a macha a makatsang batho ba sisimoha. Ena e ne e le tsebiso e bolelang hore ho tla ha Krete ho se ho le haufi. Ka matla le ka moea oa Elia, Johanne o ile a khalemela bokhopo ba sechaba hammoho le libe tse etsoang. Mantsoe a hae a ne a hlaba ebile a kholisa. Sechaba se ile sa ferekana. Matšoele-tšoele a batho a ile a bokana lefeelleng.

Johanne a biletsa batho pakong. E le bopaki ba pako sebeng, o ile a ba kolobetsa ka har’a metsi a Jorodane. Kahoo o ile a phatlalatsa hore bao ba ipolelang hore ke bakhethoa ba Molimo ba sentsoe ke sebe. Ntle le hore pelo e hloekisoa, ba ke ke ba eba le kabelo ‘musong oa Mesia.

Mahosana le borabbi, masole, balekethoa le banna ba motse ba ile ba phalla ho tla mamela moporofeta. Ba bangata ba ile ba bitsetsoa pakong, ‘me ba amohela kolobetso, hore ba tle ba be le kabelo ‘musong o a ileng a o phatlalatsa.

Bangoli le bafarisi ba bangata ba tšile ho tla ipolela libe tsa bona, ‘me ba kopa kolobetso. Ba ne ba ile ba khelosa batho hore ba thabele litšebeletso tsa bona ba bolumeli, empa joale liphiri tse ba kukunelang tsa maphelo a bona tsa senoleha. Empa Johanne o ile a makatsoa ke hore bongata ba bona ba ne ba sa kholoe hore sebe se teng ho bona. E ne e le batho ba busoang ke nako. Joaloka metsoalle ea moporofeta, ba ile ba tšepa hore ba tla fumana mohau ho khosana e tlang. Ka ho fumana kolobetso ba hopala ho tiisa tšusumetso ea bona bathong.

[64]

### **Khalemelo E Bohale Ea Johanne Ho Baikaketsi**

Johanne a bua le bona ka khalefo a re, “Malinyane a marabe le tšositsoe ke mang ho balehela bohale bo tlang? behang litholoana tse tšoanelang pako.” Kaha Bajuda ba ne ba ikorohantse ho Molimo, ba ile ba utloa bohloko tlas’a kahlolo tsa Hae. Ho arohana le Molimo e bile sesosa sa bokhoba ba bona naheng ea bahetene. Kaha linakong tsa ho feta Molimo O ile A ba bontsa mohau o moholo, eaba ba

tšireletsa libe tsa bona. Ba ithetsa ka hore ke bona ba lokileng ho feta lichaba tse ling, ‘me mahlohonolo a Molimo a khethetsoe bona.

Johanne a tsebisa baruti ba Iseraele hore boikhohomoso, mona le bokhopo ba bona li fana ka thohako e mpe ho batho. Ha ho talingoa leseli leo ba ileng ba le fumana ho Molimo, ba ne ba le babe ho feta bahetene. Molimo O ne A sa itšetleha ka bona ho phethahatsa leano la Hae. O ne a ka bitsetsa sechaba se seng mosebetsing oa Hae.

“Hape” ho rialo moporofeta, “selepe se se se beiloe metsong ea sefate. Sefate ka seng se sa beheng tholoana tse molemo se tla rengo, se lahleloe mollong.” Ha tholoana e se na thuso, lebitso le ke ke la pholosa sefate hore se rengoe. Johanne a bolella Bajuda hore haeba bophelo le semelo sa bona ha se tsamaee ‘moho le molao oa Molimo, ha se ba Hae.

Johanne o itse, bohle ba tlang ho ba litho tsa muso oa Krete ba tla fana ka bopaki ba tumelo le pako. Mohau le botšepahi li tla bonoa maphelong a bona. Ba tla hauhela ba hlokang ba tšireletse ba sa tšireletsehang, ‘me ba fane ka mohlala oa ho loka le kutloelobohloko. “Na ke fela ke kolobetsa ka metsi, empa e mong oa tla ea mphetang ka matla, eo ke sa lokelang ho lokolla leqhoele la lieta tsa hae; ke eena ea tla le kolobetsa ka Moea o Halalelang le ka mollo.”

[65] Esaia o ile a bolela hore Morena ke Eena ea tla hloekisa batho ba Hae “Ka moea oa kahlolo, le ka moea o hlokolang.” Esaia 4:4.

Ho bohle ba inehelang tlas’a matla a Hae, Moea oa Molimo o tla timetsa sebe. Sheba Baheberu 12:29. Empa haeba batho ba khomarela sebeng, khanya ea Molimo e ritpitlang sebe e tla ba ritpitla. Ho khutleng labobeli ha Krete ba khopo ba tla ritpitloa. Morena O tla ba felisa ka moea oa molomo oa Hae, ‘me O tla mo timetsa ka ponahalo ea ho hlaha ha Hae. (Sheba 2 Bathesalonika 2:8.) Khanya ea Molimo e fanang ka bophelo ho ba lokileng e tla timetsa ba khopo.

Nakong ea Johanne mokolobetsi, Krete O ne A se A le haufi le ho hlaha e le Eena Mosenoli oa semelo sa Molimo. Boteng ba Hae bo ne bo tla senola sebe sa bona. Ke ha feela ba lumela hore ba tlosoe sebeng ba ka bang le kabelo ea ho rapela ‘moho le Eena.

Ke ka tsela e joalo Mokolobetsi a phatlalalitseng molaetsa oa Molimo ho Iseraele. Ba bangata ba ile ba mamela, ‘me ba nehelana ka tsohle, hore ba tle ba sekehele tsebe. Ha se ba bakae ba ileng ba thaba ‘me ba tšepa hore ekaba ke Mesia. Empa ha Johanne a bona

---

batho ba e tla ho eena, a batla monyeta o mong le o mong oa ho  
lebisa tumelo ea bona ho Ea neng A tsoanetse ho tla.

## KHAOLO EA 11—KOLOBETSO EA JESU

*[E itšetlehile ka khaolo ea Matheu 3:13-17; Mareka 1:9-11; Luka 3:21.]*

Molaetsa oa moporofeta oa lefeelleng, o ile oa fihlella mafu-manehi a neng a phela metseng e maralleng, e thoko, le batšoasing ba litlhapi pel'a leoatle. Molaetsa ona o ile oa amoheloa ka tieo, ka lipelo tse tletseng cheseho, ke batho bana ba batho. Nazaretha, molaetsa ona o ile oa phetoa ka setorong sa 'metli oa mapolanka, seo e neng e kile ea e-ba sa Josefa. E mong O ile A elelloa pitso ena, A elelloa hore nako ea Hae e se e fihlile. O ile A lumelisa 'm'ae, A latela batho ba naha eo ba neng ba subuhlellana Jorodane.

Jesu e ne e le motsoala oa Johanne Mokolobetsi, empa ba ne ba es'o ka ba kopana. Sena se ne se etsahetse ka morero oa Molimo. E ne e le hore ho se be ea ka ba qosang ka hore ba ile ba rera 'moho, hore e mong a tšehetse litaba tsa e mong.

Johanne o ne a tseba ka lietsahala tse ileng tsa tšoaea tlhaho ea Jesu, ka ketelo ea hae Jerusalema boshanyaneng ba hae, le ka bophelo ba hae bo hlokanang sebe. O ne a lumela hore ke Mesia empa o ile a belaetsoa ke ho se itlhamise ha Jesu, le ho se fane ka bopaki bo khethihileng ba thomo ea hae. Leha ho le joalo, o ile a ema a lebella ka tumelo. O ne a ile a senoleloa hore Mesia O tla kolobetsoa ke eena, le hore letšoa la semelo sa hae sa bo-Molimo le tla bontšoa.

Ha Jesu A fihla ho Johanne ho kolobetsoa, Johanne o ile a elelloa bohloeki ba semelo sa hae, bo neng bo e-s' o bonoe ho motho ofe kapa ofe. Boteng ba hae bo ne bo tlisa tšabo. Tsena li ne li lumellana le se neng se senoletsoe Johanne ka Mesia. Empa ho ne ho ka etsahala joang hore eena, moetsalibe, a kolobetse Ea senang sebe? Ke ka lebaka lang hore Eena ea neng A sa hloke pako, A kene tšebeletsong ea ho ipolela libe, le ho hlatsuo ha melato?

Jesu ha A kōpa kolobetso, Johanne o ile a itatota a re, “Eka khona ebe ‘na ea kolobetsoang ke uena, athe uena u tla ho ‘na?’” Empa Jesu A mo araba A re, “‘Lesa, joale, hobane ka tsela ena re lokela ho



phethahatsa hohle ho lōkileng.’ Johanne a lumela. Hang-hang hoba Jesu a kolobetsoe, a tsoa metsing, ‘me bonang, a buleloa leholimo, a bona Moea oa Molimo o theoha e ka leeba, o etla holim’ a hae.’

### Jesu Ea Senang Sebe Oa Kolobetsoa

Jesu ha A ka A amohela kolobetso e le ho ipolela melato molemong oa Hae. O ile A ikamahanya le baetsalibe, A nka mehato eo re tšoanelang ho e nka, le ho etsa mosebetsi oo re lokelang ho O etsa. Bophelo ba Hae ba ho utloisoa bohloko, le mamello, ka mor’a kolobetso ea hae, e ne e le mohlala ho rōna.

Ha A tsoa ka har’a metsi, Jesu O ile A khumama, A rapela lebōpong la nōka. Joale O ne A kena ntoeng ea bophelo ba Hae. Le hoja E ne E le Morena oa khotso, ho tla ha Hae ho ne ho tšoana le ha sabole e huloa selateng sa eona. Muso oo A neng A tlil’o o haha, o ne o fapane le o neng o lakatsoa ke Bajuda. O ne A tla talingoa e le sera le mosenyi oa mekhoha ea tšebeletso le ea bophelo ba Iseraele, A ahlōloe ka hore ke Bele-Sebule. Ho ne ho se le ea mong lefatseng ea neng ileng a Mo utloisisa homme O ne A sa ntsane A tla tšoanela ho tsamaea A le mong. ‘M’ae le bana babo ba ne ba sa utloisise thōmo ea Hae. Esita le barutuoa ba Hae ba ne ba sa Mo utloisise.

A tšoanela ho jara melato le thohako ea rona e le ea tšoanang le rona. Eena ea senang sebe, A tšoanela ho utloa lihlong tsa sebe, morati oa khotso A lule har’a mefere-fere le leshano, bohloeki bo lule le litšila. Sebe ka seng, ho hloka kutloano ka ‘ngoe, tšilafalo ka ‘ngoe e ne e le sehlabi se sehlo moeeng oa Hae.

A tšoanela ho tsamaea tseleng A le mong. Pholoho ea lefatše ea e-ba holim’a Hae, Eena ea ileng A amohela bofokoli ba batho. O ile A bo bona, A bo utloa kaofela empa sepheo sa Hae sa ema se tiile. [68]

Mopholosi O ile A tšolla moea oa Hae thapelong. O ne A tseba kamoo sebe se thatafalitseng pelo tsa batho, ka moo ho neng ho tla ba thata ho utloisisa thōmo ea Hae le ho amohela pholoho. O ile A kōpa hore Ntat’ae A Mo fe matla a ho hlōla ho se lumele ha bona, ho khaola liketane tseo Satana a ba tantetseng ka tsona, le ho hlōla mosenyi.

Mangeloi a ne a e-s’o ho mamele thapelo e joalo haesale. Ntate ka bo-Eena O ne A tla araba kōpo ea Mora oa Hae. Maholimo

a buloa ‘me ntho e kang leeba, e nang le khanya e hloekileng, ea theohela holim’ a hlooho ea Mopholosi.

Ke batho ba seng bakae, kante ho Johanne, ba ileng ba bona pono ena ea leholimo. Empa maikutlo a mahlonoko a boteng ba Molimo a ile a tlala ho ba neng ba bokane moo. Sefahleho sa Kreste se neng se lelaletse holimo, se ne se tletse khanya eo ba neng ba es’o ho e bone ho motho. Lentsoe le ile la utloahala, le hlaha maholimong le re “Enoa ke Mora oa ka eo ke mo ratang, ea nkahlang!”

### **Tiiso Ea Leholimo**

Mantsoe a na a ile a buuo a ho susumetsa ba neng ba lebeletse pono ena hore ba be le tumelo, le ho matlafaletsa Mopholosi thōmo ea Hae. Lehoja libe tsa lefatše le khopo li ne li beiloe holim’ a Kreste, lehoja ho nka boemo bo oeleng ba batho ho ne ho Mo theotse, lentsoe le tsoang leholimong le ile la Mo hlalosa e le Mora oa Rabosafeleng.

Johanne o ne a ile a ameha haholo. Ha khanya ea Molimo e aparela Jesu, ‘me lentsoe le tsoang leholimong le utloahala, Johanne a tseba hore Eo a neng a qeta ho Mo kolobetsa ke Mopholosi oa lefatše. A otlollela letsoho la hae ho Jesu ‘me a Mo supa, a hōoa a re, “Bonang Konyana ea Molimo e tlosang sebe sa lefatše!” Johanne 1:29

[69] Har’ a ba neng ba utloa mantsoe ana, esita le ho eena ea neng a a bua, ha ho ea ileng a utloisisa bohlokoa ba mantsoe ana, “Konyana ea Molimo”. Batho ba bangata ba Iseraele ba ne ba nka mahlabele joalo ka ha bahedene ba nka a bona — ba ne ba a nka e le nyehelo ea ho thiba bohale ba Molimo. Molimo O ne O lakatsa ho ba ruta hore lerato la Hae le ba file mpho e ba khutlisetsang ho Eena.

Mantsoe a builoeng ho Jesu a reng, “Enoa ke Mora oa ka eo ke mo ratang, ea nkahlang!” a akaretsa batho bohle. Le hoja re le baetsalibe, re bile re fokola, ha re lahleloe ka thōko joale ka ntho tse hloakang thuso. “E le hore re rorise mohau o tlōtlehang oa hae, oo a re hauhetseng ka oona, ka Mora oa hae ea ratoang.” Baefese 1:6. Khanya e ileng ea aparela Kreste, ke kano ea lerato la Molimo ho rōna. E re bolella ka matla a thapelo — kamo lentsoe la motho le ka fihlang tsebeng ea Molimo ‘me likōpo tsa rōna tsa amoheloa makhotleng a leholimo. Lefatše le arohantsoe le leholimo ke sebe empa Jesu O kopantse leholimo le lefatše hape, ka khanya ea Hae.

Khanya e ileng ea theohela hloohong ea Mopholosi e tla theohela ho rona ha re rapela, re kōpa thuso ea ho hlōla moleko. Lentsoe le ileng la bua le Jesu le re ho e mong le e mong ea lumelang, “Enoa ke ngoana oa ka eo ke khahlisoang ke eena.”

Molopolli oa rōna O butse tsela e le hore baetsalibe ba babehali, batho ba hatelletsoeng, le ba nyefoloang, ba fumane mocha oa ho ea ho Ntate. Bohle ba ka fumana lehae meahong e metle eo Jesu A ileng ho ea e lōkisa.

## KHAOLO EA 12—MOLEKO FEELLENG

*[E itšetlehile ka khaolo ea Matheu 4:1-11; Mareka 1:12,13; Luka 4:1-13.]*

Eaba Jesu O isoa ke Moea feelleng ho ea lekoa ke Diabolosi. A itima lijo ka matsatsi a mashome a mane, le masiu a mashome a mane, a nt’o lapa.” Matheu 4:1.

Jesu ha A ka A imemela moleko. O ile A ea lefeelleng ho ba mong, ho tebisa maikutlo ka thōmo ea Hae. O ne A tlameha ho itokisetsa tsela e mali eo A neng A tsoanetse ho e tsamaea. Empa Satane o ile a lekanya hore eo ke eona nako e ntle haholo ea ho Mo nanarela.

Lintho tsa bohlokoa li ne li le kotsing. Satane o ne a re lefatše ke la hae, ‘me a ipitsa “khosana ea lefatše lena.” O ne a re batho ba mo khethile e le Morena oa bona ‘me ke ka bona a nkileng puso ea lefatše. Krete O ne A tlile ho tla bontša ho hloka ‘nete ha litaba tsa Satane. E le Mor’a Motho, Krete O ne A eme A tšepahetse ho Molimo. Ke ka mokhoa oo ho neng ho tla bonahala hore Satane ha a ea hapa batho bohle, le hore taba ea hore lefatše ke la hae ke thetso. Bohle ba neng ba laba-labela ho pholoso matleng a hae ba ne ba tla lokolloa.

Satane o ne a tseba hore matla a hae lefatšeng ha a phetheha. Batho ba ne ba le teng ba neng ba bonahala ba mo hlōla ka matla. (Sheba Tsimoloho 3:15.) O ile a hlokomela hore mahlabelo a neng a etsoa ke Adama le bara ba hae ke letšoao la hore lefatše le leholimo li sebelisana ‘moho. Eaba o itokisetsa ho ferekanya hore ho se be le kutloano. A hlahisa Molimo hampe ‘me a hlalosa le litšebeletso tse neng li supa Mopholosi hampe. A etsa hore batho ba tšabe Molimo, ba nke A thabela hore ba felisoe. Mahlabelo a neng a tšoanela hore a senole lerato la Molimo, a re a fanoa e le mokhoa oa ho kokobetsa khalefo ea Hae.

Ha molaetsa oa Molimo o ngotsoeng o fanoa, Satane a ithuta boporofeta. Ho tloha molokong o mong ho isa ho o mong, a sebeletsa ho fofatsa batho e le hore ba tie ba hane Krete ha A hlaha.

Ha Jesu A tsoaloe, Satane A tseba hore Eo ea teng, O tli'l'o loantsa puso ea hae. Hore Mor'a motho A tie mona lefatseng lena, A nkile sebōpeho sa botho, ha mo nyarosa. O ile a sitoa ho utloisisa lerato le joalo. Ho tloha nakong eo a neng a tebeloa Holimo, a itherele ho etsa hore ba bang le bona ba oe. O ne a tla etsa hore ba eise lintho tsa leholimo, 'me a etse hore pelo tsa bona li khoramele lintho tsa lefatše.

### Satane A Rera Ho H151a

Ho tloha nakong eo molaoli oa leholimo E neng E le lesea Betlelehema, O ile A 'na A hlorisoa ke e mobe. Makhotleng a Satane ho ile ha reroa hore a hlōloe.

Matla a bobbe a ne a mo latelletse tseleng ea hae ho Mo loantsa le hore ha ho ka etsahala, a hlōloe. Ha Mopholosi A kolobetsoa, Satane o ile a utloa lentsoe la Jehova ha A paka ka bo-Molimo ba Jesu. "Ka ho roma Mora oa hae e le sehlabelo sa sebe, a inketse botho bo tšoanang le ba baetsalibe," (Baroma 8:3) Ntate ka boena A bua. O ne A ile A bua pele le batho ka Krete; Joale O ne A tla buisana le batho A le ho Krete. Joale ha totobala hore likamano lipakeng tsa Molimo le motho li khutletse malulong.

Satane a bona hore ke feela hore a hlōle kapa a hlōloe. Matla 'ohle a bokoenehi a ne a hlometse khahlanong le Krete.

Ba bangata ha ba bone ntoa ena e lipakeng tsa Krete le Satane e ama maphelo a bona ka letho. Empa ntoa ena e ntse e ipheta ka hare ho pelo e 'ngoe le e 'ngoe ea motho. Likhohelo tseo Jesu A ileng A li hlōla ke tseo re fumanang ho le thata ho li hlōla. Krete leha A ne A jere boima ba libe tsa lefatše, O ile A hlōla teko ea meharo. Ho rata lefatše le ho rata ho ipeha ka pele, ho etsa hore motho a be le ho sotha tumelo. Ena ke meleko e ileng ea hlōla Adama le Eva, eo le rōna e re hlōlang ha bobebe.

Satane o ne a ile a supa sebe sa Adama e le bopaki ba hore molao oa Molimo o ke ke oa bolokoa. Krete O ne A tšoanela ho lefelletsa tšito ea Adama, A nkile sebōpeho sa rona sa botho. Empa ha Adama a ne a lekoa, bofokoli bo tlišoang ke sebe bo ne bo le sieo ho eena.

O ne a eme a le matla a phethehileng a senna, a e-na le mafolo-folo a tletseng ‘meleng le kelellong. O ne a potiloe ke khanya ea Edene ‘me a buisana le libopuo a tsa leholimo ka letsatsi le letsatsi.

Ho ne ho se joalo ho Jesu ha A kena lefeelleng, ho thulana le Satane. Ka lilemo tse likete tse ‘ne batho ba ne ba ntse ba e-ea ba fokolloa ke matla a ‘mele, a kelello le a boitšoaro, ‘me Krete A inkela bofokoli ba botho bo theohileng matleng a bona. Ke ka tsela ena qha! A neng A ka tseba ho pholosa motho botebong boo bo tlase-tlase.

### **O Ile A Nka Tsohle Tse Neng Li Loketse Batho**

Ba bangata ba re Krete ho ne ho se kamoo a ka hlōloang ke moleko. Haeba bo ne ho le joalo O ne A ke ke A beoa boemong ba Adama, kapa A fumana tlhōlo eo Adama a neng a hlōtsoe ho e fumana. Haeba teko ea rōna e le boima ho feta ea Krete, Krete O ne A ke ke A tseba ho re thusa. Empa Mopholosi oa rōna O ile A nka botho le mathata ‘ohle a bona. O ile A nka sebōpeho sa motho, ‘me O ne A ka ‘na A hlōloa ke moleko. Ha ho letho leo re lokelang ho le jara Eena A sa ka A le jara.

Moleko oa takatso ea lijo e ile ea e-ba ona o moholo, oa pele, oa Krete, joalo ka ha e bile oona oa pele ho bobeli bo halalelang, Edene. “Eaba Jesu o isoa ke Moea feelleng ho ea lekoa ke Diabolosi. A itima lijo ka matsatsi a mashome a mane, le ka masiu a mashome a mane, a nt’o lapa. Moleki a mo atamela, a re: ‘Haeba u Mora oa Molimo, e-re majoe ana a fetohle bohobe!’”

Mantsoe ana a ho qala a ile a eka mong’a ona le semelo sa hae. “Haeba u Mora oa Molimo.” Mantsoe a na a ne a reretsoe ho hlokisa motho tšepo. Ha Jesu A ne A ka etsa se batloang ke Satane e ne e tlabana O amohetse khoao. Satane o ile a batla ho kenya ka kelellong ea Eva monahano oa hore ka ho ba thibela ho ja litholoana tse khahlehang hakaalo, Molimo ha O hlile ha O ba rate. Joale [73] moleki o batla ho kenya maikutlo ona ale ho Krete. “Haeba u Mora oa Molimo.” Molimo oa lentsoe la hae o ne o reretsoe ho kenya ho se kholoe. Ebe Molimo O ne O ka sotla Mora oa ‘Ona joalo, O Mo siee lehoatateng, ka har’a libatana tse hlaha, A sena lijo, le balekane, A phela habohlōkō! O ile a sokahanya litaba ho tlisa maikutlo a reng Molimo O ne O sa bolele hore Mor’a .’ona A be boemong bo

bobe joalo. “Haeba u Mora oa Molimo” bontša matla a Hao. Laela hore majoe ana a fetohle bohobe.

### Moleko O Tlisang Khoao

Mantsoe a tsoang leholimong a reng, “Enoa ke Mora oa ka eo ke mo ratang” a ne a ntse a luma ka litsebeng tsa Satane. Empa a ikemisetsa ho etsa hore Krete A se ke A lumela bopaki bona. Lentsoe la Molimo e ne e ile ea e-ba tiiso ea borōmuoa ba leholimo; le ne le ile la phatlalatsa kamano ea hae le leholimo. Satane o ile a itherele ho Mo etsa hore A se ke A lumela lentsoe leo. Haeba tšepo ea Krete ho Molimo e ne e ka sisinngoa, Satane o ne a tseba hore a ka hlōla Jesu. O ne a hopola hore ha Krete A lapile, A khathetse matla, O ne A ka lahla tšepo ho Ntat’ae, ‘me A etse mohlolo o Mo thusang. Hoja A etsa hona, leano la pholoso le ka be le senyehile.

Satane o ile a sebelisa ka matla monyetla ona oo a neng a nahana hore o o fumane. O ile a re, le leng la mangeloi a matla le tebetsoe leholimong. Jesu O ne A shebahala e ka ke lona lengeloi leo le oeleng, le qheletsoeng ka thōko ke Molimo le batho. Sebōpuoa se halaleleng se ne se ka netefatsa tlaleho ena ka ho etsa mohlolo: “Haeba u Mora oa Molimo, e-re majoe ana a fetohle bohobe!” Ketso ena ea matla a tlhōlo, e ne e tla ba bopaki ba ho qetela ba bo-Molimo. Ha rialo Satane. E ne e tla felisa khanyetsano.

Empa Mora oa Molimo O ne A sa hloke ho pakahatsa bo-Molimo ba Hae ho Satane. Hoja Krete A latela tlhahiso ea sera, Satane a ka be a ile a boela a re, mpontše letšoao ke tie ke lumele hore U Mora oa Molimo. Krete O ne A ke ke A sebelisa matla A boMolimo molemong oa Hae. O ne A tlile ho jara liteko joalokaha re tsoanetse, A re siele mohlala. Mesebetsi ea Hae e babatsehang eohle e ne e etsetsoa molemong oa ba bang. Kamora’ hore A hopole litaba tsa lentsoe le tsoang leholimong, le neng le Mo matlafatsa, le bile le Mo hopotsa ka lerato la Ntat’ae, Jesu A ba le phomolo moeeng oa Hae.

Jesu O ile A arabela Satane ka mangolo, A re, “Ho ngotsoe”. Sebetsa ntoeng ea hae e ile ea e-ba lentsoe la Molimo. Satane o ile a kōpa Jesu ka matla hore A etse mohlolo. Empa se seholo ho feta mehlolo eohle, eleng boitšetleho bo tiileng ka mantsoe ana a reng, “Ho itsalo Morena,” e ne e le letšoao le ke keng la fetoloa. Ha Krete A eme boemong bona, Moleki o ne a ke ke a Mo qhekella.

Nakong ena eo A neng A fokola haholo, Krete O ile A hlaseloa ke meleko e boima ka ho fetisisa. Satane o nka monyetla oa bofokoli ba botho. Sheba Lipalo 20:1-13; I Marena 19:1-14. Ha re tsielehile kapa re tšoenngo a ke bofutsana kapa nyahamo eba Satane o atamela ka meleko, ho re hlasela hona moo re fokolang, ho sisinya tšepo ea rōna ho Molimo. Hangata moleki o tla joalokaha a ile a tla ho Krete. O re bontša bofokoli ba rōna. O lakatsa ho nyahamisa meea ea rōna, kahoo a khaole boitšoarello ba rōna ho Molimo. Empa ha re ka mo arabela joaleka Jesu o tla sitoa ho re hlōla.

Krete O ile A re ho moleki, “Motho a ke ke a phela ka bohobe feela, empa o tla phela le ka polelo e ‘ngoe le e ‘ngoe e tsoang molomong oa Molimo.” Lilemong tse fetang sekete le makholo a mane tse fetileng mane lefeelleng ha Ba-Iseraele ba e-ea Kanana, Molimo A rōmella batho ba Hae manna, a sa khaotse, a tsoang leholimong. Hona e ne e le ho ba ruta hore ha ba tšepa Molimo, ‘me ba tsamaea litseleng tsa Hae, O ne A ke ke A ba lahla. Ka lentsoe la Molimo, makhotla a Baheberu a ne a ile a fumantšoa thuso, ‘me ka lentsoe lona leo, Jesu O ile A fumantšoa thuso. O ile A emela hore Molimo O Mo pholose ka nako ea Oona. O ne A ke ke A fumana lijo ka ho latela likeletso tsa Satane. Ho ikarohanya le thato ea Molimo ka mokhoa ofe kapa ofe, ke tsietsi e kholo ho feta ho utloisoa bohloko ka mekhoha e meng.

[75] Hangata molateli oa Krete o ee a fihlisoe moo ho bonahalang eka ho latela litaello tse totobetseng tsa Molimo ho ka mo hlokisa mekhoha ea boipheliso. Satane o etsa hore a lumele hore a nyahlatse se mo kholisang letsoalong la hae. Empa ntho e ‘ngoe feela eo re ka e tšepang -ke lentsoe la Molimo. Bona Matheu 6:33. Ha re ithuta ka matla a Lentsoe la Hae, ha re na ho latela likeletso tsa Satane ho fumana lijo kapa ho pholosa maphelo a rona. Re tla mamela litaello tsa Molimo re tšepa litšepisong tsa Hae.

Ntoeng e kholo ea ho qetela le Satane, ba tšepahalang ho Molimo ba tla bona tsohle tseo ba li tšepang lefatseng li tlosoa ho bona. Ba tla haneloa ho reka kapa ho rekisa, hobane ba tla be ba hana ho tlōla molao oa Hae. Sheba TSenolo 13:11-17. Empa ba mamelang ba fuoe tšepiso ena, “Ke eena ea tla phela bakeng tse phahameng....Lijo o tla li fuoa, a ke ke a hloka metsi.” Esaea 33:16. “Ba ke ke ba hlajoa ke lihlolong nakong tse mpe, matsatsing a tlala ba tla khora.” Lipesaleme 37:19.



### Ho Hloka Boithibo Ho Bolisa Mekhoa.

Mengoaheng eohle, meleko e hohelang nama ke eona e atle-hileng ka ho fetisisa ho bolisa batho. Ka ho etsa hore batho ba hloke boitimo, Satane o senya matla a kekello le a mekhoha e metle. Joale eba ho ba thata ho batho ho thabela lintho tsa bo sa feleng. Satane o batla ho hlakola setšoantšo sa Molimo moeeng, ka ho tlisa takatso ea ho khotsofatsa litakatso tsa lefatše.

Kreste O bolela hore pele A e-tla khetlo la bobeli, boemo ba litaba tsa lefatše bo tla be bo tšoana le matsatsing a pele ho moroallo, joaloka Sodoma le Gomora. Re tsoanetse ho hopola thuto ea ho itima lijo ha Mopholosi. Ke ha re utloisisa bohlokō boo Kreste A bo utloileng re ka utloisisang bobele ba takatso tse lumelloang ho khotsofatsoa. Tšepo e ‘ngoe ea rōna hore re ka fumana bophelo bo sa feleng. Ke ha re tlisa litakatso tsa rōna tsamaisong ea thato ea Molimo.

Ka matla a rona, re sitoa ho thiba se hlokoang ke tlhaho ea rōna e oeleng. Empa ka ho tsamaea lefatšeng leo motho a tšoanelang ho tsamaea ho lona, Morena oa rōna O re lōkiselitse mokhoa oa hore re hlōle. Ha a batle hore re tšosoe kapa re nyahamisoe. O re, “Litaba tsena ke li buile ho lona hore le tie le fumane khotso ho ‘na.’” Johanne 16:33.

Ea loanang le matla a takatso ea lijo a ke a talime ho Mopholosi ha A ne A le lefelleng la moleko. Mo shebe ha A ne A le bohlokōng bo tšabehang sefapanong, ha A ne A re, “Ke nyoriloe.” Tlholo ea Hae ke ea rōna. [76]

Jesu O ile A re “Musi oa lefatše oa tla. Ha a na matla holim’ a ka.” Johanne 14:30. Ha ho letho le ho eena le ileng la hoheloa ke mano a Satane. Ha A ka A lumela ho etsa sebe. Ha A ka A inehela molekong leha e le ka monahano feela. Ho ka ba joalo le ho rona. Botho ba Kreste bo ne bo kopane le boMolimo. O ne A lōkiselitsoe ntoea ke Moea o Halalelang ka hare ho Eena. O ile A tla ho re etsa hore le rona re be le kabelo semelong sa bo-Molimo. Molimo O nanabela letsoho la rona la tumelo ho le tataisetsa hore le itšoarelle ka boMolimo ba Kreste, e le hore re fihlele phetheho ea semelo.

Kreste O re bontšitse kamoo sena se ka fihleloang. Kreste O ile A hlōla Satane joang? Ka Lentsoe la Molimo. O ile A re “Ho ngotsoe.” ‘Me tšepiso e ‘ngoe le e ‘ngoe e Lentsoeng la Molimo ke

ea rona. Sheba II Petrose 1:4. Ha u hlaseloa ke moleko, sheba matla a Lentsoe. Matla 'ohle a lona ke a hao. Sheba Lipesaleme 119:11; 17:4.

## KHAOLO EA 13—TLHOLO

[77]

*[E itšetlehile ka khaolo ea Matheu 4:5-11; Mareka 1:12,13; Luka 4:5-13.]*

Eaba Diabolosi o mo nka a mo isa motseng o halalelang, ‘me a ‘mea tlhōrōng ea Tempele, a re ho eena: ‘Haeba u Mora oa Molimo, itihele, hobane ho ngotsoe, ho thoe:

O tla laella mangeloi a hae,  
‘me a tla u khakeletsa ka liatla,  
esere leoto la hao  
la khoptjoa ke lejoe.’”

Satane a ‘na a hlaha e le lengeloi la khanya, ‘me a bontša hore o tseba mangolo. Ha Jesu A sebelisa lentsoe ho tsectsa tumelo ea Hae, Moleki eena a le sebelisa ho pata thetso ea hae. Satane o ile a leka Mopholosi ho fana ka bopaki bo bong ho bontša tumelo ea Hae.

Empa moleko o ne o boetse o etelloa pele ka mantsoe a bontšang ho hloka tumelo “Haeba u Mora oa Molimo.” Krete O ile A lekoa ka hore A arabele lentsoe lena “Haeba,” empa O ile A hana ho amohela mantsoe ao a khoao.

Moleki o ile a batla ho sebelisa monyetla oa ha Krete A sa ntsane A le sebopehong sa botho, hore a Mo susumelletse ho lumela lintho tseo A senang bopaki ba tsona. Empa leha Satane a ka leka motho hore a etse sebe, a ke ke a mo qobella. O ile a re “Itihele fatše,” a tseba hantle hore eena Satane a ke ke a Mo lihela fatše, kapa a Mo qobella hore A itihele. Ha Krete A ne A ke ke A lumela ho lekoa,-O ne A ke ke A hlōloa.

Moleki a ke ke a re qobella ho etsa sebe. Satane a ka re hlōla ka matla ha feela e le thato ea rōna ‘me re khaotsa ho khomarela Krete ka tumelo. Empa takatso e ‘ngoe le e ‘ngoe ea sebe eo re e lumellang, e bula monyako oo Satane a ka kenang ka ‘ona ho re leka le ho re felisa. Ha re hlōleha, re mo fa monyetla oa ho nyefola Krete.

[78]

Ha Satane a ne a pheta tšepiso ena, “O tla laella mangeloi a Hae,” o ile a siea ana a reng “a u lebele litseleng tsohle tsa hao” ke hore, Utseleng tsohle tse khethiloeng ke Molimo. Jesu O ile A hana ho tsoa tseleng ea ho mamela litaelo. O ne A ke ke a qobella mohau oa Molimo ho tla Mo pholosa, hobane ha A ne A ka etsa joalo, O ne A tla hlōloa ho siela motho mohlala oa ho tšepa le boinehelo.

Jesu A re ho Satane, “Le teng ho ngotsoe, ho thoe: ‘U se ke ua leka Morena Molimo oa hao.’” Molimo O ne O se O pakile hore Jesu ke Mor’a ‘Ona; joale ho batla bopaki bo bong e ne e tla be e le ho beha lentsoe la Molimo tekong, le ho mo leka. Ha rea tšoanela ho isa likōpo tsa rōna ho Molimo e le ha re batla ho bona hore na O tla phethisa na, empa re etse joalo e le hobane O tla phethisa; eseng ho bona hore ehlile O a re rata, e mpe e be hobane O a re rata. Sheba Baheberu 11:6. Sebakeng sa tumelo ea ‘nete, Satane o batla hore motho a be le khopolo-tabā. Tumelo ea ‘nete e ipapisitse ka litšepiso tsa Molimo, ‘me e bea litholoana tsa mamelo. Khopolo-tabā le eona e itšetlehile ka litšepiso, empa e li sebelisa ho itšoarella sebeng. Tumelo e ka be e ile ea tataisa batsoali ba rona ba pele ho tšepa lerato la Molimo le ho mamela litaelo tsa ‘Ona. Ho kenya maikutlo ao eleng a bona mantsoeng a Molimo ho ile ha ba etsa hore ba tlole molao oa Molimo, ka ho lumela hore lerato la ‘Ona le leholo hoo le tla ba pholosa litholoaneng tsa sebe sa bona. Tumelo e batlang mohau oa leholimo empa e sa ipapisa le maemo ao mohau ona o ka fanoang ka ‘ona hase ea ‘nete.

### **Ho Bapalla Mabaleng A Satane**

Ha Satane a ka etsa hore re ikenye molekong ho sa hlokahale, o tseba hore tlhōlo ke ea hae. Molimo O tla baballa bohle ba mame-lang, empa ho tsoa tseleng ena, ke ho tsamaea mabaleng a Satane. Mopholosi O re laile A re, “Falimehang, le rapele, hore le se kene molekong.” Mareka 14:38.

[79] Hangata ha re feta bothateng, re sitoa ho lumela hore ke ka tsamaiso ea Moea oa Molimo. Empa ke Moea O ileng Oa isa Jesu lefeelleng. Ha Molimo O re fetisa kahar’a liteko, e ee e-be e le hobane O na le sepheo se tla re tlišetsa molemo. Jesu ha A ka hopolela tšepiso tša Molimo ka ho kena molekong A sa mengoa. Ha

A ka A khathala matla ha moleko o Mo oela. Le rōna ha rea tšoanela ho etsa joalo. Sheba I Bakorinthe 10:13; Lipesaleme 50:14,15.

Jesu O ile A hlōla molekong oa bobeli, joale Satane a hlahisa ‘mala oa hae oa ‘nete, e le lengeloi le matla, leha a oele. O ile a ipolela e le moetapele oa ba khahlanong, le Molimo oa lefatše lena. O ile a beha Jesu tlhorong ea thaba, a etsa hore mebuso ea lefatše e fete ka pele ho Eena. Mahlaseli a letsatsi a ne a chabetse metse e meholo e litempele, meaho ea borena e hahiloeng ka lehakoe, masimo a nonneng a merara e beileng. Lipha tsa sebe li ne li patiloe. Mahlo a Jesu a talima pono ea botle le monono o fetisisang. Joale lentsoe la moleki la utloahala: le re, “haeba u nkhumamela, e tla ba ea hao eohle.”

Kreste O ne A ea A shebane le bophelo ba masoabi, boima le ntoa le lefu le soabisang. Kreste O ne A ka ‘na A ipholosa bokamosong bo lefifi ka ho amohela ho laoloa ke Satane. Empa ha A ne A ka etsa joalo, e ne e tla ba O inehela hore A hlōloe phehisanong e kholo. Ha Satane a ne a ka hlōla ka motsotso ona, e ne e tla ba bofetohele bo hlōtse.

### **Kreste O Ne A Ke Ke A Rekoa**

Ha moleki a khankhetsa Kreste mebuso le tlotla ea lefatše, o ne a etsa tlhahiso ea hore Kreste a okamele mebuso ena, A le boikarabellong ba Satane. Ena e ne e le eona puso eo Bajuda ba neng ba e tšepile. Ba ne ba lakatsa ‘muso oa lefatše lena. Empa Kreste O ile A re ho moleki “Tloha, Satane! Ho ngotsoe, ho thoe: ‘U tla khumamela Morena Molimo oa hao, u sebeletse eena a ‘notsi.’” Kreste O ne A ke ke A rekoa. O ne A tlile ho aha ‘muso oa ho lōka ‘me O ne A ke ke A sutha sepheong sa Hae.

Satane o nanarela batho ka moleko o tšoanang le ona, ‘me bathong o na le katleho ho fapana le ho Kreste. O ba fa ‘muso oa lefatše lena haeba ba ka senya bophethehi ba bona, ba se ke ba natsa letsoalo, ba rate boikhabo ‘me ba iphahamise joaloka eena. Satane o re: Ha ho tsotellehe hore na seo e leng ‘nete ka bophelo bo sa feleng ke sefe, ha u batla ho atleha lefatšeng lena, u tšoanela ho ntšebeletsa. Nka u fa maruo, menyaka, ho hlompheha, le thabo. U se ke ua nkela menahano ea botšephehi kapa ho iketsa sehlabelo holimo.

Ke kahoo bongata bo ananelang ho iphelela bo-bona, ‘me Satane a utloe monate. Empa seo a fanang ka sona ha se sa hae, ‘me haufinyane o tla se amohuoa. Moputso oa hae, ha ba mo latela, o etsa batho hore ba sitoe ho fumana lefa la bana ba Molimo.

### **Satane E Ntse E Le Sera Se Hlōtsoeng**

Ho lelekoeng ha hae, Satane o ile a ba le bopaki ba hore Jesu ke Mor’a Molimo. Bo-Molimo bo ile ba bonesa har’a botho bo sohlokehileng. Satane o ile a qobelloa ho sutha ka pele ho Mopholosi oa lefatše, a hoshola, ke tšoabo le khalefo. Krete O ile A hlōla ka ho phethahala moo Adama a neng a hlōtsoe teng.

Ka mokhoa o joalo, le rona re ka hlōla moleko, ra qobella Satane ho re tlohela. Jesu O ile A fumana tlhōlo ka ho ikokobetsa le ho ba le tumelo ho Molimo, ‘me O re ho rōna ka moapostola oa Hae, ‘Ka baka leo, ikokobeletseng Molimo. Loantšang Diabolosi, ‘me o tla le baleha. Atamelang ho Molimo, ‘me o tla atamela ho lona.’” Jakobo 4:7,8. “Lebitso la Morena ke qhobosheane, ea lokileng o tšabela teng, a sireletsehe.” Maele 18:10. Satane o thothometsoa le ke moea o fokolang ho feta eohle, ha feela o itširelelitse ka lebitso leo le matla.

[81] Kamora’ hore sera se suthe, Jesu O ile A oela fatše ke mokhathala, A pulufetse joaleka motho ea shoang. Mangeloi A ile A lebella mamello ea Molaoli oa ‘ona Ea ratoang ha A feta tekong e fetang eo rona re ka bitsoang hore re e mamelle. Joale a sebelletsa Mor’a Molimo Ea rapalletseng fatše joaleka ea shoang. O ile A matlafatsoa ka lijō, A khotatsoa ka tiiso ea hore leholimo le nyakaletse ke tlhōlo ea Hae. Ha A phaphama borokong A boela bophelong, pelo ea Hae E ile ea utloela batho bohlokō, ‘me A tsoa ho ea qetela mosebetsi oo A neng A se A O qalile; e le hore A se ke a re khefu, ho fihlela sera se felisitsoe ‘me sechaba se oeleng se pholositsoe.

Theko ea pholoho e ke ke ea ba ea lemohuoa ke batho, ho fihlela ba pholositsoeng ba ema le Mopholosi ka pel’a terone ea Molimo. Joale etlare ha khanya ea lehae le sa feleng e chabela likelello tsa rona tse tletseng thabo, re tla hopola hore Jesu O siile tsena tsohle ka lebaka la rōna, le hore molemong oa rōna, O ile A ipeha tsietsing ea ho hlōloa le ho lahleha ka ho sa feleng. “Konyana e hlabiloeng e

lokela ho amohela borena, le borui, le bohlahe, le matla, le hlompho, le tlōtla, le thorisō.” Tšenolo 5:12.

**KHAOLO EA 14—RE FUMANE MESIA**

*[E itšetlehile ka Johanne 1:19-51.]*

Johanne Mokolobetsi o ne a ruta Bethabara ka mose ho nōka ea Jorodane ‘me batho ba ne ba khobokana mabōpong a eona, ka letsatsi le letsatsi. Thuto ea Johanne e ne e sisintse maikutlo a sechaba. O ne a sa ka a ipeha tlas’a matla a bafarisi le bangoli, ho kōpa tumello ho bona, empa batho ba ne ba ntse ba eketsa ho bontša thahasello thutong tsa hae.

Lekhotla la puso la Bajuda le ne le entsoe ka baprista, babusi, le baruti. Nakong eo sechaba sa Bajuda se neng se sa ntse se ipusa, lekhotla lena ke lona le neng le le ka sehloohong sechabeng. Le hoja ha ha joale, le ne le se le le tlas’a taolo ea ‘musisi oa Roma; empa le ne le ntse le na le taolo e kholo litabeng tsa puso le tsa bolumeli. Lekhotlana lena ha lea ka la lieha ho etsa lipatlisiso ka mosebetsi oa Johanne. Ba bang ba ile ba hopola tšenolelo e ileng ea etsetsoa Sakariea tempeleng, e neng e bontša hore mor’a hae o tla etella Mesia pele. Batho ba ile ba hopola litaba tsena ka ho chesehisoa ke ha ba bona mosebetsi oa Johanne.

E ne e se e le nako e telele Baiseraele ba qetetse ho ba le mo-profeta. Ntho ea hore batho ba ipolele libe, e ne e le ncha, ‘me e makatsa. Baetapele ba bangata ba ne ba sa thabele ho ea moo Johanne a rutang, hobane ba ne ba tla tloha ba bolela makunutu a maphelo a bona. Empa thuto ea hae e ne e tsebisa ka Mesia ka ho otloloha.

[83] E ne e le ntho e tsebahalang hore liveke tse mashome a supileng tsa boporofeta ba Daniele, bo akaretsang ho tla ha Mesia, li ne li se li tla fela; ‘me bohle ba ne ba laba-labela ho nka karolo khanyeng ea sechaba e neng e lebeletsoe. Sechaba se ne se lebelletse hore lekhotla le tla ananela kapa le hanyetse mosebetsi oa Johanne. Lekhotla lena, le ne le se le na le bothata ba hore na le ka etsa joang hore le tsoele pele ho okamela sechaba. Le ile ba rōmela baprista ba bang, ‘moho



le balevi Jorodane, ho buisana le moruti enoa e mocha, ka tšepo ea hore ba tla mo tseba hore na ke mang.

Ha barōmuoa bana ba fihla, ba ile ba fihlela a bokanetsoe ke matšoele a neng a mo mametse. Borabbi bana ba baikhohomosi ba fihla ka moea oa boiphahamiso le ho batla ho itlhaisa ba phahame ho feta moporofeta enoa. Sechaba sa ba suthela ka hlompho le tšabo ho re ba fete. Banna bana ba apereng liphahlo tse theko e boima, ba tummeng ka matla, ba ile ba ema ka pele ho moporofeta oa lefeelleng.

Ba re, “U mang?”

Ka ho tseba seo ba se nahanneng, Johanne a araba a re, “Na ha ke Krete.”

“Ha ho le joalo u mang? Na u Elia?”

A re, “Ha ke eena.”

“Na u Moporofeta?”

“Che”

“U mang he? Re tšoanetse ho ea nea ba re rōmileng karabo. U re’ng ha u ipolela?”

”Na ke lentsoe la ea hōoang feelleng, le reng: Otlollang ‘mila oa Morena!’ joalokaha moporofeta Esaea a ne a bolele.”

Mehleleng ea khale, ha morena a ne a hloela batho ‘musong oa hae, banna ba ne ba romeloa pele ho eena, ho batalatsa tsela le ho kata likoti, e le hore a tsamaee hantle, a se ke a hlaheloa ke kotsi. Moporofeta Esaea o sebelisa moetlo ona, ho hlakisa mosebetsi oa lentsoe. “Likhohlo tsohle li tla katoa, lithaba le maralla li bothalatsoe.” Esaea 40:4. Ha Moea oa Molimo O kena ka pelong, O tlosa boikhōhōmōso. Menate ea lefatše, maemo le matla li bonahale li se na thuso. Joale ebe ho kena boikokobetso, boitelo le lerato, ebe tsona tse phahamisoang. Ona ke mosebetsi oa Lentsoe, ‘me e ne e le ‘ona molaetsa oa Johanne.

Baruti ba ile ba tsoela pele ho botsa ba re, “Ha u se Krete, u se Elia, u se Moporofeta, ke’ng ha u kolobetsa?” Mantsoe ana, “Moporofeta eo” a ne a bolela Moshe. Ha Mokolobetsi a qala mosebetsi oa hae, ba bangata ba ne ba hopola hore ke Moshe, o tsohile bafung.

Ho ne ho lumeloa hape hore pele ho ho tla ha Mesia Elia o tla tla. Johanne o ile a latola litaba tsena, empa hamorao Jesu O ile A re, ha A bua ka Johanne, “me ha le ka kholoa taba eo, Johanne ke eena Elia ea neng a tsoanetse ho tla.” Matheu 11:14. Johanne o ile a tla ka moea le matla a Elia, ho etsa mosebetsi o ileng oa etsoa ka Elia. Empa Bajuda ha ba ka ba amohela molaetsa oa hae. Ba ne ba sa mo nka e le Elia.

### **Ba Bangata Kajeno Ba Sitoa “Ho Bona” Krete**

Ba bangata ho ba neng ba bokane Jorodane, ba ne ba le teng ha Jesu A kolobetsoa, empa letšoao le ileng la bontšoa mohlang oo, le ne le ile la bonoa ke ba fokolang feela. Likhoeling tse qalang, tsa boruti ba Mokolobetsi, ba bangata ba ne ba ile ba hana ho amohela pitso ea hore ba sokolohe. Ke ka hoo ba sa kang ba bona ha leholimo le etsa bopaki, ka Jesu, kolobetsong ea Hae. Mahlo a neng a sa ka a Mo sheba ka tumelo, ha a ka a bona tšenolo ea khanya ea Molimo; litsebe tse neng li e-so ka li Mo mamela, ha lia ka tsa utloa mantsoe a bopaki. Ho ntse ho le joalo le hona kajeno. Hangata Krete le mangeloi a sebeletsang ba ba teng liphuthehong, empa ba bangata ha ba elelloe. Ha ba bone letho le sa tloaelehang. Empa ba bang ba senoleloa boteng ba Mopholosi, ‘me ba khothatsoa, ba hlohonolofatsoa.

Barōmuoa ba tsoang Jerusalema, ba ne ba ile ba botsa Johanne ba re, “Ke’ng ha u kolobetsa?” ‘me ba ne ba emetse karabo ea hae. Hang ha a bona sechaba se moo, sefahleho sa khanya, ‘me a ameha haholo. A otlolla matsoho a hae, ‘me a hōoa a re, “Na ke kolobetsa ka metsi; har’a lona ho eme eo le sa mo tsebeng, ea tlang kamorao ho ‘na, eo ‘na ke sa lōkelang ho lōkōlla leqhoele la moqathatso oa hae.”

Molaetsa ona o ne o utloahala, ‘me o tiile, e le o lōkelang ho khutlisetsoa lekhotleng. Mesia O ne A se A le har’a bona! Baprista le babusi ba ile ba qamaka ba maketse, empa eo Johanne a neng a bua ka Eena, O ne A se a ipatile har’a matšoele.

Mohla Jesu A kolobetsoang, Johanne o ile a nahana mantsoe a Esaea a reng, “a qhōjoa sa konyana ha e isoa tllhabong.” Esaea 53:7. Libekeng tse latelang, Johanne o ile a ithuta boporofeta, le litšebeletso tsa sehlabele ka thahasello. A elelloa ho re ho tla ha

Kreste ho na le lebaka le leholo ho feta kamoo baprista le batho ba neng ba ešelletsoe. Ha a bona Jesu A le har'a matšoele, ho khutleng ha Hae lehoatateng, a ema a lebelletse ho utloa Mopholosi A phatlalatsa tsa thōmo ea Hae; empa a se ke a utloa letho, a se ke a bona leha e le letšoa feela. Jesu ha A ka A araba ha Mokolobetsi a Mo tsebisa batho, empa A kena har'a barutuo ba Johanne, A seke A etsa hore A bonoe.

Ka letsatsi le hlahlamang Johanne a bona Jesu A e-tla A Mo lebile. Leseli la khanya ea Molimo le ne le lutse holim'a hae, 'me moporofeta a otlolla matsoho a hae, a re, "Bonang Konyana ea Molimo e tlosang sebe sa lefatše! Empa le eena eo ke neng ke bua ka eena, ha ke re: Kamorao ho 'na ho tla monna ea mphetang ka boholo, hobane o bile teng pele ho 'na...Ke bone Moea o theoha leholimong o ka leeba, 'me o lula holim'a hae....Ea nthōmileng ho kolobetsa ka metsi, o itse ho 'na:...ke eena ea kolobetsang ka Moea o Halalelang.' Le 'na ke bone, 'me ke pakilc hore enoa ke Mor'a Molimo."

### Ho Hlaha Ha Kreste Ho Ne Ho Sa Khetheha

Ebe eo ke Kreste? Batho ba ile ba talima Ea neng A sa tsoa phatlalatsoa e le Mora oa Molimo ka ho tšoha le ka ho makala. Ba ne ba ile ba angoa haholo ke mantsoe a Johanne. O ne a buile lebitsong la Molimo. Ba ne ba mo mamela letsatsi ka letsatsi, ha a ntse a khalemela libe, 'me ba ne ba kholoa ka ho tlala, hore o rōmiloe ke leholimo. Joale ebe Eo E moholo ho feta Johanne Eena ke mang? Ho ne ho se se bontšang boemo ba Hae liaparong tsa Hae le kamoo A neng A ikukile ka teng. O ne A bonahala e le motho ea tlase, ea ikaparetseng liaparo tsa bofutsana. [86]

Ba bang ho batho ba neng ba bokane moo, ba ne ba be ba le teng kolobetsong ea Kreste, 'me ba na ba utloa lentsoe la Molimo. Empa sebōpeho sa Mopholosi se ne se fetohile haholo. Ha A kolobetsoa, ba ne ba ile ba bona sebōpeho sa Hae se fetoha, se chabeloa ke khanya ea leholimo; empa joale ha A se A khathetse, A sohlokehile, O ile A tsejoa ke Johanne feela.

Empa batho ba ile ba bona hore sefahleho sa Hae, se tletse mohau oa leholimo, o kopaneng le matla. Chalimo le tšobotsi ea Hae e ne e tletse boikokobetso, 'me e bontša lerato le ke keng la boleloa. Batho

ba ne ba thabisoa ke ho boha matla A Hae, A neng A ipatile, empa A ke ke a patoa. Ebe Enoa ke Eena eo Baiseraele e neng e le khale ba Mo lebelletse na?

Jesu O ile A tla ka bofutsana le boikokobetso e le hore E tie e be mohlala, esita le Mopholosi oa rōna. Haeba A ne A tlile ka boemo bo phahameng ba borena, O ne A ka ruta boikokobetso joang? E ne e ka ba tšepo ea ba tlase joang, ha A ne A ka tla joaloka morena har'a batho?

Empa bongata bo ne bo sitoa ho lumela ho re Ea supiloeng ke Johanne ke Eena eo ba Mo lebeleletseng ho ba phahamisa. Ba bangata ba soaba, ba nyahama.

Mantsoe ao ba neng ba a lebeletse hore Jesu A a bue -a hore joale O se A tla buseletsa Iseraele 'muso oa eona -a ne e-s' o buuo. Baprista le baruti ba ne ba ka amohela morena ea joalo kapele-pele. Empa ba ne ba sitoa ho amohela Ea neng A batla ho haha 'muso oa ho lōka ka lipelong tsa bona.

### **Johanne O Supisa Balateli Ba Hae Ho Jesu**

Ka letsatsi le hlahlamang, barutuo ba babeli ba le pel'a hae, Johanne a boela a bona Jesu. Hape sefahleho sa moporofeta sa khanya ha a hoeletsa a re, "Bonang Konyana ea Molimo!" Barutuo ba ne ba sa utloisise. Ebe moelelo oa lebitso lee leo a neng a le filoe ke Johanne le reng "Konyana ea Molimo" ke ofe?

[87] Ba siea Johanne, 'me ba ea batla Jesu. E mong e ne e le Andrease, ngoan'abo Simone Petrose; e mong e le Johanne ea ngotseng buka ea evangeli. Bana e bile bona barutuo ba pele ba Krete. Ba ile ba latela Jesu -ba lakatsa ho bua le Eena, empa ba ntse ba 'nahana ka ho thōla le tšabo. Ba ne ba ipotsa, "Eo na ke Eena Mesia?"

Jesu O ne A tseba hore bano ba babeli ba a Mo latela. E ne e le litholoana tsa pele tsa bosebeletsi ba Hae, 'me Moruti enoa oa leholimo O ne A tletse thabo ha meea ena e amohela mohau oa Hae. O ile A hetla 'me A botsa A re, "Le batla'ng?"

Ba araba ba re, "Rabbi, (ke ho re: Moruti): U lula kae?" Puisanong eo e khutšoanyane pel'a tsela, ba ne ba ke ke ba fumanana seo ba se batlang. Ba ne ba lakatsa ho buisana le Jesu, le ho utloa mantsoe a Hae boinotšing.

“A re ho bona: Tloong, le bone. Ba ea, ba bona moo a lulang teng, ‘me ba hlola le eena letsatsi leo.”

Hoja Johanne le Andreama ba ne ba hloka tumelo joaloka baprista le babusi, ba ka be ba sa ka ba ithuta, empa ba ka be ba fetohile banyefoli, ba ahlolang mantsoe a Hae. Empa ka hobane ba ile ba amohela pitso ea Moea o Halalelang ha Johanne Mokolobetsi a ntse a ruta, ba ile ba tseba ho elelloa Moruti oa leholimo. Ho bona, mantsoe A Jesu a ne a le matle, a nchafatsa. Khanya ea leholimo e ile ea bonesa Mangolo a Testamente ea Khale, ‘me ‘nete ea hlaka.

Morutuoana enoa, Johanne, e ne e le monna ea nang le cheseho, le lerato le tebileng, ea nang le thahasello, empa ea inahanang. O ne a qalile ho bona “tlōtla e kang eo Mora ea tsoetsoeng a ‘notši a e fumaneng ho Ntate.” Johanne 1:14.

Andreama o ne a batla ho arolela ba bang thabo e neng e tletse ka pelong ea hae. O ile a batla ngoan’abo, ‘me ha a mo fumane, a hōoa a re “Re fumane Mesia.” Simone le eena o ne a ile a mamela thuto ea Johanne Mokolobetsi ‘me a potlakela ho Mopholosi. Krete O ile A talimela pele, ‘me A bona semelo sa Simone le pale ea bophelo ba hae. Ho hloka boinahano ha hae, pelo ea hae e tletseng mohau le lerato, ho itšepa le ho lakatsa lintho tse kholo, ho oa ha hae le ho baka, mosebetsi oa hae, le lefu la hae la boshoele-tumemo — tsena tsohle Mopholosi A li bona. A re “U Simone, mor’a Johanne; u tla bitsoa Kefase, ke ho re: Petrose.”

“Ka la hosasane Jesu...a fumana Filipi. A re ho eena: Ntatele!” [88] Filipi a amohela memo eo, ‘me a fetoha mosebeletsi oa Krete.

Filipi a bitsa Nathanaele, ea neng a le teng ha Mokolobetsi a supa Jesu, a re ke Konyana ea Molimo. Ha Nathanaele a sheba Jesu, a khathala matla. Ebe Eo, ea bonahalang A sotlehile ‘me A fumanehile, e ka ba Mesia? Empa o ne a khotsoe molaetsa oa Johanne.

### Thapelo Ea Nathanaele Ea Sephiri Ea Arajoa

Nakong eo Filipi a neng a ‘mitsa, Nathanaele o ne a ile moo ho khutsitseng, ho ea nahana ka boporofeta bo amanang le Mesia. O ile a rapela hore haeba eo Johanne a neng a Mo supa ke Eena Mopholosi, a mpe a senoleloe. Moea o Halalelang O ile oa tlala ka ho eena, ‘me oa mo khotatsa hore Molimo O etetse sechaba sa

Oona. Filipi o ne a tseba hore motsoalle oa hae o ntse a batlisisa Mangolong. Filipi a mo fumana moo a ntseng a rapela teng. Bane ba ile ba 'na ba rapella moo ba tširuoe ke litlama.

Molaetsa ona, “Re fumane eo Moshe a ngotseng ka eena Mo-laong, le boporofeta ba ngotseng ka eena,” o ile oa utloahala ho Nathanaele e le karabo ea thapelo ea hae. Filipi o ile a eketsa a re, “e leng Jesu, mor’a Josefa oa Nasaretha.” Ho se lumele ho ile ha hlaha ka pelong ea Nathanaele, ‘me a khotsa a re, “Na ho na le ho molemo ho ka tsoang Nasaretha?”

Filipi a araba a re, “Tloo, u bone.” Jesu A bona Nathanaele a e-tla ho Eena, A ‘molella A re, “Bonang mo-Iseraele oa ‘nete, eo ho se nang mano ho eena!” Nathanaele a araba ka ho makala a re, “U ntsebella kae?” Jesu A araba A re, “Ke u bone pele Filipi a u bitsa u le katlas’a sefate sa feiee.”

Karabo ena e ne e lekane, Moea oa Leholimo O neng O ile oa pakela Nathanaele thapelong ea hae ea sephiri, tlas’a sefate sa feiee, O ile oa bua le eena ka mantsoe a Jesu. Nathanaele o ne a tlile ho Kreste a na le takatso ea ho tseba ‘nete, ‘me takatso ea hae e ne e phethisitsoe. A re, “Rabbi, u Mora oa Molimo, u khosi ea Iseraele!”

[89] Hoja Nathanaele o ne a tšepile tataiso ea baruti, a ka be a sa fumana Jesu. E ile ea e-ba morutuo a ka ho ichebela le ho iketsetsa geto. Ho joalo le kajeno. Ba bangata ba tšepile matla a batho. Joaloka Nathanaele, re tšoanela ho ithuta lentsoe la Molimo ka bo rona, me re rapele ho re Moea o Halalelang O re tataise. Ea ileng A bona Nathanele tlas’a sefate sa feiee, O tla re bona ha re rapela sephiring. Mangeloi a haufi le ba batlang tataiso ea leholimo ka boikokobetso.

“Motheho oa kereke ea bokretse o qalile ka pitso ea Johanne, Andrease, Simone, Filipi, le Nathanaele. Johanne o ile a bontša barutuo a ba hae ba babeli Kreste. ‘Me e mong oa bona, Andrease a bitsa ngoan’abo. Joale ha bitsoa Filipi, ‘me eena a batla Nathanaele. Ena ke mehlala ea hore re tsoanetse ho bitsa bang ka rōna, metsoalle, le ba ahileng le rona. Ba bang ba teng, ba e-s’ong ho ikhathatse ho tliša moea leha o le mong ho Mopholosi.

Ba bangata ba ile tahlehong, ba ka beng ba pholohile hoja baahisani le bona, banna le basali, esita le batho feela ba ba sebeletsa. Re na le mosebetsi oo re tšoanetseng ho o phetha: malapeng, ho baahisani, le metseng eo re phelang ho eona. Motho ha a sokoloha

ka hare ho eena ho ba le takatso ea ho bolella ba bang ka setsoalle sa hae le Jesu.

### **Bopaki Bo Matla Ka Ho Fetisisa**

Filipi ha a ka a kōpa Nathanaele ho amohela bopaki ba motho e mong. O ile a re a ichebele Krete ka boena. O mong oa mekhoha e atlehileng ka ho fetisisa ea ho hapela Jesu meea, ke ho bontša semelo sa Hae maphelong a rona. Batho ba ka ‘na ba hanana le bopaki ba rona ba mantsoe esita le boipiletso ba rona, empa ba sitoa ho hanyetsa bophelo bo tletseng lerato, bo hlokang boikhabo.

Lentsoe la Molimo, ha le boleloa ke ea halalelitsoeng ke lona, le na le matla a fanang ka bophelo a hohelang ba le mametseng. Ea amohetseng ‘nete leratong, o phatlalatsa seo a se utloileng, seo a se boneng, le seo a se tšoereng sa lentsoe la bophelo. Bopaki ba Hae ke ‘nete, pelong e amohelang, ‘me bo tlisa khalaletso bophelong.

Ea batlang ho tlišetsa ba bang leseli, le eena oa hlohonolofatsoa. “Ea fanang ka metsi le eena o tla a fuoa.” Maele 11:25. Hore re tle re kene thabong ea Krete — thabo ea ho bona meea e pholoso ka sehlabele sa Hae -re tsoanetse ho nka karolo mosebetsing oa Hae oa ho pholosa ba bang.

[90]

Tumelo e ileng ea bontšoa ke Nathanaele lekhetlo la pele e ile ea oela litsebeng tsa Jesu joalokaha e ka ke ‘mino. “Na u lumela kahobane ke u boleletse hore ke u bone tlas’a sefate sa feiee? U tla bona tse khoho ho feta tsena.” Mopholosi O ne A talimile pele ka thabo, ha A tla etsa mosebetsi oa Hae oa ho ruta litaba tse molemo ho ba bonolo, ho tlamella pelo tse hlomohileng, ho fa ba litlamong tsa Satane tōkōlōho. O ile A eketsa A re, “Kanete-nete, kea le bolella, le tla bona leholimo le bulehile, ‘me mangeloi a Molimo a nyoloha, a theohela holim’a Mor’a Motho.”

Mona Krete O bolela ho re, mabopong a nōka ea Jorodane, maholimo a ile a buloa, ‘me Moea oa theohela. Empa haeba u lumela ho ‘Na, tumelo ea hao e tla tsosolosa. U tla lemoha ho re maholimo a butsoe, ‘me a ke ke a hlōla a koaloa. Ke u buletse ona. Mangeloi a Molimo a ea nyoloha, a nkile lithapelo tsa ba hlokang le ba matšoenyehong, ho li isa ho Ntate, holimo, ‘me a boele a theohe, ho tlisa tšepo, sebete le bophelo baneng ba batho.

Mangeloi a ntse a feta ka linako tsohle, ho tloha lefatseng ho leba leholimong, le ho theoha leholimong ho ea lefatseng. Mahlohonolo ohle a tla ho rona, a tsoa ho Molimo, a tla ka Krete, ka litšebeletso tsa baromuoa ba Hae ba leholimo. Ka ho nka botho, Mopholosi oa rona O ikopanya le bara le barali ba Adama ba oeleng, ka bo-Molimo ba Hae, O tšoara terone ea Molimo.



## KHAOLO EA 15—JESU O EA MOKETENG OA LENYALO

[91]

*[E itšetlehile ka khaolo ea Johanne 2:1-11.]*

Kopanong ea lelapa motsaneng oa Galelea, Jesu O ile A sebelisa matla A Hae ho tliša thabo moketeng oa lenyalo. Ka mokhoa oo O ile A bontša kutloelo-bohlōkō ho batho, le takatso ea Hae ho ba tlišetsa thabo. Lefeelleng Eena ka bo-Eena ba Hae O ile A noa mohope oa mahlomola; O tšile ho fa batho mohope oa mahlohonolo.

Ho ne ho tla ba le lenyalo mane Kana. Bana ba nyalanang e ne e le seng le Josefa le Maria, ‘me Jesu le barutuo ba Hae ba ne ba memilo.

Maria ‘Ma’e, o ne a ile a utloa ka tse ileng tsa etsahala Jorodane mohla kolobetso ea Hae. Litaba tsena li ile tsa mo hopotsa liket-sahalo tseo a neng a li bōlōkile ka pelong ea hae lilemo tse telele. Maria o ile a sisinngoa haholo ke thōmo ea Johanne Mokolobetsi. Joale, kopano ea hae le Jesu e ile ea tsosolosa tšepo ea hae bocha. O ne a bōlōkile ka hlōkō bopaki bohle bo neng bo supa hore Jesu ke Mesia, empa hape o ne a na le khoao le masoabi. O ne a laba-labela nako eo khalalelo ea hae e tla senoloa ka eona.

Lefu le ne le arohantse Maria le Josefa, ba neng ba arolelana tsebo ena ea sephiri sa tsoalo ea Jesu. Joale ho ne ho se lea mong, eo a ka mo bulelang sefuba sa hae ka tšepo le tšabo ea hae. O ile a nahana ka mantsoe a Simeone a reng, “Lerumo le tla u hlaba moea.” Luka 2:35. O ile a emela ho khutla ha Jesu ka pelo e tšoenyehileng.

Eaba o kopana le Eena moketeng oa lenyalo, e ntse e le Eena mora oa hae ea bonolo, ea sebetsang. Empa O ne A sa tšoane le pele. Sefahleho sa Hae se ne se na le lipontšo tsa ntoea ea Hae lefeelleng, hape se ne se bontša ho hlompheha, matla le thōmo ea Hae ea leholimo. O ne A tsamaea le sehlopha sa bahlankana se neng se ‘mitsa Monghali. Batho bana ba ile ba phetela Maria tseo ba li boneng le tseo ba li utloileng kolobetsong ea Hae le libakeng tse ling.

[92]

Baeti ba tlileng mokateng ha ba ntse ba fihla ha eketsa ho ba le tebello eo ho seng bonolo ho e pata. Ha Maria a lemoha hore bongata bo talimme ho Jesu, o ile a lakatsa eka A ka itlhahisa hore ho bonahale hore ke Ea hlomphiloeng ke Molimo.

E ne e le moetlo hore mokete oa lenyalo o nke matsatsi a mangata. Lekhetlong lena ho ile ha fumanaha hore veine e felile pele mokete o fela. Kahobane Maria o ne a amana le beng ba mokete, o ne a thusa, ‘me joale a re ho Jesu, “Ha ba na veine.” Ka mantsoe ana, o ne a kōpa Jesu ka bohlae hore A ba thuse. Empa Jesu A araba A re, “Mè, hoo ho re ama ka’ng, rona le uena? Nako ea ka ha e e-s’o fihle.”

Ho latela meetlo ea khale, mokhoa ona oo A neng A araba ka ona, o ne o sa bontše ho khena kapa tello. O ne o sebelisoa ho batho ba neng ba hlomphuoa. Krete ke Eena ea neng A fane molao o reng, “Hlompha ntat’ao le ‘m’ao.” Phallo 20:12. Mokateng oa lenyalo le sefapanong, moo A ileng A bontša lerato la Hae ho ‘M’ae khetlo la ho qetela, mantsoe ana a ile a hlalosa ke mokhoa oo A neng A mo shebe ka ‘ona, le ka molumo oa lentsoe la Hae.

Ha A ne A etetse tempeleng boshanyaneng ba Hae, Krete O ile A re ho Maria, “Na le ne le sa tsebe hore ke tsoanetse ho ba mosebetsing oa Ntate?” Luka 2:49. Joale O pheta thuto eo A neng A e rute ‘M’ae. Kotsi e ne e le teng ea hore Maria a ka nka kamano ea hae le Jesu e le tōkelo ea ho Mo tsamaisa thōmong ea hae. Ka lilemo tse mashome a mararo e ile ea e-ba Mora Ea lerato, Ea mamelang, empa joale O ne A tsoanetse ho etsa mosebetsi oa Ntat’ae. Ho ne ho se liketane tsa lefatše tse neng li lokela Mo sitisa ho phetha thōmo ea Hae, hobane E ne E le Mopholosi oa Iefatše. Ho se be tse hohelang tsa lefatše kapa likamano le batho tse ka faposang maoto a rōna tseleng eo Molimo O re biletsang eona.

[93] Maria o ne a ka fumana pholoho feela ka Konyana ea Molimo. Likamano tsa hae le Eena tsa nama li ne li sa fetole kamano ea hae le Eena ea Moea hore li se ke tsa tšoana le tsa batho ba bang. Mantsoe A Mopholosi A ile A hlakisa hore ho na le phapang kamanong ea Hae le eena ha e le Mor’a motho, le ha e le Mor’a Molimo. Ho amana ha bona ho ne ho sa etse hore ba lekane.

“Nako ea ka ha e-s’o fihle.” Ha Krete A sa le har’a batho, mohato o mong le o mong oa Hae O ne O tataisoa ke thato ea Ntate. Ka ho elelloisa Maria hore nako ea Hae ha e-s’o fihle, O ne A arabela

se ka monahanong oa hae -tebello ea hae ea hore A itlhahise hore ke Mesia, ‘me A nke ‘muso oa Iseraele. Empa nako e ne e-s’o fihle. Jesu O ne A amohetse tsa botho, E se Khosi empa E le “motho oa mahlomola, ea tsebangeng mahlōkō.”

### Tumelo Ea Maria Ea Putsoa

Maria leha a ne a sa utloisise thōmo ea Krete, o ne a Mo tšepa ka ho tlala. Krete O ile A putsa tumelo ena. Ho ananela tšepo ea hae le ho matlafatsa tumelo ea barutuo ba Hae A etsa mohlolo oa pele. Ho barutuo, baporofeta ba ne ba bontšitse ntle le khoao hore Jesu ke Mesia, empa ba ne ba soabisitsoe haholo ke ho hloka tumelo le lehloeo le tebileng la baprista le baruti. Mehlolo ea pele ea Mopholosi E ile ea tiisa barutuo hore ba eme ba tiile har’a khanyetso.

Maria a re ho ba fepang tafoleng, “Eng le eng eo a le bolellang eona, le e etse.”

Ho ne ho e-na le linkho tse kholo tse tletseng metsi pel’a monyako. Jesu A laela basebeletsi hore ba li tlatsa ka metsi. Eaba A re, “le isetse motsamaisi oa mokete.” Metsi a ne a fetohile veine.

Eitse hoba mong’a mokete a latsoe veine e tlišoang ke basebeletsi, a fumana e le monate ho feta tsohle tseo a kileng a li latsoa. Ha a fetohela ho monyali a re, “Batho bohle ba ee ba qala ka veine e monate pele, ‘me ha bamemuoa ba se ba noele, ba tlise e mpe; uena u bōlōkile veine e monate ho fihlela joale.”

Limpho tse fanoang ke lefatše, li ka boheha ha li talingoa ‘me tsa thabisa maikutlo, empa ha li khotsofatse. “Veine” e fetoha masoabi, thabo e fetohle masoabi. Se neng se qaliloe ka lipina le thabo, se qetelle ka mokhathala le ho teneha, empa limpho tse tsoang ho Jesu li pholile ‘me li ncha kamehla. Mokete oo A O etsang ha O lese ho fana ka thabo le khotsofalo. Lisebelisuo ha li ke ke tsa fela. Ha u lula ho Eena, mpho e kholo eo u e fumanang kajeno e etella pele e fetisisang kamoso.

Mpho ea Krete moketeng oa lenyalo e ne e le setšoantšo. Metsi a neng a tlatsa linkho, a ne a khuae ka matsoho a batho, empa ke Lentsoe la Krete feela le neng le ka a fa bophelo. Lentsoe la Krete le fana ka tsohle tse hloka halang moketeng. Mohau oa Hae o moholo hoo o ka hlakolang bobele, ho nchafatsa le ho baballa moea. Veine eo

Kreste A ileng A e etsa moketeng, esita le eo A neng A e fa barutuo a e le setšoantšo sa mali a Hae, e ne e le lero le hloekileng la morara. Esaea o bua ka lona ha a bua ka veine e ncha e lesihleng la morara ha a re, “Le se ke la o lahla, hobane o sa na le molemo.” Esaea 65:8.

Kreste O fane ka tlhokomeliso testamenteng ea khale O itse, “Veine ke moikakasi, joala bo baka lerata, ea khelosoang ke tsona o hloka bohla.” Maele 20:1. Le Eena ka bo-Eena, ha A ka A fana ka seno se joalo. Satane o leka batho ho kenya ka hare ho ‘mele ea bona lintho tse fifatsang kelello le ho thotofatsa pono ea moea, empa Kreste O re ruta ho bea botho bo katlase tlas’a taolo. Ke Kreste ea ileng A laela hore Johanne Mokolobetsi a se ke a noa veine le ha e le ho tahang. O ile a laela boitimo bo joalo le ho mosali oa Manoa. O beile thohako ho ea fang mohaisani le eena botlolo ea tai. Sheba Habakuke 2:15. Kreste ha A ka A hanyetsa thuto ea Hae. Veine e sa lomosoang eo A ileng A e etsetsa baeti moketeng oa lenyalo, e ne e le senoamapholi se phethahetseng, se khathollang.

Ha baeti ba ntse ba khotsa veine ena, lipatlisiso li ile tsa etsoa, tse ileng tsa etsa hore basebeletsi ba hlalose tsa mohlolo. Kamora’ nako e telele ha sehlopha sena se batla Jesu, O ne A se a nyametse.

[95] Joale batho ba fetohela ho barutuo a, ‘me bona ba fumana monyetla oa ho ba bolella ka tumelo ea bona ho Jesu. Ba bolela ka tseo ba li boneng le tseo ba li utloileng Jorodane. Pale ea mohlolo ona e ile ea tlala-tlala, ea ba ea fihla Jerusalema. Baprista le baholo ba batlisisa boporofeta bo supang ho tla ha Kreste ka thahasello e ncha.

### **Kreste O Thuha Marako A Karohano A Ho Shebelana Tlaase**

Jesu O qalile mosebetsi oa Hae ka ho atamela haufi le batho. Lehoja A ne A ntse a hlompha molao oa Molimo, O ile A khalemela mekhoha ea Bafarisi ea ho iketsa eka ba lōkile, ‘me A lōkōlla batho melaong e se nang kelello e neng e ba tlamile. O ne A batla ho thuha marako a neng a arohantse lihlopha tse sa lekaneng sechabeng, e le hore a kopanye batho ho ba etsa bana ba lelapa le le leng.

Jesu O ile A nyatsa ho ithabisa ho se nang moeli, empa ka tlhaho E ne E le motho ea ratang batho. O ne A thabela kamohelo ea bohle, A chakela mahae a barui le bafutsana, barutehi le ba se nang tsebo. A leka ho phahamisetsa menahano ea bona, hore e nahane ka

lintho tsa bo sa feleng. Ho ne ho se na meriti ea lintho tsa lefatše lena e neng e fialitse boitšoaro ba Hae, empa O ne A thabisoa ke liketsahalo tse nang le thabo e se nang kotsi. Monyaka oa lenyalo la Bajuda o ne o se na bobbe ho Mor’a Motho. Ka ho ea moketeng ona, Jesu O ile A phahamisa lenyalo e le ntho e theiloeng ke leholimo.

Testamenteng e ncha le ea khale, lenyalo le emetse kopano ea bohlokoa, e halalelang, e teng lipakeng tsa Krete le batho ba Hae. Menahanong ea Jesu, thabo ea lenyalo e ne e supa nyakallo ea letsatsi lela leo A tla beng A tlisa monyaluoa oa Hae, e leng ba pholositsoeng, tlung ea Ntat’ae. “Joalokaha monyali a thabela monyaluoa, Molimo oa hao le eena o tla u thabela.” “O tla u thabela ka nyakallo, a u rate ka lerato la sebele...a e hlabe sa mohl’a tsatsi la mokete.” Esaea 62:5; Sofonea 3:17. Moapostola Johanne o ngotse tjena: “Ka boela ka utloa ho kang molumo oa letsoelehali...ho re:...re thabeng, re nyakalleng, ‘me re mo tlotlise, hobane ke letsatsi la mokete oa lenyalo la Konyana. Monyaluoa oa hae o itokisitse.” Tšenolo 19:6,7.

Jesu O ile A fihlela lipelo tsa batho ka ho tsoakana le bona, ‘me A iponahatsa A ba lakaletsa tse molemo. O ile A ba batla literateng, matlung a bolulo, liketsoaneng, masinagogeng, mabopong a linōka, le moketeng oa lenyalo. O ile A ba le thahasello litabeng tsa bona. Mohau oa Hae o matla o ile oa hapa lipelo tsa bona. Thapelo ea Hae e neng e etsoa boinotšing thabeng, e ne e lōkisetse mosebetsi oa Hae har’a batho, bophelong ba bona. Ha A khutla likhutloaneng tsena tsa thapelo, O ne A tla ho imolla ba kulang, ho khaola liketane ho ba hapiloeng ke Satane.

Jesu O ile A koetlisa barutuo ba Hae ka ho kopana le ho sebelisana le bona. Ka nako e ‘ngoe O ne A ba koetlisa A lutse thabeng, ka nako e ngoe ba le pel’a leoatle, kapa A tsamaea le bona tseleng, A ba ruta liphiri tsa ‘muso oa Molimo. Ha A ka A laela barutuo ba Hae ho etsa hona kapa hoane, empa O ile A re, “Ntateleng.” O ne A tsamaea le bona maetong a Hae, e le hore ba bone kamoo A rutang batho.

Mohlala ona oa Krete, o tšoanetse ho lateloa ke bohle ba rutang Lentsoe la Hae. Ha rea tšoanela ho itšekathajana, empa re lokela ho kopana le lihlopha tsohle tsa batho moo li leng teng. Ha se feela ka ho ema sefalaneng lipelo tsa batho li ka sisinngoang ke ‘nete ea leholimo. Tsimo e ‘ngoe ea ho sebetsa, e tšepisang haholo ke lapeng

ha mofutsana, ke ntlong e majaba-jaba le moo batho ba bokaneng ka boithabiso bo se nang bobbe.

Ha re na ho tsoaka-tsoakana le batho ba lefatše ho kopanela lintho tsa mafeela. Ha rea tšoanela ho emela sebe ka mantsoe, liketso, ho se tholela, esita le ka boteng ba rōna ha se etsoa. Hohle moo re eang, re tšoanela ho tsamaea le Jesu. Bohle re tšoanela ho ba lipaki tsa Jesu. Matla a sechaba a hlohonolofalitsoeng ka mohau oa Kreste, a tšoanela ho ntlafatsoa e le hore meea e tle e hapjoe. A re etseng hore lefatše le bone hore re lakatsa hore ba bang ba arolelane le rōna mahlohonolo le menyetla, le hore bolumeli ha bo re etse hore re hloke mohau, le hore ha re ba qobelle. Bohle ba fumaneng Kreste ba ke ba sebeletse batho joaloka Eena.

Ha re se ke ra fa lefatše maikutlo a fosahetseng a hore Bakreste ke batho ba lulang ba khenne ‘me ba se na thabo. Balateli ba Kreste ha se liamahale, empa ke batho ba phelang, banna le basali, ba arolelanang sebōpeho sa leholimo. Ba bonesetsa ba bang leseli le ba chabetseng, ka mesebetsi e khantšitsoeng ke lerato la Kreste.

## KHAOLO EA 16—KRESTE O LOANTSA BOBOLU TEMPELENG

[97]

*[E itšetlehile ka Johanne 2:12-22.]*

Paseka ea Bajuda e ne e le haufi, ‘me Jesu a nyolohela Jerusalema.’ ‘Kaha Jesu O ne A e-s’o tsebahatse thomo ea Hae sechabeng, ha A ka A bonahala kahar’a matšoele ao A neng A tsoakane le ona. Likopanong tse kang ena, moqoqo oa bohlokoa e ne e le oa ho tla ha Mesia. Jesu O ne A tseba hore tšepo ea batho bana ea hore sechaba sa bona se tla matlafala e ne e tla soabisoa kaha e ne e sa itšetleha ka Mangolo. O ile A hlalosa boporofeta, ‘me A leka ho ba khotlaetsa ho ithuta lentsoe la Molimo ka cheseho e kholo.

Vekeng ea Paseka batho ba bangata ba hlahang libakeng tsohle tsa Palestina esitana le mafatšeng a hole, ba ne ba bokane Jerusalema. Mabala a tempele a ne a tletse batho ba meharo. Ba bangata ba ne ba sitoa ho tla le tseo ba etsang sehlabelo ka tsona eleng se neng se tšoantšitse sehlabelo se sehlo. Molemong oa ba joalo, liphoofole li ne li tlisoa ‘me li rekisoa lebaleng le kantle.

Mojuda e mong le e mong o ne a lebeletsoe ho lefella “topollo ea moea oa hae,” selemo se seng le se seng. Chelete e bokeletsoeng e ne e tšehetsa mesebetsi ea tempele. Sheba Phallo 30:12-16. Ho feta moo, chelete tse ngata li ne li fanoa ka bōlōkōlohi e le likabelo tse eang mokotleng oa tempele. Ho ne ho hlokahala hore chelete tsena li fetoleloe cheleteng ea tempele e bitsoang shekele, eo e neng e le eona e amohelang litšebeletsong tsa sehalaleliso. Ba thuhang lichelete ba ne ba fumana monyetla oa ho qhekella le ho hanyapetsa. Mosebetsi ona o ne o se o fetohile sesomo, ‘me baprista ba ne ba

[98]

Barapeli bana ba ne ba rutiloe, ba bile ba lumela hore ha ba sa etse sehlabelo, Molimo O ke ke Oa hlohonolofatsa bana ba bona le masimo a bona. Barekisi ba liphoofole ba ne ba li rekisa ka theko e boima, ‘me ba ne ba arolelana phaello le baprista, le baholo, ‘me

bona ba ne ba ipokella ka maruo a fumanoeng ka ho hanyapetsa batho.

### **Tšenyeho Ea Ho Qetela Har'a Mosebetsi Oa Molimo**

Thekising tsena ho ne ho le moferefere hoo mantsoe a neng a lebisoa ho Molimo, a neng a koaheloa ke lerata. Ho ne ho utloahala ho lla ha likhomo, linku le maeba, hape ho ne ho utloahala ho ketema ha chelete le likhang. Bajuda ba ne ba rata tempele ea bona hoo ba neng ba nka lentsoe le leng le le leng le khahlanong le eona e le nyefolo, empa ba ne ba beile lerato la chelete holim'a tsohle. Ba ne ba khelohile sepheong sa litšebeletso tse hlomiloeng ke Molimo ka bo-Eena. Hohle moo Molimo O iponahatsang teng, ke qalo e halalelang. Sheba Phallo 19:12,13. Meeli ea tempele ea Molimo e ne e tšoanetse ho bolokoa e halalela, empa meharo e ile ea etsa hore ba se ke ba phethisa.

Baprista le babusi ba ne ba tšoanetse hore ebe ba ile ba khalemela tšebeliso e fosahetseng ea tempele le mabala a eona, 'me ba fe batho mohlala oa bohloeki. Ho e-na le ho ipatlela phaello, ba ka be ba ile ba thusa ba neng ba hlōloa ho reka lintho tsa sehlabelo empa meharo ea thatafatsa lipelo tsa bona.

Moketeng ona, ho ne ho e-tla bohle ba matšoenyehong le bohloking, lihlotso, litutu-tsebe le liqhoala. Ba bang ba ne ba tlisoa ka mealo. Ba bangata ba ne ba futsanehile hoo ba hlōloang ho rekela Morena mahlabelo a theko e tlase, kapa hona ho ithekela lijo. Sehlopha sena se ne se nyahamisoa haholo ke lipolelo tsa baprista. Baprista ba ne ba ithorisa ka hore ba ea halalela, empa ba ne ba hloka mohau le kutloelobohlōkō. Ba ne ba sa hauhele bafutsana, bakuli le ba shoang.

[99] Ha Jesu A kena ka tempeleng A bona ho ananya hona ha bolotsana. O ile A bona bothata ba bafutsana ba neng ba hopola hore ntle le tšollo ea mali, ba ke ke ba tšoareloa libe. A bona sebaka se halalelang sa tempele ea Hae se fetotsoe se sa halaleleng.

E ne e le tšoanelo hore ho etsoe ho hong. Barapeli ba ne ba etsa mahlabelo empa ba se na kutloisiso ea hore ke litšoantšo tsa sehlabelo se le seng feela, se phethehileng. 'Me ho ne ho le teng har'a bona, Eo ba sa Mo eelloeng, ba sa Mo hlompeng, Eo E leng Eena Ea neng A tšoantšitsoe ke mehlabelo a bona. A bona hore



batho ha ba na kutloisiso ea likabelo, ‘me li fosahetse. Ho ne ho se se tlamahantseng baprista le babusi le Molimo. Krete O ne A tli’o theha borapeli bo fapaneng hole le bona.

Krete A shebisisa ka hlōkō sena se etsahalang ka pel’a mahlo a Hae. Leihlo la Hae la boporofeta la talima pele, lilemong le mengoaheng e tlang. A bona kamoo baprista le babusi ba tlang ho thibela hore lentsoe la Molimo le se ke la bolelloa mafutsana, kamoo lerato la Molimo le tla pateloa baetsalibe, le kamoo batho ba tlang ho etsa khoebo ka mohau oa Hae. Sefahleho sa Hae se ile sa bontša bohale le borena. Mahlo a batho a hohelloa ho Eena, esita le a bao ba neng ba rekisa ka bolotsana. Ba bona hore monna enoa O bona menahano ea bona e ipatileng, ‘me O bontšisa tse ipatileng kahare ho bona. Ba bang ba leka ho ipata lifahleho.

Lerata la thekiso le ho ananye la khutsa. Khutso ea eba e bohlōkō. E ne eka sehlopha sena se khobokantsoe ka pel’a lekhotla la Molimo la kahlolo. Ha ba talima Krete, ba bona boMolimo bo bonesa har’a botho ba Hae. Motlotlehi oa leholimo A ema joaloka ha Moahloli A tla ema letsatsing la bofelo — O ne A sa pota-potoa ke khanya e tšoanang le ea mohlang oo, empa ka matla a tšoanang le a tla ba teng mohlang oo a ho bala botebo ba motho. Mahlo A Hae a talima e mong le e mong. Sebopeho sa Hae sa bonahala se ba phahametse, se hlompheha. Khanya ea bonesa sefahleho sa Hae. Lentsoe la Hae le molumo o hlakileng — lona le neng le fana ka molao thabeng ea Sinai — la utloahala kahar’a tempele le re, “Tlosang ntho tsena mona; le se ke la etsa ntlo ea Ntate ntlo ea khoebo!” Johanne 2:16.

A phahamisa phafa ea maratsoana, eo A neng A e thonakile ha A kena, ‘me A laela ba rekisang hore ba tsoe ka tempeleng. Ka cheseho le ka ho tiea ha sefahleho hoo ba neng ba e-s’o bone ho Eena, A rapalatsa litafole tsa ba rekisang ‘me chelete ea oela fatše ka lerata. Ha ho ea kileng A ‘motsa hore na matla O a nka kae. Ha ho ea bileng le sebete sa ho bokella chelete ena ea bolotsana. Jesu ha A ka A ba otlala ka phafa, empa phafanyana eo e letsohong la Hae e ile ea shebahala joaleka sabole e phatsimang. Basebeletsi ba tempele, baprista, bahoebi, le barekisi ba likhomo, ‘moho le linku le likhomo tsa bona, ba tsoa ba petetsane ka tempeleng, ba baleha kahlōlo ea boteng ba Hae.

[100]

## Tempele E Hloekisoa Ke Boteng Ba Morena

Sechaba sa tlaloa ke tšabo, ‘me sa ikutloa eka se khurumelitsoe ke bo-Molimo. Le barutuo ba ile ba thōthōmetsoa ke mantsoe le mokhoa oa Jesu, O sa tšoaneng le boitšoaro ba Hae ba mehla. Ba ile ba hopola hore ho ngotsoe tšena ka Eena, “Ho chesehella ntlo ea hao ho ntjele.” Pesaleme 69:10. Liphoofole le batho ba neng ba tletse mabaleng a tempele tsa tloha. Khutso e tebileng ea nka sebaka sa moferefere. Boteng ba Morena ba halaletsa tempele e hahetsoeng lebitso la Hae.

Ka ho hloekisa tempele, Jesu O ile A phatlalatsa thōmo ea Hae e le Mesia, ‘me A qala mosebetsi oa Hae. Tempele e ne e beiloe e le setšoantšo sa thuto ho Baiseraele le lefatše. E ne e le sepheo sa Molimo hore sebōpuoa se seng le se seng se fetohle tempele ea Molimo. Pelo ea motho e ne e se e sa bontše khanya ea ea Halalelang, hobane e ne e ntšofalitsoe le ho silafatsoa ke sebe. Empa ka ho amohela sebōpeho sa Mora oa Molimo, Molimo O lula ka hare ho motho, ‘me pelo e boele e fetohle tempele ea Hae ka mohau oa Hae o pholosang.

[101] Molimo O hlomile tempele e Jerusalema e le bopaki ba lehae le phahameng le buletsoeng motho e mong le e mong. Empa Bajuda ha ba ka ba inehela hore e be litempele tse halalelang tsa Moea oa Molimo. Mabala a tempele, a neng a tletse batho ba rekisang le liphoofole a ne a bontša bonnete ba boemo ba tempele ea pelo, e silafalitsoeng ke menahano le litakatso tse sa lōkang. Ka ho hloekisa tempele, Jesu O ne A bontša thōmo ea Hae ea ho hloekisa pelo sebeng sa -litakatso tsa lefatše, litakatso tsa boikhōhōmōso, litloaelo tse litšila tse senyang moea. “Morena eo le ‘matlang o tla kena Tempeleng ea hae a sa lebelloa. Morōmuoa eo le mo lebeletseng oa tla...Ebe ke mang ea ka tiisetsang tsa mohl’ a letsatsi la ho tla ha hae? Eena o joaloka mollo oa sebōpi...O tla lula fatše joaloka ea tšèkang, a hloekisa silefera. O tla hloekisa Balevi, a ba tšèkè joaloka khauta le silefera.” Malakiea 3:1-3.

“Na ha le tsebe hore le tempele ea Molimo, le hore Moea oa Molimo o ahile ka ho lona? Ha motho a heletsa tempele ea Molimo, Molimo o tla mo timetsa, hobane tempele ea Molimo ea halalela, ‘me tempele eo ke lona.” 1 Bakorinthe 3:16,17.

Ha ho motho eo ka matla a hae a ka tebelang mokhopi ona o litšila o hapileng pelo ea hae. Ke Krete feela ea ka hloekisang tempele ea moea. Empa A ke ke A qobella hore A kene. O re, “Bona, ke eme monyako, ‘me kea kokota. Haeba motho a ka utloa lentsoe la ka, ‘me a mpulela, ke tla kena ha hae.” Tšenolo 3:20. Boteng ba Hae bo tla hloekisa ‘me bo halaletse moea, e le hore o fetohe tempele ea Morena e halalelang, “Ntlo ea Molimo moeeng.” Baefese 2:22.

### Tšoantšiso Ea Kahlōlo Ea Ho Qetela

Baprista le babusi ba ne ba ile ba baleha ka tempeleng ba tletsoe ke tšabo, ba balehela Ea neng A bala lipelo tsa bona. Krete O ile A bona pono ena e tšoantša hore sechaba sa Bajuda se tla qhalana, ka baka la bokhopo le lipelo tsa bona tse thata.

Baprista ba ne ba balehelang? Ke eng ha ba ne ba sa ikemele? Eo Ea neng A ba tebela, e ne e le mor’a ‘metli, Mogalelea oa mofumanehi. Ke eng ha ba ne ba sa itšireletse? Ke eng ha ba ile ba siea chelete ea bona ea bolotsana, ho balehela Eo Ea sebōpeho se tlase?

Krete O ne A bua ka matla a bokhosi, ‘me sebopeho sa Hae le lentsoe la Hae, li ne li e-na le seo ba ke keng ba se emela. Ha ba utloa taelo ea Hae, ba ile ba elelloa boemo ba Hae ba ‘nete, hore bona ke baikaketsi le basenyi. Ha bo-Molimo bo khantša botho ba Hae, ba ile ba iphumana eka ba ka pel’a terone ea Moahloli ea sa feleng, ‘me ba se ba ahlōtsoe ka ho sa feleng. Ka nakoana eo, ba bangata ba ile ba lumela hore ke Mesia. Moea o Halalelang O ile oa chabisetsa likelellong tsa bona lipolelo tsa baporofeta tse buang ka Krete. E be ba tla lumela ho kholisoa?

[102]

Ha ba ka ba baka. Ba ne ba tseba hore ba molato oa ho qhekella batho. Ba hloea Krete hobane A ile A bala menahano ea bona. Khalemelo ea Hae e pepeneneng e ile ea ba soabisa, ‘me ba tlaloa ke mōna ha ba bona ‘ tšusumetso ea Hae bathong e hōla. Ba rera ho mo qholotsa ka ho Mo botsa hore na matla a ho ba tebela O A nkile kae.

Ba khutlela tempeleng butle, le ka ho inahana, empa ba tletse lehloeo ka lipelong tsa bona. A phetoho e kaakang! Ha ba ne ba

baleha, bafumanehi ba ne ba ile ba salla morao; ‘me joale ba ne ba talimile Jesu, eo sefahleho sa Hae se neng se tletse lerato le mohau.

Batho ba ne ba bokanetse Krete, ba etsa boipiletso bo potlak-ileng bo reng, Morena, ntlhohonolofatse. Tsebe ea Hae e ne e utloa sello se seng le se seng. Bohle ba ne ba mameloa. Bohle ba ile ba folisoa mafu a bona.

Ha baprista le basebeletsi ba tempele ba bona mosebetsi ona o moholo, ba ile ba fihleloa ke tšenolo e kholo. Batho ba ne ba pheta tsa ho tšoengoa ke bohlokō, ka ho nyebeha ha bona, ka matsatsi ao ba a qetileng ba opeloa, le ho hlobaela bosiu. Moo tšepo ea bona e seng e fela, Krete A ba folisa. E mong a re, moroalo ona o ne o le boima, empa ke fumane mothusi. Ke Krete oa Molimo, ke tla nehela bophelo ba ka tšebeletsong ea Hae. Batsoali ba laea bana ba bona, ba re, O pholositse bophelo ba hao; phahamisa lentsoe la hao, ‘me u Mo rorise. Tsepo le thabo tsa tlala lipelong tsa bana le bacha, bo-ntate le bo-’m’e, metsoalle le ba shebeletseng. Ba ile ba folisoa moeeng le ‘meleng, ‘me ba khutlela hae ba bolela ka lerato la Jesu.

Ha Jesu A thakhisoa, bao A neng A ba folisitse ha ba ka ba kena mokhopping o neng o hoeletsa o re, “Ha thakhisoe, ha thakhisoe.” Ba ne ba utloela Jesu bohlokō, hobane ba ne ba utloile matla A Hae a makatsang. Ba ne ba Mo tseba e le Mopholosi oa bona. Ba ile ba mamela baapostola, ‘me ba fetoha lipaki tsa mohau oa Molimo le lisebelisuo a tsa pholoso ea Hae.

[103] Sechaba se neng se balehile ka tempeleng, se ile sa khutlela butle kamora’ nako, empa lifahleho tsa bona li ne li bontša ho sa ikemesetsa ho fetoha le lihlong. Ba ne ba khotsoe hore boporofeta ba Mesia bo phethehile ka Jesu. Sebe sa ho silafatsa tempele, se ne se le ho baprista. Ba ne ba lumeletse hore mabala a tempele a fetohle ‘maraka. Batho ba ne ba se na molato. Empa baprista le babusi ba ile ba nka thōmo ea Krete e le phetoho e ncha, ‘me ba Mo botsa hore na matla a ho kena-kenana le se lumeletsoeng ke ba boholong tempeleng O a nkile kae. Ba ile ba khentšoa ke hobane mokhopi oa thekiso o ne o khaolitse, ‘me ba thibela matla a Moea o Halalelang maphelong a bona.

### Qaleho Ea Hore Krete O Tla Qetella A Hanno

Baprista le babusi ba ne ba lōketse hore ba lemohe hore Jesu ke Motlotsuoa oa Morena, hobane matsohong a bona ba ne ba tšoere Mangolo a halalelang, a hlalosang thōmo ea Hae. Ba ne ba tseba hore tlhoekiso ea tempele ke sesupo sa matla a fetang a motho. Le hoja ba ne ba hloile Jesu, ba ne ba sitoa ho iphanyetsa maikutlo a hore e ka ‘na eaba ke moporofeta ea rōmetsoeng ke Molimo ho halaletsa tempele. Ba ile ba ea ho Eena ka tšabo ena ‘me ba re, “U re bontša mohlolo ofe, ha e le moo U etsa tsee?”

Jesu O ne A ba bontšitse letšoao. Ka ho etsa mosebetsi o neng o tšoanetse ho etsoa ke Mesia, O ne A fane ka bopaki bo totobetseng ba semelo sa Hae. Joale A ba araba ka papiso ho bontša hore O bone lehloeo la bona, le hore na le tla lebisa kae. “Qhaqhang tempele ena, ‘me ke tla e tsosa ka matsatsi a mararo.”

Ka mantsoe ana, O ne A sa bontše feela ka tšenyō ea tempele ea Bajuda le mokhoa oa ho rapela, empa O ne A supa le lefu la Hae — tšenyō ea tempele ea ‘mele oa Hae, eo Bajuda ba neng ba se ba ntse ba e rera. Ha Baprista le babusi ba khutlela tempeleng, ba ne ba hopotse ho bolaea Jesu le ho Mo felisa ‘me ba tlose ‘maki oa mofereferere. Empa ba ile ba hopola hore o bua ka tempele e Jerusalema, ‘me ba Mo fetola ka khalefo ba re, “Tempele ena e ile ea hahuoa ka lilemo tse mashome a mane a metso e tšeletseng, ‘me uena u re u tla e tsōsa ka matsatsi a mararo?” Joale ba nka hore Jesu O bontšitse hore A ke ke a tšepjoa, ‘me joale ba tiisa ho Mo hana.

Jesu O ne A tseba hore lira tsa Hae li tla fetola mantsoe A Hae [104] ‘me li a sebelise khahlanong le Eena. A ne a tla sebelisoa kahlong ea Hae le Gologotha ka ho Mo soma. Empa ha A ne A ka A hlalosa ka nako eo, barutuo ba Hae ba ne ba tla ba le tsebo ea hore O tla hlōkōfatsoa, ‘me ba ne ba tla utloa bohōkō boo, ka nako eo, ba neng ba tla sitoa ho bo mamella. ‘Me tlhaloso e ne e tla senolela Bajuda, (pele ho nako), litholoana tsa ho hloka tumelo le litšekamelō tsa bona tse sa lōkang. Ba ne ba se ba kene tseleng eo ba neng ba tla e latela, ho fihlela A hulantsoe joaleka konyana e il’o hlajoa.

Kreste O ne A tseba hore mantsoe ana a tla phetōa. A ne a tla phetōa moketeng oa Paseka, ‘me a oele litsebeng tsa likete-kete tsa batho, ‘me bona ba a jala-jale le karolo tsohle tsa lefatše. Ha A se A

tsohile bafung, moelelo oa mantsoe ana o ne o tla tōtōbala. Ho ba bangata e ne e tla ba bopaki ba bo-Molimo ba Hae.

Mantsoe a Mopholosi ha A re, “Qhaqhang tempele ena, ‘me ke tla e tsosa ka matsatsi a mararo,” a ne a e-na le moelelo o tebileng ho feta kutloisiso ea ba mametseng. Litšebeliso tsa tempele li ne li bontša sehlabelo sa Mora oa Molimo. Leano lohle la tšebeliso ea sehlabelo e ne e le setšoantšo sa lefu la Mopholosi ho pholosa lefatše. Tloaelo ena e ne e se na moelelo ka thōko ho Eena. Ha Bajuda ba tiisa khano ea bona ka ho nehelana ka Krete hore A bolaoe, ba ile ba hana sohle se neng se fana ka moelelo oa tempele le litšebeliso tsa eona. ‘Me khalalelo ea eona e ne e felile. E ne e lōketsoe ke tšenyeho. Ho tloha mohlang oo, litšebeliso tsa sehlabelo li ne li feletsoe ke moelelo. Ka ho bolaea Krete, Bajuda ba ile ba senya tempele ea bona. Ha Krete A thakhisoa, lesela le arolang tempele le ile la taboha ka lehare, ho tloha holimo ho isa tlase, e le sesupo sa hore sehlabelo se sehlo sa ho qetela se entsoe. Tsamaiso ea mahlabelo e ne e fihlile pheletsong.

“Ke tla e tsosa ka matsatsi a mararo.” Jesu O ile A tsōha lebitleng la Josefa e le ea hlōtseng. Ka lefu le tsōho ea Hae e ile ea e-ba mosebeletsi oa “tente ea ‘nete e hlomiloeng ke Morena, e seng ke motho.” Baheberu 8:2. Tempele ea Bajuda e ne e hahiloa ke batho; empa tempele e holimo ha e ea hahuo ke motho. “O tla hlōmela moo e leng hona teng, a hahe Tempele ea Morena...O tla apesoa botlotlehi, a rene a lutse teroneng ea hae. Moprista le eena o tla lula teroneng ea hae.” Sakariea 6:12,13

[105]

Litšebeliso tsa mahlabelo tse neng li supa ho Krete li ile tsa feta; ‘me mahlo a batho a ile a talima sehlabelo sa ‘nete sa libe tsa lefatše. Boprista ba lefatše bo ile ba khaotsa; empa re talima ho Jesu, mosebeletsi oa selekane se secha. “Tsela e kenang Sehalalelong se halalelang ka ho fetisisa ha e e-s’o buloe, ha karolo ea pele ea Tente e sa ntsane e le teng....Joale Krete o tlele e le Moprista e Moholo oa tse molemo tse tlang ho tla. Tente eo a sebeletsang ho eona e kholo, ‘me e phethehile ho feta ea pele. Ha ea etsoa ke motho, e leng ho re hase ea lefatše lena. O kene hanngoe feela Sehalalelong se halalelang ka ho fetisisa, a sa nka mali a liphooko kapa e manamane, empa a nkile mali a hae ka sebele, ‘me a re fumanela topollo e sa feleng.” Baheberu 9:8-12.

“Ka hona o na le matla a ho pholosa ka ho tlala bohle ba tlang ho Molimo ka eena, kaha a phela kamehla ho ba buella.” Baheberu 7:25. Le hoja re ke ke ra bona sehalaleliso le Moprsta oa rōna ea phahameng ka mahlo a botho, empa barutuo ba ne ba ke ke ba khaotsa ho buisana le Eena kapa ho felloa ke matla, ka lebaka la ho ba sieo ha Mopholosi. Le ha Jesu A ntse A etsa litšebeletso sehalalelisisong se holimo, e ntse e le mosebeletsi oa kereke mona lefatseng, ka Moea oa Hae. Tsepiso eo A ileng A e etsa mohlang a tsamaeang, e phethehile, “Bonang, ke na le lona kamehla eohle ho isa bofelong ba lefatše.” Matheu 28:20. O ntse A matlafatsa kereke ea Hae le joale.

“Moprsta oa rōna e Moholo hase ea ka sitoang ho re utloela bohloko mefokolong ea rona, hobane ke ea ileng a lekoa ka litsela tsohle joaloka rona, empa a se ke a etsa sebe. Ka baka leo, a re atameleng ka sebete teroneng ea mohau, re tle re amohele lereko, re fumane le mohau ho re thusa ha re hloka thuso.” Baheberu 4:15,16.

[106] **KHAOLO EA 17—NIKODEMA O TLA HO JESU  
BOSIU**

*[E itšetlehile ka khaolo ea Johanne 3:1-17.]*

Nikodema e leng setho se hlomphehang, se rutehileng sa lekhotla la sechaba o ne a sisimolositsoe ke thuto ea Jesu. Leha e ne e le morui, a bile a rutehile, o ne a hohetsoe ka mohlolo ke Monazareta enoa ea ikokobelitseng. Lithuto tse tsoang molomong oa Mopholosi li ne li lutse maikutlong a hae, ‘me o ne a lakatsa ho ithuta haholo.

Kreste O ile A sebelisa matla ho hloekisa tempele ‘me hona ho ile ha qholotsa lehleo la baprista le babusi. Sebete se sekaalo se neng se bonahala ho Mogalelea enoa ea neng A sa tsebahale, se ne se ke ke sa mamelloa. Empa ha se bohle ba neng ba lumela hore mosebetsi oa Hae o feliso. Ba bang ba ne ba tšaba ho ba khahlanong le Eo ea neng A bonahala A tsamaisoa ke Moea oa Molimo. Ba ne ba tseba hore bokhoba ba Bajuda sechabeng seo sa bahedene e ne e le litholoana tsa manganga a bona le ho se natse likhalemelo tse tsoang ho Molimo. Ba ne ba tšaba hore ka ho rera ho hanyetsa Jesu baprista le babusi ba ne ba latela mehatong ea bo ntat’a bona ‘me ba ne ba tla tlisetsa sechaba mathata a macha. Nikodema o ne a e-na le maikutlo a tsoanang le a bona. Lekhotleng la puso, Nikodema o ile a eletsa hore lintho li etsoe ka hlōkō le ka boitšoarō. O ile a eletsa ka hore, haeba Jesu A hlile A fuoe kabelo ea ho sebelisa matla a tsoang ho Molimo, e ka ba kotsi ho se natse likeletso tsa Hae. Baprista ba ne ba ke ke ba iphapanyetsa keletso ena.

[107] Nikodema o ne a ile a ithuta boporofeta bo bolelang ka Jesu ka hlōkō. Patlisisong ea hae o ile a ba le kholo e tiileng ea hore enoa ke Eena ea neng A tšoanetse ho tla. O ne a ile a utloisoa bohloko ke tšebeliso e fosahetseng ea tempele. O ile a bona ha Jesu A ntša ba neng ba reka le ba neng ba rekisa; a bona Mopholosi A folisa ba kulang; a bona ha lifahleho tsa bona li tlala thabo, a utloa le mantsoe a bona a thoriso. O ne a se na pelaelo ea hore Jesu oa Nazareta ke Morōmuoa oa Molimo.



O ne a lakatsa haholo ho buisana le Jesu, empa o ne a tšaba ho Mo batla pepeneneng. Ha Lekhotla la puso le ne le ka tseba hore o ile a etela Jesu o ne a tla nyefoloa le ho nyatsoa. A itokisetsa ho kopana le Jesu ka sekhukhu. A etsa lipatlisiso tse khethehileng, ho fumana moo Jesu A orohelang teng, thabeng ea mehloare, ‘me a ema ho fihlela bosiu ha motse o khutsitse, ‘me a ‘Matla.

Kapele ho Kreste, Nikodema o ile a tšoaroa ke lihlolong tse sa tloaelehang, tseo a ileng a leka ho li pata. “Rabbi, rea tseba hore u moruti ea tsoang ho Molimo, hobane ha ho ea ka etsang mehlolo ena eo u e etsang, ha Molimo a se na le eena.” Mantsoe a hae a ne a hlophisitsoe ka mokhoa oo a bontšang ho mema Kreste hore A mo tšepe, empa a ne a bontša ho hloka tumelo. Ha a ka a hlahisa Jesu e le Mesia, o ile a re feela, ke moruti ea rōmeletsoeng ke Molimo.

Jesu O ile A sheba enoa ea neng a bua, joalokaha eka o bala kelello ea hae. A bona ka pele ho mahlo a Hae, ea batlang ‘nete. Ka takatso ea ho holisa tumelo eo momameli oa Hae a neng a se a e-na le eona, A be A se A phunya litaba, A re ka mosa, “Kannetenete, kea u bolella, ha motho a sa tsoaloe bocha, a ke ke a bona ‘Muso oa Molimo.” Johanne 3:3.

Nikodema o ne a tlile lipuisanong, empa Jesu A utolla motso oa ‘nete. A re, Ha u hloke ho kholisoa, empa e le ho fumana pelo e ncha. U tšoanetse ho fumana bophelo bo bocha bo tsoang holimo, pele u ka thabela lintho tsa leholimo. Pele phetoho ena e etsahala, ha ho na ho ba le thuso ho buisana le ‘Na ka matla kapa thōmo ea Ka.

Nikodema o ne a ile a utloa thuto ea Johanne Mokolobetsi e buang ka pako. Empa molaetsa o sisimosang pelo oa Mokolobetsi o ne o ile oa sitoa ho mo kholisa hore ke moetsalibe. E ne e le Mofarisi ea tiileng, ‘me o ne a ithorisa ka mesebetsi ea hae e metle. O ne a tsebahala ka mesebetsi ea hae e metle, ‘me a ikutloa a lōketsoe ke lerato la Molimo. O ile a tšosoa ke monahano oa ‘muso o hloekileng hoo a ke keng a o bona, a le boemong ba hae.

Setšoantšo sa tsoalo e ncha e ne e se ntho e ncha litsebeng tsa Nikodema. Batho ba sokolloang bohedeneng ba ne ba atisa ho bapisoa le bana ba sa tsoa hlaha. Ka lebaka leo, o tlameha a ile a utloisisa mantsoe a Kreste. Empa, joaloka Moisraele, o ile a ikutloa a sa hloke phetoho. Ke kahoo a ileng a makatsoa le ho tenoa ke

mantsoe a Mopholosi. Boikhōhōmōso ba bofarisi bo ne bo loantšana le takatso ea hae ea ho batla ‘nete.

Ka ho makala a araba ka mantsoe a phoqang, “Motho a ka tsoaloe joang a se a tsofetse na?” Joaleka ba bangata, o ile a senola hore ha ho letho mothong oa nama le amohelang lintho tsa Moea; lintho tsa Moea li bonoa ka Moea.

Ka bokhabane bo hlokgang lerata, Mopholosi A phahamisa lentsoe ‘me ka tiiso e kholo A kenya litaba tsena tsa ‘nete kelellong, “Kannete-nete, kea u bolella, ha motho a sa tsoaloe ka metsi le ka Moea, a ke ke a kena ‘Musong oa Molimo.” Nikodema o ne a tseba hore Jesu mona O bua ka kolobetso ea metsi, le nchafatso ea pelo e etsoang ke Moea oa Molimo. O ne a khotsoe hore o ka pel’a Eo ho tla ha Hae ho ileng ha boleloa pele ke Johanne Mokolobetsi.

### **Mohlolo Oa Tsoalo E Ncha Oa Hlalosoa**

Jesu A tsoela pele A re: “Se tsoetsoeng ke nama ke nama, se tsoetsoeng ke Moea ke moea.” Ka tlhaho pelo e tletse bobbe. Sheba Jobo 14:4. Ha ho seo motho a ka se qapang, se ka fumanelang moea o etsang sebe pheko. “Ea thahasellang tsa botho ke sera sa Molimo.” “Hobane pelong ho tsoa mehopolo e khopo: polao ea sohlōhlō, bofebe, bohloa, bosholu, bopaki ba leshano le liketseletso.” Baroma 8:7; Matheu 15:19. Mohloli oa pelo o tsoanetse ho hloekisoa pele seliba se ka hloeka. Ea lekgang ho fihla leholimong ke mesebetsi ea hae le ka ho bōlōka molao o leka ho fihlela se kekeng sa fihleloa. Bophelo ba Mokreste ha bo a khomeletsoa ho ba khale, empa ke nchafatso ea semelo, ho shoa boeeneng le sebeng, le bophelo bo bocha. Phetoho ena e ka tlisoa feela ke Moea o Halalelang.

[109]

Nikodema o ne a hlōletsoe, ‘me Jesu A sebelisa moea ho hlakisa moelelo oa hae: “Moea o fokela moo o ratang teng, ‘me u utloa molumo oa oona, empa ha u tsebe moo o tsoang teng le moo o eang teng; e mong le e mong ea tsoetsoeng ke Moea o joalo.”

Moea o ea utloahala ha o sisinya mahlaka le lipalesa, empa ha o bonahale. Ho joalo le tšebetsong ea Moea o Halalelang pelong. Motho a ka sitoa ho bolela nako le sebaka, kapa ho tšoaea mehato ea tšōkōlōho, empa sena ha se bolele hore ha a ea sōkōlōha. Krete O sebetsa pelong ka linako tsohle, ka letsoho le sa bonoeng joaleka moea. Hanyane ka hanyane, moea o hoheloa ho atamela ho Krete.

Sena se ka fumanoa ka ho bala mangolo kapa ho utloa lentsoe ho moreri ea phelang. Hang ha Moea O etsa boipiletso bo otlohileng, motho o inehela ho Jesu ka thabo. Ba bangata ba hlalosa hona e le “tšokōlōho e potlakileng,” empa ke litholoana tsa qekiso ea nako e telele ea Moea oa Molimo.

Moea O etsa tse bonoang le ho tšoaroa. Ka mokhoa o joalo, mosebetsi oa Moea mothong, o tla itlhahisa ka liketso, ho motho ea utloileng pholoso ea ‘Ona. Moea oa Molimo O fetola bophelo. Menahano ea sebe ea tlosoa, liketso tse mpe li lahloe. Lerato, boikokobetso le khotso li nka sebaka sa bohale, mohono le ntoa. Thabo e nka sebaka sa masoabi. Ka tumelo ha motho a inehela ho Molimo, matla ao ho seng leihlo la motho le ka a bonang, a bopa motho e mocha ka setšoantšo sa Molimo. Re ka qala ho pholoso re sa le mona, ka maiphihlelo a rōna; litholoana tsa teng li fihla mengoaheng e se nang bofelo.

### Nikodema O Qala Ho Bona Leseli

Ha Jesu A ntse A bua, mahlaseli a ‘nete a ile a phunyeletsa kelello ea ‘musi, empa ha a ka a utloisisa mantsoe a Mopholosi ka botlalo. O ile a re ka ho makala, “Tsee li ka etsahala joang?”

“U moruti oa Iseraele, empa ha u utloisise litaba tsee?” Jesu A botsa. Sebakeng sa ho khentšoa ke mantsoe ana a tōtōbetseng a ‘nete, Nikodema a kabe a ile a elelloa bofokoli ba hae, ka baka la ho hloka tsebo linthong tsa moea. Empa Krete O ne A bua ka mahlonoko, bokhabane, le lerato le nang le cheseho, hoo Nikodema a sa kang a utloa bohlōkō. [110]

Empa ha Jesu A hlalosa hore thomo ea Hae ke ho haha ‘muso oa moea eseng o felang, momameli oa Hae o ile a tšoenyeha. Jesu ha A bona sena, A eketsa A re, “Haeba le sa lumele ha ke le bolella tsa lefatše, le tla lumela joang ha ke le bolella tsa leholimo na?” Ka ho se utloisise mosebetsi oa Krete lefatseng, Nikodema o ne a sitoa ho utloisisa mosebetsi oa Hae leholimong.

Bajuda bao Jesu A neng A ba tebetse tempeleng, ba ne ba chesehella ho itlhahisa ba halalela, empa ba qheletse ka thōko khalalelo ea pelo. Bona ba neng ba khomaretse molao, ba ne ba qhoebeshana le Moea ka linako tsohle. Bohlōkō ba bona bo boholo, e ne e le phetoho

eo Krete A neng A e hlalositse Nikodema — e leng tsoalo e ncha ea boitšoaro, tlhoekiso ea sebe, le nchafatso ea khalalelo.

Baiseraele ba ne ba hloka boitšireletso mabapi le mosebetsi oa tsoalo e ncha. Davida o ile a rapela a re, “Oho, Molimo, ak’u bōpe ka ho ‘na, u bōpe pelo e hloekileng, u kenye moea o mocha, o tiileng.” Tsepisano e ne e fanoa ka Esekiele, e reng, “Ke tla le nea pelo e ncha le moea o mocha, ke felise pelo tse thata sa lejo e tse ka ho lōna, ke le nee pelo tse ikokobelitseng. Ke tla le nea Moea oa ka, ke etse hore le tsamae ho ea ka litaelo tsa ka, le boloke melao ea ka, le e phethe.” Pesalema 51:12; Esekiele 36:26,27.

Joale Nikodema o ile a qala ho utloisisa moelelo oa mangolo ana. A bona hore ha ho motho ea ka bang le tōkelo ea ho kena ‘musong oa maholimo ka ho latela molao a sa sisinyeha, empa a etsa hona kantle feela.

Nikodema o ile a hoheloa ke Krete. Ha Mopholosi A mo hlalosetsa ka tsoalo e ncha, o ile a laba-labela ho ba le phetoho ena kahare ho eena. E ka fumanoa joang? Jesu A araba potso ena e neng e sale ka maikutlong: “Joalokaha Moshe a ne a phahamise nōha feelleng, eka khona Mor’a Motho a phahamisoe joalo, hore e mong le e mong ea lumelang ho eena a be le bophelo bo sa feleng.”

[111] Setšoantšo sa nōha e fanyehilioeng, se ile sa totobatsa thōmo ea Mopholosi ho Nikodema. Ha bana ba Iseraele ba e-shoa ke ho longoa ke linoha tse mahlōkō, Molimo A laela Moshe ho etsa noha ea koporo ‘me a e fanyeha sefateng kahar’a sechaba. Bohle ba neng ba talima ba ne ba phela. Nōha e ne e le setšoantšo sa Krete. Joalekaha setšoantšo sa noha e senyang se fanyehoa, ho ba folisa, ka mokhoa o joalo, Mopholosi oa bona o ne a tla hlaha “a inketse botho bo tšoanang le baetsalibe.” Baroma 8:3. Molimo O ne O lakatsa ho etella Baiseraele pele ho ba isa ho Mopholosi. Ho ne ho se letho leo ba ka le etsang ho folisoa maqeba le ha e le ho tšoareloa libe, ha ese feela ho bontša tumelo ea bona mphong ea Molimo. Ba ne ba tšoanela ho talima ‘me ba phele.

Bao ba neng ba lonngoe ke linōha ba ne ba ka batla ho fuoa tlhaloso ea bohlafehi. Empa ho ne ho se tlhaloso e fanoeng. Ho hana ho talima e ne e le ho shoa. Nikodema o ile a fumana thuto ‘me a tsamaea le eona. O ile a batlisisa mangolo ka mokhoa o mocha, e seng ho buisana le ba bang, empa ho amohela bophelo ba moea. O ile a inehela ho tsamaisoa ke Moea o Halalelang.

Ba bangata kajeno ba hloka ho ithuta ‘nete ena e ileng ea rutoa Nikodema, ea nōha e fanyehiloeng. “Ha ho lebitso le leng lesele tlas’a letsatsi, le neiloeng batho, leo re tšoanelang ho pholoso ka lona.” Liketso 4:12. Ka tumelo re fumana mohau oa Molimo. Empa tumelo ha se eona Mopholosi oa rōna. Ha e amohele letho. Ke letsoho le re kopanyang le Krete, pheko ea sebe. Re sitoa le ho baka ka ntle ho thuso ea Moea o Halalelang. Mangolo a re ka Krete, “Molimo o mo phahamisitse ka letsoho la hae le letona hore e be ‘Musi le Mopholosi, ea tla nea Iseraele pako le tšoarello ea libe.” Liketso 5:31. Pako le tšoarello li tsoa ho Krete.

Ha ho le joalo re ka pholoso joang? “Bonang Konyana ea Molimo e tlosang libe tsa lefatše.” Johanne 1:29. Leseli le khayang sefapanong, le senola lerato la Molimo. Lerato la Hae le re tlisa ho Eena. Ha re se khahlanong le ho tlisoa ho Eena, re tla tataisetsoa maotong a sefapano ka tšōkōlōho libeng tse thakhisitseng Mopholosi. Moea oa Molimo o sebelisa tumelo ho hlahisa bophelo bo bocha moeeng. Menahano le litakatso li laoloa ke Krete. Pelo le kelello, li boptjoa bocha ka setšoantšo sa ea sebetsang kahare ho rona ho laola tsohle tsa rona. Joale molao oa Molimo o ngoloa ka kelellong le ka pelong, ‘me re ka re ‘moho le Krete, “Ke thabela ho etsa thato ea hao, Molimo oa ka.” Pesalema 40:8. [112]

Puisanong le Nikodema, Jesu O ile A manolla leano la pholoso. Lipuisanong tsa Hae tse tiileng kamora’ tsena, ha ho moo a ileng a hlalosa ka ho tlala, mohato ka mohato, mosebetsi o hlokahalang ho etsua lipelong tsa bohle ba tla ja lefa la ‘muso oa maholimo. Qalong ea thōmo ea hae, o ile a senolela setho sa Lekhotla la puso la Bajuda moruti oa sechaba, ‘nete. Empa baetapele ba Iseraele ha ba ka ba amohela leseli. Nikodema o ile a bōlōka ‘nete ka pelong ea hae, ‘me ka lilemo tse tharo o ne a bontša a hlahisa litholoana tse fokolang feela.

Empa mantsoe ao a ileng a buuo a bosiu thabeng, khutsong, ha a ka ba a lahleha. Libokeng tsa lekhotla la puso, Nikodema o ile a nyopisa merero ea ho bolaea Jesu. Eare qetellong ha A fanyehilo sefapanong, Nikodema a hopola mantsoe ana “Joalokaha Moshe a ne a phahamise nōha feelleng, eka khona Mor’a Motho a phahamisoe joalo, hore e mong le e mong ea lumelang ho eena a be le bophelo bo sa feleng.” Leseli le tsoang lipuisanong tseo tsa lekunutu, le ile la

bonesa sefapano mane Gologotha, ‘me Nikodema a bona hore Jesu ke Mopholosi oa Lefatše.

Kamora’ nyolohelo ea Morena, ha barutuo ba phasaphasitse ke litlhoriso, Nikodema a ba sebete ho ema ka pele. O ile a sebelisa maruo a hae bo thusa kereke e ntseng e hōla, eo Bajuda ba neng ba lebeletse hore e tla fela kamora’ lefu la Krete. Nakong ea tsietsi, enoa ea neng a botsa lipotso ka bohlae o ne a tiile joale ka lefika, a khothatsa barutuo tumelong ‘me a fana ka mekhoha ea ho tsoellisa lentsoe pele. O ile a fetoha mofutsana linthong tsa lefatše, empa ha a ka a tsila-tsila tumelong e ileng ea qala bosiuung boo a neng a buisana le Jesu ka bona.

Nikodema o ile a phetela Johanne ka lipuisano tseo, ‘me a li ngola ho laea like-tekete tsa batho. Linnete tsena tse ileng tsa rutoa bosiuung boo bo mahlonoko, ha ‘musi enoa oa Bajuda a ne a ithuta ka mokhoa oa bophelo, ho Moruti enoa ea ikokobelitseng oa Mogalelea, e ntse e le tsa bohlokoa le kajeno.

## **KHAOLO EA 18—“EKA KHONA EENA A HŌLA [113] ‘ME ‘NA KE BOBE”**

*[E itšetlehile ke khaolo ea Johanne 3:22-36.]*

Hoja Johanne Mokolobetsi a itlhahisa e le Mesia, ‘me a tsosa moferefere khahlanong le Roma, baprista le batho ba ka be ba ile ba khobokana lehlakoreng la hae. Lintho tsohle tse hohelang takatso ea bophahamo ba ho hapa lefatše, Satane o ne a laletse ho mo leka ka tsona. Empa o ile a ema a tiile ho hana ho ekoa. thahasello e neng e lebisoa ho eena, o ne a e lebisa ho ba bang.

Joale a bona thahasello ena e neng e tobane le eena e se e fetoha e e-ea ho Mopholosi. Letsatsi ka letsatsi matšoele a neng a khobokana ho eena a ile a fokotseha hobane batho ba ne ba se ba bokana ho mamela Jesu. Lenane la balateli ba Krete le ne le eketseha letsatsi ka letsatsi.

Empa balateli ba Johanne ba ile ba honohela ho tsebahala ha Jesu. Ba itherela ho tšoea mosebetsi oa hae liphoso, ‘me ka potlako ba ile ba fumana monyetla oa ho etsa joalo. Ho ile ha hlaha potso lipakeng tsa barutuo ba Johanne le Bajuda hore na kolobetso e hlatsoa motho sebe; ba supa hore kolobetso ea Jesu e fapane hole le ea Johanne. Kapele barutuo ba Johanne ba e-ba khahlanong le balateli ba Krete ka hore na mantsoe a tsoanetseng ho sebelisoa kolobetsong ke a fe, le hore na ba na le tōkelo ea ho kolobetsa na. Barutuo ba Johanne ba tla ho eena ka pelaelo e reng, “Rabbi, ea bileng le uena mose ho Jorodane, eo u mo pakileng, bona, oa kolobetsa, ‘me bohle ba ea ho eena.”

Satane o ile a tlisa moleko ho Johanne, ka mantsoe ana. Hoja [114]  
Johanne a bonša tšoabo ea ho hlolisoa, a ka be a ile a jala peo ea karohano, a khothaletsa mohono le mona, ‘me a khina tsoelo-pele ea lentsoe.

Ka tlhaho Johanne o ne a e-na le liphoso le bofokoli bo aparet-seng botho, empa lerato la leholimo le ne le mo amme, ‘me le mo fetotse. O ne a phela sebakeng se e-song ho silafatsoe ke boithati le

takatso ea bophahamo. Ha a ka a ba a tšehetsa ho se khotsofale ha balateli ba hae, empa a bontša kamoo a amohelang ka thabo, Eo ea neng a Mo lōkiselitse tsela.

A re, “Motho a ke ke a amohela letho haese ha a le neoa le etsoa leholimong. Iona ka sebele le ka mpakela hore ke itse: ‘Na ha ke Krete, empa ke rōmiloe ho mo etella pele.’ Ea nang le monyaluoa ke monyali, empa motsoalle oa monyali, ea emeng pel’a hae, ‘me a mo utloa, o ee a thabe haholo ka baka la lentsoe la monyali.” Johanne o ile a ipeha e le motsoalle eo e leng morōmuoa lipakeng tsa ba babeli ba nyalanang, eena e le ea lōkisetsang lenyalo. Ha monyali a se a fumane monyaluoa oa hae, mosebetsi oa motsoalle o phethehile. O ne a nyakalatsoa ke thabo ea bao a sebelilitseng kopano ea bona. Johanne o ile a ba le thabo ea ho ba paki ea katleho ea mosebetsi oa Mopholosi. O ile a re, “Thabo ena ea ka e phethahetse. Eka khona eena a hole, empa ‘na ke nyenyefale.”

Ka ho talima Mopholosi ka tumelo, Johanne o ne a fihletse boemo ba ho itiha. E ne e ile ea e-ba lentsoe feela, mohoo lefeelleng. Joale a amohela khutso le ho boba, ka thabo, e le hore mahlo a bohle a talime Leseli la bophelo.

Moea oa moporofeta, o neng o se na boikhopolo o ne o tletse leseli la bo-Molimo. Johanne a re, “Ea tsoang holimo o kaholimo ho bohle...Eo Molimo a mo rōmileng o bolela lipolelo tsa Molimo, hobane Molimo o fana ka Moea ho se tekanyetso.” Krete O itse, “Ha ke batle ho etsa thato ea ka, empa thato ea ea nthōrnileng.” Johanne 5:30.

Ho joalo le ho balateli ba Krete. Re ka fumana leseli la leholimo ha feela re lumela ho khokhotha boikhopolo ‘me re lumele ho isa monahano o mong le o mong ho hapuo ke Krete. Ho bohle ba etsang hona, Moea o Halalelang o fanoa ntle le tekanyo.

[115] Katleho ea mosebetsi oa Krete, eo Mokolobetsi a neng a e amohetse ka thabo, e ile ea tlalehoa le ho babusi Jerusalema. Baprista le baruti ba ne ba le mōna ka tšusumetso ea Johanne, ha ba bona batho ba sutha sinagogeng ‘me ba khobokana lefeelleng. Empa joale Enoa O ne A na le matla a fetisang ho hohela matšoele. Baetapele bao ba Iseraele ba ne ba sa lumele hore, joaleka Johanne, ba re, “Eka khona eena a hole, empa ‘na ke nyenyefale.”



## **Mohlala Oa Jesu Oa Ho Qoba Likhohlano**

Jesu O ne A tseba hore sefefe se se se ntse se fehla se neng se tla hohola e mong oa baporofeta ba baholo ba kileng ba fuoa lefatše. Ka ho leka ho qoba lintho tse ka bakang khohlano, A ikhula A khutsitse, A leba Galelea. Le rōna ka mokhoa o joalo ha re emela ‘nete, re tsoanetse ho leka ho qoba lintho tse ka bakang likhohlano. Ha ho na le maemo a ka bakang karohano, re tšoanetse ho latela mohlala oa Jesu le Johanne Mokolobetsi.

Johanne o ne a bitsitsoe ho etella ntlafatso pele. Empa mosebetsi oa hae o ne o sa lekana ho ba motheo oa kereke ea Bokreste. Ho ne ho e-na le mosebetsi o mong o ne o tšoanetse ho etsoa oo bopaki ba hae bo neng bo ke ke ba o phetha. Balateli ba hae ba ne ba sa utloisise sena. Ha ba bona Jesu a e-tla ho nka mosebetsi, ba ile ba tlaloa ke mōna.

Kotsi ena e ntse e le teng. Molimo O bitsa motho ho etsa mosebetsi o itseng; ha motho enoa a o phethile ho ea kamoo a khonang, Morena O tliša e mong ho o ntšetsa pele. Empa ba bangata ba nahana hore katleho ea mosebetsi e itšetlehile ka ea neng a sebetsa pele. Mōna oa kena, ‘me mosebetsi oa Molimo o silafatsoe. Enoa ea phahamisoang ka phoso a fihleloe ke moleko oa ho itšepa. Batho ba itšetleha ka motho ho fumana tataiso ‘me ba khaohanngoe le Molimo.

Ho lehlohonolo ba lumelang ho kokobetsoa, ‘me ba re, joaloka Johanne Mokolobetsi, “Eka khona eena a hole, empa ‘na ke nyenyefale.”

[116] **KHAOLO EA 19—JESU LE MOSALI EA NANG  
LE BANNA BA BAHLANO**

*[E itšetlehile ka khaolo ea Johanne 4:1-42.]*

Ha A le leetong la ho ea Galelea, Jesu O ile A feta har'a motse oa Samaria. E ne e le har'a mpa ea motšoare ha A fihla selibeng sa Jakobo. Kaha O ne A khathetse ke leeto la Hae, O ile A lula fatše ho phomola, ha barutuo ba Hae bona ba e-ea ho reka lijo.

Bajuda le Basamaria e ne e le lira tse kholo. Ho sebelisana 'moho ka tsa khoebo ha ho hlokeha, ho ne ho lumelloa ke borabbi, empa Mojuda o ne a ke ke a kalima kapa a amohela molemo oo a o etsetsoang ke Mosamaria leha e se e le sengoathoana sa bohobe kapa mohope oa metsi. Barutuo ka ho reka lijo ba ne ba etsa se lumelletsoeng ka moetlo oa sechaba sa habo bona. Empa ho kōpa molemo ho Basamaria ba ne ba sa nahane ho ho etsa.

Ha Jesu A lutse moo pela seliba, O ne A khathetse ke tlala le lenyora. Leeto le ne le ile la ba letelele 'me letsatsi la motšoare le ne le Mo chesa. Lenyora la Hae le ne le eketsoa ke monahano oa metsi a pholileng, a khatholosang, a pel'a Hae; empa O ne A se na lerapo kapa nkho ea metsi, 'me seliba se ne se tebile.

Mosali oa Mosamaria o ile a atamela, a bonahala a sa elelloe boteng ba hae, 'me a tlatsa nkho ea hae metsi. Ha a reteleha ho tsamaea, Jesu A kōpa ho noa. Kōpo ea mofuta ona ho batho ba khale e ne e ke ke ea iphapanyetsoa. Ho fa motsamai ea nyoriloeng metsi e ne e le tšoanelo ea boinehelo, eo Maarabia a neng a etsa ka hohle ho e phetha.

[117] Mopholosi O ne A batla ho fumana senotlolo sa ho bula pelo ea mosali, eo 'me ka bohlale bo tsoaloang ke lerato la bo-Molimo, O ile A kopa thuso. Tšepo e tsosolosa tšepo. Morena oa leholimo O ile A tla moeeng ona o neng o qheletsoe ka thoko, A kōpa tšebeletso ea liatla tsa hae. Eena ea entseng maoatle, ea laolang le metsi a tebileng, ea butsenseng mehloli le mecha ea lefatše, O ne A itšetlehile ka mohau oa molichaba ho fumana le 'ona metsi a ho noa.

Mosali o ile a elelloa hore Jesu ke Mojuda, ‘me ka ho makala, a lebala ho phetha kōpo ea Jesu, empa a leka ho fumana lebaka leo kōpo e entsoeng ka lona. Mosali joale a botsa, a re “U ka nkōpa ho noa joang u le Mojuda, ‘na ke le mosali oa Mosamaria?”

Jesu A araba A re, “Hoja u tsebile mpho ea Molimo, le hore na ke mang ea reng ho uena: ‘Ak’u mphe, ke noe,’ uena, u ka be u mo kōpile, ‘me a ka be a u file metsi a kollang.” Hoja u ne u nkōpile, nkabe ke u file metsi a bophelo bo sa feleng, oa noa.

### **Thahasello Ea Mosali Ea Tsosolosa**

Mokhoa oa mosali enoa oa mafeela, oa masaoana, oa fetoha. “Monghali, ha u na sekhello, le seliba se tebile; joale metsi a kollang u a nka kae? Na u moholo ho feta ntat’a rōna Jakobo ea re neileng seliba see, le eena a noa ho sona?” O ne a bona ka pele ho eena motsamai feela ea nyoriloeng. Kelellong ea hae o ile a mo bapisa le Jakobo. O ne a hetlile morao, nakong ea bontat’ae, le pele Mesia A e-tla, athe Mesia ka bo-Eena O pel’a Hae, ‘me o ne a sa Mo tsebe. Ke meea e mekae kajeno, e nyoriloeng empa e le haufi le seliba, empa e shebile hole moo e ka fumanang mohloli oa seliba sa bophelo!

Ka qophello e mahlonoko Jesu A re, “E mong le e mong ea noang metsi ana, o tla nyoroa hape; athe mang le mang ea noang metsi ao ke tla mo fa ‘ona, a ke ke a hlola a nyoroa le ka mohla, empa metsi ao ke tla mo fa ‘ona a tla fetoha ka ho eena seliba sa metsi a kopoletsang bophelong bo sa feleng.”

Ka hohle, batho ba laba-labela ho fumana se ka kholisang meea ea bona. O mong feela ea ka tsebang ho etsa joalo -Kreste Eena takatso ea lichaba tsohle. Mohau oa bo-Molimo oo a fanang ka [118]

Jesu ha A ka A hlahisa maikutlo a hore ho nka karolo e fokolang feela ea metsi a bophelo hang ho lekane. Ea latsoang lerato la Kreste o tla lula a lakatsa ho fumana ho feta; ‘me a ke ke a hlōla a batla ho hong hosele. Maruo, tlotla, le menyaka ea lefatše ha e sa mo hohela. Sello sa kamehla sa pelo ea hae ke hore, “Nkekeletse Morena.” Mopholosi oa rōna ke mohloli o sa cheng. Re ka noa, ra boela ra noa; ‘me re tla ‘ne re fumane metsi a macha kamehla.

Jesu O ne A tsosolositse thahasello ea mosali ‘me A tsosolositse takatso ea ho fumana mpho eo A neng A buile ka eona ha mosali a tla re, “Monghali, ak’u mphe metsi ao, hore ke se ke ka hlola ke nyoroa, leha e le ho tla kha mona.”

### **Sephiri Se Setšo Sa Bophelo Ba Hae Bo Fetileng**

Joale Jesu A phakisa A fetola moqoqo. Pele moea ona o ka amohela mpho eo A laba-labelang ho e fana, o tsoanetse hore o tataisoe hore o elelloe sebe sa ‘ona le Mopholosi oa ‘ona. Jesu A re ho eena, “E-ea, u bitse monna oa hao, le tle koano.” A araba a re “Ha ke na monna.” Empa Mopholosi A tsoela pele A re “U nepile ha u re: ‘Ha ke na monna,’ hobane u bile le banna ba bahlano, ‘me eo u nang le eena hona joale hase monna oa hao; moo u buile ‘nete.”

Ea neng a mametse a thothomela. Letsoho le sa bonoeng le ne le ntse le phetla maqephe a pale ea bophelo ba hae. Enoa Ea tsebang ho bala makunutu a bophelo ba hae ke mang? Ho ile ha fihla kelellong ea hae mehopolō ea bo sa feleng le kahlōlo e tlang, moo tsohle tse patiloeng li tla senoloa.

O ile a leka ho qoba ho bua ka taba tsena tse seng monate. “Monghali, ke lemōha hore u moporofeta.” Joale ka sepheo sa ho khutsisa kholiso ena, a fetohela lintlheng tsa bolumeli tseo ba sa lumellaneng ka tsona.

[119] Jesu A lebella ka mamello monyetla oa ho tlisa ‘nete pelong ea hae hape. “Bo-ntat’a rona ba ile ba khumamela Molimo thabeng ena,” a rialo, “empa lōna le re Jerusalema ke sona sebaka seo eka khonang ho khumamelloe ho sona.” Haufi le mahlo a bona ho ne ho na le thaba ea Kerisime, eo e neng e baka ho se lumellane pakeng tsa Bajuda le Basamaria ha ho buuo a ka eona. Hobane ka mengoaha Basamaria ba ne ba ile ba tsoakatsoakana le barapeli ba melimo ea bohata, bao bolumeli ba bona ka hanyane bo ileng ba senya ba Basamaria.

Ha tempele e hahuoa bocha mehleng ea Esdrase, Basamaria ba ne ba lakatsa ho thusa Bajuda khahong. Ba ile ba haneloa, ‘me phapang e matla e ile ea hlaha pakeng tsa lihlopha tsena tse peli. Basamaria ba ile ba haha tempele ea bona e khahlanong le eo thabeng ea Kerisime. Empa tempele ea bona e ile ea senngoa ke lira, ‘me ba bonahala ba oetsoe ke thohako; empa leha ho le joalo ha ba ka

ba ananela tempele e Jerusalema e le ntlo ea Molimo kapa hona ho lumela hore tumelo ea Bajuda e phahametse ea bona.

Ha A arabela mosali, Jesu A re, “Mosali, ntumele hore nako ea tla eo ka eona le sa tl’o khumamella Ntate thabeng ena, leha e le Jerusalema. Lōna le khumamela seo le sa se tsebeng; rōna re khumamela seo re se tsebang, hobane pholoho e tsoa ho Bajuda.” Jesu O ne A batla ho heletsa maikutlo ana a senang ‘nete a Mosamaria enoa ka Bajuda. Bajuda ba ne ba neiloe linnete tse kholo homme Mesia O ne A loketse ho hlaha har’a bona.

Jesu A laba-labela ho phahamisetsa maikutlo a enoa ea neng a Mo mametse ka holim’a likhohlano. “Empa nako ea tla, ‘me e se e fihlile, eo ka eona bakhumameli ba ‘nete ba tla khumamela Ntate ka moea le ka ‘nete, hobane Ntate o fela a batla ba joalo ho mo khumamela.”

Ha se ka ho batla thaba kapa tempele e halalelang batho ba ka tlisoang kopanong le leholimo. Hore re tle re sebeletse Molimo ka nepo, re tsoanetse ho tsoaloa ke Moea oa Molimo. ‘Ona O tla hloekisa pelo, O nchafatse kelello, O re fe ho lumela le ho mamela tsohle tseo A li hlokang. Ena ke thapelo ea ‘nete. Ke tholoana ea tšebetso ea Moea o Halalelang. Ha pelo e labalabela Molimo e ee be e le ha Moea o Halalelang o sebetsa, ‘me Molimo O itšenola pelong e joalo.

Ha mosali a ntse a buisana le Jesu, o ile a susumetsoa ke mantsoe a Hae. Ha bophelo ba hae bo fetileng bo aloa ka pel’a hae, a elelloa lenyora la moea oa hae, leo metsi a seliba sa Sikare a neng a ke ke a le tima. Ho ne ho e-s’o etsahale pele hore moea oa hae o elelloe bohloki bona bo phahameng. Jesu O ile A bala makunutu a bophelo ba hae; empa mosali a utloisisa hore ke motsoalle oa hae, ea mo hauhelang, ea mo ratang. Le hoja mosali a ne a ikutloa a sa hloeka ha a le pel’a Hae, Jesu O ne A sa ka a mo omanya, empa O ne A mo boleletse ka mohau oa Hae o ka nchafatsang pelo. Mosali o ile a ipotsa ka kelellong ea hae, ebe Eo ha se Eena Mesia eo esaleng a lebeletsoe? Eaba o re ho Eena, “Kea tseba hore Mesia, ea bitsoang Krete, oa tla; mohla a tlang, o tla re bolella lintho tsohle.” Jesu a re ho eena: “Ke ‘na ea buang le uena.”

[120]

Ha mosali a utloa mantsoe ana, tumelo e ile ea tota ka pelong ea hae. A amohela phatlalatso ena e makatsang e tsoang melomong ea Moruti oa leholimo.

Kelello ea mosali enoa e ne e le boemong ba ho amohela ka thabo. O ne a thahasella mangolo, ‘me Moea o Halalelang O ne O se O mo lōkiselitse ho amohela leseli le eketsehileng. Leseli la Boporofeta ba Testamente ea Khale le ne le se le chabetse kelello ea hae. Metsi a bophelo ao Krete A A fang motho e mong le e mong ea nyoriloeng, a ne a qalile ho kolla ka pelong ea hae.

Polelo ena e hlakileng e entsoeng ke Krete ho mosali enoa, e ne e ke ke ea etsoa ho Bajuda ba neng ba ipona ba lokile. Seo ba neng ba se tinngoe, seo hamorao barutuo a ba ileng ba laeloa ho se bōlōka e le lekunutu, o ile a se senoleloa. Jesu A bona hore mosali a ka sebelisa tsebo ena ea hae ho tlisa ba bang hore ba arolelane mohau.

Ha barutuo a ba khutla thomong ea bona, ba ile ba makala ho fumana Mong’ a bona A bua le mosali. O ne A s’o ka A noa metsi a khatholosang ao A neng A a lakatsa, ‘me ha A ka A ja lijo tseo barutuo a ba Hae ba neng ba li tlisitse. Ha mosali a se a ile, barutuo a ba Hae ba Mo kōpa ka qophello hore A je. Ba ile ba bona A khutsitse, sefahleho sa Hae se khanya, ‘me ba tšaba ho kena-kenana le menahano ea Hae, empa ba hopola hore ke tōkelo ea bona ho Mo hopotsa bohloki ba Hae ba ‘mele. Jesu A eelloa thahasello ea bona e tletseng lerato ‘me A re, “Ke na le sejo seo ke se jang, seo le sa se tsebeng.”

[121] Barutuo a ba makala hore na ebe lijo O li tliselitsoe ke mang. A hlalosa a re, “Sejo sa ka ke ho etsa thato ea ea nthōmileng, le ho phetha mosebetsi oa hae.” Ho Eena ho sebeletsa moea o lapetseng ‘nete le ho nyoreloa ‘nete ho ne ho khothatsa ‘me ho khatholla ho feta ho ja le ho noa.

Mopholosi oa rona O lapela mohau le lerato la bao A ba rekileng ka mali a Hae. Joalekaha ‘m’e a lebella ho bososela ho bontšang tlhalohanyo ho lesea la hae, ho supang ho chaba ha kelello, ho joalo le ho Krete, o lebella hore re bontše lerato le teboho ea rona, ho bontša hore bophelo ba moea bo qalile mothong.

Mosali a tlala thabo ha a ntse a mametse mantsoe a Krete. O ile a sia nkho ea hae ea metsi, ‘me a khutlela motseng, a isa molaetsa ho ba bang. A lebala se mo tlisitseng selibeng, a lebala lenyora la Mopholosi leo a neng a itheretse ho le tima. Ka pelo e tletseng thabo, a potlakela ho isetsa ba bang leseli leo a le fumaneng.

“Tloong, le bone motho ea mpoleletseng tsohle tseo ke li entseng,” A rialo ho batho ba motse. “Na ekaba hase eena Krete?”

Sefahleho sa Hae se ne se nchafatse, botho bohle ba Hae bo fetohile. “Ba tsoa motseng, ba tla ho eena.”

Kaha Jesu O ne A ntse A lutse pel’a seliba, A phahamisa mahlo A Hae ‘me A talima masimo a koro, a neng a namme ka pele ho Eena, botalana ba ‘ona bo bonolo bo ne bo chabetsoe ke mahlaseli a letsatsi. A supisa barutuo ba Hae pono ena, ‘me A e sebelisa e le setšoantšo: “Ha ke re le ee le re: ‘Khoeli li sa le ‘ne, ‘me e nt’o ba kotulo?’ Bonang, kea le bolella, phahamisang mahlo, le bone hore masimo a soeufaletse kotulo.” Ha A ntse A bua, A sheba lihlopha tsa batho tse neng li e-tla selibeng. E ne e le bona kotulo e lōketseng mokotuli.

### **Sakana-la-nkope La Kotulo Ea Evangeli**

“Mokotuli o se a amohela moputso, ‘me lijo o li bōkellela bophelo bo sa feleng, hore mojali a thabe hammoho le mokotuli. Ke moo polelo ena e tla netefala: E mong oa jala, e mong oa kotula.” Bao ba amohelang lentsoe, ba tšoanetse ho ba lisebelisuo ba Hae tse phelang. E mong o hasa peo; ha e mong a bokella kotulo; ‘me bobeli ba thaba ‘moho moputso oa mosebetsi oa bona.

Jesu A re ho barutuo, “ke le romile ho kotula seo le sa kang la se sebetsa; ba bang ba sebelitse, ‘me lōna le ja mofufutso oa bona.” Barutuo ba ne ba kenella tšebetsong ea batho ba bang. Sesebelisuo se sa bonoeng se ne se sebelitse ka lekunutu, ka ho atleha, ho hlahisa kotulo. Krete O ne A le lekhateng la ho nosetsa peo ena ka mali a Hae. Barutuo ba Hae e ne e le basebetsi ‘moho le Eena, esita le banna ba halalelang ba khale. Ka tšollelo ea Moea ka pentakonta, likete-kete li ne li tla sokolloa ka letsatsi. Tsena e ne e le litholoana tsa ho jala ha Jesu, kotulo ea mosebetsi oa Hae.

[122]

Basamaria ba ile ba tla, ba mamela Jesu, ‘me ba lumela. Ba Mo bokanela moo selibeng, ba Mo hloma lipotso, ‘me ba amohela litlhaloso tsa Hae ka cheseho, tsa lintho tse ngata tse neng li ipatetse bona. Ho tsieleha ha bona ho ile ha qala ho hlakoha. Ka letsoalo le thahasello ea ho mamela halelele, ba ile ba Mo memela motseng oa bona, ‘me ba Mo kōpa ho hlola le bona. O ile a hlola matsatsi a mabeli Samaria, ‘me ba bangata ba lumela ho Eena.

Jesu ha A ka A etsa leha e le mohlolo o le mong har’a bona, haese ho senolela mosali makunutu a hae selibeng. Empa ba bangata ba

ile ba Mo amohela. Thabong ea bona e ncha ba ile ba re ho mosali, “Ha e sa le ka baka la puo ea hao feela re lumelang; re ikutloetse ke borōna, ‘me rea tseba hore ruri monna enoa ke Mopholosi oa lefatše.”

### **Kreste O Thuha Marako A Ho Nahanelana**

Jesu O ne A qalile ho thuha marako a karohano lipakeng tsa Bajuda le Basamaria, le ho ruta lefatše ka pholoho. O ile A tsoakana ka bōlōkōlōhi le Basamaria ‘me A amohela memo ea batho bana ba neng ba nyelisoa. A robala tlas’a marulelo a bona, A ja le bona litafoleng tsa bona, A ruta literateng tsa bona, ‘me A ba tšoara ka lerato le tlhomphe e fetisisang.

[123] Tempeleng Jerusalema, ho ne ho na le lerako le lekhotšoanyane le arolang lekhotla le kante le likarolo tse ling tsa mohaho ona o halalelang. Leboteng lena ho ne ho na le mengolo e boelang hore ha ho mang kapa mang, haese Bajuda, ea lumelletsoeng ho tšela moeli oo. Ha Molichaba a ne a ka kena ka likarolong tse kahare a sa etsa lipatlisiso tsa hore na oa lokela, o ne a tla lefa ka bophelo ba hae. Empa Jesu, Eena Moqali oa tempele, O ile A tlišetsa balichaba pholoho eo Bajuda ba neng ba e hanne.

Barutuo ba ile ba makatsoa ke boitšoaro ba Jesu. Matsatsing a mabeli ao ba a hlōtseng Samaria, ho tšepahala ho Eena ho ile ha etsa hore ba iphanyane; empa ka pelong ba ne ba sa thaba. Ba lieha ho ithuta hore ho eisa batho ba bang le lehloeo li lōkela ho suthela mohau le kutloelo-bohlōkō. Empa kamora’ nyolohelo ea Morena, lithuto tsa Hae li ile tsa fihla likelellong ho bona li na le moelelo o mocha, ‘me ba hopola Mopholosi, chebahalo ea Hae, mantsoe a Hae, tlhomphe le bonolo ba Hae, ho balichaba ba nyelisehang. Ha Petrose a il’o ruta Samaria, a tla ka moea o tšoanang mosebetsing oa hae. Ha Johanne a biletsoa Efese le Smirna, a hopola maiphihlelo a hae Sikeme, le mohlala oa Moruti oa leholimo.

Bao ba ipitsang balateli ba Mopholosi ba ka nyelisa le ho ikhula ho bao ba nyelisehang; empa ha ho maemo a tlhaho kapa a bochaba, leha e le maemo a bophelo, a ka khelosang lerato la Hae ho motho ofe kapa ofe, ho sa tsotellehe hore na o tetebetse joang sebeng. Metso ea molaetsa e tsoanetse ho etsetsoa bohle. Selibeng sa Jakobo



Jesu ha A ka A lahla monyetla oa ho bua le mosali a le mong, molichaba ea neng a phela sebeng se totobetseng.

Hangata o ne a qala lithuto tsa Hae ka sehlotšoana sa ba fokolang ba Mo bokanetseng, empa ka bonngoe, bafeta-ka-tsela ba ne ba re khefu ho mamela, ho fihlela e se e le letšoele le mametseng ka ho makala le ka tšabo mantsoe a Molimo ka Morōmuoa enoa oa leholimo. Ho ka ‘na ha ba le a mong feela ea mamelang lentsoe ha moruti a ruta hona kajeno tjena, empa ke mang ea ka bolelang hore na tšusumetso ea lona e tla fihla hole hakae?

Mosali oa Mosamaria o ile a ipaka e le morōmuoa ea tsebang ho etsa se hlokoang ho feta barutuo ba Hae. Ka lebaka la hae, batho ba motse kaofela ba ile ba tlišoa ho utloa Mopholosi. Morutuo e mong le e mong oa ‘nete o tsoalloa ‘musong oa Molimo e le morōmuoa. Ea noang metsi a bophelo o fetoha mohloli oa bophelo. Ea amohe-tseng o fetoha mofani. Mohau oa Molimo kahare ho pelo, o tšoana [124] le seliba se lehoatateng, se khathollang bohle, ‘me se etse hore bao ba lekhateng la ho shoa ba thahaselle ho noa metsi a bophelo.

[125]

## **KHAOLO EA 20—“NTLE LE HORE LE BONE MEHLOLO”**

*[E itšetlehile ka khaolo ea Johanne 4:43-54.]*

Bagalelea ba neng ba tsoa moketeng oa Paseka, ba ile ba tlisa tlaleho ea mesebetsi e makatsang e neng e etsoa ke Jesu. Batho ba bangata ba ne ba lla ka hore bafarisi ba sebelisa tempele hampe, ba meharo, ba sebelisa tempele joalokaha eka ke ea bona. Ba ne ba tšepile hore monna enoa, ea tebetseng babusi ekaba ke Eena Mopholosi eo esaleng A lebeletsoe. Ho ne ho ile ha tlalehoa hore moporofeta O ipoletse e le Mesia.

Molaetsa oa hore Jesu O khutletse Kana o ile oa tlatatlala le motse oa Galelea. Kaperenauma teng, molaetsa ona o ile oa hohela monna oa Mojuda, oa mali a borena, eo e neng e le ofisiri tšebeletsong ea Khosi. Mor’a khosana ena o ne a tšoeroe ke lefu le neng le bonahala le sena pheko. Ha ntat’ae a utloela ka Jesu, o ile a itherela ho mo kōpa thuso. O ne a tšepile hore thapelo ea ntate e ka tsosolosa mohau oa Ngaka e Kholo.

Ha a fihla Kana, o ile a fohla har’a matšoele ho ea fihla moo Mopholosi A neng A le teng. O ile a felloa ke tumelo ha a bona monna ea ikaparetseng liaparo tsa theko e tlase, ea aparetsoeng ke lerole, ‘me a khathetse ke ho tsamaea. A buisana le Jesu, a Mo tsebisa tsa ketelo ea hae, ‘me a kōpa Mopholosi hore A mo felehetse ho ea ha hae.

[126] Jesu O ne a tseba hore ntate enoa o entse qeto ka kelellong ea hae ea lintho tse ka etsang hore a lumele ho eena. Ntle le hore kōpo ea hae e amoheloe, o ne a ke ke a Mo amohela e le Mesia. Ha khosana ena e ntse e maketse hore na ho tla etsahala ke hofe, Jesu A re, “Ha le sa bone lipontšo le mehlolo ha le ka ke la lumela”

Mopholosi A bapisa ho hloka tumelo ha mokōpi enoa le tumelo e bonolo ea Basamaria, ba neng ba sa ka ba kōpa mohlolo kapa letšoao. Lentsoe la Hae le ne le na le matla a kholisang, a fihlang

lipelong tsa bona. Kreste A utloa bohlokō hore ebe sechaba sa habo se sitoa ho utloa lentsoe la Molimo ha O bua ka Mor’a ‘ona.

Empa leha ho le joalo, monna enoa oa mali a borena o ne a e-na le tumelonyana ka hare ho eena, hobane o ne a tlil’o kōpa ho Eena lehlohonolo le neng le bonahala ho Eena e le la bohlokoa ka ho fetisisa. Jesu O ne A sa lakatse feela ho folisa ngoana, empa O ne A lakatsa hore khosana ena le lelapa la eona le bona ba fumane karolo ea mahlohonolo a pholoho, le ho bonesa Kaperenauma. Empa monna enoa o ne a tsoanetse ho hlokomela bohloki ba hae pele a ka lakatsa mohau oa Kreste. Ba bangata ba sechaba sa habo ba ne ba na le thahasello ho Jesu ho fumana se seng ho eena. Tumelo ea bona ho Eena e ne e itšetlehile ka hore ba fumane melemo ea nakoana ea lintho tsa lefatše lena, empa ba sa bone hore ba hloka mohau oa Molimo.

Mantsoe a Mopholosi ho monna enoa a ile a senola pelo ea Hae joaleka lehalima la mollo. O ile A elelloa hore mabaka a hae ha a lōka. Tumelo ea hae e tsilatsilang ea bonahala sebopeho sa eona sa ‘nete. O ile a utloa bohlokō bo tebileng ha a elelloa hore ho hloka tumelo ha hae ho ka ‘na ha timetsa bophelo ba mor’a hae. Ka bohlokō bo boholo le boikokobetso, a hoeletsa a re “Monghali, ak’u theohe hle, ngoana oa ka a e-s’o shoe.” Tumelo ea hae e ile ea khomarela ho Kreste, joalekaha Jakobo a ne a loana le lengeloi, a re, “Ha nka ke ka u tlohela ua tsamaea, haese haeba u ka ntlhohonolo-fatsa!” Tsimoloho 32:26.

Joaloka Jakobo o ile a hlola. “E-ea, mora oa hao o phetse.” Jesu a rialo. Monna enoa o ile a tloha ka pele ho Mopholosi a tletse khotso le thabo eo a neng a e-s’o ka a ba le eona.

Ka eona hora eo, ba neng ba lebetse ngoana ea shoang Kaperenauma ba ile ba bona kapele phetoho ea mohlolo. Sefahleho se neng se retetse ke ho kula se ile sa fetoha, sa tlala khanya e bonolo e bontšang bophelo. Matla a ile a khutlela ‘meleng ona o neng o fokola. Ho ne ho sa sala leha e le letšoao le leng feela la ho kula ha hae. Letlalo la hae le neng le chesa, le ne le se le le mongobo, le le bonolo, ‘me o ile a robala a khutsitse. Lelapa le ne le maketse ‘me le ile la nyakalla.

Khosana ena e ka be e ile ea finyella hae Kaperenauma, mantsi-boeng a tsatsi leo e neng e buisana le Jesu; empa ha ea ka ea potlakela hae. O ile a fihla Kaperenauma hoseng ha letsatsi le hlahlamang.

Ha a ne a e-ea ho batla Jesu, pelo ea hae e ne e imetsoe ke masoabi. Maikutlo a hae joale ha a khutla, a tsamaea esale hoseng, ho sa khutsitse, a ne a se a fetohile. Lintho tsohle tsa tlhaho li ne li bonahala li mo tlatša ho rorisa Molimo. Ha a sa ntsane a le hole le moo a lulang, basebetsi ba mo khahlanyetsa ho tla mo imolla matšoenyeho ao ba neng ba nahana hore o na le 'ona. Ha a ka a makatsoa ke litaba tseo ba neng ba mo tlišetsa tsona, a botsa feela hore na ngoana o qalile ho fola ka hora efe. Ba arabela tjena, “Maobane, ka hora ea pele motšoare, feberu e ile ea mo tlohela.” E ne e le ka ona motsotso oo ntat'ae a neng e amohela tšepiso ena ka tumelo, “Mora oa hao o phetse,” lerato la Molimo le ile la ama ngoana ea shoang.

Ntate o ile a potlakela ho lumelisa mora oa hae. A mo kōpa, a mo atamelletsa pel'a pelo ea hae joaleka ka ea khutlang lefung, 'me a leboha Molimo hangata-ngata, ka pholiso eo.

Hamorao khosana ena, 'moho le lelapa la hae, ba ile ba ithuta haholo ka Krete 'me ba fetoha barutuoa. Litaba tsa mohlolo ona li ile tsa hasana 'me tsela e ile ea buleha moo Kaperenauma bakeng sa bosebeletsi bo tla etsoa ke Krete ka sebele.

Joaleka ntate enoa ea neng a tšoenyehile, hangata Jesu re 'matlisoa ke takatso ea ho fumana molemo oa lefatše; 'me e re ha re se re fuoe seo re neng re se hloka, ebe ke hona re Mo ratang le ho Mo tšepa. Mopholosi o labalabela ho re fa mahlohonolo a fetang ao re a kōpang, 'me O ee A liehise karabo e le hore A re bontše bobele ba lipelo tsa rōna, le hore re hloka mohau oa Hae. O lakatsa hore re lahle boikhabo bo etsang hore re 'matle.

[128] Khosana e ne e batla ho bona phethahalo ea thapelo ea eona pele e lumela; empa o ne a tšoanela ho amohela lentsoe la Jesu le hore kōpo ea hae e utloiloe 'me le tlhonolofatso e fano. Ha rea tšoanela ho lumela feela hobane re bona, 'me re utloa hore Molimo oa re utloa. Re tšoanetse ho tšepa litšepiso tsa 'ona. Ha re kōpile mahlohonolo a Hae, re tšoanela ho lumela hore re tla a fumana, 'me re mo lebohe ka hore re se re a fumane. Joale re lokela ho tsoela pele ka mesebetsi ea rōna, re na le tšepo ea hore re tla fuoa mahlohonolo ana nakong eo re a hlokang ka ho fetisisa.

## KHAOLO EA 21—TSA BETHESTHA LE LEKHOTLA LA SANHEDRINE

[129]

*[E itšetlehile ka Johanne khaolo ea 5.]*

Moo Jerusalema, haufi le Khoro ea Linku, ho na le letšana, le bitsoang Bethestha ka Seheberu, le nang le mathule a mahlano. Tlas'a 'ona ho ne ho paqama bakuli ba bangata; lifofu, le liritisa, le ba shoeleng litho."

Ka linako tse khethehileng tsa selemo, metsi a letšana lena a ne a fuluhua 'me ho ne ho lumeloa hore hoo ke mohlolo o khethehileng, 'me motho ea neng a ka kena ka metsing ao pele ho ba bang, o ne a phekoheha lefu lefe kapa lefe leo ebang le ne le mo tšoere. Batho ba baloang ka makholo ba kulang ba ne ba bokana moo, 'me ebe letšoele le lengata hoo ha metsi a fuluhua ba neng ba sutumetsana, 'me banna le basali le bana ba fokolang ba hatakeloe ka maoto. Ba bangata ba ileng ba atleha ho fihla letšeng, ba ne ba shoela lintšing tsa lona. Ho ne ho ahiloe mathule a ho itšireletsa moo. Ba bang ba kulang ba ne ba robala mathuleng ao, ebe ba ntse ba hahabella lintšing tsa letša ka letsatsi le letsatsi, ka tšepo ea ho fumana pholiso.

Jesu O ne A le Jerusalema hape. O ne A tsamaea A le mong, A bonahala eka O imametse ebile oa rapela. A fihla letšeng. Eitse ha A bona bakuli bao ba hlomolang pelo, A lakatsa ho sebelisa matla A Hae A ho phekoheha, e le hore mokuli e mong le e mong a fole. Empa e ne e le letsatsi la Sabatha, 'me A tseba hore ketso ea ho folisa e tla halefisa Bajuda haholo hoo ba neng ba ka Mo khutsufaletsa nako ea ho phetha mosebetsi oa Hae.

Leha ho le joalo, Mopholosi O ile A bona e mong oa bakuli, ea neng a hlomola pelo ka ho fetisisa, e leng monna eo e ne e le seqhoala ka lilemo tsa mashome a mararo a metso e robeli. Lefu la hae ho no ho lumeloa hore ke kahlolo e tsoang ho Molimo. Mokuli enoa o ne a phetse lilemo tse ngata tsa masisa-pelo, a hloka oa habo, a hloka motsoalle, 'me a ikutloa hore o koaletsoe kantle ho mohau oa Molimo. E ne e re ha nako ea ho fuluha metsi e atamela, batho ba

[130]

neng ba mo utloela bohlokō, ba ne ba mo nka ba mo behe mathuleng. Empa ka nako eo e khethehileng, ha letša le fuluhuo e be o hloka motho ea mo thusang hore a kene ka har'a lona. O ne a anela ho bona ha metsi a hlokoleha, ebe o sitoa ho kena ka har'a letša, a mpe a fihle lintšing tsa lona feela. Boiteko ba hae ba nako e telele, le ho hloka katleho ka nako eo eohle, li ne li mo fokolisa 'meleng haholo.

Monna enoa ea kulang o ne a ntse a sekame moalong oa hae, ha sefahleho se nang le kutloelo-bohlokō se inamela ho eena. A hapjoa mikutlo ke mantsoe a tletseng tšepo, a reng, “Na u rata ho fola?” A utloa hore ho na le monyetla oa hore a ka fumana thuso. Empa tlhase eo ea tšepo ea phakisa ea tima. A hopola hore o lekile ka makhetlo a mangata ho kena ka letšeng. A araba, a re, “Monghali, ha ke na motho ea nkenyang letšaneng ha metsi a fuluhuo; e ee ere ke sa ea, e mong a theohele pele ho ‘na.’”

Jesu ha A ka A kōpa mokuli enoa ho bontšahatsa tumelo ea hae ho Eena. A mpa A re ho eena, “Tsoha, nka liphate tsa hao, u tsamaee.” ‘Me tumelo ea monna eo ea itšoareletsa ka mantsoe ao. Eaba methapo ea hae kaofela le mesifa eohle ea litho tsa hae tse kokobaneng li tlala bophelo bo bocha. O ile a thapisa kelello ea hae hore e hlonephe Krete, ‘me mesifa ea hae ea latela. A tlola ka maoto a hae, ‘me a iphumana e se e le monna ea matla.

### **Lekunutu La Pholiso Ea Moea**

[131] Monna enoa a ka be a lahlehetsoe ke monyetla oa hae o le mong feela oa pholiso, hoja a emela ho qea-qea. Empa o ile a lumela polelo ea Krete, ‘me ka ho e phethahatsa a fumana matla. Ka tumelo e tšoanang, re ka fumana pholiso ea moea. Sebe se arohantse meea ea rōna le bophelo ba Molimo ‘me e omeletse. Ka borona ha re na matla a ho phela bophelo bo halalelang feela joalekaha monna ea qhoalileng a ne a hloka matla a ho tsamaea. Ba bangata ba iponang ba hloka thuso, ‘me ba laba-labela bophelo ba moea, ba sebetsa ka thata ho bo fumana, empa ho se katleho. Mopholosi O atamela batho bana ba nyahameng, ba sokolang, ‘me O re, “Na u rata ho fola?”

U se ke ua emela ho ikutloa u folile. Lumela polelo ea\_Hae ‘me u behe thato ea hau lehlakoreng la Jesu. Ka ho phethahatsa polelo ea Hae u tla fumana matla. Krete O na le matla A ho re lopolla

bobeng bofe kapa bofe, bo bofileng moea le ‘mele. O tla fana ka bophelo ho moea o neng o “shoele ka baka la litšito.” Baefese 2:1.

Ea folisitsoeng o ile a inama ho nka liphate le kōbo ea hae, ‘me eare ha a inamoloha a ikotlolla, a thalatsa ka mahlo ho batla Molopolli oa hae. Empa Jesu O ne A se A nyamelletse har’ a bongata [bo neng bo le teng moo]. Eare ha a ntse a tsamaea a potlakile, a hata ka matla le ka bōlōkōlōhi, a thabetse matla a macha ao a a fumaneng, a bolella Bafarisi ba ‘maloa ka pholiso ea hae. A mpa a makatsoa ke ho bona ba mametse ka ho tsoafa.

Ba ile ba mo kena hanong, ba mo botsa hore na ke hobaneng ha a jere liphate tsa hae ka letsatsi la Morena. Ka lebaka la thabo, monna enoa o ne a lebetse hore ke Sabatha. A araba ka sebete a re, “Ea mpholisitseng, ke eena ea itseng ho ‘na: ‘Nka liphate tsa hao, u tsamaee’.” Ba mo botsa hore na ke mang ea mo folisitseng, empa o ne a sa Mo tsebe. Babusi bana ba ne ba batla bopaki bo tōtōbetseng, e le hore ba tle ba tsebe ho tsoa Jesu ka hore ha A bōlōke Sabatha. O ne A sa tlōla molao feela ka ho folisa monna enoa ea kulang ka Sabatha, empa O ne A bile A tlōtse molao o halalelang ka ho mo laela hore a jare liphate tsa hae, a tsamaee.

### **Melaoana E Senang Thuso**

Bajuda ba ne ba sothile molao haholo, ba o khoesitse melaoana e se nang thuso, hoo o neng o se o fetohile joko ea bokhoba, ‘me ho bōlōka molao e se e le moroalo o sitang. Mojuda o ne a sa lumelloa ho besa mollo leha e le ho khantša lebone ka Sabatha. Ka mabaka ana, sechaba se ne se itšetlehile haholo ka Balichaba bakeng sa mesebetsi e mengata eo babusi ba bona ba neng ba ba hanela ho e etsa. Ba ne ba nahana hore pholoho ke ea Bajuda feela, le hore boema ba lichaba tse ling bo se ntse bo sena tšepo ea pholoho kahoo ha ba sa na thuso. Empa Molimo ha A e-s’o fane ka molao o ke keng oa bolōkoa ke batho bohle.

[132]

Ha A le ka tempeleng, Jesu A kopana le monna eo A neng A mo folisitse. O ne a tšile ho fana ka nyehelo ea sebe le nyehelo ea teboho bakeng sa mohau o moholo oo a neng a o fumane. Jesu A itsebahatsa ho eena. Monna eo ea folisitsoeng o ile a tlala thabo e khaphatsehang ha a fumane Molopolli oa hae. Ka ho se tsebe lehleo la Bafarisi ho Jesu a ba bolella hore ke Eena ea mo folisitseng. “Ka

baka leo, Ba-Juda ba hlorisa Jesu, ba rata ho ‘molaea, kahobane a na a etsa tse joalo ka Sabatha.’ Johanne 5:16.

Jesu O ile A hlahisoa kapele ho lekhlotla le phahameng, ho arabella qōso ea tlole ea Sabatha. Hoja Bajuda e ne e le sechaba se ipusang, qōso e joalo e ka be e sebeliselitsoe ho Mo bolaea. Empa qōso ena eo ba neng ba e hlahisa ka Jesu, e ne e hloka matla ka lekhlotleng la Roma. Leha ho le joalo, ba ne ba tšepile hore ba tla fumana lintlha tse ling. Krete O ne A na le tšusumetso e matla ho feta ea bona, le matšoele a ne a hloka thahasello ea ho mamela lipuo tse telele tsa bo-Rabbi, ‘me ba ne ba khahloa ke lithuto tsa Hae. O ne A bolela hore Molimo ha se moahloli ea iphetetsang, empa ke Ntate ea utloelang bohlōkō. Ka mantsoe le mesebetsi ea Hae ea mohau O ne A ntse A tsoela pele ho khaola matla a bohately a iketselitsoeng ke batho ka melao ea bona. Sebakeng sa eona A hlahisa lerato la Molimo.

### **Batho Ba Phuthehela Ho Jesu**

[133] Ho bo bong ba boporofeta ba pele ka Krete, ho ngoliloe ho thoe, “Lere la bokhosi le ke ke la tloha ho Juda, le lere la bolaoli ho litlōhōlō tsa hae, ho fihlela mong’a lona a fihla, eena eo lichaba li tla mo mamela.” Tsimoloho 49:10. Sechaba se ne se bokellana ho Krete. Hoja baprista le baruti ba se kena-kenane le Eena, lithuto tsa Hae li ka be li hlahisitse phetoho eo lefatše le neng le e-s’o ka le e bona. Empa baetapele bana ba ne ba ikemiselitse ho senya tšusumetso ea Jesu. Ba lekile ho phethahatsa taba ena ka ho Mo qōsa lekhlotleng le phahameng, le ka ho Mo nyefola phatlalatsa har’a batho. Mang kapa mang ea neng a ka nyefola litaelo tsa bo-rabbi, o ne a ahlōloa ka molato oa bohlabaphieo. Ka mokhoa oona, bo-rabbi ba ne ba leka ho etsa hore Krete A belaelloe ka hore O leka ho felisa meetlo e thehiloeng, kahoo O baka karohano sechabeng ‘me O lōkisetse Baroma tsela ea ho ba hatella ka botlalo.

Kamorao ho hore Satane a hlōlehe ho hapa Krete lefeelleng, o ile a kopanya mabotho a hae ho loantsa Krete le ho senya mosebetsi oa Hae. O ile a matlafatsa merero ea hae ho fufatsa likelello tsa sechaba sa Bajuda, hore ba se ke ba amohela Molopolli oa bona, ‘me a tlatsa baetapele ba bona ka bora ba hae ho senatla sa ‘nete. O ne a tla ba etella pele hore ba lahle Krete ‘me ba Mo sulafalletse



bophelo ka mekhoa eohle, ka khopolo ea ho Mo nyahamisa thomong ea Hae.

Jesu O ne A tlile ho etsa “hore Molao oa hae o be moholo, o tlōtlehe.” Esaea 42:21. O ne A tlile ho lokolla Sabatha melaoaneng e boima, e neng e fetotse letsatsi lena thohako bakeng sa lehlohonolo. Ke ka baka lena A ileng A khetha ho folisa motho Bethestha ka Sabatha. O ne A ka folisa monna enoa ka letsatsi lefe kapa lefe, kapa A mo folisa feela ebe ha A mo laele hore a nke liphate tsa hae. Empa O ile A khetha motho ea neng a le tsietsing e kholo ka ho fetisisa, ‘me A bolella monna eo hore a tsamaee kahar’a motse, a jere liphate tsa hae, e le ho phatlalatsa mosebetsi o moholo o entsoeng ho eena. Ketso ena e ne e tla Mo bulela monyetla oa hore A hlaole lithibelo tsa Bajuda malebana le letsatsi la Morena, ‘me A be A phatlalatsa hore meetlo ea bona ke lefeela.

Jesu A bolela hore mosebetsi oa ho thusa ba mahlomoleng o lumellana le molao oa Sabatha. Mangeloi a Molimo ha a khaotse ho sebeletsa batho ba mahlomoleng. “Ntate o ntse a sebetsa ho fihlela joale, ‘me le ‘na kea sebetsa.” Matsatsi ‘ohle ke a Molimo, ‘me ka ‘ona ho phethahatsoa merero ea Hae bakeng sa batho. Haeba mokhoa oo Bajuda ba neng ba hlalosa molao ka oona o ne o nepahetse, ho ne ho tla hlokeha hore Eena ea hlōlileng letsatsi la Sabatha, A ke A khaotse mosebetsi oa Hae ‘me A emise tšebeletso ea kamehla, e sa khaotseng, ea leholimo le lefatše.

[134]

Na Molimo O tšoanela ho thibela letsatsi hore le se ke la phetha mosebetsi oa lona ka Sabatha? Na O tlameha ho laela melatsoana hore e se ke ea noesetsa masimo le meru? Na koro le mabele li tlameha ho khaotse ho hōla? Na lifate le lipalesa li tlameha hore li se ke tsa thunya ka Sabatha?

Molimo A ke ke A tlosa letsoho la Hae leha e le ka nakoana feela, hoba motho a ka akheha, a shoa. Motho le eena o na le mosebetsi oo a lōkelang ho o etsa ka letsatsi lena. O tlameha ho hlokomela bakuli, le ho thusa bahloki. Letsatsi la Molimo le halalelang la phomolo le etselitsoe motho; kahoo Molimo ha A lakatse hore ka letsatsi la Sabatha, leha e ka ba ka nakoana e fokolang feela; ebe libōpuoa tsa Hae li utloa bohloko bo neng bo ka folisoa.

Molao oa Sabatha o re thibela ho phetha mosebetsi oa ka mehla ka letsatsi lena la Morena; re khaotse mosebetsi oa boipheliso; re khaotse le mosebetsi oa boithabiso ba lefatše le oa ho eketsa

leruo, hobane e khahlanong le molao oa letsatsi lena. ‘Me joalekaha Molimo A ile A emisa mosebetsi oa Hae oa ho hlola, eaba Oa phomola ka Sabatha, ka mokhoa o joalo feela motho o tlamaha ho tlohela mesebetsi ea hae ea letsatsi le letsatsi, ‘me ka lihora tseo tse halalelang, a inehle ho phomola e le ho ntlafatsa bophelo, a inehle ho rapela le ho etsa liketso tse halalelang. Krete O ne A tlōtlisa Sabatha ha A folisa mokuli eo.

[135] Empa Bafarisi ba ne ba chesa ke khalefo. Ka kutloisiso ea bona Jesu O ne A sa tlōla molao feela, empa O ne A bile A iketsa ea lekanang le Molimo hobane A itse “Molimo ke Ntat’ae ka sebele.” Ba ile ba Mo qōsa ka nyefolo. Bahanyetsi bana ba Krete ba ne ba emela mekhoha le meetlo ea bona feela, empa tsena li ne li bonahala li fokola ebile li sa utloahale, ha li bapisoa le mabaka ao Jesu A neng A a qotsitse Lentsoeng la Molimo, le liketsahalang tse sa khaotseng tsa tlhaho. Empa baruti ba iphapanyetsa lintlha tseo A li hlhisitseng, ‘me ba batla mokhoa oa ho Mo tsoetsa mofere-ferere, kahobane A bolela hore O lekana le Molimo. Hoja ba se ke ba tšaba sechaba, baprista le baruti ba ka be ba bolaetse Jesu hona moo. Empa maikutlo a batho ba bangata a ne a sekametse lehlakoreng la Hae. Ba bangata ba ne ba amohetse hore O nepile ha A folisitse mokuli Bethetha.

### **Jesu O Itšetlehile Ka Matla A Ntat’ae**

Jesu O ile A hanyetsa qōso ea nyeliso. O ile A bolela A re, Ka boemo Ke Mora oa Molimo, Ke ntho e le ‘ngoe le Eena ka tlhaho, ka thato le ka sepheo. Ke sebetsa ‘moho le Molimo. “Mora a ke ke a etsa letho ka boena, haese seo a bonang Ntat’ae a se etsa.” Baprista le baruti ba ne ba tsekisa Mora oa Molimo mosebetsi oo A neng A o tletse lefatseng. Ba ne ba ikutloa ba phethahetse, ba sa hloke bohlae bo kaholimo. Empa Mora oa Molimo O ne A inehetse thatong ea Ntat’ae, ebile A itšetlehile ka matla A Hae. Krete ha A ka A iketsa merero ka boEena. Ka letsatsi le letsatsi, Ntate O ne A Mo manolella merero ea Hae. Re lokela ho tšepa Molimo ka mokhoa o joalo, e le hore maphelo a rona e tle e be phethahatso ea thato ea Hae.

Lipolelo tsena tsa Krete li re ruta hore re lokela ho ikuka re tlamahane le Ntate oa rōna ea leholimong, ‘me re ke ke ra aro-

hanngoa le Eena. Ho sa tsotellehe maemo ao re leng ho ona re phela ka Molimo. O re khethetse mosebetsi oa rōna, ebile O re file le mahlale a ho phetha mosebetsi oo. Ha feela re nehela thato ea rōna ho Molimo, ‘me re tšepa matla le bohlale ba Hae, O tla re tataisetsa litseleng tse nepahetseng, e le hore re tsebe ho phethahatsa karolo eo re e khethetsoeng mosebetsing oa Hae. Empa motho ea tšepang bohlale ba hae le matla a hae o ikarohanya le Molimo ‘me O phethahatsa mosebetsi oa sera sa Molimo le motho.

Basaduke ba ne ba lumela hore ha ho na tsōho ea bafu, empa Jesu O ile A ba bolella hore O mong oa mesebetsi e meholo haholo ea Ntat’ae, ke ho tsōsa bafu, ‘me le Eena O na le matla A ho etsa mosebetsi oona oo. “Joalokaha Ntate a tsosa bafu, a ba phelisa, le Mora o phelisa joalo bao a ratang ho ba phelisa.” “Nako ea tla, ‘me e se e fihlile, eo ka eona bafu ba tla utloa lentsoe la Mora oa Molimo, ‘me ba le utloang ba tla phela.” Krete A bolela hore matla A tsosang bafu a teng har’a bona, ‘me ba tla a bona ha a sebetse. Matla ‘ona [136] ao a tsōho a fana ka bophelo moeeng ‘me, a lōkōlla batho “molaong oa sebe le lefu.” Baroma 8:2. Ka tumelo moea o sireletseha sebeng. Motho ea bulelang Krete pelo ea hae, o amohela matla ao a maholo a tla lōpolla ‘mele oa hae lebitleng.

Monazaretha ea ikokobelitseng O ile A phahamela kaholimo ho botho, A lahla sebōpeho sa boikhakanyo sa sebe le bomalimabe, ‘me A hlaha A senolehile, e le Mora oa Molimo, E le ntho e le ‘ngoe le Mopi oa leholimo. Bamameli ba Hae ba ne ba hlōletsoe. Ha ho motho ea kileng a bua litaba tse tšoanang le tsa Hae, kapa e kileng a itlhompha ka bokhabane ba borena joaleka Eena. Lipolelo tsa Hae li ne li hlakile, li totobetse, li hlalosa mosebetsi oa Hae ka ho tlala. “Ntate ha a ahlōle motho, empa o neile Mora tokelo eohle....Ntate...O mo neile matla a ho ahlōla, hobane ke Mor’a Motho.”

Baprista le babusi ba ne ba ipehile e le baahloli ba nyatsang mosebetsi oa Krete, empa Eena O ne A ipolela ka hore ke Eena moahloli oa bona le oa lefatše lohle. Mahlohonolo ‘ohle a tsoang ho Molimo a eang sechabeng se oeleng, a tlisitsoe ka Eena. Eitse hang ha sebe se ba teng, le Mopholosi A ba teng. Eena ea fileng bohle khanya, Eena ea latelletseng motho, A mo kōpa ka bonolo, A batla ho mo hlōlela sebe ka bohalaleli, ke ‘Muelli ebile ke Moahloli. Ke Eena eo ka mengoaha eohle A ntseng A sebeletsa ho lōkolla

batšoaruoa litlamong tsa mothetsi, ebile ke Eena ea tla ahlōla motho e mong le e mong.

Kahobane O ile A latsoa maritsa a mahlomola le liteko tsa botho, ‘me O utloisisa mefokolo ea batho; kahobane O ile A mamella liteko tsa Satane, ebile O tla sebeletsa ka ho hloka leeme le ka bonolo batho bao mali a Hae a tšolletsoeng ho ba pholosa -ka lebaka lena, Mora oa motho O khethetsoe ho liha kahlōlo.

Empa “Molimo ha aa ka a rōma Mora oa hae lefatseng ho ahlōla lefatše, empa e le hore lefatše le pholosoe ka eena.” Johanne 3:17. Jesu O ile A bolela kapele ho lekhotla le busang, A re, “ea utloang lentsoe la ka, a lumela ho ea nthōmileng, o na le bophelo bo sa feleng. Ha a ahlōloe, empa o tsoile lefung, a kena bophelong.”

### **Tsōho Ea Bophelo**

[137] “Nako ea tla, eo ka eona bohle ba ka mabitleng ba tla utloa lentsoe la Hae, ‘me ba tla tsoa, ba entseng tse molemo ba tsohela bophelo, ba entseng tse khopo ba tsohele kahlolo.”

Khanya eo e leng eona fela e ka khantšetsang lefifi la lebitla, e ne e phatsima holim’a Iseraele. Empa ho itšepa ke bofofu. Jesu O ne A eisitse neheletsano ea litaba ea seruti kahoo ba hana ho lumela.

Nako, le sebaka, le boima ba maikutlo a sechaba se neng se bokane, li ile tsa kopana ho matlafatsa mantsoe a Jesu, ao A a buileng ho litho tsa lekhotla. Baokameli ba sechaba, ba neng ba phahame haholo bolumeling, ba ne ba batla ho bolaoa Enoa ea ipolelang hore ke Eena ea tla khutlisetsa Iseraele boemong ba eona. Morena oa Sabatha O ile A qōsoa ka ho roba molao oa Sabatha. Baahloli ba Hae ba ne ba Mo shebile ka makalo empa e le ka khalefo; ba mpa ba sitoa ho araba lipolelo tsa Hae. O ile A hana ho lumela hore baprista le baruti ba na le matla a ho kena-kenana le mosebetsi oa Hae. A hana ho amohela hore O molato liqōsong tsa bona, A hana le ho hlangoa lipotso ke bona.

Bakeng sa ho kōpa tsoarelo, Jesu O ile A khalemela babusi ka boatla ba bona ba ho se tsebe Mangolo. O ile A ba bolella hore ba lahlile Lentsoe la Molimo, joalokaha ba Mo lahlile le Eena, e le morōmuoa oa Molimo. “Le fuputsa Mangolong, hobane le hakanya hore ka ‘ona le na le bophelo bo sa feleng, athe ke ‘ona a mpakang.”

Mangolo a Testamente ea Khale a khantsitsoe ke khanya ea Mora oa Molimo. Mekhoa eohle e halalelang ea tumelo ea Bajuda, e ne e le pokello ea boporofeta ba litaba tse molemo. Ka leloko le bapateriareka le melao e neng e tsamaisa sechaba sa Bajuda, khanya e tlōtlisehang ea leholimo e tōtōbalitse metsamao ea Mopholosi. Ka sehlabelo se seng le se seng ho ne ho tsoantšoa lefu la Krete. Lerung le leng le le leng la mosi oa libano ho bontšoa ha ho lōka ha Hae ho nyoloha. Ka sephiri se hlollang sa sehalaleliso ho bontšoa moo khanya ea Hae e lulang teng.

### **Lekhotla Le Sitoa Ho Tsosa Jesu**

Bajuda ba ne ba lekanya hore kahobane ba tseba Mangolo, ba na le bophelo bo sa feleng. Empa kahobane ba lahlile Krete ea supjoang ke Lentsoe la Hae, ba Mo lahlile ka sebele sa Hae. O ile A re, “Ha le rate ho tla ho ‘na hore le be le bophelo.”

[138]

Baetapele ba Bajuda ba ne ba ithutile lithuto tsa baporofeta, feela e ne e se hobane ba na le cheseho e tiileng ea ho tseba ‘nete, empa e ne e le ka sepheo sa ho fumana bopaki bo ka tšehetseng mehopolo ea bona ea boiphahamiso. Kahobane Krete A ile A tla ka mokhoa o fapaneng le oo ba neng ba o lebeletse, ha ba ka ba Mo amohela, ebile ba lekile ho fana ka bopaki ba hore Ke mothetsi. Ha Mopholosi A ntse A tsoela pele ho buisana le bona ka ho otloloha ka mesebetsi ea Hae ea mohau eaba le bona ba tsoela pele ka maikemisetso a ho loantšana le leseli.

Jesu A re, “Ha ke amohele tlōtla ho batho.” O ne A sa lakatse ho fuoa tlōtla ka lekhotla la puso la Bajuda. O ne A apesitsoe ka tlōtla le matla A leholimo. Ha A ne A rata, mangeloi a ka be a theohile ho tla Mo sebeletsa. Empa O ne A lakatsa hore babusi ba Bajuda ba utloisise semelo sa Hae, molemong oa bona ka bobona, le molemong oa sechaba seo ba neng ba se eteletse pele.

“Ke tlile ka lebitso la Ntate, ‘me ha le nkamohele; ha e mong a ka itlela ka lebitso la hae, le tla mo amohela.” Ha ba bang ba ka tla ba nkile sebōpeho sa Krete, empa ba ipatlela khanya bao baa amoheleha. Hobaneng? Ke hobane motho ea ipatlelang tlōtla, o ama litakatso tse ntseng li le teng ka har’a ba bang. Bajuda ba ne ba ka amohela moruti oa bohata hobane O ne A tla phahamisa boikhantšo ba bona. Empa thuto ea Krete e ne e le ea semoea ‘me e batla hore

bo-'na bo thakhisoe; ka lebaka leo ba se ke ba e amohela. Ho bona lentsoe la Hae e ne e ka la motho eo ba sa mo tsebeng.

Na ha ba bangata baetapele ba tumelo matsatsing aa a rōna, ba nyatsang Lentsoe la Molimo e le hore ba tle ba ipolokele meetlo ea bona?

“Hoja le lumetse Moshe, le ka be le ntumetse, hobane o buile ka 'na. Empa ha le sa lumele seo a se ngotseng, lipolelo tsa ka le tla li lumela joang?” Hoja ba ile ba mamela lentsoe le tsoang leholimong, le neng le bua ka moetapele oa bona e moholo, e leng Moshe; ba ka be ba le tsebile lithutong tsa Krete.

[139]

Baprista le baruti ba ile ba hlokomela hore qholotso ea bona ho Jesu e hloka mabaka, ba mpa ba tōtelo a ke lehloeo le bolaeang. Ba tlala tšabo ha ba ntse ba bona bopaki ba matla a kholisang, a neng a bonoa mesebetsing ea Hae; ba mpa ba ikoalla lefifing.

Ba ne ba hlōtsoe ho ketola Jesu kapa hona ho sokolla maikutlo a batho, bao bongata ba bona ba neng ba kholisitsoe ke litaba tsa Hae. Babusi ka bobona ba ne ba ikutloa ba le molato o tebileng; leha ho le joalo ba ikemisetsa ho felisa bophelo ba Hae. Ba rōmella maqōsa ho hlokomelisa sechaba hore Jesu ke mothetsi. Ha rongoa lihloela hore li tle li tlise tlaleho ea lintho tseo A li buileng le tseo A li entseng. Ruri joale Mopholosi ea ratehang O ne A eme ka tlas'a moriti oa sefapano.

## KHAOLO EA 22—JOHANE O KENA TERONKONG; LEFU LA HAE

[140]

*[E itšetlehile ho Matheu 11:1-14; 14:1-11; Mareka 6:17-28; Luka 7:19-28.]*

Johanne Mokolobetsi e bile oa pele ho phatlalatsa ka ‘Muso oa Krete, ‘me e bile eena oa pele ho utloisoa bohloko. A tloha bohloko lefeelleng, a ea koalloa kahar’a marako a teronko, e le motsoaruo qhobosheaneng ea Heroda Antipase. Heroda ka boena o ne a ile a mamela lithuto tsa Mokolobetsi, ‘me a tšoha ha a biletsoa pakong. “Heroda o ne a tšaba Johanne ka ho tseba hore ke monna ea lokileng, ea halalelang.” Johanne o ne a ile a mo nyatsa ka ho ba le likamano tse sa lohle le Herodiase mosali oa ngoana’bo. Ka nakoana e seng kae, Heroda o ile a leka ho itokolla litlamong tseo tsa litakatso, empa Herodiase a mo thatella le ho feta pele ka mesebetsi ea hae, ‘me a ba a fumana ho iphethetsa ka ho susumetsa Heroda ho kenya Mokolobetsi chankaneng.

Johanne o ile a imeloa bohloko moeeng ke masoabi le ho lula feela ha a ntse a le chankaneng. Ha matsatsi a ntse a chaba a bile a likela, ho se phetoho ea letho, o ile a keneloa ke ho nyahama le pelaelo. Barutuo ba hae ba ne mo tlišetsa litaba tsa mesebetsi ea Jesu, le kamoo sechaba se bokellanang ho Eena ka teng. Ba belaela ba re haeba moruti enoa e mocha e le Mesia ke hobaneng A sa lokolle Johanne? Litaba tsena li ile tsa memela Johanne khoao, eo eena a neng a e hloka. Satane o ile a nyakalla ha a bona kamoo lipolelo tsa barutuo bana li neng li tetebetsa moea oa morōmuoa oa Morena ka teng. Ke hangata hakaakang metsoalle ea motho ea lohle e fetohang lira tsa hae tse kotsikotsi!

Johanne Mokolobetsi o ne a lebeletse hore Jesu A lule setulong sa Davida sa borena. Eare ha nako e ntse a feta, ‘me Mopholosi A sa bue letho ka ho nka matla a borena, Johanne a nyahama. O ne a lebeletse hore boikhanšo bo boholo le matla a botho li feliso. O ne a lebeletse hore Mesia O tla fielisisa seotlo sa Hae, A bokelle koro

[141]

ea Hae molikong, ‘mōkō oona A o chese mollong o sa timeng. Bala Esaea 40, Matheu 3. Joalokaha ho ne ho etsahale ka Elia, o na a nahana hore Morena O tla iponahatsa e le Molimo ea tla arabela ka mollo.

Mokolobetsi o ne a ile a ema a sa tšabe letho, a khalemela liketso tsa bokhopo bo etsoang ke ba phahameng le ba tlase. Ha a ka ba a tšaba ho toba Morena Heroda a mo khalemella sebe. Joale ha a le teronkong, o ne a lebeletse hore Tau ea lelōko la Juda e lihele matla a boikhōhōmōso, a mohatelli fatše ‘me E lopolle bafumanehi. Empa Jesu O ne a shebahala A khotsofetse ke mosebetsi oa ho ruta le ho folisa batho. O ne A e-ja litafoleng tsa balekhetho, empa sechaba sa Iseraele se ntse se imeloa ke joko ea Baroma ka letsatsi le letsatsi, ‘me Morena Heroda le nyatsi ea hae e khopo ba iketsetsa borata, ‘me lillo tsa ba fumanehileng le ba hlorisoang li ntse li nyolohela leholimong.

### **Tšoabo E Kholo**

Sena sohle sa bonahala e le sephiri. Litšebo tsa bademona li ne li hlorisa moea oa Johanne, ‘me a apareloa ke moriti oa tšabo e tšosang. A ipotsa hore na ebe Molopolli eo esaleng A lebelloa ha A e-s’o fihle? Johanne o ne a soabisitsoe haholo ke qetello ea mosebetsi oa hae. O ne a lebeletse hore molaetsa o tsoang ho Molimo o tla ba le litholoana tse tšoanang le tsa ha ho ne ho baloa molao, mehleng ea Josiase le Esera moo ho neng ho latele mosebetsi o tebileng oa pako (2 Liketsahalo 34; Nehemia 8). A ipotsa lipotso tse ngata: Na ebe bophelo ba hae bohle e bile sehlabelo sa lefeela? Na mosebetsi oo a o etselitseng barutuo ba hae e ne e le o hlokang litholoana? Na ebe o ile a hloka botšepahi thomong ea hae, haele moo a se a arohantsoe le mosebetsi oa hae? Haeba Molopolli ea neng A lebeletsoe A fihlile, ‘me eba Johanne o fumanoe a tšepahetse mosebetsing oa hae, na ebe Jesu A ka be a sa ketola ‘muso oa mohatelli ‘me A lokolla morōmuoa oa Hae?

[142]

Empa Mokolobetsi ha a ka a lahla tumelo ho Krete. Lentsoe le hlahang leholimong, le leeba le theohang, le bohloeki bo senang sekoli ba Jesu, le matla a Moea o Halalelang a ileng a lula holim’a Johanne ha a atamela pel’a Mopholosi, le bopaki ba Mangolo -tsena tsohle li ne li paka hore Jesu ke Eena ea Tsepisanoeng.



Johanne a rera hore a rōmelle molaetsa ho Jesu. A rōmella ka barutuo a ba hae ba babeli, a tšepile hore ho buisana le Mopholosi ka sebele ho ka tiisa tumelo ea bona. Hape, o ne a nyoretsoe ho utloa mantsoe a tsoang ho Krete, ‘me a tobisitsoe ho eena.

Barutuo a ba babeli ba fihla ho Jesu ka molaetsa, o reng, “Na ke uena ea tlang, kapa re lebelle e mong?” Potso ena e ne e le bohloko, ebile e soabisa haholo ho motho. Haeba Johanne, moetapele ea tletseng tumelo a sitoa ho elelloa tšebetso ea Krete, ho ka lebelloa’ng ho matšoele aa a ipatlang?

Mopholosi ha A ka A arabela barutuo a hang-hang. Ha ba ntse ba eme ba makaletse ho thōla ha Hae, ba kulang le ba hlotsang ba ne ba tla ho folisoa. Lifofu le ba kulang ba ne ba fohla ka cheseho, ba batla ho fihla pel’a Jesu. Lentsoe la Ngaka e kholo le ne le phunyeletsa litsebeng tsa litholo. Polelo ea Hae feela kapa ho angoa ke letsoho la Hae, li ne li bula mahlo a lifofu. Jesu O n’a khalemela mafu, A leleka feberu. Lentsoe la Hae le ne le fihlela litsebeng tsa ba shoang ‘me ba ne ba phahama ba tletse bophelo le matla. Ha A ntsa A ba phekola mafu, bafumanehi le basebetsi ba neng ba nyatsuo a ke baruti, ba re ba litšila; ba ne ba bokellanne pel’a Hae, ‘me O n’a ba bolella lipolelo tsa bophelo bo sa feleng.

### **Jesu O Nehelana Ka Bopaki**

Letsatsi la ea joalo, barutuo a ba Johanne ba bona ‘me ba utloa tsohle. Qetellong Jesu A ba bitsetsa ho Eena, ‘me A ba laela ho ea bolella Johanne tsohle tseo ba li boneng. A ba A eketsa ka hore, “Ho lehlohonolo ea sa khoptjoeng ka baka la ka!” Bopaki ba bo-Molimo ba Hae ba bonoa; ‘me khanya ea Hae ea bonahatsoa ka ho theohela ha Hae boemong ba rōna bo tlase.

Barutuo a ba isa molaetsa, eaba ho lekane. Johanne a hopola boporofeta bo buang ka Mesia, bo reng: “Molimo...o ntlotselitse ho bolella mafutsana, molaetsa o molemo. O nthōmetse ho thoba pelo tsa ba soabileng, ho phatlalletsa bathōpuoa tsa tokoloho le hore ba chankaneng ba tla lokolloa.” Esea 61:1. Mesebetsi ea Krete e ne e Mo phafa hore ke Mesia. Jesu O ne A lokela ho phetha mosebetsi oa Hae, e seng ka ho loana ka libetsa kapa ho ketola marena le mebuso, empa e be ka ho buisana le lipelo tsa batho ka bophelo bo tletseng mohau le boinehelo.

[143]

Molao o tsamaisang bophelo ba Mokolobetsi e ne e le molao oa ‘Muso oa Mesia. Empa seo ho eena e neng e tla ba bopaki bo kholisang ba bo-Molimo ba Krete, ho baetapele ba Iseraele e ne e se bopaki ho hang. Johanne o ile a elelloa hore tšebetso ea Mopholosi, ho bona e ka tlisa feela lehloeo le tsuo. Eena, e le selekela, o ne a noela senoelong seo Krete ka bo-Eena A neng A lōkela ho noela ho sona, A be A se menyeletse.

Taeo ea Mopholosi e bonolo, e ne e sa lahleha feela ho Johanne. Joale a utloisisa hantle sebōpeho sa mosebetsi oa Krete, ‘me a inehela ho Molimo hore a tle a ntšetse pele mosebetsi oona oo a o ratang, leha ho ka mo qosa bophelo ba hae.

Pelo ea Mopholosi e ile ea hlomohela paki ena e tšepahalang, e neng e le chankaneng ea Heroda. A sitoa hore A tlohelle feela, hore batho ba etse qeto ea hore Molimo O furalletse Johanne, kapa ba re tumelo ea hae e ile ea fela mohlang a neng a qosoa. A ba botsa, A re, “Le ne le il’o bona eng feelleng? Lehlaka le tsukutloang ke moea?”

Baruti ba neng ba emetse ho nyatsa mosebetsi oa Mokolobetsi, ba ne ba tšoana le lehlaka le lelelele le pel’a nōka ea Jorodane, ba ne ba tsokoletsca koana le koana ke maikutlo a bongata; ‘me ka lebaka la ho tšaba batho, ba ne ba sitoa ho hanyetsa mosebetsi oa Hae patlalatsa. Haele mohlanka oa Molimo, Johanne, eena e ne e se lekoala le joalo. O ile a bua ka ho totobala ho tšoanang ho Bafarisi, ho Basaduke, ho Morena Heroda le lekhotla la hae, ho mahosana le masole, le ho balekhetso le bafo. E ne e se lehlaka le tetemang. Le

[144] ka chankaneng o ne a tšepahetse ho Molimo ka mokhoa o tšoanang; a tšepahala molaong, a tiile joaloka lefika.

### **Ha Ho E Moholo Ho Eena**

Jesu A tsoela pele A re, “Hantle-ntle le ne le il’o bona eng? Motho ea liaparo tse mabokoboko? Ba liaparo li mabokoboko ba matlung a mahosi.” Liaparo tsa borui le menate ea bophelo bona ha se karolo ea basebeletsi ba Molimo. Baprista le babusi ba ne ba ikhabisa ka liaparo tsa borui. Ba ne ba thabela ho khahlisa batho ho feta ho etsa se amohelang ho Molimo. Botšepahi ba bona ba ne ba sa bo lebise ho Molimo, empa ba ne ba bo lebisa ‘musong oa lefatše lena.

Jesu A re, “Ehlile le ne le il’o bona eng? Le il’o bona moporofeta?...Ke eo ho ngotsoeng ka eena, ha thoe:

Ke romela leqosa la ka ke leo,  
le tla u etella pele,  
le u lōkisetse tsela.”

Jesu A re, “Ruri kea le bolella, har’a ba tsoetsoeng ke basali ha ho e-s’o hlahe ea fetang Johanne Mokolobetsi ka boholo, empa e monyenyanane ‘Musong oa maholimo o mo feta ka boholo.’” Ha lengoloi le ne le etetse Sakaria pele ho tsoalo ea Johanne le ile la re, “hobane o tla ba moholo pel’a Morena.” Luka 1:15. Ka tekanyo ea leholimo, boholo bo lekangoa ka eng? Ha se ho latela kamoo lefatše le lekanyang boholo ka teng. Boitsoaro bo botle ke eona ntho ea bohlokoa ho Molimo. Lerato le bohloeki ke libōpeho tseo A li ratang ka ho fetisia. Johanne o ne a le moholo mahlong a Morena kaha a ile a hana tlōtla empa a supisa bohle ho Jesu, e le Eena ea tšepisitsoeng. Thabo ea hae e senang boikhōhōmōso tšebetsong ea Krete, e bontša bonolo bo phahameng ka ho fetisisa, ho bo kileng ba bonoa bathong.

### **Ea Fetang Moporofeta**

Johanne o ne a le “moholo le ho feta moporofeta.” Baporofeta ba ile ba bonela ho tla ha Krete hole, empa Johanne eena o ile a [145] neoa hore a Mo bone, a be a Mo hlahise ho sechaba sa Iseraele, e le Morōmuoa oa Molimo. Moporofeta Johanne e ne le leseli le lenyenyane le tla lateloa ke le leholo. Ha ho sa tla ba leseli le tla khanyetsa batho ba oeleng haholo joaloka lithuto le mehlala ea Jesu.

Ha e ne e se ka thabo eo a neng a e fumana thōmong ea hae bophelo ba Johanne e ne e le ba mahlomola. O ne a le bolutu. Ha a ka a lumelloa ho bona litholoana tsa mosebetsi oa hae. Ha a ka a fumana tōkelo ea ho ba le Krete, ‘me a bone khanya e neng e bonahala polelong e ‘ngoe le e ‘ngoe ea Krete, ‘me e bonesa litšepiso tsa boporofeta.

Heroda o ne a lumela hore Johanne ke moporofeta oa Molimo ‘me o ne a lakatsa haholo ho mo lokolla. Empa o ne a tšaba Herodiase. Herodiase o ne a tseba hore a ke ke a kholisa Heroda hore

a bolae Johanne kahoo a etsa qeto ea ho sebetsa ka maqiti. Ka letsatsi la tsoalo ea morena ho ne ho tla ba le mokete. Ho ne ho tla ba le boithabiso le botahoa. Herodiase a lumela hore mohlomong Heroda a ka lumellana le maikutlo a hae tsatsing leo.

Ha letsatsi leo le leholo le fihla, morena le mahosana a hae ba ile ba ithabisa ‘me ba noa. Herodiase o ile a rōmella morali oa hae ka tlung ea mokete, ho ea etsesa bamemuoa chao. Salome o ne a le lilemong tsa boroetsana bo bocha, ‘me botle ba hae bo hohelang ba hapa baeti ba morena. Heroda a neoa lithoriso tse phoqang, ha enoa morali ea baprista le likhosi tsa Iseraele a ntse a etsesa bamemuoa chao.

Morena o n’a thotofalitsoe ke joala. Maikutlo a hae a ne a le thoko le eena, ‘me kelello ea hae e lahlehile. Ka pele ho eena, o ne a bona feela baeti ba thabileng, a bona mokete le joala, le mabone a phatsimang, le moroetsana ea etsang chao. Ka motsotsoana feela, bohlasoa ba hlaha; morena a batla ho etsa pontšo e neng e tla mo phahamisa kapele ho banna ba baholo ba ‘muso oa hae. A tšepisa morali oa Herodiase ka kano hore o tla mo fa ntho efe kapa efe eo a ka e kōpang, eo a e batlang leha e ka ba ho mo arolela ‘muso oa hae ka lehare.

[146] Salome a titimela ho ‘m’ae. Ebe a ka kōpa eng? Karabo e ne e se ntse e lōkile -hlooho ea Johanne Mokolobetsi. Salome o ne a tšaba ho ea hlahisa kōpo eo, empa o ile a hloloa ke maikutlo a ‘m’ae. Moroetsana o ile a khutla ka kōpo eo e tšabehang, a re, “Mphe hona mona, ka mokèkè, hlooho ea Johanne Mokolobetsi.”

Heroda a makala, a tlalloa. A otloa ke letsoalo ha a nahana ho felisa bophelo ba Johanne. Empa le teng o n’a sa batle ho bonahala eka maikutlo a hae a thekesela. O ne a entse kano e le ho tlotlisa baeti ba hae, ‘me hoja e mong ho bona o kile a etsa tlhahiso e hanyetsanang le ho phethahatsoa ha tšepiso eo, a ka be a babaletse bophelo ba moporofeta ka thabo. O ile a ba fa monyetla oa ho buella motsoarua. Ba ne ba tseba hore Johanne ke mosebeletsi oa Molimo. ‘Me le hoja ba ile ba tsietsoa ke kōpo ea moroetsana, ba ne ba thotofetse likelello hoo ba ileng ba sitoa ho hanyetsa letho. Ha ho ea kileng a hlahisa lentsoe, ho pholosa bophelo ba leqosa la leholimo. Banna bana ba maemo a phahameng, ba ne ba na le boikarabelo bo boholo, empa ba ne ba inehelletse botahoa. Lihlooho tsa bona li ne li hapiloe ke ‘mino o tsekisang le motjeko, ‘me

matsoalo a bona a ne a robetse. Ka ho thola ha bona, ba ne ba phatlalatsa kahlolo ea lefu holim'a moporofeta oa Molimo, e le ho phethisa boiphetetso ba mosali eo ea nyatsehang.

Heroda o ile a laela ka lesisitheho hore moporofeta a khaoloe hlooho. 'Me hlooho ea Johanne e ile ea tlisoa hang. Joale ho ne ho ke ke ha hlōla ho utloahala lentsoe leo le biletsang batho pakong. Boithabiso ba bosiu bo le bong bo ile ba nka bophelo ba e mong oa baporofeta ba baholohali.

Ke hangata hakaakang batho ba hlokang molato ba etsoang sehlabelo, ka lebaka la ho hloka boikhalemelo ha batho ba tsoanetseng ho tsamaisa tōka! Motho ea noang tai o tla jara molato oa mesebetsi eohle e hlokang tōka eo a ka e etsang a le tlas'a matla a eona a thotofatsang kelello. Batho ba nang le matla a ho sebelisa tōka holim'a maphelo a ba bang, ba etsa tlolo ea molao ha ba inehella ho tsamaisoa ke litakatso tsa bona. Ba lōkela ho ba le taolo e phethahetseng holim'a matla a bona a 'mele, le kelello le litakatso, e le hore ba tle ba be le likelello tse matla le letsoalo le letle la tōka.

Herodiase o n'a thabetse boiphetetso ba hae, 'me o n'a ithetsa ka hore letsoalo la Heroda ha le sa tla khathatseha. Empa thabo ha ea ka ea e-ba teng. Lebitso la hae (Herodiase) le ile la nyatseha, haele Heroda eena a hlorisoa ke letsoalo le molato. Ka linako tsohle o (Heroda) ne a leka ho itokolla letsoalong le molato. Eare ha a hopola bophelo ba Johanne bo hlokang boikhōhōmōso, le boipiletso ba hae ba bohlokoa, bo tiileng, le liqeto tsa hae tse utloahalang ha a eletsa, 'me joale a hopola hore na o shoele joang, Heroda o ne a sitoa ho fumana phomolo. Litabeng tsa naha, ha a fumana tlhompho e tsoang ho batho ba hae, o n'a bontša sefahleho se thabileng empa a patile pelo e hateletsoeng ke letsoalo. O ne a lumela hantle hore Molimo o bone bosaoana ba boithabiso bo neng bo le ka tlung, ebile O bone nyakallo ea Herodiase le tlhapa eo ka eona a rohakileng hlooho e khaotsoeng, ea motho ea neng a mo khalemela.

Eitse ha Heroda a utloela ka mesebetsi ea Krete a nahana hore Molimo o tsositse Johanne bafung. Ka linako tsohle o ne a lula a tšohile hore Johanne o tla phetetsa lefu la hae ka ho mo ahlola, eena le ba ntlo ea hae. Heroda o n'a kotula litholoana tsa sebe -“lipelo tsa lōna li tšoenyehe, mahlo a Iona a fifale, meea ea Iona e hlomohe....Hoseng le tla re: 'Hoja e ne e le ka phirimana!' Ka phirimana le re: 'Hoja e ne e le hoseng!' e le ka baka la tšabo eo

lipelo tsa lōna li tla tšaba ka eona.” Lipolelo 28:65,67. Ha ho na kotlo e bohlokō ho feta letsoalo le molato, le sa faneng ka phomolo bosiu le motšoare.

### **Lebaka Leo Jesu A Sa Kang A Lokolla Johanne**

Batho ba bangata baa ipotsa hore na ke hobaneng ha Johanne a ile a tlohelo a hore a sotlehe, a be a shoele chankaneng. Leha ho le joalo, tsamaiso ena e lefifi e ke ke ea tsitsinya tšepo ea rōna ho Molimo, haholo ha re ka lemoha hore Johanne o ne a nka kabelo mahlomoleng a Jesu. Bohle ba latelang Jesu ba tla roala moqhaka oa mahlomola. Satane o tla loantšana le molao oa boinehelo hohle moo o phethahatsoang.

[148] Satane o ne a sa ka a khathala litekong tsa hae, tsa ho leka ho khelosa Mokolobetsi tseleng ea hae ea bophelo bo inehetseng ho Molimo kahohle, empa o ne a ile a hloloa. Tekong ea lefeelleng, Satane o ne a ile a hloloa. Joale a ikemisetsa ho tlisetsa Krete masoabi ka ho bolaea Johanne. A batla ho Mo utloisa bohlokō, Eena eo a hlotsoeng ho Mo hohella sebeng.

Jesu ha A ka A kena lipakeng ho lokolla mosebeletsi oa Hae. O ne A tseba hore Johanne o tla mamella teko ena. Mopholosi A ka be A ile ka thabo ho ea khothatsa Johanne tlokotsing ea chankaneng, ka boteng ba Hae. Empa hona ho ne ho tla beha thōmo ea Hae kotsing. Molemong oa ba bangata, bao ka lilemo tse latelang ba neng ba tla kenngoa teronkong, ba be ba bolauoe, Johanne o ile a lokela hore a noe senoelo sa boshoele-tumelo. E le hore, ha balateli ba Jesu ba sotleha bolutung ba chankane, mohlomong ba bolaoa ka sabole, kapa ka ho tamolloa kapa ka ho chesoa, ‘me ho bile ho bonahala eka ba furalletsoe ke Molimo le batho, ba tle ba khothale ka lipelong tsa bona, ha ba hopola hore Johanne Mokolobetsi o fetile har’a maiphihlelo a joalo.!

Johanne o ne a sa furalloa. Mangeloi a leholimo a ne a na le eena, ‘me a mo senolela boporofeta bo malebana le Krete, hammoho le litšepiso tsa bohlokoa tsa Mangolo. Johanne, esita le ba bang ba neng ba tla mo hlahlama ba filoe khothatso ena, “Bonang, ke na le lōna kamehla eohle ho isa bofelong ba lefatše.” Matheu 28:20.

Molimo ha A ise bana ba Hae hosele le moo ba neng ba ka rata ho isoa teng, ha ba ne ba ka elelloa qetello ba sa le qalehong, ‘me ba

ba ba lemoha sepheo seo ba se phethahatsang e le basebetsi ‘moho le Eena. Hase Henoke ea ileng a nkeloa leholimong, hase Elia ea ileng a nyolohela leholimong ka koloi ea mollo, eo ho ka thoeng o moholo kapa o hlompheha ho feta Johanne Mokolobetsi, ea ileng a shoella chankaneng a le mong. “Lōna le filoe lehlohonolo, e seng feela la ho lumela ho Krete, empa le la ho mamella mahlōkō ka baka la hae.” Bafilipi 1:29. Har’a lineo tsohle tseo leholimo le ka. li fang batho ha ho eo ka eona ho ka thoeng leholimo le tšepetse motho ntho e kholo le bile le mo tlotlisetse ho feta ha a fuoa ho sotleha le Krete mahlomoleng a Hae.

[149]

## **KHAOLO EA 23—KAMOO DANIELE A ILENG A TSEBAHATSA HORE JESU KE KRESTE**

Ho tla ha Mesia ho no ho phatlalatsoe Judea pele. Mangeloi a ne a boele ka tsoalo ea Jesu a le holim'a maralla a Betlelehema. Banna ba bohlale ba bochabela ba ne ba tle Jerusalema ba ntse ba Mo batla.

Hoja baetapele ba Iseraele ba ne ba ile ba amohela Krete, A ka be A ba hlomphile ka hore e be barōmuoa ba hasanyang Evangeli lefatseng kaofela. Empa Iseraele ha a ka a tseba nako ea ho eteloa ha hae. Mona le ho hloka tšepo ha baetapele ba Bajuda, li ile tsa butsoa, tsa ba tsa tsoala lehloeo le totobetseng, 'me lipelo tsa batho tsa furalla Jesu. Lekhotla le phahameng le ne le sekametse polaong ea Hae, kahoo Jesu A tloha Jerusalema, A tloha ho batho ba neng ba rutiloe molao, 'me A fetohela ho sehlopha se seng sesele ho bolela molaetsa oa Hae.

Melokong eohle e hlahlamang, pale ea Krete ea ho tlameha ho furalla Judea e ntse e ipheta. Ha Banchafatsi ba ne ba ruta lentsoe la Molimo, ba ne ba se na mohopolo oa ho ikarohanya le kereke e thehiloeng, empa baetapele ba tsa bolumeli ba ile ba sitoa ho mamella leseli leo, 'me ba neng ba le tšoere ba ile ba tlameha ho batla sehlopha se seng se neng se nyoretsoe 'nete. Matsatsing a kajeno, ke batho ba seng ba kae ho ba ipolelang e le balateli ba Batsosolosi, ba ikemiselitseng ho utloa Lentsoe la Molimo, ka boikemisetso ba ho amohela 'nete ho sa tsotellehe hore na e hlaha ka mang. Hangata batho ba latelang Batsosolosi ba tlameha ho furalla likereke tsa bona tseo ba li ratang, e le hore ba tle ba phatlalatse lentsoe la Molimo ka ho totobala. Ba bangata ba tlameha ho tlohella likereke tsa bontat'a bona hore ba tle ba hlonephe Lentsoe la Molimo hantle.

[150]

Batho ba Galelea ba ile ba bontša ba amohela mosebetsi oa Mopholosi. Likelello tsa bona li ne li bulehetse ho amohela 'nete hobane ba sa khoramela meetlo haholo. Ho fapana le Judea tikiloho ena ea Galelea e ne e le lehae la batho ba merabe e fapaneng, e mengata; ba hlahang libakeng tse fapaneng.



—Ha Jesu A ntse A tsamaea Galelea, A ruta ebile A folisa, batho ba ne ba tla ka bongata; esita le ba hlahang Judea ba ne ba le bangata. Thahasello ea batho e ile ea phahama haholo hoo ho neng ho hlokahala hore ho nkuoe mehato e hlokolosi, esere mohlomong babusi ba Roma ba keneloa ke tšabo ea hore mohlomong batho ba ka ba tsohela matla. Batho ba lapileng le ba nyoriloeng ba ne ba nyakalla mohaung oa Mopholosi ea hauhelang.

### Moporofeta Daniele O Ile A Porofeta Ka Mosebetsi Oa Krete

‘Moko-tabo oa thuto ea Krete e ne e le hore, “Nako e fihlile, ‘Muso oa Molimo o atametse; bakang, ‘me le lumele molaetsa o molemo.” Mareka 1:15. Molaetsa o molemo o neng o boleloa ke Mopholosi, o ne o itšetlehile ka Boporofeta. “Nako” eo A neng A bolela hore e phethehile, ke nako e ileng ea tsebahatsoa ho Daniele. Lengeloi Gabriele le ile la re “Lemo tse mashome a supileng, a supileng hasupa, li baletsoe chaba sa heno le motse o halalelang, hore litšito tsohle li tle li feliso, libe le tsona le ke le li felise, ho etsoe poelano bakeng sa ho etsa bokhopo, ho loka ha kamehla ho tle ho be teng, ho phethahetsoe lipono, le bona boporofeta, Ea Halalelang haholo le eena a tlotsoe.” Daniele 9:24. Boporofeteng letsatsi le emela selemo. Bona Ezekiele 4:6. Liveke tse mashome a supileng kapa ona matsatsi a 490, a emela lilemo tse 490.

Qaleho ea nako ena e fano: “Ka baka lena tseba, u utloisise: Ho tloha mohla ho phatlalatsoang taelo, taelo ea hore Jerusalema e tsosoe, ho fihlela ha ‘musi a fihla, ‘musi ea tlotsitsoeng, lemo tse supileng hasupa li tla feta...lemo tse mashome a tšeletseng a metso e ‘meli hasupa,” liveke tse 69 kapa lilemo tse 483. Daniele 9:25.

Molao oa hore Jerusalema e tsosoe e hahuo, o ileng oa phethoa ka taelo ea Aretascesese, (Bona Esera 6:14; 7:1,9) o ile oa qala ho sebelisoa ka nako ea selemo, selemong sa 457 B.C. (pele ho tsoalo ea Krete). Ho tloha nakong eo, lilemo tse 483 li ile tsa phethahala ka nako ea selemo, selemong sa 27 A.D. (Kamora’ tsoalo ea Krete). Ho latela boporofeta, nako ena e ne e tla fihlela nakong ea Mesia, Ea tlotsitsoeng. Ka selemo sa 27 A.D., ha Jesu A kolobetsoa, O ile A fumana tlotso ea Moea o Halalelang, ‘me hang kamora’ moo O ile a qala tšebetso ea Hae. Eaba ho phatlalatsoa molaetsa o reng, “Nako e phethehile.”

Kamora, lengeloi le ile la re, “Khosana e tla etsa selekane, e se etse le ba bangata, selekane seo e be sa lilemo li supile.” Ka lilemo tse supileng kamora’ hore Mopholosi A kene tšebetsong ea ‘muso oa Hae, litaba tse molemo li ne li lokela ho bolelloa Bajuda haholo-holo; ‘me ka lilemo tse tharo le khoeli tse tšeletseng, li ne li tla boleloa ke Krete ka sebele sa Hae, ‘me kamora’ moo e be mosebetsi oa baapostola. “Bohareng ba nako ena ea selekane, e tla felisa mahlabelo, e felise le linyehelo.” Daniele 9:27 Ka hoetla selemong sa 31 A.D. (kamora’ tsoalo ea Krete) Krete e leng sehlabelo sa ‘nete O ile A thakhisoa Golgotha. Lesela la Tempele le ile la arohana ka lehare. Hona ho no ho bontša hore bohaleleli le bohlokoa ba litšebeletso tsa mahlabelo bo felile. Nako e ne e fihlile ea hore mahlabelo le linyehelo tsa lefatše li khaotse.

Veke e le ‘ngoe -e leng lilemo tse supileng -li ile tsa fela ka selemo sa 34 A.D. (kamora’ tsoalo ea Krete). Eaba Bajuda ba qetella ka ho tiisa taba ea bona ea ho latola litaba tse molemo, ka ho tlepetsa Setefane ka majoe. Eitse barutuo a ha ba qhalakanngoa ke litlhoriso, “ba ea kahohle ba ntse ba bolela molaetsa o molemo” (Liketso 8:4); ‘me kamoraonyana ho moo, Saule eo e neng e le mohlorisi o ile a sokoloha, ‘me ea eba Paulosi, moaposotola ea Balichaba.

Nako ea ho tla ha Krete, le lefu la Hae, le ha litaba tse molemo li fetisetsoa ho Balichaba li ile tsa bontšoa ka ho totobala. Bajuda ba ne ba na le monyetla oa ho utloisisa boporofeta bona, le ho elelloa ha bo phethahala mosebetsing oa Jesu. Krete ha A bua ka boporofeta bo filoeng Daniele malebana le nako ea bona, O ile A re, “‘mali a utloisise se boleloang.” Matheu 24:15. Kamora ho tsoho [152] ea Hae O ile A hlalose barutuo a ba Hae ka Baporofeta bohle, “a ba qaqisetsa tse amanang le eena.” Luka 24:27. Mopholosi O ile A bua ka baporofeta, ‘me ba “paka e sa le pele tsa ho hlōkōfatsoa ha Krete le tsa tlotla e tlang ho ho latela.” 1 Petrose 1:11.

E ne e le Gabariele, lengeloi le pel’a Mora oa Molimo ka maemo, le neng le tlisitse molaetsa o molemo ho Daniele. E ne e le eena Gabariele eo Krete A ileng A mo romela ho senolela Johanne tse tlang ho tla; le ho phatlalatsa tlhohonolofatso ho ba balang le ba utloang litaba tsa boporofeta, ebile ba bōlōka litaba tse ngoliloeng teng. (Bona Isenolo 1:3). Lehlohonolo la Molimo le tla etela ba ithutang mangolo a boporofeta ka tlhompho le thapelo.

KE KRESTE

—Joalokaha molaetsa oa ho tla ha Kreste lekhetlo la pele o ne a phatlalatsa ‘muso oa Hae oa mohau, ka mokhoa o joalo molaetsa oa ho tla ha Hae lekhetlo la bobeli o phatlalatsa ‘muso oa Hae oa khanya. Molaetsa ona oa bobeli joaloka oa pele, o itšetlehile holim’a boporofeta. Mopholosi ka bo-Eena ha A fana ka lipontšo tsa ho tla ka Hae, O re, “Itlhokomeleng, esere mohlomong lipelo tsa lona tsa imeloa ke botlofa, le botahoa, le matšoenyeho a bophelo bona, ‘me letsatsi lela la le tsometsa.” “Falimehang ke hona, le rapele ka linako tsohle, hore le tle le be le matla a ho phonyoha tsena tsohle, tse seng li tla etsahala, le a ho ema pel’a Mor’a Motho.” Luka 21:34,36.

Bajuda ba ile ba toloka lentsoe la Molimo hampe, ‘me ba se ke ba tseba nako eo ba tla eteloa ka eona. Ka lilemo tsa tšebetso ea Kreste le baapostola ba Hae, bona ba ne ba rala merero eo ho felisa barōmuoa ba Morena. Litakatso tsa lefatše li ne li hapile menahano ea bona. Ho sa le joalo le kajeno, ‘muso oa lefatše lena o hapile likelello tsa batho, ‘me ha ba lemohe ha boporofeta bo ntse bo phethahala ka potlako, esita le matšoao a supang hore ‘muso oa Molimo o tla o potlakile. Leha e le moo re sa tsebe nako eo Morena oa rona A tla khutla ka eona empa re ka tseba ha e atametse. “Ha ho le joalo, re se ke ra robala joaloka ba bang bohle, re mpe re falimehe, ‘me re be le boitšoaro.” 1 Bathesalonika 5:6.

[153] **KHAOLO EA 24—“NA HASE MORA OA ‘METLI  
OA MAPOLANKA?”**

*[E itšetlehile ka Luka 4:16-30.]*

Ka har’a matsatsi a matle a boqosa ba Krete Galelea, ho ne ho na le tšitiso e le ‘ngoe -ea hore batho ba Nasaretha ba ne ba ile ba Mo latola. Ba re, “Na hase mora oa ‘metli oa mapolanka?” Matheu 13:55. Nakong ea bocha ba Hae, Jesu O ne A ile A rapela le bana babo tlung ea thapelo ea Nasaretha. Haesale A qala mosebetsi oa Hae, O ile A ba sieo har’a bona, ‘me eitse ha A boela A ba teng har’a bona hape, tebello ea bona ea phahama haholo-holo. A bona lifahleho tseo A li tloaetseng, tseo A li tsebileng ho tloha bonyenyanyeng ba Hae. Ho le teng ‘m’ae, le bana babo le likhaiseli, ‘me mahlo ‘ohle a talimile ho Eena ha A kena tlung ea thapelo ka letsatsi la Sabatha, ‘me A lula har’a bona ho rapela ‘moho le barapeli.

Nakong ea litšebeletso tsa mehla moholo o ne a khothaletsa batho hore ba lule ba lebeletse Eo Ea tlang ho tla, ea tla tlisa puso ea khanya ‘me A felise khatello eohle. O ne A leka ho khothatsa bamameli ba hae, ka ho pheta-pheta bopaki ba hore ho tla ha Mesia ho se ho le haufi. A tiisa mohopolo oa hore O tla hlaha A eteletse pele mabōtho a tlang ho tla lokolla Iseraele bokhobeng.

[154] Ha moruti a ne a le teng o ne a lebelloa hore a fana ka thuto, ‘me Moiseraele e mong feela o ne a ka fana ka palo ea lentsoe, bukeng ea baporofeta. Ka Sabatha seo, Jesu O ile A kopuo ho thusa tšebeletsong. A “ema, hore a tle a bale. A neeloa buka ea moporofeta Esaea.” Lengolo leo A ileng A le bala, le ne le tsejoa ele le buang ka Mesia Le re:

Moea oa Morena o holim’a ka  
hobane a ntlotselitse  
ho bolella mafutsana  
molaetsa o molemo,

o nthōmetse  
ho phatlalletsa bathopuo  
tsa tōkōlōho,  
le lifofu hore li tla tutuboloha,  
le ho lokolla ba hateletsoeng,  
le ho phatlalatsa lemo sa Morena  
sa mehauhelo.”

“Hoba a koale buka, ‘me a e khutlisetse ho mothusi, a lula, ‘me mahlo a bohle ba ka tlung ea thapelo a e-ba holim’ a hae....Bohle ba mo paka, ba makalla mantsoe a mohau a tsoang molomong oa hae.”

Ha A hlalosa mantsoe ao A ileng a a bala, Jesu O ile A bolela hore Mesia ke Mopholosi oa ba hateletsoeng, Ea folisang ba kulang Ea tutubolang ba fofetseng, ‘me a ba senolela leseli la ‘nete. Molaetsa o hlolang oa mantsoe a Hae oa hlasimolosa bamameli ba Hae ka matla ao ba qalang ho a utloa. Matla a molaetsa ona o halalelang, a heletsa marako ‘ohle a tšitiso. Eare ha lipelo tsa bona li sisintsoe ka Moea o Halalelang, ba arabela ka li-amen tse mofuthu le lithoriso tse eang ho Morena.

Empa eare ha Jesu A ba bolella, A re “Kajeno temana ena ea Mangolo e phethahetse moo le utloang,” hanghang ba hopola boipolelo ba Motho Eo ea neng a buisana le bona. Bona, bana ba Aborahama, ba ne ba hlalositsoe e le ba litlamong, e le batšoaruoa ba neng ba tšoanela ho lokolloa matleng a bobee; ba le lefifing, ‘me ba hloka leseli la ‘nete. Boikhantšong ba bona ba iphumana ba rohakiloe. Mosebetsi oo Jesu A neng A o etsa har’ a bona o ne o tla fapana ho hang le seo ba neng ba se lebeletse. Liketso tsa bona li ne li ka ‘na tsa hlahlojoa ka thata. Ba honyela, ba tšaba ho hlahlojoa ke mahlo ao a hlakileng, a phunyeletsang.

“Jesu enoa ke mang?” Ba botsa. Eena eo ea ipolelang hore ke Mesia ea khanyang e ne e le mora oa ‘metli. Ba ne ba Mo bone ha A ntse A sebetsa, A nyolosa, A theosa le marallana. Ba ne ba tseba baena le likhantseli tsa Hae, ba tseba le bophelo ba Hae le mesebetsi ea Hae. Ba ne ba ile ba ‘mona ha A ntse A hola ho tloha bonyenyaneng ho isa ha e le monna. Leha bophelo ba Hae bo ile ba hloka sekoli, ba ne ba sa kholoe hore ke Eena Ea tšepisitsoeng. Ba lumella khoao, ‘me lipelo tsa bona tsa thatafala, leha li ne li ile tsa

nolofala ka nakoana. Satane a sebetsa ka matla a maholo hore a ba tiiseletse ho se lumeleng.

Ba ne ba ile ba sisinngoa ke kholiseho ea hore Ea neng A buisana le bona ke Eena Mopholosi oa bona. Eaba Jesu O ba fa bopaki ba bo-Molimo ba Hae ka ho senola menahano ea bona ea lekunutu. A re, “Ha ho moporofeta ea amohelang motseng oa habo. Kannete kea le bolella, ho ne ho e-na le basali ba bangata ba bahlolohali Iseraeleng mehleng ea Elia, pula e sa ne ka lilemo tse tharo le likhoeli tse tšeletseng, tlala e kholo e le teng naheng eo eohle. Empa Elia ha aa ka a rōmelo le ho ea mong oa bona, haese ho mosali oa mohlolohali, Sarepeta, naheng ea Sidone. Ho ne ho bile ho e-na le balepera ba bangata Iseraeleng mehleng ea moporofeta Elisha, ‘me ha hoa ka ha hloekisoa le ea mong oa bona, haese Mosiria Naamane feela.”

Bahlanka bao Molimo A neng A ba khethile, ba ne ba sa lumelloa hore ba sebeletse sechaba se thatafalitseng lipelo, ‘me se sa lumele. Mehleng ea Elia, Iseraele e ile ea latola maqosa a Morena. Ka lebaka leo, Molimo A fumanela mohlanka oa Hae setšabelo naheng ea bohedene, ha mosali eo e neng e se oa sechaba se khethiloeng. Empa pelo ea mosali enoa e ne e bulehetse ho amohela leseli le leholo leo Molimo A ileng A le rōmela ka moporofeta oa Hae.

[156] Ka lebaka le tšoanang, le mehleng ea Elisha, balepera ba Iseraele ba ile ba fetoa feela. Empa Naamane, monna ea phahameng oa mohedene, o ne a le maemong a ho amohela limpho tsa mohau oa Molimo. Ha a ka a hloekisoa lepera feela, empa o ile a hlohonolo-fatsoa ka ho tseba Molimo oa ‘nete. Bahedene ba khethang ho etsa ho lōka ho fihlela kamoo ba ka tsebang ho hlalohanya hantle, ba boemong bo molemo ho feta batho ba ipolelang hore ba sebeletsa Molimo, empa ba sa tsotelle leseli, ‘me maphelo a bona a letsatsi le letsatsi a hanana le boipolelo ba bona.

### **Jesu A Ba Bonša Boemo Ba Bona Ba ‘Nete**

Mantsoe a Jesu a hlatha bamameli ba Hae tlase motsong oa ho ipona ba lokile. Lentsoe le leng le leng la ba seha joaloka thipa, ha A ba senolela boemo ba bona ba ‘nete. Eaba ba qala ho nyefola tumelo eo Jesu A ileng A ba kenya eona pele. Ba sitoa ho lumela hore Eo ea hlahang bofutsaneng bo tlase hakaalo e ka ba motho oa letho.

Ho se lumele ha bona ha tsoala lefufa. Ba kharumela Mopholosi ka khalefo. Ha tsoha boikhōhōmōsō bo tšabehang ba bochaba, ‘me mantsoe a Hae a nyamella ka har’ a lerata la bona. Maikutlo a bona a tletseng litšekamelo a khopeha, ‘me ba ne ba se ba itokiselitse ho Mo bolaea.

Phutheho ea qhalana, ‘me ba tšoara Jesu, ba Mo akhela kante ho ntlo ea thapelo, ba Mo ntšetsa kante ho motse. Ba ne ba thohothel-letsoe ho Mo timetsa, ba Mo kothomeletsa lintšing tsa selomo, ba rerile ho Mo tsubelletsa. Mehoo ea bona e ne e tletse sebakeng. Ba bang ba ne ba Mo betsa ka majoe, eaba hang-hang oa nyamela. Maqosa a leholimo a ne a e-na le Eena har’ a mokhopi oo o tletseng bohale, ‘me a Mo tšireletsa.

Ho joalo, ka mengoaha eohle, makhotla a bobbe a lika balateli ba Krete ba tšepahalang; empa mabōtho a leholimo a lara pel’ a bohle ba ratang Molimo, ho ba pholosa. Ha re fihla bophelong bo sa feleng, re tla tseba hore maqosa a tsoang ho Molimo a ne a ntse a hlokomela metsamao ea rona ea letsatsi le letsatsi.

Jesu O ne A ke ke A lesa sehlopha seo a sa boele a se biletsa pakong hang hape. Ha mosebetsi oa Hae Galelea o ea qetellong, A boela A chakela lehae la Hae la bonyenyaneng. Botumo ba lithuto le mehlolo ea Hae li ne li tletse naheng eohle. Moo Nasaretha, ho ne ho se motho ea neng a ka latola hore Jesu O tletse matla a fetang a botho. Ba ne ba potiloe ke metse eo ka har’ a eona, A neng A folisitse batho bohle ba neng ba kula.

Batho ba Nasarethe eitse ha ba boela ba mamela mantsoe a Hae, ba sisinngoa ke Moea o Halalalang. Empa le hona hoo, ba ile ba sitoa ho lumela hore Monna Eo ea holetseng har’ a bona, O moholo ho ba feta. Ha ‘na ha sala makukuno ka lipelong tsa bona, ba re haele moo A ipolela hore ke Eena Eo ba Mo tšepisitsoeng, hoa totobala hore O ba timme sebaka se tšoanelang Baiseraele; hobane O bontšitse hore haele bakeng sa ho fumana mohau oa Molimo, ha ba fetane ka letho le banna le basali ba bahedene. Leha ba ile ba botsana, ba re, “Bohlale boo le liketso tsee tse hlollang, eo o li nka kae?” (Matheu 13:54), ba ne ba sitoa ho Mo amohela e le Krete oa Molimo. Ka lebaka la ho se lumele ha bona, Mopholosi A hloloa ho sebetsa mehlolo e mengata har’ a bona ‘me A tloha ho bona ka monyebe, A ela ruri.

Ho hloka tumelo ho bileng teng, ho ile ha hola ka har'a banna ba Nasaretha, le ka har'a lekhotla le phahameng, le ka har'a sechaba. Taba ea ho latola Moea o Halalelang e ile ea qetella sefapanong sa Golgotha, ea qetella ka tšenyeho ea motse oa bona, le ka ho qhalakanngoa ha sechaba sa Bajuda.

Kreste O ne A lakatsa ho bulela Iseraele matlotlo a bohlokoa a 'nete! Empa ba ile ba khoramela litumelo tsa bona le litšebeletso tse senang thuso. Ba sebelisitse chelete ea bona ho reka 'moko le litlhoka, empa bohobe ba bophelo bo le har'a bona. Hangatangata Kreste O ile A ba qotsetsa mangolong a baporofeta, 'me A re, "Kajeno temana ena ea Mangolo e phethahetse moo le utloang." Hoja ba ile ba batlisisa Mangolo ka botšepahi, 'me ba hlahloba litsebo tsa bona ka sekala se Lentsoe la Molimo, Jesu A ka be A sa ka A re, "Bonang, ntlo ea lōna e sala e le lithako." Luka 13:35. Mohlomong tlokotsi e ileng ea thuhakanya motse oa bona oa boikhōhōmōso, e ka be e ile ea ba pota ka thoko.

Empa lithuto tsa Kreste li ne li batla pako. Haeba ba amohela lithuto tsa Hae, mekhoha ea bona e ne e tšoanela ho fetoha, 'me ba tele litakatso tsa bona tseo ba li ratang. Ba ne ba tla lokela ho hanyetsana le maikutlo a bahlalefi le baruti ba nako eo.

Baetapele ba Bajuda ba ne ba tletsoe ke Moea oa boikhōhōmōso. Ba ne ba rata litulo tse phahameng ka tlung ea thapelo. Ba ne ba thabisoa ke ha batho ba ba bitsa ka mabitso a maemo a phahameng. Eitse ha ba ntse ba felloa ke boithompho ba sebele ba qala ho boulela meetlo le mekete ea bona haholo. Likelello tsa bona tsa [158] fifatsoa ke litšekamelō tsa boikhōhōmōso, 'me ba sitoa ho kopanya matla a mantsoe a Kreste a kholisang le bophelo ba Hae ba boikokobetso. Bofutsana ba Hae bo ne bo bonahala bo sa lumellane le hore ke Mesia. Ebe ke hobaneng A ne A sa iketsise? Haeba ruri E ne E le Mesia joalekaha A ne A ipolela, ke hobaneng ha A ne A khotsofaletse ho tsamaea A se na lebōtho la nto? Matla le khanya tse lebeletsoeng ka nako e telele, li tla phethahala joang e le hore lichaba li be tlas'a puso ea Bajuda?

Ho hloka khanya e bonoang kantle bophelong ba Hae, ha se eona feela taba e entseng hore Bajuda ba latole Jesu. Eena ka sebele sa Hae e ne e le bohloeki 'me Bajuda bona ba ne ba sa hloeka. Botšepahi ba Hae, bo ne bo senola ho se tšepahale ha bona 'me bokhopo ba bona ba hlahella ka sebōpeho sa bona se tšabehang.



Leseli leo le joalo le ne le sa amohelehe ho bona. Ba ne ba ka mamella masoabi a ha litakatso tse bona tse boikhabo li nyopa, ho feta ho mamella ha Krete A khalemela libe tsa bona, esita le ho nyatseha hoo ba neng ba ho utloa ha ba ipapisa le bophelo ba Hae bo hloekileng.

**KHAOLO EA 25—PITSO LEOATLENG**

*[E itšetlehile ka Matheu 4:15-22; Mareka 1:16-20; Luka 5:1-11.]*

Letsatsi le ne le haba ho chabela leoatleng la Galelea. Barutuo ba ne ba lutse ka liketsoaneng tsa bona lebopong, ba khathetse, kamora' ho sebetsa bosiu bohle ba tsoasa litlhapi, empa ba sa fumane letho. Jesu O ne A tsohelletse lebopong la leoatle, ho ea ikhutsa ho se hokae. O ne A lakatsa hore A ke A fumane nakonyana ea phomolo, A phomolele matšoele a Mo salang morao ka letsatsi le letsatsi. Empa batho ba ile ba bokellana kapele hoo ba ileng ba Mo likanela ka mahlakoreng 'ohle.

E le ho suthela bongata bona, Jesu O ile A kena ka sekepeng sa Petrose, 'me A re a sesisetse ka leoatleng hanyenyane. Teng bohle ba ne ba khona ho Mo bona le ho Mo utloa hantle, eaba O ruta matšoele a lebopong, Eena A le ka seketsoaneng. Eena Ea hlomphehang oa leholimo, O ne A bua A le sebakeng se bulehileng, A bolela litaba tse kholo tsa 'Muso oa Hae, ho batho feela. Letša, le lithaba, le masimo a pharalletseng le khanya ea letsatsi e aparetseng lefatše, tsohle li ne li pakela lithuto tsa Hae 'me tsa li hatisa likelellong tsa batho. Ha ho na thuto e ileng ea lahleha feela. Molaetsa o mong le o mong o ne o kena pelong ea motho e mong joaloka polelo ea bophelo bo sa feleng.

Baporofeta ba ne ba talimela taba e tjena pele ha ba tla ngola, ba re:

“Lefatše la Sebulone  
le lefatše la Nafthali,

nq'a leoatle, mose ho Jorodane,  
Galelea ea balichaba,  
sechaba se neng se lutse lefifing  
se bone leseli le leholo,  
'me ba neng ba lutse lefatšeng

la lefu le lefifing,  
ba chabetsoe ke leseli.”

**Matheu 4:15-16.**

Ha A talima mengoaha e tlang ho tla, Jesu O ile A bona balumeli ba Hae ba tšepahalang ba le chankaneng le lekhotleng la kahlōlo, ba le litekong, ba le bolutung le litlhorisong. Lipolelo tseo A li buileng ho batho ba neng ba phuthehetse ho Eena lebopong la Genesarethe, O ne A li lebisa hape ho batho bao ba litsietsing, e le mantsoe a nang le molaetsa oa tšepo ho ba litekong, oa matšelisano ho ba mahlomoleng, le khanya ho ba lefifing. Lentsoe leo le neng le bua le hlaha seketsoaneng sa motšoasi oa litlhapi, le tla utloahala le bua khotso lipelong tsa batho qetellong ea nako.

Thuto eo ea fela. Jesu A bolella Petrose hore a sesiselletse hare ho leoatile, ‘me a akhele letlōoa ka leoatleng hore le tšoase. Empa Petrose o ne a nyahame pelo. O ne a qetile bosiu bohle a sa tšoasa letho. Ha a ntse a lutse ka bolutu, o ile a nahana ka Johanne Mokolobetsi ha a sotleha chankaneng, a nahana le ka bokamoso ba Jesu le balateli ba Hae, a nahana le ka ho hloka katleho ha tšebetso ka Judea, a nahana le ka bokhopo ba baprista le baruti. Eitse ha a talima matlooa a sa tšelang letho, bokamoso ho eena ba bonahala bo le lefifi, bo lahlisa tšepo. A araba Jesu, a re: “Monghali, re sebelitse ka thata bosiu bohle re sa tšoase letho, empa ho ea ka polelo ea hao ke tla lepeletsa matlōoa.”

Kamora’ ho sebetsa bosiu bohle ho se katleho ea letho, Petrose o ne a bona ho se na thuso ho akhela letlōoa metsing a hloekileng a letša, empa ka lebaka la ho rata Morena, ba ile ba phethisa. Simone le ngoan’abo ba lepeletsa letlōoa. Eitse ha ba leka ho le nyolla, ba fumana le tletse litlhapi tse ngata hoo ba ileng ba tlameha ho kōpa Jakobo le Johanne hore ba ba thuse. Ha ba se ba nyolotse letlōoa, liketsoana tse peli li ile tsa tlala litlhapi hoo li neng li ka ‘na tsa teba.

**Ho Se Halalele Hoa Totobatsoa**

[161]

Ho Petrose, mohlolo eona e ne e le o bontšang matla a leholimo, ho feta e meng eohle eo a neng a kile a e bona. A bona hore Jesu ke Eena eo tlholeho e leng tlas’a tsamaiso ea Hae. O ile A itšoabela ke ho hloka tumelo hoa hae, a leboha ho ipeha tlase hoa Krete, empa

ho feta tsohle, maikutlo a hae a hlolloa haholo ha a lemoha hore ke motho ea litšila, ha a bapisoa le bohloeki ba Jesu. Petrose o ile a itihela maotong a Jesu a re, “Morena, tloha ho ‘na, hobane ke motho oa moetsalibe!”

E ne e le kapele ho bohaleli bona ba leholimo, ha moporofeta Daniele a tla oela fatše joaleka motho oa shoeleng, pel’a lengeloi. Sheba Daniele 10:8. Esaea o ile a khotsa, a re, “A ‘na eloa! Ke malimabe hakaakang! Ke timetse! Ke motho ea puo li mpe,...Mahlo a ka a bone Khosi, Morena oa mabōtho.” Esaea 6:5. Ho bile joalo ho bohle ba nehiloeng ho bona boholo le borena ba Molimo.

Mopholosi A arabela Petrose A re, “Se tšabe; ho tloha joale u tla ba motšoasi oa batho.” Kamora’ hore Esaea a bone bohaleli ba Molimo, le ho hloka thuso hoa hae, o ile a fuoa boikarabelo ba molaetsa o halalelang. Kamora’ hore Petrose a tsebe ho inyatsa, o ile a fumana pitso ea ho sebeletsa Krete.

Barutuo ba ne ba bone mehlolo e mengata e entsoeng ke Krete, ebile ba mametse le lithuto tsa Hae, empa leha hole joalo ho no ho se ea lahlileng mosebetsi oa hae oa pele oa boipheliso, ho hang. Ho koalloa hoa Johanne Mokolobetsi ho ile hoa baka mesarelo e tšabehang. Ba utloisisa hore haeba litholoana tsa mosebetsi oa Johanne li tjena, ba fokolloa ke tšepo ha ba nahana ka Morena oa bona, hobane baetapele ba tumelo ba ne ba ikopantse hore ba Mo loantše. Ba ile ba ikutloa ba pholile ha ba fumana monyetla oa ho khutlela mosebetsing oa bona oa ho tšoasa lihlapu nakoana. Empa joale Jesu A ba mema hore ba lahle bophelo ba bona ba pele, ‘me ba kopanye litakatso tsa bona le tsa Hae. Simone Petrose a amohela pitso. Ha ba fihla lebopong Jesu A bitsa ba bang ba boraro A re, “Ntšaleng morao, ‘me ke tla le etsa batšoasi ba batho.” Ba tlohela tsohle hang-hang ‘me ba Mo latela.

[162]

### **Boitelo Boa Putsoa**

Pele Jesu A ba laela hore ba siece liketsoana tsa bona tsa ho tšoasa lihlapu, O ne A ile A ba fa tiisetso ea hore Molimo O tla tlatsa bohloki ba bona. Petrose o ile a putsoa haholo, hoba seketsoana sa hae se sebelisoa. “Ea ruisang bohle ba mo rapelang,” O itse, “fanang, ‘me le tla fuoa: mekotlaneng ea lona le tla tšelloa haholo, e hlohloe, e hlōkōhloe, e sasamale.” Baroma 10:12, Luka 6:38. Morena O ile

A putsa mosebetsi oa Petrose ka mokhoa oona ona. Boitelo bo bong le bo bong bo etsetsoang tšebetso ea Hae bo tla buseletsoa. Bona Baefese 3:20; 2:7.

Bosiung boo, bosiu ba mahlomola, barutuo ba ne ba arohane le Kreste, kahoo ba ile ba hatelloa ke ho hloka tumelo. Empa boteng ba Hae bo ile ba tsosolosa tumelo ea bona, ‘me ba tlisa thabo le katleho. Ho joalo ho rōna. Ha re khaohane le Kreste mosebetsi oa rona o hloka litholoana, ebile re ka felloa ke tšepo habonolo, ra korotla. Empa ha re sebetsa tlas’a tsamaiso ea Hae, re thabisoa ke ho bona bopaki ba matla a Hae. O re tlatša ka tumelo le tšepo. Eena eo lentsoe la Hae le phuthang lihlapa leoatleng, A ka susumetsa lipelo tsa batho ‘me A li hapa, e le hore basebetsi ba Hae e tie e be “batšoasi ba batho.”

Kreste O ne A tseba haholo ho ntlafatsa banna ba ikokobelitseng le ba sa rutehang, e le hore ba tle ba lōkele mosebetsi oo A neng A ba khethetse oona. Mopholosi O ne A sa nyelise thuto. Thuteho ke lehlonolo ha e laoloa ke lerato la Molimo. Empa banna ba bohlale ba nakong eo ea Hae, ba ne ba itšepile bo bona hoo ba neng ba ke ke ba sebelisana ‘moho le Monna eo oa Nasaretha. Ba ne ba eisa ho rupelloa ke Kreste. Ntho ea pele e tlamehang ho ithutoa ke bohle ba batlang ho ba basebetsi le Molimo, ke ho hloka boitšepo. Joale ba tla be ba loketse ho amohela semelo sa Kreste. Hona ha ho fumanoe ka ho kena likolo tsa mahlale.

### **Kamoo Basebetsi Ba ‘Nete Ba Rupeloang**

Jesu O ile A khetha batsoasi ba lihlapa ba sa rutehang kahobane ba ne ba sa rutoa meetlo e fosahetseng ea nako eo. E ne e le banna ba nang le mekhoha ea bochaba ‘me ba ikokobelitse, ka hoo e le batho ba ka rutehang. Bophelong ba letsatsi le letsatsi, batho ba bangata ba ntse ba pota-pota ka mamello, ho phetha mesebetsi ea letsatsi, ba sa lemohe hore ba ruile matla ao, haeba a ka sebelisoa ka tšoanelo, a ka ba phahamisetsang boemong bo lekanang le ba banna bao lefatše le ba hlonephang haholo. Ho hloka hahala hore ba tšoaroe ke letsoho le bohlale, ho tsosa matla ao a robetseng. Jesu O ile A bitsa banna ba mofuta o joalo ho ba basebetsi ‘moho le Eena. Ha barutuo ba khutla thupelong ea Mopholosi, ba ne ba tšoana le Eena ka kelello le semelo.

Mosebetsi o moholo oa thuto ke ho fana ka matla a phelising, a fumanoang ka ho kopana ha kelello le kelello, le moea le moea. Ke bophelo feela bo ka fanang ka bophelo. Ba bile lehlohonolo hakaakang, bao ka lilemo tse tharo ba bileng le hona ho kopana le mong'a bophelo bo halalelang, ka letsatsi le letsatsi. Moapostola Johanne o re, "Mohaung oa hae o khaphatsehang, rona bohle re amohetse mohau holim'a mohau." Johanne 1:16. Maphelo a banna bana, le limelo tseo ba bileng le tsona, le mosebetsi o moholo o phethiloeng ka bona, tsohle ke bopaki ba lintho tseo Molimo A ka li etsang ho bohle ba ikokobelitseng le ba rupelehang. Motho oa bohlokoa, ea behellang boena kathoko, 'me a bula pelo ea hae hore Moea o Halalelang o sebetse, ebile a phela bophelo bo inehetseng ho Molimo kahohle a ka sebelisoa boemong bofe kapa bofe. Haeba batho ba ka mamella khalemelo e lōkelang, Molimo O tla ba rupela nako le nako. O nka batho ba le joalokaha A ba fumane, ebe O ba rupella tšebetsong ea Hae, ha feela ba inehetse ho Eena. Moea oa Molimo, ha O amohetsoe ka pelong O tla tsosolosa matla a oona kaofela. Kelello e inehetseng ho Molimo ka botlalo, e hola kaofela ha eona, 'me ea matlafatsoa hore e utloisise e be e phethe tsohle tseo A li hlokang. Semelo se fokolang sea matlafala.

Boinehelo bo sa khaotseng bo aha kamano e tiileng pakeng tsa Jesu le morutuo oa Hae, 'me joale Mokreste a tšoane le Eena ka kelello le ka semelo. O tla ba le kutloisiso e hlakileng e pharaletseng, tthalohanyo ea hae e tla ba e tebileng le kahlōlo ea hae e be e lekaneng. O tla ba le hona ho beha litholoana tse ngata tse isang khanya ho Molimo. Bakreste ba maphelo a ikokobelitseng, ba fumane thuto sekolong sa phahameng ho feta tsohle. Ba ile ba lula maotong a Motho eo ho seng "motho ea kileng a bua joaloka" eena. Johanne 7:46.

## **KHAOLO EA 26—MATSATSING A PHATHAHANENG A THABISANG KAPERENAUMA**

[165]

*[E itšetlehile ka Mareka 1:21-38; Luka 4:31-44.]*

Lipakeng tsa maeto a Hae ha A ntse A e ea holimo le tlase, Jesu O ne A lula Kaperenauma, mabopong a leoatle la Galelea, ‘me ho ile ha tsebahala ka hore ke “motse oa habo”. Matheu 9:1. Mabopo a leoatle le lithajana tse hojana li ne li ena le, metse mona le mane. Leoatle le ne le koahetsoe ke liketsoana tse tsoasang lithlapi. Hohle ho ne ho phetheselo ho phathahanoe.

Kaperenauma e ne e le tseleng e kholo e tlohang Damaseka ho ea Jerusalema le Egepeta, le Leoatleng le Bohareng; batho ba bangata ba tsoang mafatšeng a mang ba ne ba feta le teng. Mona Jesu O ne A ka kopana le lichaba tsohle le ba maemo a fapaneng, ‘me lithuto tsa Hae li ne li tla fihlela linaha tse ling. Lipatlisiso tsa boporofeta li ne li tla thahasellisa, ‘me maikutlo ohle a ne a tla lebisoa ho Mopholosi, ‘me borōmuoa ba Hae bo ne bo tla tlisoa kapele ho lefatše. Mangeloi a ne a lōkisetsa tsela ea boromuoa ba Hae, a sisinya lipelo tsa batho ho ba hulela ho Mopholosi.

Hona moo Kaperenauma Krete O ile A folisa mor’a monna oa ‘musisi ea ileng a fana ka bopaki ba matla a Hae. ‘Musisi le ba lelapa la hae ba ile ba paka ka thabo e makatsang ka tumelo ea bona. Eare ha ho tsebahala hore Moruti ka bo-Eena O har’a bona, motse kaofela oa sisinyeha. Ka Sabatha batho ba bokana tlung ea thapelo ka bongata boo matšoele a batho a bileng a khutlisetsoa morao.

[166]

Bohle ba ileng ba utloa Mopholosi “ba hlolloa ke thuto ea hae, hobane mantsoe a hae a ne a e-na le matla.” Luka 4:32. “Hobane o ne a ruta joaloka ea nang le matla, e seng joaloka Litsebi tsa Molao tsa bona.” Matheu 7:29. Lithuto tsa bangoli le baholo li ne li bata hape li sa natefele bamameli. Ba ipolela hore ba ka qaqisa molao, empa ho ne ho se tšutšumetso e tsoang ho Molimo ea ho sisinya lipelo tsa bona esitana le lipelo tsa bao ba neng ba mametse.

Mosebetsi oa Jesu e ne e le ho nehelana ka 'nete. Mantsoe a Hae a ile a bonesa lithuto tsa baporofoeta. Haesale bamameli ba Hae ba ne ba qala ho fumana lithuto tse tebileng joalo, tse nang le moelelo lentsoeng la Molimo.

Jesu O ne A fana ka 'nete ka tsela e tobileng, e bonolo. Puo ea Hae e ne e hloekile, e khethehile, e bile e hlakile joaloka metsi a phallang. Lentsoe la Hae e ne e ka pina ho bao ba kileng ba mamela mantsoe a bo-rabbi, a tenang.

### **Ha Ho Pelaelo Kapa Ho Qea-qea**

O ne A bua joaloka motho ea nang le borena. Bo-rabbi ba ne ba bua ka pelaelo le qea-qea joaloka ha e ka mangolo a ka tolokoa a bolela ntho e 'ngoe a khutla a bua e 'ngoe e hananang le eona ho hang. Empa Jesu O ile A ruta ka mangolo a na le matla a sa thekeseleng. Hore na ke thuto efeng O ne A e fana ka matla.

Empa O ne A tšepahetse, A sa halefa. Puong e 'ngoe le e 'ngoe ea Hae Molimo O ne A senoloa. Jesu O ne A batla ho heletsa mosebetsi o bothoto o hohellang batho linthong tsa lefatše. O ile A beha lintho tsa bophelo bona moo li lokelang; eleng hore li tlase ho tsa bo sa feleng. Ka ho rialo O ne A sa bolele hore ha li na molemo ho hang. O ile A ruta hore tsebo e halalelang ea 'nete e lōkisetsa batho ho etsa mesebetsi ea letsatsi le leng le le leng ka bokhabane. Leha A ne a lemoha likamano tsa Hae le Molimo O ile A eelloa hore O na le kopano le batho kaofela.

[167] O tsebile “ho khothatsa ba tsepeletseng.” Esaea 50:4. O ne A e-na le bohlale ba ho kopana le mehopollo e khanyetsong, ‘me a ba makatsa ka lipapiso tse neng li hapa maikutlo a bona. Lipapiso tsa Hae li ne li nkuoa linthong tse etsahalang maphelong a bona a kamehla, ‘me leha lithuto tsa Hae li ne li le bonolo, li ne li ena le moelelo o tebileng. Ka linonyana, mehalalito, lipeo, molisana, nku-O ile A tseba ho fana ka lipapiso tsa 'nete e sa feleng; ‘me kamora’ thuto e 'ngoe le e'ngoe bamameli ba Hae ba ne ba hopola lithuto tsa Hae ha ba bona lintho tseo A ileng A bapisa ka tsona.

Kreste O ne A sa phaphathe batho kapa ho na ho ba babatsa ka mesebetsi eo ba e entseng ea mahlale, empa botebong ba lipelo tsa bona, batho ba nahanang haholo ba amohela ‘me ba fumana lithuto tsa Hae li qholotsa bohlale ba bona. Baruteihali ba ne ba khahloa



ke mantsoe a Hae, empa ba sa rutehang ba ne ba fumana molemo kamehla. One A etsa hore le bahedene ba utloisise hore O na le molaetsa oa bona.

Leha A ne A le ka har'a lira tsa Hae tse halefileng, O ne a aparetsoe ke moea oa khotso. Botlehali ba semelo sa Hae, lerato la Hae le bonahalang sefahlehong sa Hae, le utloahalang ha A bua, li ne li hulela ho Eena bohle ba neng ba sa thatafatsoa ke ho se lumele. Ba matšoenyehong ba ne ba utloa hore ke motšoalle ea tšepehang, ea utloelang bohlokō, 'me ba lakatsa ho tseba haholo ka 'nete eo A e rutang. Ba ne ba laba-labela hore lerato la Hae le khothatsang le ka ba le bona kamehla, le sa khaotse.

Jesu A talima lifahleho tsa bamameli ba Hae. Lifahleho tse neng li bontša thahasello li ne li Mo fa khotsofalo. Ha litsenene tsa 'nete li phunyeletsa marako a mōna, 'me li hlahisa pako le teboho Mopholosi A thaba. Ha mahlo a hae a bona lifahleho tseo A ileng A li bona pele, sefahleho sa Hae sa tlala thabo. E ne e ee e re ha A ile A fana ka 'nete e totobatsang melingoana e ratoang, A lemohe lifahleng hore seo A se buileng ha se amohelhe. Ha A ne A bona batho ba hana molaetsa oa khotso, O ne A hlabeha haholo botebong ba pelo ea Hae.

Moo Jesu a ntseng a bua ka tsa borōmuoa ba Hae, A le ntlong ea thapelo ha tšoha ho itšohlometsa motho oa lehlanya har'a batho, a hōoa ka lentsoe le leholo a re: “U re kene ka'ng, Jesu oa Nasaretha? Na u tlil'o re timetsa? Kea tseba hore na u mang: U Ea Halalelang oa Molimo!”

Ha ferekanoa. Ha tšohuoa. Maikutlo a batho a tloha ho Krete, 'me mantsoe a Hae a se ke a eloa hlōkō. Empa Jesu A khalemela modemona, A re, “Thōla! Tsoa ho eena! Eare hoba moea o litšila o mo ilibanye habohlōkō, a bokolle haholo, oa tsoa ho eena.”

[168]

Kelello oa molahluoa enoa ea kulang e ne e ile ea fifatsoa ke Satane, empa botenng ba Mopholosi, o ile a tsosoloha ho labalabela tokoloho litlamong tsa Satane. Empa modemona a tsitlalla. Ha monna enoa a leka ho ipiletsa ho Jesu, a kōpa thuso, moea o litšila oa kenya mantsoe molomong oa hae, 'me a lla ha bohlokō a le tlhōkōfatsong ea tšabo.

Motho ea nang le modemona o ne a lemoha ka lerootho hore o pel'a Ea ka mo lokollang empa ha a leka ho atamela letsoho leo le matla, matla a mang a mo hanela, e mong a bua ka molomo oa hae.

Ntoa pakeng tsa matla a Satane a mo thibelang le ho laba-labela tokoloho ho pelong ea hae e ne e tšabeha.

Modemona oa tsitlalla ka matla a ona ho hatella motsoaruo oa ona. Ho ne ho bonahala eka motho enoa ea makaqabetsing o tla lahlehelo ke bophelo ba hae ntoeng ea hae le sera sena seo esaleng se senya botho ba hae. Empa Mopholosi A bua ka borena ‘me a lokolla motšoaruo enoa. Monna eo a ema pel’a batho ba maketseng, a thabetse ho ba bolokolohing ba boikutlo ba botho. Esitana le modemona o ne a ile a paka matla a bomolimo a Mopholosi. Leihlo le neng le tonnoe, le tletse khalefo ea bohlang, joale ke lena le phatsima ka kelello e chatsi, ‘me le tšoloha meokho ea teboho.

Batho ba makala ba botsana ba re, “Hoo ke eng? Ke thuto e ncha e nang le matla! O laela le meea e litšila, ‘me ea mo mamela!” Mareka 1:27.

[169] Monna enoa o ne a ile a nkoa ke menate ea sebe ‘me a nahana ho natefisa bophelo ka menyaka. O ne a sa lore hore a ka fetoha koko ho batho ‘me a hlabisa lelapa la hae lihlong. A nahana hore a ka sebelisa nako ea hae ka bosaoana. Empa ho hloka boitšoarole ho phelela masaoana tsa senya bophelo ba hae, eaba Satane o laola bophelo ba hae kahohle. Sebakeng sa hore ebe o tetse maruo le menyaka ho reka boleng bo mo lahlehetseng, o ne a fetohile ea sitoang ho itšoasolla marong a e mobe. Satane o ne a tsamaisa menahano ea hae eohle. Ha motho enoa ea soto a se a le matleng a ona, moea o litšila oa khopama ho feta. Ho joalo ho bohle ba inehelang bobeng. Menate e kileng ea qala ea ba thabisa e qetella ka tsieleho le bohlang le tšenyeho ea moea.

Ke moea ona oo o litšila o neng o laola Bajuda ba sa lumeleng, empa ho bona oa ikhakanya ka sebōpeho sa moea oa bolumeli. Boemo ba bona bo ne bo senyehile ho feta ba motho ea kenoeng ke modemona, hobane ba ne ba sa ikutloe hore ba hloka Krete. Ka baka leo ba ile ba tlamelloa tlas’a taolo ea Satane.

Borōmuoa ba Krete ka seko ho batho bo bile nakong eo mosebetsi o moholo oa makhotla a lefifi o neng o iphile matla. Ka lilemo-lemo Satane o ne a ntse a sebelletsa ho laola ‘mele le meea ea batho, ho ba tlišetsa ho bona sebe le matšoenyeho; Joale o ile a qosa Molimo ka mahlonoko ao. Jesu O ne A senolela batho semelo sa Molimo, kahoo A robokella matla a Satane, ho lokolla ba mahlaahleleng a Satane. Lerato le matla tse tsoang leholimong li ne li sisinya

lipelo tsa batho, ‘me khosana ea lefifi ea hlokoleha. A phahisana le mosebetsi oa Krete mohatong o mong le o mong.

### Satane O Sebetsa A Ikhakantse

Ho tla ba joalo ntoeng ea ho qetela pakeng tsa ho lōka le sebe. Ha bophelo bo bocha le matla li theohela ho barutuo ba Krete li qholotsa makhotla a Satane. Ka bomenemene bo a ithutileng bona ka lilemo tse makholokholo tsa ho loantša Molimo ea bokhopo e sebetsa e ikhakantse, e ikapesitse joaloka lengeloi la khanya. Batho “ba khomarele meea e khelosang, le lithuto tsa bademona”. 1 Timothea 4:1.

Baetapele le Baruti ba Iseraele ba ne ba sa e le hlōkō monyetla oo ka ona ba ka beng ba ile ba hlola meea e litšila. E ne e le ka lentsoe la Molimo Krete A ileng A tseba ho hlola e mobe. Baetapele ba Bajuda ba ile ba toloka lentsoe la Molimo hore le bolele seo Molimo O neng O sa se fana. Ba ne ba etsa khang ka ntho tse sa tsebisahaleng ‘me ba latola linnete tseo e leng tsa bohlokoa. Kahoo lentsoe la Molimo la amohuo a matla a lona; eaba moo meea e litšila e etsang ka boithatelo.

Pale ea lefatše ea ipheta. Bible e phetluoe pel’a bona baetapele ba tsa bolumeli nakong ena ea rōna ba ntse ba phetlile Bible ba hlile ba ritpitla tumelo ea batho lentsoeng la Molimo. Ba kheketla lentsoe la Molimo e be ba beha maikutlo a bona ka holim’a se hlalosoang ke Lentsoe. Ke kahoo ho hloka tumelo ho atileng ‘me le bokhopo bo atileng.

[170]

Ba furallang thuto tsa mangolo tse hlakileng le matla a kholisang a Moea oa Molimo o Halalelang o kholisang ba mema bademona ho ba laola. Ho hanyetsa Mangolo a Halalelang ho buletse motheketheke sebaka le hona ho lumela bafung ‘me ntho ena e fumanoa le ka har’a likereke tse ipitsang ka Jesu Krete. Ho na le meea ea bohata e ipapisang le khaso ea molaetsa o molemo. Batho ba bangata ba ee ba qale ho sebetsa le meea ena e le ha ba rata ho bona hore na ehlile meea ke ntho e teng. Ere ha ba lemoha hore e na le matla a fetisang a botho ba hoheloe ke eona ho fihlela e ba busa. Ebe moea o felloa ke boitšireletso. Motho ea joalo a ka iphumana a fetohile lekhoba la sebe seka motho ea kenoeng ke modemona. Empa boemo ba hae ha bo bolele hore a ke ke a thusoa ke Krete.

A ka hlola ka matla a Lentsoe la Molimo. Haeba re lakatsa ho tseba le ho etsa thato ea Molimo, tšepiso ena ea Hae ke ea rona e reng, “le tla tseba ‘nete, ‘me ‘nete e tla le lōkōlla.” “Ha motho a rata ho etsa thato ea ea nthōmileng, o tla tseba hore na thuto eo e tsoa ho Molimo.” 1 Johanne 8:32; 7:17. Ka tumelo litšepisong tsena motho e mong le e mong a ka pholoso mahlaahleleng a liphoso le puso ea sebe.

### **Tšepo E Teng Ho Mang Kapa Mang Ea Lahlehileng**

Ha ho motho ea oeleng putla, ha ho motho ea mobe be! ea ke keng a fumana pholoho ho Krete. Motho ea nang le modemona o ne a ka bua mantsoe a tsoang ho Satane feela empa Molimo A utloa selo se ka pelong. Le haeba selo se tsoang moeeng se sa utloahale ka mantsoe Molimo Oa se utloa. Ba amohelang ho kena seleaneng le Molimo oa leholimo ba mengoa ke Mopholosi: O re, “a ba ke ba tie ho ‘na, ‘na ke be setšabelo sa bona, ba tle ho ‘na ke etse khotso le bona. E, ba tle ho ‘na ke etse khotso le bona.” Esaea [171] 27:5. Mangeloi a Molimo a tla loanela motho eo ka matla a hlōlang. “Na...mothopuo a o lopolloa ho motlalapi oa hae?...Ba loantšanang le uena ke tla ba loantsa, bana ba hao ke ba lopolle.” Esaea 49:24,25.

Eare ha phutheho ka ntlong ea thapelo e ntse e hapehile maikutlo, Jesu A ba siea ho ea tlung ea Simone ho phomola hanyenyane. Empa le mona lefifi le ne le aparetse. Mohoehali oa Simone o ne a tšoeroe ke “feberu e bohale.” Jesu A inamela ho eena hae, a khalemela feberu, ‘me ea mo tlohela, a tsoha hang-hang, a nt’o, ba sebeletsa.

Litaba tsa mosebetsi oa Krete tsa phatlalla kapele Kaperenauma. Ka hobane borabbi ba ne ba tšajoa, batho ba tšaba ho tla phekoloa ka Sabatha. Hang ha letsatsi le likela batho ba khobokana moo Jesu A neng A lula teng. Ba kulang ba tlisoa ho Mopholosi.

Hora kamora’ hora ba ‘na ba fihla, ba tsamaee, hobane ho ne ho se motho ea tsebang hore na hosasa ba tla fumana Ea folisang A ntse A le teng har’a bona. Haesale motse oa Kaperenauma o ne o es’o bone letsatsi le tšoanang le lona. Moea o ne o tletse mantsoe a tlholo, a thabileng. Mopholosi O ile A thabela matla a Hae a pholiso a busetsang bophelo le thabo ho bakuli.

E ne e se e le bosiu haholo ha matsoele a khutlela mahae ‘me khutso e e-ba teng lapeng la Simone. Letsatsi le lelelele, le thabisang

le ne le se le fetile, joale Jesu A batla ho phomola. Empa ha batho ba sa khalehile, “e sa le ka malungoalungoana, Jesu a tsoha, a tsoa, a ea nahathothe, a rapella teng.”

Hangata Jesu O ne A lōkōlla barutuo ba Hae ho chakela ma-haeng a bona ho ea phomola; empa ka bonolo A hanana le maleke a bona a ho Mo suthisa mosebetsing oa Hae. O ne A ee A sebetse letsatsi lohle e re mantsiboea kapa kameso A ee lithabeng ho ea buisana le Ntat’ae. Hangata O ne A qeta bosiu bohle A rapela, A khutlele mosebetsing oa Hae ha letsatsi le chaba.

Esale hosasa, Simone le barutuo ba bang ba tla ho Jesu, ba re batho ba se ba ntse ba ‘Matla. Baokameli Jerusalema ba ne ba batla ho ‘molaea; esitana le banna ba motse oa Habo ba ne ba lekile ho felisa bophelo ba Hae; empa Kaperenauma O ile A amoheloa ka thahasello, ‘me tšepo ea barutuo e ile ea tuka bocha. Ho ka etsahala hore ebe har’ a ba Galelea ba ratang tokoloho ho ka fumanoa batšehetsi ba ‘muso o mocha. Ba makala ha ba utloa Kreste A re, “A re eeng nq’ e ‘ngoe metseng e ka mathōko, e le hore le teng ke tle ke rute, hobane ke seo ke se tletseng.” Mareka 1:38. Jesu O ne A sa khotsofalle ho hohella batho ho Eena, e le mofolisi ea makatsang. Leha batho ba thahaselletse ba lumela hore o tlile ho tla ba morena le ho theha ‘muso oa lefatše lena, Eena A lakatsa ho tlosa menahano ea bona nthong tsa lefatše ho e isa ho tsa moea.

[172]

Ho makalloa ke sechaba hona ha Hae ha Mo imela moeeng. Hlompho eo lefatše le eeng le e nehe batho ho latela boemo kapa leroo kapa litalenta tsa bona e ne e se mokhoa o amohelehang ho Mor’ a Molimo. Ha ho le o mong oa mekhoa e sebelisoang ke batho ho ikhulela bolateli eo Jesu A ileng A e sebelisa. Ho ile ha porofetoa ka Eena ha thoe, “Ha a ka ke a hōoeletsa kapa a phahamisa lentsoe, kapa a peroha har’ a literata....O tla ahlōla bohle ka botšepahi.” Esaea 42:2,3.

Bophelong ba Jesu, ho ne ho se lerata le khang, leha e le borapeli bo reretsoeng ho itlisetsa thoriso, ho se na ketso e memang thooletso. Kreste O ne A patiloe ho Molimo, ‘me Molimo O ne A senoloa semelong sa Mora oa Hae.

Letsatsi la ho Lōka (eleng Kreste) ha lea ka la hlaha lefatseng ka khanyahali, ho tsietsa likelello ka leselihali la Hae. Butle-butle le ka bonolo letsatsi le ee le leleke lefifi, ‘me le tsoetse lefatše bophelong.

Ke ka tsela e joalo Letsatsi la ho Lōka le hlahang, “ka mahlaseli a lona a folisang.” Malakiea 4:2.

## **KHAOLO EA 27—MOLEPERA OA PELE EA ILENG A NTLAFATSOA KE KRESTE**

[173]

*[E itšetlehile ka Matheu 8:2-4; 9:1-8,32-34; Mareka 1:40-45;  
2:1-12; Luka 5:12-28.]*

Har'a mafu a tsebahalang ka bochabela, lepera le ne le tšajoa haholo. Ho se phekohe, le ho tšoaetsana ha lefu lena le tsela eo le senyang motho litšobotsi ka eona le ne le tšosa le tsona linatla haholo. Har'a Bajuda le ne le shejoa e le kotlo e fuoeng motho ka baka la sebe, ke kahoo ho neng mothoe ke "monoana oa Molimo." Le ne le nkuoe e le sesupo sa sebe.

Seka motho ea seng a shoele, molepera o ne a sa lumelloe ho phela le batho. Sohle seo a neng a se ama se ne se sa hloeka. Moea o ne o silafatsoa ke phekumoloho ea hae. Ea neng a belaelloa hore o tšoeroe ke lefu lena o ne a tlameha ho itlhahisa ka pele ho ba-prista. 'Me ha ho fumanehile hore ke molepera, ho ne ho etsoa qeto ea hore a eo lula le ba tšoeroeng ke lefu leo. Molao o ne o sa fetohle. Marena le babusi le bona ba ne ba tlanngoa ke molao oo ha le ba tšoere.

Molepera o ne a jara thohako a le hole le metsoalle le bang ka eena. O ne a tlameha ho phatlalatsa sekhobo sa hae 'me a hōelehetse haholo hore batho ba balehele hole le eena, esere a ba tšoaetsa. Sello se reng, "ha kea hloeka! ha kea hloeka!" Se ne se utloahala ka lentsoe le hlomolang le tsoang ho molepera ea lelekiloeng har'a sechaba 'me sello seo se ne se tlatsa ba se utloang ka tšabo le nyeliso.

Litaba tsa mosebetsi oa Krete li ile tsa fihla ho ba bang ba neng ba tšoeroe ke lepera, 'me tsa hotetsa tlhasenyana ea tšepo. Empa haesale ho tloha mehleng ea Elisha ho ne ho e-s' o ka ho utloahala ka motho ea kileng a hloekisa ea tšoeroeng ke lefu lena. Ho ne ho e-na le monna a le mong, le ha ho le joalo, eo pelong ea hae tlhase ea tumelo e ileng ea kunkela. Empa o ne a ka itlhahisa joang ho Mofolisi? Ana Krete O ne A ka mo folisa? Ana O ne A tla tsotella motho ea ahloloang ke Molimo? Na O ne A tla mo neha thohako?

[174]

Molepera o ile a nahana ka tsohle tseo a ileng a li utloa ka Jesu. Ho ne ho se le ea mong ea kileng a batla thuso ea Hae eaba oa lelekoa. Monna oa batho a ikemisetsa ho fumana Mopholosi. Mohlomong o ne a ka tšoha a teana le Eena tseleng tse thabeng kapa moo A ntseng A ruta teng ka ntle ho metse. Ena e ne e le eona feela tšepo ea hae.

Molepera o ile a tataisetsoa ho Mopholosi moo A ntseng A ruta lebopong la leoatle. A ema thokoana, ‘me a utloa mantsoe a se makae a tsoang molomong oa Mopholosi. A ‘Mona A beha matsoho A Hae holim’ a ba kulang, lihlotsa, lifofu, ba shoeleng litho, le ba neng ba le makhatheng a lefu a ba bona ba tsoha ba rorisa Molimo Ea ba lopolotseng. Tumelo ea matlafala pelong ea hae. A atamela haufinyane. A lebala lithibelo tseo a li etselitsoeng, le tšabo eo batho bohle ba neng ba mo tšaba ka eona. O ne a nahanne ntho e le ‘ngoe feela e leng tšepo e lehlohonolo ea ho folisa.

O ne a tšabeha ha u mo talima. ‘Mele oa hae o seng o ntse o bola o ne o tšabeha haholo. Ha batho ba ‘mona ba chechella morao ke tšabo, ba hatellana holimo e le ha ba leka ho baleha molepera eo hore a se ba thetse. Ba bang ba leka ho mo thibela ho tla ho Jesu, empa ha a ka a ba bona kapa ho utloa ha ba bua. O ile a bona Mora oa Molimo feela. A phehella ho ea ho Jesu, me a itihcla maotong a Hae a lla a re, “Morena, ha u rata, u ka ntlhoekisa.”

Jesu A araba A re: “Kea rata, hloeka,” ‘me A otlolla letsoho A mo ama.

Hang-hang phetoho ea tlela molepera. Letlalo la hae la e-ba le bophelo, methapo kutlo ea boela ea utloa, mesifa ea tiea. Mahoashe le ho khakhapeha ha let’alo tsa nyamela, ‘me ha hlaha letlalo le bonolo le benyang joaloka la ngoana ea atlehileng.

[175] Ka potlako Krete O ile A supisa motho enoa hore a thole ‘me a phakise a sebetse. A mo laela, A re, “Hlokomela u se bolelle motho, u mpe u e’o itlhahisa ho moprista, u ntše nyehelo e laetsoeng ke Moshe, hore e be bopaki ho bona.” Ha baprista ba ne ba ka tseba linnete tse amang ho fola ha hae lehloeo la bona ho Krete le ne le ka ‘na la ba etsa hore ba se shebisise litaba hantle. Jesu O ratile hore molepera a itlhahise tempeleng pele mafosisa a ka fihla ho bona. Ke tsela ena ho neng ho tla etsoa qeto e senang leeme, ‘me molepera o ne a tla lumelloa ho boela a kopana le ba lelapa le metsoalle ea hae.



—Mopholosi o ne a tsebile hore ha litaba tsa molepera ea folisitsoeng li ka tsejoa hohle, ba bang ba tšoeroeng ka lepera ba ne ba tla balehela ho Eena, ‘me selo se ne se tla phahama sa hore batho ba tla tšoaetsoa. Balepera ba bangata ba ne ba sa tl’o sebelisa mpho eo ea pholiso e le lehlohonolo la bona kapa la ba bang. ‘Me ka ho hulela balepera ho Eena, O ne A tla fana ka monyetla oa ho qosoa ka hore O tlotse molao. Kahoo mosebetsi oa Hae oa boruti ebe oa khineha.

Letšoele la batho le ile la e-ba lipaki tsa pholiso ea molepera ‘me ba ile ba thahasella ho tseba ka qeto ea baprista. Ha molepera ea folileng a khutlela ho metsoalle ea hae, thabo e ile ea khaphatseha. Molepera o ne a sitoa ho pata ka pholiso ea hae. E ne e ke ke ea e-ba ntho e ka etsahalang ruri hore a ka pata taba ena, empa molepera o ile a phatlalatsa taba eo, a nka hore ho hloka boipatlo ha Jesu ke hona ho etsang hore Jesu A mo hanela ho phatlalatsa taba eo. O ne a sa utloisise hore ho hlahella ho hong le ho hong ha Jesu ho ne ho etsa hore baprista le baholo ba batle ka matla ho ripitla Jesu. Monna ea ntlafalitsoeng o ile a thabela matla a bonnna ‘me a utloa a sitoa ho ithiba ho isa tlotla ho ngaka ena e mo phekotseng. Empa ketso ea molepera ea ho hasanya taba ena e ile ea etsa hore batho ba bokellane ho Jesu ka bongata hoo A ileng A tlameha hore A khaotse mosebetsi oa Hae nakoana.

Mosebetsi o mong le o mong oo Krete A neng A o etsa oa borōmuoa ba Hae o ne o anela hohle ho phethahatsa leano la ona. Ha A ka A tlohela letho le sa sebelisoa leo ka lona, baprista le baruti ba koaletsoeng lesakeng la pelaello le lintho tse neanoang, ba ka fihleloang ka lona. Ka ho rōmela molepera ea folisitsoeng ho baprista, Jesu O ne A rerile ho ba fa bopaki bo neng bo tla ba hlokisa maqiti a ho loana ho hang. Bafarisi ba ne ba qositse Krete ka hore O khahlanong le molao, empa taelo ea Hae ea hore molepera ea hloekisitsoeng a eo itlhahisa ka pel’a baprista ea shanofatsa qoso tseo. Jesu O fane ka bopaki ho bontša lerato la Hae ho motho, tlhomphe ea Hae ea molao, le matla a hae a ho pholosa batho sebeng le lefung.

Bona baprista ba ileng ba lelekella molepera nahathote ke bona ba phatlalalitseng hore o folile pepeneneng. Monna ea folisitsoeng, ea buselitsoeng ha hae a le kahar’a sechaba, e bile paki e phelang ea Ea mo folisitseng. Ka thabo e kholo a holisa lebitso la

Jesu. Monyetla oa fuoa baprista hore ba tsebe 'nete. Nakong ea ho phela ha Mopholosi, borōmuoa ba Hae bo ne bo bontša khohelo e nyenyane haholo ho baprista, empa kamora' nyolohelo ea Hae “sehlophahali sa barista sa amohela tumelo.” Liketso 6:7.

### **Tsela Eo Krete A Hloekisang Motho Sebeng**

Mosebetsi oa Krete ho hloekiseng molepera ke tšoantšiso ea mosebetsi oa Hae oa ho hloekisa motho sebeng. Monna ea tiileng ho Jesu o ne “a tletse lepera”. Barutuo ba lekile ho thibela Monghali oa bona ho ama molepera. Empa ho beha letsoho la Hae holim'a molepera, hoo ha ho a Mo silafatsa. Kamo ea Hae e tlisitse matla a fanang ka bophelo.

Ho joalo le lepereng la sebe — le bolaeang, le ke keng la phekoloa ke matla a motho. “Ha ho bophelo ho tloha bohatong ba leoto, ho isa hloohong, ke maqeba le matetsetso ke liso tse petlang, ha li e-s' o hlatsuoe kapa tsa tlamisoa, le ho tlotsoa ka ole ha li e-s' o tlotsoe.” Esaea 1:6. Empa Jesu O na le matla A folisang. Mang le mang ea itihelang maotong a Hae ka tumelo, a re, “Morena, ha u rata u ka ntlhoekisa,” Jesu O nanabetsa letsoho, A mo ame, A re “Kea rata, hloeka.”

[177] Linakong tse ling ha ho lōkeloa ho folisoa, Jesu O ne A sa thuse motho hang-hang. Tabeng ea molepera enoa, hang ha a kōpa o ile a neoa seo a se kōpang. Ha re rapella mahlohonolo a lefatše, karabo e ka 'na ea lieha, kapa Molimo A ka araba ka ho re fa se seng eseng seo re se kōpang. Empa ha ho joalo ha re ka kōpa ho lopolloa sebeng. Ke thato ea Hae ho re hloekisa, ho re etsa bana ba Hae, le ho re thusa ho phela bophelo bo halalelang. Krete “o itetse ka baka la libe tsa rōna, hore a tle a re lopolle lefatšeng lena le khopo, ho ea ka thato ea Molimo Ntat'a rōna.” Bagalata 1:4. “Ha re kōpa ho hong ho ea ka thato ea hae, oa re utloa. Joale, kaha re tseba hore oa re utloa ha re kōpa, rea tseba hore tseo re li kōpang ho eena e se e ntse e le tsa rōna.” 1 Johanne 5:14,15.

Ho foliseng motho ea omeletseng litho Kaperenauma, Krete O boetse O rutila 'nete e tšoanang. Mohlolo ona o entsoe ho bontša matla a Hae, a ho tšoarella libe. Joaloka molepera ha a ne a lahlehetsoe ke tšepo le ho motho ea omeletseng litho ho ne ho le joalo. Ho kula ha hae ho etsahetse ka lebaka la bophelo ba hae ba sebe,

‘me bohlokō ba hae bo ile ba totisoa ke letsoalo le molato la kamoo a neng a phela kateng. O ile a ipiletsa ho bafarisi le lingaka, empa ba mo fa karabo e nyahamisang ea hore a ke ke a fola ‘me ba mo furalla, ba ‘molella hore o otloa ke Molimo.

Ha a bona ho se na tšepo ea hore a ka thusoa kae kapa kae ea omeletseng litho o ile a tetebela, a lahla tšepo. Eaba o utloela ka Jesu. Metsoalle ea mo khothaletsa ho lumela hore le eena a ka ‘na a folisoa haeba a ka nkuoa a isoa ho Jesu.

### Moroalo Oa Sebe

E ne e se hakaalo ho ntlafala bophelong ba nama hoo a neng a ho hloka, empa o ne a hloka hore moroalo oa sebe o tlosoe. Haeba a ne a ka fumana tiisetso ea hore o tšoaretsoe le hore khotso e teng pakeng tsa hae le leholimo, o ne a ka khotsofalla ho shoa. Monna ea makhatheng a lefu o ne a se na nako ea ho bapala. A kōpa metsoalle ea hae ho mo jara ka mealo ea hae, ho mo isa ho Jesu, ‘me bona ba thabela ho etsa mosebetsi oo. Sechaba se ne se petetsane haholo pel’a Mopholosi hoo ho neng ho le thata ho monna ea kulang hammoho le metsoalle ea hae ho atamela ho Eena.

Jesu O ne A ruta lehaeng la Petrose, barutuo a ba Hae ba ‘Mokanetse. “Bafarisi le baruti ba Molao ba tsoang motseng o mong le o mong oa Galelea, Judea le Jerusalema, ba ne ba lutse moo” e le lihloela. Ka ntle ho phuthehile letšoele la batho, ka thahasello, le tlhompho le kelello e hapehileng, le ho se lumele.” Empa bafarisi le lingaka tsa molao ha ba ka ba hlokomela boteng ba Moea o Halalelang. Ha ba ka ba iphumana ba e-na le bohloki leha e le hona ho hloka pholiso. “A khōrisa ba lapileng ka tse molemo, a khutlisa ba ruileng ba se na letho.” Luka 1:53.

[178]

Banna ba jereng monna ea shoeleng litho ba lekile ho peseletsa ba phunyeletsa, ho ea ho Jesu, empa ba hloloa. Ana monna ea kulang o lokela ho lahla tšepo? Ka tlhahiso ea hae, metsoalle ea hae ea mo jara ho mo hloesetsa holim’a ntlo, ba phunya marulelo, eaba ba mo lepelletsa maotong a Jesu.

Mopholosi A bona sefahleho se kopang mohau. Mahlo a Mo shebile. A utloisisa kōpo ea hae. E ne e ile eare mokuli enoa a sa le lapeng Mopholosi A kenya tšepo pelong ea hae. Eare ha a baka libeng tsa hae, matla a Mopholosi a mohau, a fanang ka bophelo,

a qala ho hlohonolofatsa pelo ea hae e laba-labelang pholiso. Jesu O ile A bona khanya ea pele ea tumelo e hola e ba matla haholo ka katamelo e 'ngoe le e 'ngoe e eang ho Eena.

Joale mantsoe a Mopholosi a oela litsebeng tsa ea kulang joaloka pina ha Mopholosi A re, “Ngoan’a ka, u tšoaretsoe libe tsa hao.” Moroalo oa nyahamo oa thetaha pelong ea mokuli; khotso ea tšoarello ea khanya sefahlehong sa hae. Bohlōkō ba hae ba fela ‘me boena bohle ba fetoha. Ea omeletleng litho ‘me a se na thuso a fola ‘me moetsalibe ea molato a tšoarello!

A amohela mantsoe a Jesu ka tumelo e bonolo. Ha a ka a hlola a kōpa ho hong hape, empa a paqama a khotsofetse. Batho ba ne ba shebile, ba tsohile.

[179] Borabbi ba hopola kamoo monna enoa a neng a ile a ikōpela thuso ho bona, le kamoo ba ileng ba mo nyahamisa ba re a ke ke a fumana tšepo kapa kutloelobhlōkō, hobane o kulisoa ke thohako eo a e fuoeng ke Molimo ka baka la boetsalibe ba hae. Ba sheba thahasello eo batho ba nang le eona ha ba shebile ketsahalo ena, ‘me bona ba ikutloa ba na le tšabo e tšosang ea ho lahlehelo ke tšusumetso ea bona sechabeng. Ha ba talimana lifahlehong ba fumana ba ena le mehopollo e tšoanang -ho hong ho tsoanetse ho etsoa ho thibela maikutlo a batho bana ho se ee le Jesu. Jesu O ne A boletse hore libe tsa ea omeletseng litho li tšoaretsoe. Bafarisi ba ne ba ka hlahisa puo eo ele nyefolo, sebe se lōkeloang ke lefu. “Eo ke mang ea nyefolang? Ke mang ea ka tsebang ho tšoarella libe, haese Molimo a ‘notši na?”

Jesu A ba talima A re “Ke ka baka la’ng le ipotsang tjee? Ho bonolo ke hofe, ho re ho ea shoeleng litho: ‘U tšoaretsoe libe tsa hao,’ kapa ho re: ‘Tsoha U nke liphate tsa hao, u tsamee?’ Joale hore le tle le tsebe hore Mor’a Motho o na le matla a ho tšoarella libe lefatseng,” a re ho ea shoeleng litho, “ke re ho uena: Tsoha, u nke liphate tsa hao, ‘me u ee hae.”

Eaba ea neng a ile a nkoa ka lempara a isoa ho Jesu o phahama ka maoto a hae a tletseng matla joaloka a motho e mocha. Setho se seng le se seng sa ‘mele oa hae sa qala ho sebetsa ka matla a pakang bophelo. Khanya ea bophelo ea nka sebaka sa pulufalo ea lefu. “Hanghang a tsoha, a nka liphate tsa hae, a tsoa, bohle ba mo talimile, hoo ba ileng ba hlolloa haholo, ‘me ba tlotlisa Molimo, ba re: ‘Ha re e-s’o bone ntho e tjena!”

—Matla a tiholeho a khutliselitse bophelo ‘meleng o neng o bola. Lona lentsoe lela le neng le fane ka bophelo mothong mohla a bopjoang ka lerole la lefatše ke lona lena le tlisitseng bophelo mothong ea omeletseng litho. Kreste A laela ea omeletseng litho ho ema a tsamaea “hore le tle le tsebe hore Mor’a Motho o na le matla a ho tšoarella libe lefatseng.”

### Pholiso Ea Moea Hangata E Etella Pele Pholiso Ea ‘Mele

Har’a likete tsa ba kulang ‘meleng kajeno ho na le lenyora la ho utloa mantsoe a reng, “libe tsa hao li tšoaretsoe,” feela joaleka ea neng a omeletse litho. Sebe ke mothèo oa mafu a bona. Mofolisi oa meea ke Eena feela ea ka fanang ka matla a kelello le bophelo ‘meleng.

Le hajoale Jesu O ntse A ena le matla ao A fanang ka bophelo joalokaha A ne A le lefatseng, A folisa ba kulang, ‘me A fana ka tšoarello ho moetsalibe. “Ke eena ea u tšoarelang melato ea hao kaofela...ea folisang mahlōkōng a hao kaofela.” Pesalema 103:3 Sheba 1 Johanne 3:8, Johanne 1:4-10; 10:10; 1 Bakorinthe 15:45.

[180]

Ha monna ea ileng a folisoa a feta har’a batho a jarile moalo oa hae habobebe joaloka masiba, batho ba fana ka sebaka hore a fete. Batho ka lifahleho tse maketseng ba buela fatše har’a bona ba re, “Re bone limakatso kajeno.”

Bafarisi ba sitoa ho buoa ke ho makala ‘me ba apareloa ke ho hloleha. Ka ho soaba le ho teneha ba hlokomela leha ba sa ka ba amohela taba eo pontšeng hore Ea ba phahametseng O har’a bona. Ha ba tloha lapeng la Simone, moo ba ileng ba bona ha ho folisoa ea omeletseng litho, ba tsamaile ba aparetsoe ke hose lumele ‘me ba rerile ho etsa mano a macha a ho tholisa Mora oa Molimo.

Lelapeng la ea folisitsoeng thabo e ne e le kholo. Ba lelapa ba ‘mokanetse ka meokho ea thabo, hoo ba neng ba sitoa ho kholoa seo mahlo a bona a se bonang. Nama tse neng le ile tsa kokobana tsa nchafala, tsa sola. O ne a bontša bophelo, mehato ea hae e lōkōlōhile. Thabo le tšepo li ne li ngoliloe sefahlehong sa hae. Bohloeki le khotso tsa nka sebaka sa metoa ea sebe le bohloeki. Monna enoa hammoho le lelapa la hae ba ne ba itōkiselitse ho nehela maphelo a bona ho Jesu. Ho ne ho se tika-tiko e fifatsang tumelo ea bona ho Ea neng A tlisitse leseli ka har’a lelapa la bona le neng le le lefifing.

[181]

## **KHAOLO EA 28—MATHEU: EA NENG A BOKELLA LEKHETHO JOALE KE MOAPOSTOLA**

*[E ilšetlehile ka Matheu 9:9-17; Mareka 2:14-22; Luka 5:27-39.]*

Baroma ba neng ba le pusong naheng ea Palestina ba ne ba hlouoe. Lebaka la hore lekhetho le ne le bokelleloa melata e ne e le ntho e hlolang e halefisitse sechaba. E ne e le khopotso ea hore boipuso ba Bajuda bo felile. ‘Me balekhetho bana e ne e se feela lisebelisuo a tsa Baroma ho thusa ka khatello, e ne e hlile e le baqhekelli ka bobona ba ithuisa ka lichelete tsa batho. Mojuda ea neng a nka mosebetsi ona oa lekhetho o ne a nyefoloa a bile a balelloa sehlopheng sa ba nyatsuoang, ba babe-babe sechabeng.

Levi-Matheu e ne e le e mong oa bona ‘me o ne a tla bitsetsoa mosebetsi oa Krete. Matheu o ne a ile a mamela ha Mopholosi A ruta, ‘me eare ha moea oa Molimo O senola libe tsa hae a labalabela ho batla thuso ho Krete; empa joalokaha a ne a tseba khethollo ea borabbi ha a ka a nahana hore Moruti enoa e Moholo O tla mo amohela.

Ka tsatsi le leng Matheu o ne a lutse sebakeng seo a khafisetsang ho sona, a bona Jesu A atamela. O ile a makala haholo ha a utloa mantsoe A reng ho eena, “Ntatele”.

Matheu “a tlohela tsohle, a ema, a mo latela.” A se ke a likalika, a se ke a ipotsa lipotso, a se ke a nahana ka ho lahlehelo ke khoebo e neng e mo kenyetsa chelete e ngata, eo joale e tla mo lahlehela e be e-ba mofutsana, a thulane le mathata. Ho ne ho lekane ho eena ho ba le Jesu, ho mamela mantsoe a Hae, le ho ikopanya le Eena mosebetsing oa Hae.

[182]

Ha na ha e-ba joalo ha Jesu A ne A bitsa Simone le metsoalle ea hae ho Mo latela. Hang-hang ba ile ba siea liketsoana tsa bona Je matlooa. Ba bang ba ne ba ena le metsoalle ea bona eo eleng baphelisuo a ba bona empa ha ba amohela pitso ea Mopholosi, ha ba ka ba botsa hore, “ke tla phela joang, ‘me ke boloke lelapa laka?’”

Hamorao ha Jesu A ba botsa potso A re, “Ha ke ne ke le romile le se na sepache, mokotla, le meqathatso, na le ile la haelloa ke letho?” Ba re, “Le letho.” Luka 22:35.

Matheu leruong la hae, Andrease le Petrose bofutsaneng ba bona, ba ile ba neoa teko e tšoanang. Nakong ea katleho, ha matlooa a tletse lihlapa, ‘me litakatso tsa bophelo ba khale li le matla, Jesu A kōpa barutuo, leoatleng, ho siea tsohle ba eo ruta evangeli. Ka tsela e joalo motho ka mong o neoa teko ho bona hore na ho molemolemo ho bona keng ha e le lintho tsa mehla ea joale kapa ho ba le Krete.

Ha ho motho ea ka atlehang mosebetsing oa Molimo ntle le hore pelo ea hae eohle e be mosebetsing oo. Ha ho motho ea ntseng a itšoareletse ho hong ka thoko eo e ka bang morutuo oa Krete, ‘me ea joalo a ke ke be a sebetsa le Krete. Ha banna le basali ba lemoha topollo ena e kholo hakaana, sehlabelo sa boitelo se bonoang bophelong ba Krete se tla bonoa maphelong a bona. Hohle moo A ba isang ba tla latela.

Pitso ea Matheu ea tsosa khalefo e kholo. Hore Krete A khethe moleketho e le e mong oa balateli ba Hae e ne e le thohako bolumeling, sechabeng le meetlong ea naha. Ka ho Mo hanyetsa hona Bafarisi ba ne ba tšepile hore ba tla retelletsa maikutlo a sechaba hore a furalle Jesu. Empa har’ a baleketho thahasello e kholo ea phatlalla ‘me ea hola. Ka thabo e kholo ea ho amoheloa e le morutuo e mocha, Matheu a etsa mokete lapeng la hae, ‘me a bitsa metsoalle le ba habo ‘moho le metsoalle ea hae. E ne e se baleketho feela ba menngoeng; le ba bang ba neng ba nenoa ke sechaba se itlhomphang.

### **Boitlhabiso Ba Kantle Ha Bo Bolele Letho**

Mokete o neng o entsoe e ne e le ho tlotla Jesu, ‘me A amohela memo ho se tieho ea letho. O ne a tseba hantle hore kamohelo ena e tla hlaba bafarisi ‘me a hlahe mahlong a batho e le ea amohelang tse sa nepahalang. Empa O ne A ke ke A laoloa ke tsamaiso tsa batho.

Jesu A lula e le ea fuoeng tlotla tafoleng ea moleketho. Ka kutloelo-bohlōkō le molemo sechabeng, A bontša hore motho o na le seriti; ‘me batho ba ne ba thabela ho amoheloa ke Eena. Tjantjello e ncha ea tsosoa, ‘me monyetla oa bophelo bo bocha oa bulehela bao e neng e le balahluoa sechabeng.

Bongata ba ba sa kang ba Mo amohela e le Mopholosi pele ho tsoho ea Hae ba ile ba ameha tsatsing lena. Har'a ba likete tse tharo ba neng ba sokolohe ka letsatsi, ho ne ho e-na le ba bangata ba neng ba qale ho utloa 'nete ha ba ne ba lutse tafoleng tsa balekhetho. Ho Matheu mohlala oa Krete moketeng e bile thuto e sa hlakoheng. Molekhetho ea neng a nyefoloa ea e-ba e mong oa ba ikakhetseng ka setotsoana evangeling, 'me a tsamaeang moo Mong'a Hae a hatileng teng.

### **Teko Ea Ho Arola Barutuo**

Borabbi ba fumana monyetla oa ho qosa Jesu, 'me ba khetha ho sebelisa barutuo. Ba leka ho ba arohanya le mong'a bona ka ho leka ho ba kenya pelaello ho Eena. "Ke ka baka la'ng moruti oa lona a jang le balekhetho le baetsalibe?" ba botsa barutuo.

Jesu ha A ka emela barutuo ho araba empa Eena A araba: "Ba hlokang ngaka ke ba kulang, e seng ba phelang hantle....Ke tlile ho bitsa baetsalibe, e seng ba lokileng." Bafarisi ba ne ba inka ba phethahetse moeeng, kahoo ba sa hloke ngaka. Ba ne ba nkile balekhetho le Balichaba e le ba bolaoang ke mafu a moea. A e ne e se mosebetsi oa Hae, joaloka ngaka, ho ea sehlopheng se hlileng se hlokang thuso ea Hae?

Jesu A re ho borabbi, "E-eang, le ithute hore na ke ho re'ng ha ho thoe: 'Ke thabela, mohau, e seng sehlabelo.'" Ba ne ba ipolela hore ba ka hlalosisa Lentsoe la Molimo, empa ba ne ba sa tsebe moea oa lona ho hang.

[184] Bafarisi ba khutsa nakoana empa, lehloeong la bona, ba ikemiselitse ho leka leqheka le leng la ho etsa hore barutuo ba Johanne Mokolobetsi ba loantše Jesu. Bafarisi bana ba ne ba ile ba supa ka ho phoqa moaparo le mekhoha ea Mokolobetsi ea bophelo, ba re o apara liaparo tse mahoashe 'me ba 'mitsa hore ke lehlanya. Ba leka ho fuluo batho hore ba be khahlanong le eena. Moea oa Molimo O ne O ile Oa ama lipelo tsa basomi bana, Oa ba kholisa ka sebe, empa ba ne ba ile ba bolela hore Johanne Mokolobetsi o tšoeroe ke modemona.

Eare ha Jesu A e-tla ka tsele ea ho kopana le batho, A e-ja, A e-noa le bona meketeng ea bona, ba Mo qosa ka hore O meharo 'me O noa veine ho tlola tekanyo. Ba ne ba sa utloise hore Jesu



O noa le ho ja le baetsalibe e le hore A tle A tlise leseli la leholimo ho ba lutseng lefifing. Ha ba ka ba hlokomela hore lentsoe le leng le le leng le buuoang ke Moruti ea halalelang ke peo e phelang e tla mela, ‘me e behe litholoana tlotlisong ea Molimo. Ba ne ba ikemiselitse ho se amohele leseli, ‘me lehoja ba ne ba ile ba loantša boqosa ba Johanne Mokolobetsi, joale ba itokisetsa metsoalle ea barutuo ba hae, ka tšepo ea ho ba etsa lira tsa Jesu. Bafarisi ba re Jesu O nyefola meetlo ea khale, ‘me ba bontša phapang pakeng tsa boitimo bo matla ba borapeli ba Johanne Mokolobetsi le ho ja ha Jesu, A e-ja le balekhethe le baetsalibe.

Barutuo ba Johanne nakong ena ba ne ba le masoabing a maholo. Moruti oa bona ea ratuoang o ne a le teronkong, ba qetile matsatsi ba llela mong’a bona. Hape Jesu ha A ka A leka ho lōkōlla Johanne; ebile O ne A bonahala A nyatsa lithuto tsa Johanne. Haeba Johanne a ne a rōmiloe ke Molimo, ke hobaneng ha Jesu le barutuo ba Hae ba nkile tsela esele e sa tšoaneng le ea Johanne?

Barutuo ba Johanne ba ne ba nahana hore mohlomong liqoso tsa ka ‘na haeba le Bafarisi li na le mothèo. Barutuo ba ne ba hlokomela melao e mengata e entsoeng ke borabbi. Boitimo e ne e le ntho e etsoang ke Bajuda e le ketso ea ho eketsa ho loka; ba neng ba tihile haholo tumelong ba ne ba itima matsatsi a mabeli beke le beke. Bafarisi le barutuo ba Johanne ba ne ba itimme ha barutuo ba tla tla ho Jesu ho tla botsa hore “Ke ka baka la’ng rōna le Bafarisi re itimang lijo hangata, empa barutuo ba hao ba sa itime?”

Jesu A araba ka bonolo. Ha A ka A leka ho tšoaea phoso kutloisiso ea bona ea boitimo, e sa nepahalang A mpa A ba otlollela tsa borōmuoa ba Hae. Johanne Mokolobetsi o ne a ile a re, “Ea nang le monyaluo ke monyali, empa motsoalle oa monyali, ea emeng pel’a hae, ‘me a mo utloa, o ee a thabe haholo ka baka la lentsoe la monyali. Ha ho le joalo, thabo ena ea ka e phethahetse.” Johanne 3:29. Barutuo ba johanne ba ne ba ke ke ba lebala ho hopola mantsoe a moruti oa bona. Ha Jesu A sebelisa eona papiso eo A re, “Na le ka re baetsana ba itime lijo ha monyali a ntse a e-na le bona?”

Khosana ea leholimo e ne e le teng har’a sechaba sa Eona. Mpho e kholo-kholo ea Molimo e ne e fuoe lefatše. Thabo ho bafumanehi, hobane O tlile ho ba etsa majalefa a ‘muso oa Hae. Thabo ho barui, hobane O ne A tla ba ruta ho hlokomela maruo a bo sa feleng. Thabo ho ba se nang tsebo hobane O ne A tla ba hlalefetsa pholohong.

Thabo ho barutehi hobane O ne A tla ba senolela makunutu ka botebo bo fetang kamoo ba kileng ba a utloisisa. Ena e ne e se nako ea barutuo ea ho lla le ho itima lijo. Ba ne ba tšoanetse ho bula lipelo tsa bona ho amohela leseli la khanya ea Hae, hore ba tle ba arolelane leseli le ba lutseng lefifing le moriting oa lefu.

### **Lefifi Le Letšo-Letšo**

E ne e le setšoantšo se hlakileng, empa ka nqa'ne ho sona ho e na le moriti o tšabehang oo e leng mahlo a Kreste feela a o lemohang. “Ho tla tla matsatsi ao ka ‘ona monyali a tla tlosoa ho bona, e be hona ba itimang lijo.” E ne etlare ha ba bona Morena oa bona a ekoa, A bile A thakhisoa barutuo ba ne ba tla lla ba be ba itime lijo.

E ne etlare ha A tsoha lebitleng ebe, masoabi a bona a fetoha thabo. Kamora' nyolohelo ea Hae, ka Moemeli O ne A tla ‘ne A be le bona ‘me ba ne ba ke ke ba qeta nako ea bona ba ntse ba lla. Satane o ne a ratile hore barutoa ba be le maikutlo a hore ba ne ba thetsitsoe ‘me ba soetsitsoe. Empa ka tumelo ba ne ba tšoanetse ho talima holimo sehalalelong moo Jesu A ntseng A ba rapella teng, ba ne ba tšoanetse ho bulela lipelo tsa bona Moea o Halalelang ‘me ba thabe leseling la boteng ba Hae. Leha ho le joalo matsatsi a teko a ne a tla tla. Ha Kreste A ne A se A sa tl’o ba le bona ‘me e-ba ha ba lemohe boteng ba Moemeli, ke teng ba tla nepa ha ba itima lijo.

[186] Mangolo a hlalosa boitimo boo Molimo A bo khethileng “ke hore u lōkollle mahlaahlela a bokhopo, u imolle ba imetsoeng ke mejaro ea bona, ba hateletsoeng u ba lōkōlle, mesebetsi eohle ea botlatlapi u e felise;” “[ho] ikitlaeletsisa ho fepa ba lapileng, [ho] thoba meea ea ba tšoenyehileng.” Esaea 58:6,10. Mona ho bontšoa semelo sa mosebetsi oa Kreste. Hore na O itima lijo A le felleng kapa O ja le baleketho, O ne A fana ka bophelo ba Hae ho pholosa ea lahlehileng. Borapeli ba ‘nete ba moea bo bonahala ha motho a inehela ka boikemisetso ho sebeletsa Molimo le motho.

Ho ntšetsa pele karabo ea Hae ho barutuo ba Johanne Jesu A etsa setšoantšo sena “Ha ho motho ea rōkellang setsiba sa lesela le lecha seaparong sa khale, hobane setsiba se ka nathola seaparo,’me sa eketsa ho taboha.” Matheu 9:15. Ho leka ho nka mekhoha ea bophelo le lintho tse tšajoang ke Bafarisi ebe o li tsoaka le boinehelo ba Johanne ho ne ho tla eketsa sekheo nthong tseo tse peli.

—Hape melao ea lithuto tsa Krete li ne li ke ke tsa ea kopanngoa le mekhoha ea Bofarisi. Krete O ne A tsoanetse ho bontša phapang pakeng tsa ho hocha le ha khale. “Hape ha ho motho ea ka tšelang veine e ncha makukeng a khale, esere mohlomong makuka a phatlaha, veine ea qhaleha, le ‘ona makuka a senyeha, empa o ee a tsele veine e ncha makukeng a macha, me bobeli ba tsona li bōlōkehe.” Matheu 9:17. Libotlolo tsa letlalo tse bitsoang makuka li ne li sebelisoa e le tsona lijana tse tšelang veine ‘me kamora’ nako e itseng li ne li omella, ‘me li phahlaha habobebe, kahoo li fetohentho e se nang thuso. Baetapele ba Bajuda ba ne ba tsepame tseleng ea litšebeletso le meetlo. Lipelo tsa bona li ne li tšoana le makuka a omeletseng. Ba ne ba khotsofetse ke bolumeli ba molao hoo ho neng ho le thata ho bona ho ba bajari ba ‘nete e phelang. Ba ne ba sa rate ha ho tlisoa ho hocha bolumeling ba bona. Tumelo e sebetsang ka lerato, e hloekisang motho, e ne e ke ke ea fumana sebaka sa hore e ikopanye le bolumeli ba Bafarisi bo thehiloeng ka litšebeletso le ka litaelo tsa batho. Ho kopanya lithuto tsa Jesu le tsa tumelo e lateloang ke bona e ne e tla ba lefeela. ‘Nete e hlokolosi ea Molimo, joaloka veine, e ne e tla phatlola makuka a khale a tšetseng meetlo ea Bofarisi e neeletsanoang.

### Makuka A Macha A Veine E Ncha

[187]

Mopholosi A furalla Bafarisi, A retelehela ho ba bang ba ka amohelang molaetsa oa leholimo. Moo A fumaneng makuka a macha bakeng sa veine e ncha ke ho batšoasi ba lihlapi ba sa rutehang, balekhethoa mapatlelong, mosaling oa Mosamaria, bathong feela ba Mo utloileng, ba Mo thabetseng. Batho ba amohetseng leseli le rōmetseng ke Molimo ka thabo, ke maqosa a Hae a isang ‘nete lefatšeng.

Lithuto tsa Krete, tse bapisitsoeng ka veine, e ne e se lithuto tse ncha, empa e ne e le tse ileng tsa rutoa ho tloha tšimolohong. Empa ho Bafarisi, lithuto tsa Krete li ne li le ncha ka hohle, ‘me li ne li sa eloe hloko leha ele ho amoheloa ke bona.

“Ha ho eo ekareng ha a noele veine ea khale, ebe o lakatsa e ncha, hobane o re: ‘Ea khale e monate ho feta.’” ‘Nete e fanoeng ke bapateriareka le baporofeta e ile ea khanya ka botle ba mantsoe a Krete. Empa bangoli le Bafarisi ba ile ba hloka takatso ea veine ea

bohlokoa e ncha. Ntle le hore ba hlohlolle meetlo ea khale le liketso tsa eona, ba ne ba tla hloka sebaka sa lithuto tsa Jesu lipelong le likelellong tsa bona.

### **Kotsi Ea Maikutlo A Ratoang**

Hona ha ipakahatsa e le tšenyeho ea Bajuda, ‘me ho tla tlisa tšenyeho ho ba bangata nakong ea rona. Ho e-na le hore ba nyahlatse tse ling tsa lintho tseo ba li latelang kapa melingoana ea litumelo tsa bona, bongata bo hana ‘nete e tsoang ho Ntate oa Khanya. Ba khetha ho pholoso ka tsela e ‘ngoe ea mesebetsi ea bona ea bohlokoa. Ha ba bona hore ha ho na tsela eo ka eona ba ka lohellang mesebetsi ea bona pholohong ba a e hana.

[188] Bolumeli ba molao bo hloka lerato, ke bolumeli bo se nang Krete kahare. Boitimo kapa thapelo ha li susumetsoa ke moea oa ho ipeea ea lōkileng ke thohako pel’a sefahleho sa Molimo. Mesebetsi ea rōna ha e na ho re fumanela topollo le ka mohla o le mong. Ho ba sa tsebeng bofeela ba meea ea bona ho tla molaetsa o reng, “U re: ‘Ke morui, ke ruile, ha ke hloke letho,’ empa ha u tsebe hore u sōtō, u malimabe, u futsanehile, u foufetse, ‘me u feela. Joale ke u eletsa hore u ithekele ho ‘na khauta e hloekisitsoeng mollong, e le hore u tle u rue. U ithekele le liaparo tse tšoeu, e le hore u ikapese, bofeela ba hao bo lihlong bo tle bo se ke ba bonahala.” Tšenolo 3:17,18. Tumelo le lerato ke tsona khauta. Empa ho ba bangata khauta e bonahala e le lerootho, letlotlo le leruo le bonahala le lahlehile. Ho lōka ha Krete ke seaparo se sa aparoang, mohloli o sa nooang.

“Sehlabelo se ratoang ke Molimo: ke moea o soabileng; ke pelo e soabileng, e hlomohileng; oho, Molimo, u ke ke ua e khesa.” Pesalema 51:19. Ha bo-nna bo lahluoa Morena a ka u etsa sebupuo se secha. Makuka a macha a ka tšela veine e ncha. Lerato la Krete le ka nchafatsa molumeli ka bophelo bo bocha. Ho eena semelo sa Krete se tla bonahala.

## KHAOLO EA 29—JESU O PHOLOSA SABATHA [189]

Sabatha se hlohonolofalitsoe tšimolohong. Joalokaha se ile sa khetheloa motho, se ile sa e-ba le qaleho “mohla boMphatlalatsane ba binang ba le ‘moho, mangeloi ‘ohle a hōoa ka thabo.” Jobo 38:7. Lefatše le ne le hatela-’moho le leholimo. “Joale Molimo a talima tsohle tseo a li entseng, ‘me a bona hore li ntle haholo;’ ‘me A phomola ka thabo ea hoba A qetile mosebetsi oa Hae. Tsimoloho 1:31.

Ka hobane Molimo O ile A phomola ka Sabatha, “Molimo a hlohonolofatsa letsatsi leo la bosupa, a le halaletsa” (Tsimoloho 2:3) — A le khethela tšebeletso e halalelang. E ne e le sehopotso sa mosebetsi oa ho hlola lefatše, ‘me ka tsela eo e le sesupo sa matla le lerato la Molimo.

Lintho tsohle li hloliloe ke Mora oa Molimo. “Lintho tsohle li bile teng ka Iona, ‘me ha ho letho le bileng teng haese ka Iona.” Johanne 1:3. Joalokaha Sabatha e le sehopotso sa mosebetsi oa tlholeho, ke pontšo ea lerato le matla a Krete.

Sabatha se re hulela ho tla buoa le ‘Mopi. Linonyana ha li bina, ha lifate li sisinyeha ke moea, le leoatle le bina, le teng re ka utloa lentsoe la Hae, Eena ea buileng le Adama Edene. Ha re boha matla a Hae tlholehong, re fumana boiketlo, hobane Lentsoe le hlolileng lintho tsohle ke lona le buoang bophelo ho motho. Eena ea itseng “‘Leseli le khanye lefifing,’ ke Eena ea khantšeliseng lipelo tsa rōna, hore li be le leseli la tsebo ea tlōtla ea Molimo, e khanyang sefahlehong sa Krete.” 2 Bakorinthe 4:6.

”Sokolohelang ho ‘na, le tle le pholohe, lōna lipheletso tsohle tsa lefatše; ke ‘na Molimo, ha hona e mong.” Esaea 45:22. Ona ke molaetsa o ngotsoeng tlhahong, oo Sabatha se etselitsoeng ho re hopotsa ona. Ha morena A ne A joetsa Iseraele ho halaletsa Sabatha ea Hae, O ile A re, “Halaletsang Lisabatha tsa ka, hore e tle e be sesupo pakeng tsa ka le lona. Ka hona le tla tseba hore ke ‘na Morena Molimo oa lona.” Esekiele 20:20. [190]

Batho ba Iseraele ba ne ba e-na le tsebo ka Sabatha pele ba fihla Sinai. Tseleng, Sabatha se ne se bolokoa. Eare ha ba bang ba se hlompholla, Morena O ne A ba khalemela, “ke ho fihlela neng le tla hana ho boloka litaelo tsa ka, le melao ea ka?” Phallo 16:28.

Sabatha e ne e se sa Iseraele feela, empa e ne e le sa lefatše. Joaloka melao e leshome, ke taelo e ke keng ea fela. Ha A bua ka molao oo Krete O re “Ho fihlela leholimo le lefatše li fela, ha ho ka ke ha fetoha tlhakunyana e le ‘ngoe le ha e le letšoanyana le le leng Molaong.” Matheu 5:18. Ha feela leholimo le lefatše li ntse li le teng, Sabatha e tla tsoela pele e le letšoao la matla a ‘Mopi. Mohla Edene e hlahang hape lefatseng, letsatsi la phomolo le halalelang le tla hlomphuoa ke bohle tlas’a letsatsi. “Batho bohle ba tla nkhumamela, ba nkhumamele ha khoeli ka ‘ngoe e thoasa, ba nkhumamele ka Sabatha se seng le se seng.” Esaea 66:23.

### **Lipontšo Tsa Tsokoloho Ea ‘Nete**

Empa hore batho ba tle ba boloke Sabatha se halalela le bona ba tsoanetse ho halalela. Ka tumelo ba tsoanetse ba be le seabo ho lokeng ha Krete. Ha molao o ne o fuoa Iseraele o reng, “Hlokomela letsatsi la Sabatha, u le halaletse” (Phallo 20:8), Morena O ne A re ho bona “Le tla ba batho ba halalelang ho ‘na.” Phallo 22:31.

Eare ha Bajuda ba koenehela Molimo ‘me ba hloloa ho nka ho lōka ha Krete e le ha bona ka tumelo, Sabatha sa lahlehelo ke moelelo ho bona. Satane a sebetsa ho senya Sabatha, hobane ke letšoao la matla a Krete. Baetapele ba Bajuda ba ne ba bokelletse letsatsi la phomolo la Molimo ka melaoana e boima. Mehlang ea Krete ho boloka Sabatha e ne e le pontšo ea semelo sa batho ba tletseng bo-’na ho fapana le semelo sa Ntate ea leholimong, ea lerato. Borabbi ba ne ba bontšitse Molimo e le ea fanang ka melao eo batho ba sitoang ho e boloka. Ba Mo hlahisa ho batho e le Molimo oa motlatlapi ‘me ba nahane hore Sabatha e etsa batho ba thatafetseng lipelo, ba khopo. Ea e-ba mosebetsi oa Krete ho tla hloekisa mehopollo ea batho tabeng ena. Jesu ha A k’a lumela ho tsamaea ka melaoana ea bo-rabbi, empa A tsoela pele ho boloka Sabatha ho ea ka molao oa Molimo.

## Thuto Ea Sabatha

Ka letsatsi le leng la Sabatha, ha Mopholosi le barutuo a ba Hae ba feta har'a tšimo ea koro e seng e butsoitsoe, Barutuo a ba qala ho kha liqoapi tsa koro hore ba je kamorao hore ba li phothule ka matsohong a bona. Ha e ne e le ka letsatsi le leng feela hona ho ne ho ke ke ha kukunela mang kapa mang, hobane ha motho a ne a feta har'a tšimo ea litholoana, kapa ea morara, eo o ne a le bōlōllōkōlōhing ba ho kha, kapa ho thonaka kamoo a ratang, a je. Sheba Lipolelo 23:24,25. Empa ka letsatsi lena la Sabatha ho etsa hoo, e ne e le tlolo ea molao. Ho kha koro e ne e ka ho kotula, ho phothula koro ka har'a matsoho ho ne ho tšoana le ho pola.

Hang-hang Bafarisi ba lihloela ba belaela ho Jesu, “Bona, ke ka baka la'ng ha ba etsa se sa lumelloang ka letsatsi la Sabatha?” Mareka 2:24.

Mohla A neng A qosoa ka ho roba Sabatha Bethesaeda, Jesu A na A itšireletsa ka ho tiisa hore Eena ke Mora oa Molimo, ‘me A bolela hore Eena O sebetsa hammoho le Ntat’ae. Joale ha barutuo a ba Hae ba hlaseloa, Jesu A qotsa Testamenteng ea Khale mehlala ea liketso tse entsoeng ka Sabatha ka batho ba neng ba etsa tšebeletso ea Molimo.

Karabong ea Mopholosi ho ba neng ba Mo qosa ho ne ho e na le khalemelo le ho bontša ho se tsebe Mangolo ha bona: “Na ha le a ka la bala seo Davida a neng a se etse, ha a ne a lapile ‘moho le bao a neng a e-na le bona; kamoo a neng a kene ka Tlung ea Molimo kateng, ‘me ba ja bohobe bo halalelang, e leng boo eena le bao a neng a e-na le bona ba neng ba sa lumelloa ho bo ja, bo jeoa ke baprista feela? Kapa na ha le a ka la bala Molaong hore baprista ba tlōla molao oa Sabatha Tempeleng ka Lisabatha, empa ha ba na molato? Kea le bolella, mona ho teng ho fetang Tempele ka boholo.” [192] “Mor’a Motho ke morena oa Sabatha.” Matheu 12:5,6,8; Mareka 2:27,28; Luka 6:3,4.

Haeba ho ne ho nepahetse hore Davida a ikhorise ka ho ja bohobe bo neng bo khethetsoe tšebeletso e halalelang, ho ne ho lōkile hore barutuo a ba khe liqoapi tsa koro ka Sabatha. Hape, baprista ba ne ba etsa mosebetsi o mongata ka tempeleng ka letsatsi la Sabatha ho feta ka matsatsi a mang. Mosebetsi o joalo ha o ne o ka etsoa ka matsatsi a mang e le khoebong, e ne e tla ba sebe, empa ba ne ba

etsa liketso tse emetseng pholoso ea Krete, ‘me mosebetsi oa bona o ne o lumellana le letsatsi la Sabatha.

Sepheo sa mosebetsi oa Molimo lefatšeng lena ke ho pholosa motho. Ka baka lena hohle ho hlokehang hore ho ka etsoa ka Sabatha ho phethahatsa topollo ho lumellana le molao oa Sabatha. Joale Jesu A tšehetsa ketso ea Hae ka ho itlhalosa e le Eena “Morena oa Sabatha” -Eena ea okametseng lipotso tsohle le molao ohle. Moahloli Rabosafeleng A ntša barutuo molatong, A ba sireletsa ka molao ona oo ba neng ba qosoa ka hore ba o robile.

Jesu A bolella lira tsa Hae hore bofofung ba tsona li lahlile sepheo sa Sabatha. O re: “Hoja le ne le tsebile hore na ke ho re’ng ha ho thoe: ‘ke thabela mohau, e seng sehlabelo,’ le ka be le sa ka la ahlōla ba se nang molato.” Matheu 12:7. Litšebeletso tsa bona tse hloakang mohau li ne li ke ke tsa nka sebaka sa bonnete le lerato le genehelang le bontšang bosebeletsi ba sebele ba Molimo.

### **Ka Boomo Jesu O Folisa Ka Sabatha**

Mahlabelo ka bo oona a ne a se na thuso. E ne e le mokhoa eseng ntho ka boeona. Moelelo oa oona e ne e le ho supisa batho ho Mopholosi, ho ba tlisa tumellanong le Molimo. Ke tšebeletso ea lerato eo Molimo O e ratang. Ha lerato le le sieo tšebeletso feela tjena ke khopiso ho Eena. Ho joalo le ka Sabatha. Ha kelello e hapuo ke litšebeletso tse boima sepheo sa Sabatha sea lahleha. Litšebeletso tsa bolumeli tse bontšang bokantle feela e-ba sesomo.

[193] Ka Sabatha e ‘ngoe, ka Ntlong ea thapelo Jesu A bona monna e mong ea omeletseng letsoho. Bafarisi ba talima ka thahasello ho bona hore na Jesu O tla etsang. Mopholosi ha A k’a qea-qea ho heletsa lerako la litšebeletso tsa moetlo tse sitisang sepheo sa Sabatha.

Jesu A bolella monna ea holofetseng ho ema ‘me A botsa A re: “Na ho a lumelleha ho etsa botle kapa bobele ka Sabatha; ho pholosa motho kapa ho ‘molaea?’” Mareka 3:4. E ne e le molao ho Bajuda hore ho hloloa ho etsa hantle feela monyetla o le teng ke bokhopo; ho tlohela ho pholosa bophelo e ne e le ho bolaea. Jesu A kopana le bo-rabbi sebakeng sa bona. “Empa ba khutsa. A ba ea ka mahlo a halefile, a utloisitsoe bohloko ke bothata ba lipelo tsa bona, a re ho motho eo: ‘Otlolla letsoho!’ A le otlolla, me letsoho la hae la fola.”



Ha Bafarisi ba ‘motsa ba re: “Na ho a lumelleha ho folisa batho ka Sabatha?” A re ho bona: “Ekaba ke mang ho lōna, ea nang le nku e le ‘ngoe, eo ekareng ha e oetse ka lenkoaneng ka Sabatha a ke keng a e tšoara, a e nyolla? Ha ho le joalo, motho o feta nku hakaakang ka bohlokoa! Ka baka leo, ho a lumelleha ho etsa ho molemo ka Sabatha.” Matheu 12:10-12.

### **Tlhokomelo E Kholo E Bontšoa Ho Liphoofo**

Lihloela tsa Bafarisi ha lia ka tsa leka ho araba Krete. Ba ile ba tseba hore o bua ‘nete. Ho e-na le hore ba ka roba moetlo, ba ka mpa ba tlohela motho hore a utloe bohlōkō ba mpa ba thusa phoofo hobane mong’a eona a ka lahlehela ke eona ha e sa tsotelloe. Tlhokomelo e kholo e ne e etsetsoa liphoofo tse litholo ho feta batho. Hona ho bontša tsela ea tšebetso ea bolumeli bohle ba bohata. Bolumeli bona motheo oa bona o tsoa litakatsong tsa motho tsa ho iphahamisa ho feta Molimo, empa ho etsahalang ke hore motho o theohela tlase ho feta phoofo. Bolumeli bo bong le bong ba bohata bo ruta balateli ba bona ho se tsotelle litlhoko tsa motho, matšoenyeho, le litōkelo. Evangeli e beha motho e le ntho ea bohlokoa ka ha a rekiloe ka mali a Krete, ‘me e ruta ho sheba ka qenehelo litlhoko le bomalimabe ba motho. Sheba Esaea 13:12.

Bafarisi ba ne ba tsoma bophelo ba Jesu ka lipelo tsa tletseng lehloeo, ha Eena A ntse A pholosa maphelo ‘me A tlisa thabo ho matšoele a batho. Ana ho ne ho hlokahala ho bolaea ka Sabatha joalokaha ba ne ba rerile ho etsa, ho e-na le ho phekola ba kulang joalokaha A ne A etsa?

[194]

Ka ho folisa letsoho le holofetseng, O ne A nyatsa moetlo oa Bajuda, ‘me A siea molao oa bone O ntse O le joalokaha Molimo A ne A fana ka oona. “Ho a lumelleha ho etsa ho molemo ka Sabatha,” Jesu A rialo. Ka ho leleka lithibelo tse se nang thuso, Jesu Eena O ile A hlonepha Sabatha, athe ba belaelang ka Eena ba ne ba hlompholotse letsatsi la Molimo le halalelang.

Ba ntseng ba re Krete O felisitse molao ba ruta hore Jesu O robile Sabatha ‘me O emetse barutuo ba Hae ha ba ne ba robile molao. Kahoo ba etsa ntho e tšoanang le e entsoeng ke Bajuda ba se nang mabaka. Ka mantsoe a mang ba hanyetsa Krete ea itseng “ke bolokile litaello tsa Ntate, ‘me ke lula leratong la hae.” Johanne

15:10. Mopholosi le balateli ba hae ha b'a roba Sabatha. Ha A sheba sechaba sa lipaki se neng se batla lebaka la ho Mo tsoa, O ne A ka bua A sa qholotsoe A re, "Ke mang ho lōna ea ka mpeang molato oa sebe?" Johanne 8:46.

"Sabatha se etselitsoe motho, eseng motho bakeng sa Sabatha." Melao e leshome, eo Sabatha eleng karolo, ea eona Molimo O e file batho ba Hae e le hlohonolofatso. Sheba Lipolelo 6:24. Ho bohle ba bolokang "Sabatha ba se boloka ba sa se silafatse," Morena O re "bona ke tla ba tlisa thabeng eaka e halalelang, ke ba thabise ka tlung ea ka ea thapelo." Esaea 56:6,7.

"Mor'a Motho ke morena le oa Sabatha." Hobane "Lintho tsohle li bile teng ka lona, 'me ha ho letho le bileng teng haese ka lona." Johanne 1:3. Erekaha Krete A entse lintho tsohle, O entse le Sabatha. Ke Eena ea e beetseng kathoko ho ba khopotso ea tlholeho. Sabatha e supa ho Eena e le 'Mopi le Mohalaletsi. Sabatha e bolela Jesu ea hlolileng lintho tsohle e le Hlooho ea kereke, 'me ka matla a Hae re boelana le Molimo. O re, "ka ba nea le Lisabatha tsa ka hore e be sesupo pakeng tsa ka le bona, ba tle ba tsebe hore ke 'na Morena ea ba halaletsang." Esekiele 20:12. Sabatha ke pontšo ea matla a Krete ho re halaletsa. E fanoe ho bohle bao Krete A ba halaletsang, e le pontšo ea matla a khalaletso.

[195] Ho bohle ba e amohelang e le pontšo ea tlholeho le matla a pholosang a Krete Sabatha e tla ba thabo. Sheba Esaea 58:13,14. Ha ba bona Krete ka har'a Sabatha ba thaba ho ba le Eena. Ha e ntse e re hopotsa ka thabo ea Edene e lahlehileng, e boetse e re bolella ka khotso e khutlisitsoeng ke Mopholosi. 'Me ntho e 'ngoe le e 'ngoe ea tlholeho e boela e pheta memo ea hae e reng, "Tloong ho 'na, lona bohle ba khathetseng, ba imetsoeng, 'me ke tla le khatholla." Matheu 11:28.

**KHAOLO EA 30—KRESTE O TLOTSA  
BAAPOSTOLA BA LESHOME LE METSO E  
‘MELI**

[196]

*[E itšetlehile ka Mareka 3:13-39; Luka 6:12-16.]*

Jesu a nyolohela thabeng, a bitsa bao a ba batlang, ‘me ba tla ho Eena. A hlomamisa ba leshome le metso e meli bao a ileng a ba bitsa baapostola hore ba be le Eena, a tle a ba rōme ho ruta.’”

Tlas’a meriti ea lifate tse tširelelitseng, letsoapong la thaba, sebakana ho tloha leoatleng la Galelea, ba Leshome le metso e ‘meli ba khetheloa ho ba baapostola, ‘me hona moo Thuto ea Thabeng ea fanoa. Koetlisong ea barutuo ba Hae, Jesu A khetha ho tloha moo ho leng lerata le pherekano, motseng, A ea moo ho khutsitseng masimong le maralleng, hobane ke moo lithuto tsa Hae li neng li ka tsamaelana-’moho le thuto ea boitelo eo A neng A lakalitse ho ba ruta eona. Nakong ea bosebeletsi ba Hae, O ne A rata ho bokella batho ho Eena, tlas’a botalana ba Maholimo, le matsoapong a matala kapa lebopong la leoatile. Libakeng tsa tjena O ne A ka tseba ho hapa maikutlo a bamameli ba Hae, ho tlosa mehopolo ea bona linthong tsa maiketsetso, ho a isa ho tsa tlholeho. Kholong le tsoelopeleng ea limela tsa tlholeho, ba ne ba ka ithuta lithuto tsa bohlokoa tsa bonnete ba bo-Molimo.

E ne e le nako joale ea ho nka mohato oa pele tlhophisong ea kereke eo e neng etlare ha Krete a tsamaea eona ebe moemeli oa Hae lefatšeng. Ho ne ho se na tempelehali e ntle moo barutuo ba ka kopanelang teng, empa Mopholosi A isa barutuo ba Hae sebakeng se khutsitseng, seo A se ratang. Hamorao mehopolong ea bona, maiphihlelo a halalelang a letsatsi leo a ‘nile a hokahangoa le botle ba sebaka seo sa thabeng le makhulo le leoatile.

[197]

Jesu O ile A bitsa barutuo ba Hae hore A tle A ba rōme lefatšeng ho phatlalatsa lefatšeng seo ba ileng ba se bona ‘me ba se utloa ka Eena. Thōmo ea bona, e leng ea bohlokoa ho feta tsohle tseo batho

ba neng ba kile ba e bitsetsoa e ne e fetoa ke ea Krete feela. Ba ne ba tšoanetse ho sebetsa ‘moho le Molimo ho pholosa lefatše.

Mopholosi O ne A tseba semelo sa banna bao A neng A ba khethile. A tseba bofokoli le liphoso tsa bona. Li ne li senolehile ho Eena. O ne A tseba mathata ao ba neng ba tla feta ho ‘ona, ‘me pelo ea Hae e ne e e-na le kutloelo-bohlōkō holim’a bana ba khethiloeng. O ile A qeta bosiu bohle A le thabeng A ba rapella, bona ba robetse tlas’a thaba. Ha bosiu bo oela fatše A ba hoehla ho kopana le Eena.

Johanne le Jakobo, Andrease le Petrose le Filipi, Nathanaele le Matheu, ba ile ba ba haufi le Jesu haholo thahasellong ea mosebetsi ho feta ba bang. Haele Petrose, Jakobo le Johanne bona ba ne ba le haufinyane le ho feta likamanong le Eena, ba e-ba lipaki tsa mehlolo ea Hae, ‘me ba mamela lentsoe la Hae. Mopholosi O ne A ba rata kaofela, empa Johanne eena o ne a e-na le moea oa ho amohela litaba tsa Jesu ho feta bohle. Johanne o ne a le monyenyanane ho bona kaofela, a ena le pelo ea bongoana e nang le tšepo, ‘me a e bulela Jesu. Kahoo Johanne o ile a ba le kutloelo-bohlōkō joaloka Krete, ‘me ka eena Mopholosi O tsebile ho fana ka lithuto tsa moea ho buisana le batho ba Hae.

### **Ea Liehang Ho Lumela**

Filipi e ne e le oa pele eo Jesu A buileng le eena ka memo e utloahalang, e reng, “Ntatele.” O ne a ile a utloa Johanne Mokolobetsi ha a phatlalatsa Krete e le Konyana ea Molimo. O ne a tiile ho batla ‘nete, empa pelo ea hae e ne e lieha ho amohela ‘nete, joalokaha tsela eo tsebisitseng Jesu Nathanaele ka eona e supa. Leha Krete

[198] A ile A phatlalatsoa ke lentsoe le tsoang leholimong hore ke Mora oa Molimo, ho Filipi E ne E le “Jesu oa Nazaretha, mor’a Josefa.” Johanne 1:45. Hape le mohla likete tse hlano li feptjoang Filipi o ‘nile a hloka tšepo. E ne e le ho mo nonya ha Jesu A botsa potso ena, “Re ka reka bohobe kae, hore batho baa ba je?” Karabo ea Filipi e bontšang ho hloka tumelo, ea soabisa Jesu. “Bohobe ba lidenare tse makholo a mabeli, bo ke ke ba lekana hore e mong le e mong a fumane sengoathoana.” Johanne 6:5,7. Filipi o ne a bone mosebetsi ea Jesu, a utloile matla a Hae, empa a hloka tumelo.

Ha Bagerike ba botsisisa ho Filipi ka litaba tsa Jesu, ha a ka a nka monyetla oo ho ba bolella ka Mopholosi, empa a ea bolella

Andrease. Hape, lihoreng tsa ho qetela pele ho thakhiso ea Jesu, mantsoe a ileng a buuo a ke Filipi e ne e le a hlokisang tumelo. Ha Thomase a re, “Morena,...tsela re ka e tseba joang na?” Mopholosi A araba A re, “Ke ‘na tsela....Ha le ntseba le Ntate lea mo tseba.” Ho Filipi ha hlaha karabo e se nang tšepo, “Morena, re bontše Ntate, ebe ho re lekane.” Johanne 14:58.

Ho fapana le ho se lumele ha Filipi, hoa thabisa ho bona Nathanaele ea neng e-na le bonolo ba ngoana ho ea ka tumelo ea hae, eo tumelo ea hae e ileng ea itsoarella holim’a linnete tse sa bonoeng. Empa Filipi eo e ne e le morutuo a sekolong sa Krete, ‘me Tichere e Halalelang ea jara ka mamello ho se lumele le bothoto ba Filipi. Mohla Moea o Halalelang O ne O tšolohela ho barutuo a, Filipi a ruta ka tieo e ileng ea kholisa ba mametseng.

Ha Jesu A ntse A lōkisetša ho tlōtsa barutuo a e mong ea sa kang a khethoa a ikenya har’a bona. Judase Isekariota ea ipoletseng e le molateli oa Krete, a hlahella ‘me a ipatlela sebaka har’a bona. Ka ho kena lenaneng la baapostola Judase o ne a tšepile hore o tla fumana setulo se phahameng ‘musong o mocha. Chalimeho ea hae e ne e hohela a na le kutloisiso le bokhoni ba ho okamela, ‘me barutuo a ba ‘muella ho Jesu e le ea ka thusang Jesu haholo mosebetsing oa Hae. Hoja Jesu A hana Judase, barutuo a ba ne ba tla ipotsa hore na mong’a bona O bohlae na. Le ha ho le joalo, nalane ea bophelo ba Judase e ne e tla bontša kotsi ea ho lumella bolefatše ha ho etsoa liqeto ka batho ba lōkelang ho etsa mosebetsi oa Molimo. hore na ba a tšoaneleha na.

Le ha ho le joalo Judase o ile a utloa tšusumetso ea matla a halalelang, a khannelang batho ho Mopholosi. Jesu O ne A ke ke A hanela Judase ha feela ho na le takatsonyana e le ‘ngoe e isang nqeng ea leseli. Mopholosi A bala pelo ea Judase. O ne A tseba botebo ba bokhopo boo, ntle le hore e be ka mohau oa Molimo, Judase a neng a tla tetebela ho bona. Ka ho ikopanya le monna enoa Judase, Jesu A ‘meha moo, letsatsi ka letsatsi a ka amanang le bophelo ba Hae bo se nang boithati. Haeba Judase a ne a ka bulela Jesu pelo ea hae le eena Judase o ne a ka ba e mong oa bana ba Molimo.

Molimo O nka batho ba le joalo kaha ba le joalo ebe O ba koetlisetsa mosebetsi oa Hae, haeba ba khalemeleha, ‘me ba ithuta ka Eena. Ka ho tseba le ho phela ka ‘nete, ka mohau oa Krete, ba ka fetoleloa sebōpehong sa Hae.

Judase o ne a ena le monyetla o tšoanang le oa barutuo a ba bang. Empa ho phela ka 'nete ho ne ho hanana le litakatso le leano la hae, 'me o ne a sitoa ho inehela hore a tle a fumane tsebo e tsoang leholimong.

Ka bonolo Mopholosi A sebetsana le eo e neng e tla ba moeki oa Hae! Jesu A beha pel'a Judase botšabehe ba meharo. Hangata morutuo a enoa o ne a ee a hlokomele hore semelo sa hae se senotsoe, 'me sebe sa hae se supilo e empa a se ke a ipolela kapa ho furalla ho se lōke ha hae. A 'na a tsoela pele ho latela liketso tsa thetso. Thuto ka 'ngoe e oelang litsebeng tsa Judase e ne sa eloe hlōkō.

### **Judase A Hloka Boitatolo**

Ka mamello e Halalelang ea Hae Jesu O jere liphoso tsa Judase, leha A ne A 'montša hore O balile pelo ea hae joaloka buka e phetliloeng. Jesu A bea pel'a hae lintho tse ka mo susumeletsang ho etsa hantle; empa litakatso tsa bokhopo, boiphetetso ba lehloeo le litakatso tsa maikutlo tse fifetseng tsa qenehelo a ho fihlela Satane a laola pelo ea hae.

Hoja Judase a ne a ile a rata ho jara joko ea Krete, a ka be a ile a ba har'a ba phahameng ba baapostola. Empa a khetha tsela ea boikhōhōmōso, ea boikakaso, 'me a hloloa ho kena mosebetsing oo Molimo A ka beng A ile A mo fa ona.

[200]

Barutuo a bohle ba ne ba ena le liphoso tse tšabehang ha Jesu A ne A ba bitsa. Johanne le ngoana'bo ba ne ba bitsoa "bara ba lehalima." Nthonyana e ka bontšoang ho tella Jesu e ne e etsa hore ba halefe hampe. Johanne e ne e le sefela-peloana, a nyatsa ba bang. Empa letsatsi ka letsatsi o ne a boha bonolo le boitsoaro ba Jesu, 'me a utloa le lithuto tsa Hae tsa boikokobetso le mamello. A bulela pelo ea hae tšusumetso e Halalelang, 'me a ithuta ho jara joko ea Krete.

Jesu A khalemela A ba A laea barutuo a ba Hae, empa Johanne le bana babo ha ba ka ba lahla Jesu. Ba ile ba tsoela pele ho fihlela qetellong, ho arolelana mahlōkō le liteko tsa Hae, le ho ithuta lithuto tsa bophelo ba Hae. Ka ho talima Krete ba ile ba fetoha limelong tsa bona.

Baapostola ba ne ba sa tsoane mekhoeng le litsekamelong tsa bona. Ho ne ho ena le moleketho, LeviMatheu; Simone oa

ralipolotiki, ea bohale, Petrose ea fanang, ea potlakang, — Judase ea pelo e mpe, ea mamenemene; Thomase ea pelo e nang le 'nete, feela a le boi; Filipi ea belaelang; Bara ba Zebedea ba ipuelang feela le bana babo bona. Bana ba ile ba tlisoa 'moho kaofela ba e-na le litšekamelo tsa bobbe tseo ba li futsitseng ba ba ba li hlaolela. Empa ho Krete ba ne ba tsoanetse ho ithuta hore ba be ntho e le 'ngoe tumelong, thutong le moeeng. Ba ne ba tla fapana ka maikutlo, empa ha feela Krete A lutse lipelong tsa bona ho ne ho tla hloka-hala likhohlano pakeng tsa bona. Lithuto tsa Morena li ne li tla felisa likhohlano tsa bona ho fihlela barutuo ba ba ntho e le 'ngoe mohopolong le ho shebeng litaba. Krete ke Eena setsi se seholo, 'me ba ne ba tla atamelana ka ho ea ka hore na ba hokae le setsi eleng Krete.

### A Ba Tlotsetsa Mosebetsi O Halalelang

Jesu A bokella sehlotšoana seo haufi le Eena, 'me A khumama har'a bona. A ba bea matsoho a Hae lihlohong tsa bona, A rapela, A ba khethela mosebetsi oa Hae o Halalelang.

Ha A khetha ba tlang ho Mo emela bathong, Krete ha A ka A khetha mangeloi a sa kang a oela sebeng, empa O khethile batho ba ikutloang joaloka bohle bao ba tlang ho ba pholosa. Krete O nkile sebōpheho sa botho. Ho ne ho hloka-hala bo-Molimo le botho li kopane ho tlisa pholoho lefatlšeng. Ha e-ba joaloka basebeletsi le baromuo ba Krete. Botho bo itsoarella ho matla a boMolimo. Krete O haha ka tumelo pelong; 'me ka tšebetso-'moho le bo-Molimo matla a motho a atleha ho etsa hantle.

[201]

Ea neng A bitse batšoasi ba lihlapa ba Galelea, O sa ntsane a bitsetsa batho mosebetsing oa Hae. Ho sa thoe letho ka ho se phethehe ha rōna le bolibe ba rōna Molimo O re fa hore re ithute mosebetsi ho Krete. Ha re ikopanya le Eena, re ka sebetsa mesebetsi ea Molimo.

“Empa rōna re ka lipitsa tsa letsopa tse tšetseng letlotlo lena, hore matla ao a fetisisang e be a Molimo, e seng a rona.” 2 Bakorinthe 4:7. Ho ea bonahala hore matla a sebetsang ho batho ba fokolang ke matla a Molimo. Ho tjee re lumela hore matla a ka thusang ba bang ba fokolang joaloka rona, le rona a ka re thusa.

Ha ka bobona “ba imetsoe ke mefokolo” ba tla tseba “ho genehela ba sa tsebeng le ba khelohileng.” Baheberu 5:2. Ho na le batho ba qea-qeang ke khoao, ba fokolang tumelong, ‘me ba hlolehang ho fumana tse sa bonoeng; empa motsoalle eo ba ka ‘monang a e-tla ka lebitso la Krete, o fetoha sehokelo se tlamellang tumelo ea bona e tšeremang ho Krete.

Motho o tšoanetse ho ba mocha oo Krete A ka tsebang ho buisana le motho e mong ka ona. Ha re inehela ho Krete mangeloi a thaba hore a tle a tsebe ho bua ka rona ho senola lerato la Molimo.



## **KHAOLO EA 31—THUTO EA THABENG — MAHLOHONOLO**

[202]

*[E itšetlehile ka khaolo ea Matheu 5 ho isa 7.]*

Kreste O na sa atise ho bokella barutuo ba le bang ho ba bolella lentsoe la Hae. E ne e le mosebetsi oa Hae ho fihlela matšoeletšoele a batho, a bua le bona ka mantsoe a tlhokomeliso, boipiletso le khothaletso, A batla ho phahamisa bohle ba neng ba tla ho Eena.

Thuto ea thabeng leha e ne e tobile barutuo hakaalo, e ne e buuo a har'a matšoele-tsoele a batho. Kamora' tlotso ea baapostola, Jesu O ile A ea nq'a lebopong la leoatle. Hoseng ha letsatsi le latelang, batho ba ne ba se ba qalile ho bokana, ha ba utloa tsohle tseo a li etsang, ba tla ho mo mamela le ho folisoa maloetseng a bona...matla a ne a e-tsoa ho eena, 'me o ne a folisa bohle. Mareka 3:8; Luka 6:17-19.

Ka lebaka la bonyenyane ba sebaka se lebopong, ho no ho sena moo batho ba ka emang teng. Jesu A ba etella nq'a ea thabeng, moo ba ileng ba fihlela sebaka se bataletseng 'me ba khona ho phutheha kaofela. Jesu A lula fatše joanng eaba barutuo le matšoele a latela.

Barutuo ba ile ba lula pela Hae ba e-na le thahasello ea ho utloisisa linnete tse neng li tla tsebahatsoa mafatšeng le mengoaheng eohle. Ba ne ba lumela hore 'muso oa maholimo o se o le haufi.

Moea oa tšepo o ne o foka le matsoeleng ana a neng a phuthehile. Ha ba ntse ba lutse makhulong a lerallaneng, lipelo tsa bona li ne li tletse menahano ea khanya e tlang. Bangoli le Bafarisi ba ne ba lutse ba lebeletse ho fihla ha letsatsi leo ka lona ba tlang ho ba le matla holim'a Baroma, le ho hapa maruo le matlotlo 'ohle a bona kaha e ne e le ona 'muso o moholo ka nako eo. Banna ba motseng hammoho le batšoasi ba lihlapa ba ne ba tšepile ho utloa hore maqhofa a bona, lijo tsa bona tse fokolang, le tšabo ea bona ea ho itseka li tla fetohela majaba-jabeng; le hore ba tla phela hamonate. Ba ne ba tšepile hore Iseraele e tla hlonepheha lichabeng tse ling joaloka sechaba se

[203]

khethiloeng sa Molimo, le hore Jerusalema e tla phahamisoa hoba motse-moholo oa mebuso eohle.

### **Kreste O Felisa Tsepo Ea Boholo Ba Lefatše**

Thutong ea thabeng, Jesu O ne A batla ho etsolla mesebetsi eohle e neng e bakiloe ke lithuto tsa bohata. A batla ho bontša bamameli ba Hae setšoantšo sa ‘nete sa ‘muso oa Hae. O ile A ba bolella mekhoha ea ho kena musong oa Hae, A sa hanyetsane le maikutlo a bona, ka tseo ba neng ba li utloile lithutong tsa bohata, ‘me A ba tlohela hore le bona ba iketsetse liqeto tsa bona ka sebōpeho sa ‘muso oa Hae. Jesu a re, Ho lehlohonolo bohle ba elelloang bofutsana ba moea oa bona ‘me ba utloa ba batla pholoho. Ha se hoba ikhohomosang moeeng litaba tse molemo li tlang ho senoloa empa ke ho bano ba ikokobelitseng, ba bakileng.

Pelo e ikhohomosang e loanela topollo ka matla a eona empa ho tšoaneleha le tōkelo ea leholimo li fumanaha feela ho lōkeng ha Jesu. Ha ho letho leo Morena A ka le etsang ho lokolla motho ntle le hore eena a itihela tlas’a tsamaiso ea Molimo. Ke kamora’ mona a k’a fumanang neho eo Molimo O ntseng O mo behetse eona. Ha ho letho le ka haneloang moea o utloang bohloki ba ‘ona. Bona Esaea 57:15.

“Ho lehlohonolo ba mahlomoleng, hobane ba tla tšelisoa.” Sello seo Jesu A buang ka sona hase sello sa tšiamo kapa ho lla ho tloaelehileng. Re atisa ho siama hobane mesebetsi ea rona e mebe e re tlisetsa litholoana tse babang, empa tšoabo ea ‘nete ha motho a entse sebe e bontša tšebetso ea Moea o Halalelang. Moea o Halalelang O re tlisa maotong a sefapano ha re soabela libe tsa rona. Ka sebe se seng le se seng seo re se etsang re eketsa maqeba a Jesu ‘me ha re talima moo re mo hlabileng re soabela libe tse tlisitseng mahlōkō ho Jesu. Lillo tse joalo li lebisa phurallong ea libe. Tsoabo e tjena e re kopanya le Ea sa feleng. Likhapha tsa ba soabileng li tšoana le marotholi a pula a etellang pele letsatsi la khanya ea khalalelo, a tlisa mohloli oa thabo o tlang ho phela moeeng. Bona Jeremia 3:12 le Esaea 61:3.

[204]

Le ho ba llisoang ke liteko le tšoabo matselitsa a teng. Ke ka mathata Molimo O re senolelang matheba a mabe libōpehong tsa rōna, hore ka mohau oa Hae re tle re fumane tlhoho. Likhaolo tsa

bophelo ba rona tseo re sa li tsebeng lia senoloa ebe hlahlobo ea re tlela, hore ho bonahale, hore na re lumela khalemelo le keletso ea Molimo. Ha re lekoa, re se ke ra nganga kapa hona ho touta, ‘me ra intša liatleng tsa Krete. Litsela tsa Morena li hlaha li le lefifi li hloka monate ho rona batho. Empa litsela tsa Molimo ke litsela tsa Mohau ‘me qetello ea tsona ke pholoho.

Polelo ea Molimo ho ba hlomohileng ke ena, “masoabi a bona [a tla fetoha] e be nyakallo.” Jeremia 31:13.

### Moea O Nang Le Khutso O Rorisa Molimo

“Ho lehlohonolo ba bonolo.” Mathata ao re kōpanang le ona a ka fokotsoa ka mohau feela o ipatileng ho Krete. Ha re ka ba le boikokobetso ba Morena oa rona re tla phahamela lithohako, likhano le mahloeo. Re tla khaotsa ho tlisa masoabi holim’a meea ea rona. Eo e reng ha a sebelisoa hampe a hlolehang ho bōlōka moea o khutsitse, o hlokisa Molimo matla a ho senola ka ho eena semelo sa ‘Ona se phethehileng. Boikokobetso ba pelo bona le matla a fanang ka tlhōlo ho balateli ba Krete.

Ba bontšang moea oa boikokobetso oa Krete ba ka shejoa ka nyatso ke lefatše, empa ba na le letlotlo le leholo mahlong a Molimo. Bafumanehi moeeng, ba ikokobelitseng lipelong, le bao thahasello ea bona e kholo e leng ho etsa thato ea Molimo — bona ba tla ba har’a palo ea ba hlatsoitseng liaparo tsa bona maling a Konyana.

“Ho lehlohonolo ba lapetseng ho loka, ba ho nyoretsoeng, hobane ba tla khotsofatsoa.” Pelo e ikutloang e sena tōkelo e tla susumetsoa ho lapela ho loka. Bohle ba laba-labelang ho tšoana ka semelo le Molimo ba tla khotsofatsoa. Lerato le tla holisa moea le o fe matla a ho fumana boiphihlelo bo phahameng, le tsebo e pharaletseng ea lintho tsa leholimo, hore e seke ea haelloa ke ho tlatsoa.

Ba mohau ba tla hauhelo, ‘me ba pelo li hloekileng ba tla bona Molimo. Monahano o mong le o mong o mobe o sitisa kelello ho nahana ka tsusumetso ea Moea o Halalelang. Morena A ka tšoarella ebile O tšoarella moetsalibe ea bakang; empa leha A tšoaretse, moea o se o silafetse. Puo kapa monahano ohle o litšila o tlameha ho haneloa ke eo ea batlang ho ba le pono e hlakileng ea ‘nete ea moea.

[205]

Empa lipolelo tsa Krete li akarelletsa ho feta tōkōlōho litakat-song tse litšila le ho feta tōkōlōho tsilafatsong ea meetlo, eo Bajuda ba neng ba ikhula ho eona ka thatathata. Boikhabo bo re thibela ho bona Molimo. Ho fihlela re lahlile ho ipatla, re ke ke ra Mo utloisisa Eena e leng lerato. Ke feela pelo e hlokang boikhabo, e ikokobelitseng, le moea o nang le tšepo o tlang ho bona Molimo e le Ea “nang le kutloelo-bohlōkō, ea mosa, ea liehang ho halefa, ea nang le mohau o moholo le botšepahi.” Phallo 34:6.

“Ho lehlohonolo ba bopang khotso.” Lefatše le khahlanong le molao oa Molimo, baetsalibe ba khahlanong le ‘Mopi oa bona. Ka lebaka lena ba loantšana ka bobona. Menahano ea botho e sitoa ho tsoala khotso hobane ha e fihle pelong. Matla a ka bopang khotso ea ‘nete feela ke a mohau oa Krete. Ha mohau ona o lengoa pelong o tla ntša menahano e mebe e bakang likhang le pherekano.

### **Matšoele-tšoele A Ne A Maketse**

Batho ba ne ba e-na le monahano oa hore thabo e bolela ho hapa lintho tsa lefatše lena, le hore botumo le hlonepho li tšoanela ho honoheloa. E ne e le ntho e thabisang ho bitsoa “Rabbi” le ho rorisoa hore o bohlale, ‘me oa halalela. Empa Jesu O ile A phatlalatsa hore hlompho ea lefatše ke eona feela eo batho ba kang bao, ba tlang ho e fumana. Matla a makatsang a ne a tsamaea le lipolelo tsa Hae. Ba bangata ba ne ba na le tumelo ea hore Rabbi enoa ea makatsang o susumetsoa ke Moea oa Molimo.

[206] Kamora’ ho hlalosa hore na thabo ea ‘nete e ka fumaneha joang, Jesu A supa mosebetsi oa barutuo ba Hae, O ne A tseba hore hangata ba ne ba tla hlapaoloa ‘me bopaki ba bona bo hanyetsoe. Banna ba ikokobelitseng ba ‘neng ba mametse lipolelo tsa Hae, ba ne ba tla jara tšenyō ea mabitso, litlatlapo, ho koalloya teronkong le lefu, A tsoela pele, a re:

“Ho lehlohonolo ba hlorisetsoang ho loka, hobane ‘Musō oa maholimo ke oa bona. Le lehlohonolo ha le hlapaoloa, le hlorisoa, le etseletsoa ka mekhōa eohle ka baka la ka. Thabang, le nyakalle, hobane moputso oa lona o moholo maholimong; etsoe baporofeta ba bileng teng pele ho lona ba hlorisitsoe joalo.”

Lefatše le rata sebe ‘me le hloile ho loka. Sena ke sona sesosa sa hore Jesu A se ke A amoheloa. Khanya ea Krete e fiela lefifi le koa-

helang libe tsa bona, ‘me ho totobale hore ba hloka ho nchafatsoa. Ba itlosang ho Moea o Halalelang ba qala ho itoantsa; ba itšoarelet-seng sebeng ba loantsana le ‘nete hammoho le baemeli bohle ba eona.

Ka hona balateli ba Krete ba ahlōloa ka hore ke batšoenyi ba batho. Empa ke setsoalle le Molimo se ba tlisetsang bora le lefatše. Ba tsamaea tsela e ileng ea tsamauoa ke ba Khobane ba lefatše. Teko efe kapa efe ba enka e le sesebelisuo sa Molimo se ba isang tōkōlōhong. Qabang efe kapa efe e ekeletsa holim’a thabo ea bona ea tlhōlo ea ho qetela. Ka ho sheba tsena teko ea tumelo ea bona e amoheloa ka thabo hona le hore e tlise tšabo.

“Le letsoai la lefatše.” Se keng la ikarohanya ho lefatše e le ho balehela lipolao. Le lule har’a batho, e le hore lephoka la lerato le halalelang e tie e be letsoai ho sireletsa lefatše tšenyehong. Haeba batho ba sebeletsang Morena ba ka tlosoa lefatseng, lefatše lena le ka sala tsenyehong. Ba babe ba fumana mahlohonolo a bophelo bona ka lebaka la batho ba Molimo bao ba ba nyatsang le ho ba hatella. Empa haeba batho ke Bakreste ka lebitso feela, ba tšoana le letsoai le tapileng. Ka ho se emele Molimo hantle ba babe le ho feta bahedene.

“Le leseli la lefatše.” Pholoho e ka khanya ea letsatsi; eo e leng ea lefatše kaofela. Thuto ea Bibe le ha e ea tlameha ho lula maqepheng a buka ena feela, kapa hona marakong a kereke. E tlameha ho halaletsa bophelo ba letsatsi ka leng, ‘me e iponahatse bophelong ba rōna ba ka mehla. Melao ea ho loka e tlameha ho bōlōkoa lipelong tsa rōna. Bophelo bo feletseng, botšephehi ba ‘nete, moea o mohau, mohlala o boMolimo -tsena ke tsona litsela tseo khanya e finyellang ka tsona lefatseng.

[207]

Jesu O na tseba hore lihloela li teng tse emeng ho tšoea lentsoe lefe kapa lefe, ‘me le ne le tla nkuoa e le lona la ho Mo qosa hore mosebetsi oa bona o phethahale. Ha A ka A bua letho le ka khoehlisang tumelo ea bona nthong tseo ba li filoeng ka Moshe. Krete ke Eena ea neng A ba file melao ea boitšoaro le ea tsamaiso ea mekete. O ne A sa tla ho tlosa tšepo litaelong tsa Hae. Ha A ntse A qhelela ka thōko botoloki bo fosahetseng ba molao, O ne A le hlokolosi hore A se lahle linnete tsa mantlha tseo Baheberu ba neng ba li fuoe.

Ho Bafarisi lipolelo tsa Mopholosi li ne li luma joaloka bohata. Ha A ntse A fiela lithole tseo ka tlase ho tsona ‘nete e neng e tsetetsoe, ba ne ba nahana hore O fiela ‘nete ka bo-eona. A bala menahano ea bona, eaba O ea ba araba A re, “Le se ke la nahana hore ke tlile ho felisa Molao kapa Baporofeta; ha kea tla ho li felisa, ke mpa ke tlile ho li phethahatsa.” Mosebetsi oa Hae e ne e le ho netefatsa litemana tsa molao tseo A neng A ahlōloa ka hore O li tlotse. Haeba molao oa Molimo o ne o tlameha ho fetoloa kapa ho felisoa, Krete O ne A sa hloke ho utloisoa bohloko ka baka la melato ea tlōlo ea rōna ea molao. O ne A tlile ho hlalosa kamano ea molao le motho ka bophelo ba Hae ba hlomphe.

### **Hlomphe E Lebisang Thabong**

Molimo O rata batho. Ho re sireletsa litholoaneng tsa tlōlo ea molao, O senotse melao ea ho loka. Ha molao o amoheloa ka Krete, o re phahamisetsa ka holim’a matla a litakatso tsa tlhaho hammoho le bofokoli, ka holim’a liteko tse re lebisang sebeng. Molimo O re file boleng ba molao, ho re ka ho o bōloka re tle re thabe.

[208] Thabeng ea Sinai, Molimo O ile A tsebisahatsa bohalaleli ba semelo sa Hae, hore ha ba ipapisa le Eena, ba tle ba bone hore bophelo ba bona bo tletse sebe. Ba fuoe molao ho ba hlokomelisa sebe, le hore ba tle ba bone hore ba hloka Mopholosi. Mosebetsi ona o ntse o tsoanetse ho phethahala. Ha Moea o Halalelang O senolela batho hore ba hloka mali A Krete a hlatsoang libe le ho loka ha Hae, molao ke ona o sebelisoang ho re tlisa ho Krete, e le hore re tle re hloekisoa ka tumelo. “Molao oa Morena o phethehile, ke ‘musa-pelo.” Pesalema 19:8.

“Ho fihlela leholimo le lefatše li fela, ha ho ka ke ha fetoha tlhakunyana e le ‘ngoe leha e le letšoanyana le le leng Molaong, ho fihlela tsohle li etsahala.” Letsatsi le chabileng le lefatše ke tsona lipaki tsa Molimo hore molao oa Hae o ka ho sa feleng. Leha tsohle li ka feta, lihlokoeng tsona li tla sala. Liketsahalo tsa mekhoa tse neng li bontša Jesu joaloka Konyana ea Molimo li ne li tlameha ho felisoa lefung la Hae, empa Melao e leshome e ke ke ea fetoha joaloka terone ea Molimo ha e sa fetohle.

Bophelo ba Mopholosi ba kutlo bo ne bo bontša hore molao o ka bōlokoa ke batho, hape bo ne bo bontša bokhabane ba semelo

se hlahisoang ke ho ba le mamelo. Ka letsohong le leng bohle ba robang molao oa Molimo ba lumellana le puo ea Satane ea hore molao o ke ke oa bōlōkoa. Ha ba ka lumelloa ho kena leholimong hape ba tla tlisa likhohlano le pherekano, ‘me ba behe botsitso ba maholimo kotsing. Ha ho le a mong ea sa hlonepheng leha e le sekoto sa molao ea tla kena ‘musong oa Molimo.

Thetso e kholo ea kelello ea motho, nakong ea Kreste, e ne e le hore ho lumellana le ‘nete feela ke ho loka. Boiphihlelong bohle ba botho tsebo ea ‘nete ka kelello feela e bontšitse e sitoa ho pholosa motho. Ha e tlise litholoana tsa ho loka.

Ho boulella ho bitsoang ‘nete ea thuto -Molimo ho atisa ho tsamaea le lehloeo la seo eleng ‘nete ruri joalokaha e bonoa bophe-long. Litlaleho tse lefifihali tsa histori li hlaha moo histori e tlalehang botlokotsebe bo neng bo etsoe ke balumelihali ba baikaketsi. Ba-farisi ba ne ba inahana hore ke bona balumeli ba baholo lefatšeng, empa seo se neng se bitsoa tumelo e hloekileng ea bona se ile sa etsa hore ba thakhise Morena oa khanya. Ba bangata ba re ba lumela ‘nete; empa haeba ha e ba etse hore ba ikokobetse, ba be mohau, ba be le mamello, ba be le kelello ea leholimo, boipolelo ba bona ke thohako. ‘Me tlas’a tsusumetso ea bona ke thohako lefatšeng.

### **Botebo Le Bophara Ba Molao Oa Molimo**

Jesu O ile A qaqisa molao ka bo mong ‘me A bontša hore na o pharaletse joang. A bolela hore ka menahano e mebe, kapa ka ho sheba ka takatso, molao oa Molimo oa rojoa. Ho se etse tōka ho fokolang ke ho roba molao. Eo ea fang lehloeo sebaka pelong ea hae o kene tseleng ea ho ba ‘molai. [209]

Bajuda ba ne ba e-na le moea oa boiphethetso. Ka lebaka la lehloeo la bona ho Baroma ba ne ba ba nyefola haholo, ba ithuta ho etsa liketso tse tšabehang. Ho na le khalefo e lumellehang, esita le ho balateli ba Kreste. Ha ba bona Molimo A sa hlomphuoe, ba senang molato ba hatelloa, khalefo ea tōka e fuluha moea. Boitsoaro bo joalo hase sebe. Empa bohale le bora bona bo tlameha ho hlakoloa moeeng haeba re batla ho ba le tumellano tse ntle le leholimo.

Morero oa mantlha oa Molimo ka bana ba Hae O phahame ho feta kamoo motho a ka nahanang ka teng. “Ha ho le joalo, phethehang joalokaha Ntat’a lōna ea maholimong a phethehile.”

Taelo ena ke tšepiso. Leano la tōkōlōho le sebeletsa pholoho ea rōna e felletseng matleng a Satane. Krete O atisa ho arohanya motho ea bakileng le sebe. O entse monyetla oa hore Moea o Halalelang O lule pelong e ngoe le e ngoe e bakang, e le ho e bōlōka ho re e se etse sebe.

### **Liteko Hase Boitšireletso**

Liteko tsa Satane ha lia tsoanela ho beoa e le boitšireletso ketsong ea motho e mpe. Ha hona boitšireletso bakeng sa ho etsa sebe. Boitsoaro bo halalelang le bophelo bo kang ba Krete bo a fumanaha ngoaneng e mong le e mong oa Molimo ea bakang ‘me a lumela ho Molimo.

Joalokaha Mora oa Molimo A ne A phethehile bophelong ba Hae, ka mokhoa o joalo balateli ba Hae ba tlameha ho phetheha maphelong a bona. Jesu O ne A entsoe joaloka bana babo linthong tsohle. E ne e le nama joaloka rōna. O ne A entsoe joaloka motho ka hohle, empa e ne e le Mor’a Molimo ea hlokang sekoli. E ne e le Molimo nameng. Semelo sa Hae se lokela hoba sa rōna.

[210] Krete ke leri eo Jakobo a neng a e bone torong; karolo e ka tlase ea eona e le lefatseng, ntlha ea eona e fihla leholimong. Haeba leri eno e ne eka ea sitoa ka bohato bo le bong feela ho fihla lefatseng re ka be re lahlehile. Empa Krete O re fihlela moo re le teng. O ile A nka sebōpeho sa rona ‘me A hlola, e le hore rōna ka ho nka sebōpeho sa Hae re tle re hlole. O entsoe “botho bo tšoanang le ba baetsalibe” (Baroma 8:3), O ile A phela bophelo bo hlokang sebe. Joale oa re laela hore ka tumelo re finyelle khanyeng ea semelo sa Molimo.

Re tlameha ho phetheha joalokaha “Ntat’a rona ea maholimong a phethehile.”

Jesu O na bontšitse hore ho loka ke eng, me A supa Molimo e le mohloli oa ho loka. Joale A retelehela mesebetsing ea rōna ea letsatsi ka letsatsi. Ho seke ha etsoa letho le tla hohella mahlo a batho ho rona kapa ho ipatlela thoriso. Fanang ka botšepahi ho ba futsanehileng, ba phelang ka thata. Thapelong buisanang le Molimo. Ha le itima lijo, se keng la itima ka pelo tse tletseng boikhohomoso.

Tsebeletso e fanoang ka boikokobetso e na le moputso o moholo. “Ntat’ao ea bonang le sephiring o tla u buseletsa.” Ka bophelo boo



re bo phelang, ka mohau oa Kreste, semelo se ea bopeha. Re fumana semelo sa sebōpeho sa Kreste, ‘me setšoantšo se halalelang se qala ho khanya ka hare. Banna le basali ba tsamaeang ‘me ba sebetsang le Molimo ba koahetsoe ke moea oa leholimo, ho bona, ‘muso oa leholimo o se o qalile.

“Ha ho motho ea ka sebeletsang marena a mabeli.” Thuto ea Bible hase tsusumetso e ‘ngoe har’a tse ngata; e tlameha ho kenella bophelo bohle.

“Haeba leihlo la hao le hloka sepha, ‘mele oohle oa hao o tla ba leseling, empa haeba leihlo la hao le sa loka, ‘mele oohle oa hao o tla apareloa ke lefifi.” Ea batlang ho tseba ‘nete o tlameha a be a ikemiselitse ho amohela tsohle tseo ‘nete e li senolang. Ho thekeselaka le ho hloka pelo e tiileng malebana le ‘nete ke ho khetha phoso le thetso ea Satane.

Molao oa lefatše le molao oa ho loka ha e nyallane joaloka ‘mala oa mookoli. Pakeng tsa tse peli tsena hona le phapang e hlakileng e bontšitsoeng ke Molimo. Ho tšoana le Kreste ho ikhetholotse le ho tšoana le Satane joaloka motseare ho bosiu. ‘Me ke bano ba phelang bophelo ba Kreste feela ba eleng basebetsi ‘moho le Eena.

Bao ba khethileng tšebetso ea Molimo ba tlameha ho phomola tlhokomelong ea Hae. Kreste O ile A supa linonyana tse neng li fofa maholimong, le likhahla masimong ‘me a botsa: “Ana lona ha le li fete hole ka bohlokoa na?” Tsoere e nyenyane e alositsoe. Lipalesa le joang li arolelana tlhokomelo ea Ntat’a rōna ea maholimong. Mopi o hlokometse likhahla tsa naha, a li etsa hore li khanye ho feta khanya ea Solomone. A ka se tsotelle motho joang, ea entsoeng ka setšoantšo le khanya ea Molimo? Joalekaha mahlaseli a letsatsi a chabela likhahla tsena ka mebala ea teng e metle, ka mokhoa o joalo Molimo o chabisetsa pelo botle ba sebōpeho sa Hae.

[211]

Bukeng ea linnete ea Molimo, buka ea bophelo, e mong le e mong o na le leqephe. Leqephe leno le na le litaba tsohle tsa rōna. Bana ba Molimo ha ba hlakohe kelellong ea Hae. Ka mokhoa o joalo le se ke la belaela ka hosasane. Molimo ha A fe bana ba Hae litaelo tsohle tsa bophelo ba bona ka nako e le ‘ngoe. O ba bolella ka mokhoa o ba ka hopolang le hona ho etsa. Matla le bohlae tseo ba li fuang ke bakeng sa nako tsa joale tse potlakileng.

“Se ahlōleng ba bang, hore Molimo a tle a se ke a le ahlōla.” Se ke oa inahana o le bohlae ho feta ba bang ‘me u hlōma u le moahloli

oa bona. U ke ke oa tseba se susumetsang ketso. Ka ho tšoaea e mong liphoso u itlisetsa kahlōlo hobane o bontša hore o sebelisana ‘moho le Satane, eena moqosi oa batho. Bona 2 Bakorinthe 13:5; 1 Bakorinthe 11:31.

Sefate se setle se bea litholoana tse ntle. Ka lebaka leo, litholoana tse hlahileng bophelong li pakahatsa semelo. Mesebetsi e metle e ke ke ea reka pholoho, empa ke sesupo sa tumelo e sebetsang ka lerato ‘me e hloekisa moea. Ha re fuoe moputso ka baka la mesebetsi ea rōna e metle empa e tla ba ka ho lekantšoa le mesebetsi e entsoeng ka mohau.

Ho tjee Krete O behile melaoana ea ‘muso oa Hae. Ho natefisa thuto O ile A etsa tlhakiso. Ha hoa lekana ho utloa lipolelo tsa ka; ka hlonepho le tlameha ho li etsa motheo oa limelo tsa lōna. Haeba u haha holim’a lipolelo tsa batho, ntlo ea hao e tla oela. E tla fefoloa ke meea ea liteko le liqoso. Empa melaoana ena eo ke le fileng eona e tla sala e sa fetohē. Nkamohē; u hahe holim’a lipolelo tsa ka.

[212] “Mang le mang ea utloang lipolelo tsena tsa ka, a li phetha, o tla tšoantšoa le motho ea bohlale, ea ileng a haha ntlo ea hae holim’a letlapa. Sekhōhōla sa fihla, liphororo tsa matha, meea ea puka, ea khahlela ntlo eo, empa ha ea ka ea oa, hobane e ne e theiloe holim’a letlapa.”

## KHAOLO EA 32—MOLAOLI OA LEKHOLO O KOPELA MOHLANKA OA HAE THUSO

[213]

*[E itšetlehile ka Matheu 8:5-13; Luka 7:1-17.]*

Kreste O ne A utloile bohlokō hore ebe sechaba sa habo ke sona se batlang pontšo ea hore ke Mesia. Empa O ile A makatsoa ke hore molaoli enoa ea neng a tlile ho Eena, ha a ka a Mo kōpa hore A tle ka boEena, ‘me A ‘montše mohlolo. “Bua feela, ‘me mohlanka oa ka o tla fola.”

Mohlanka oa molaoli enoa o ne a omelletse litho, ‘me a le makhatheng a ho shoa. Har’a Baroma, basebeletsi e ne e le makhoba, ‘me ba ne ba rekoa, ba rekisoa, ‘me ba ne ba tšoeroe hampe, ba khahlapetsoa. Empa molaoli enoa o ne a rata mosebeletsi oa hae, ‘me a lakatsa hore a fole. O ne a lumela hore Jesu A ka mo folisa. Litlaleho tseo a neng a li fumane li ne li mo susumelitse hore a be le tumelo.

Moroma enoa o ne a khotsoe hore tumelo ea Bajuda e phahametse ea bona. O ne a intšitse ho nahanelaneng, le lehloeong le neng le entse likarohano lipakeng tsa bahapi le bahapuo a ‘me a bontšitse Bajuda mosa. Thutong ea Jesu A fumana se kholisang bohloki ba moea. A ikutla a hulehela ho Jesu ka botebo ba maikutlo a hae. Empa a iphumana a sa lokela hore a ka hlaha ka pele ho Jesu, ‘me a kōpa baholo ba Bajuda hore ba kōpele mohlanka oa hae pholiso. Kaha ba ne ba tloetse Moruti enoa e moholo, o ne a tšepile hore ba tla ‘muela le Eena, ka mokhoa o nepahetseng. Jesu ha A kena Kaperenauma A kopana le sehlopha sa baholo se neng se rōmiloe ho Eena. Ba ile ba Mo rapela ka matla, ba re: “O lokeloa ke hore u mo etsetse joalo, hobane o rata sechaba sa rōna, o bile o re hahetse ntlo ea thapelo.”

[214]

Jesu A potlakela lapeng la molaoli empa, ka lebaka la ho bokaneloa ke matšoele, A lieha ho fihla. Molaoli ka ho se itšepe, a Mo romella molaetsa ona, “Morena,...ha ke tšoaneloe ke hore u kene tlung ea ka.” Empa Mopholosi O ile A ‘na A tsoela pele. Qetellong

molaoli a iteta sebete ‘me a Mo atamela a re, “ka baka leo, ha kea ka ka iphumana ke lokeloa ke ho tla ho uena;” “Mpe u bue feela, ‘me mohlanka oa ka o tla fola. Le ‘na, ke le motho ea laoloang ke ba bang, ke na le bahlabani tlas’ a ka, ‘me ha ke re ho enoa, ‘E-ea,’ oa ea, le ho e mong ‘Tloo,’ oa tla, le ho mohlanka oa ka, ‘Etsa hona,’ oa etsa.” Joaloka ha ke le ea emetseng ‘muso oa Roma, le bahlabani ba ka ba hlonepha matla a ka, joale Uena u emetse ‘muso oa Molimo O sa feleng, ‘me lihloiloeng tsohle li mamela lentsoe la Hao. U ka laela boloetse hore bo tsoe ‘me bo tla U mamela. U ka bitso maqosa a leholimo ho tlisa matla a pholiso. U mpe U bue polelo ‘me mohlanka oa ka o tla fola.

“Ha Jesu a utloa taba tseo, a mo makalla, ‘me a rctelehela ho letšoele le mo latetseng, a re: ‘Kea le bolella, ha ke e-s’o fumane tumelo e kaalo le Iseraeleng.’” ‘Me ho molaoli A re, “‘E-ea, u etsetsoe joalokaha u lumetse!’ Mohlanka oa hae a fola ka eona nako eo.”

Baholo ba Bajuda ba ile ba thoollensa molaoli ka lebaka la mohau oo a ileng a o bontša “sechaba sa rona,” e le ha ba ikuka ba lokile. Empa molaoli ena ha a ipolela o itse, “ha ke tšoaneloe.” O ne a sa tšepa ho loka ha hae. Tumelo ea hae e ile ea ama Krete semelong sa Hae sa sebele Eena Motsoalle le Mopholosi oa batho.

Ha Satane a u bolella hore u moetsalibe, ‘molelle hore Krete O tlile lefatseng lena ho pholosa baetsalibe. Kōpo eo re ka e etsang hona joale le ka mehla eohle, ke ho hlahisa boemo ba rōna bo se nang thuso e leng bona bo etsang ebe re hloka matla a Hae a pholosang.

Letsohong la ka ha kea tšoara letho

Ke mpa ke itšoarella sefapanong.

[215] Bajuda ba ne ba sa bone letho le lakatsehang ho Jesu. Empa molaoli enoa ea holisitsoeng ka lithuto tsa melimo ea bohata ea Roma, eo ho neng ho bonahala a arohantsoe le bophelo ba moea ke thuto le tse mo pota-potileng, ea koaletsoeng ka ntle ke boikhopolo ba Bajuda — eena monna enoa o ile a bona ‘nete eo bana ba Abo-rahama ba neng ba sitoa ho e bona. “Leseli la ‘nete le bonesetsang motho e mong le e mong, le ne le e-tla lefats’eng” (Johanne 1:9) le ne le mo chabetse, ‘me o ne a bone khanya ea Mora oa Molimo. Ho

*THUSO* ccix

Jesu, ona e ne e le o mong feela mohlala oa meea e mengata e tla bokelloa e tsoa lichabeng tsohle, e bokelleloa ‘muso oa Hae.

### Ho Tsosoa Motho Ea Shoeleng

Motse oa Naine o bohōle ba likilomithara tse 32 ho tloha Kaperenauma, me Jesu ha A tloha moo, O ile A leba teng. Hohle tseleng moo A neng A feta, batho ba ne ba e-tla, ba tlisa ba kulang pholisong, ‘me ba ntse ba tšepile hore O tla itlhahisa e le Morena oa Iseraele. O ne A lateloa ke batho ba thabileng ba lebeleletseng ho hong ha A tsamaea tseleng eo e matlapa ho ea khorong ea motse oo o thabeng.

Ha ba ntse ba atamela, ho ile ha bonahala mokoloko oa ba eang mabitleng. Ba eteletsoe pele ke setōpō se neng se kentsoe ka lekaseng le butsoeng. Ba neng ba tlil’o tšelisa ba ne ba bokane, ‘me sello sa bona se ne se tletse hohle.

Mofu e ne e le mora a le mong oa ‘m’ae homme ‘m’ae eo e le mohlolohali. Enoa ea llang, ea mong, o ne a siiloe ke motho a le mong feela, ea neng a ka mo tšehetsa le ho mo khothatsa. “Eare ha Morena a bona ‘m’a mofu, a mo utloela bohloko.” Ha mosali a ntse a tsamaea, a sa bone le mo a eang teng ke meokho, Jesu A atamela ho eena ‘me A re ka bonolo, “se lle!” “Jesu a atamela, a ama lempara.” Jesu O ne A sa silafatsoe ke ho tšoara setōpō. Ba mo jereng ba ile ba ema, ‘me ba llang ba atamela ka tšepo. Har’a bona ho ne ho le teng har’a bona, Ea neng A kile A tebela bademona. Ebe le lefu le matleng a Hae?

O ile A bua mantsoe a latelang, ka lentsoe le hlakileng, le nang le matla, “Mohlankana, ke re ho uena, tsoha!” Lentsoe leo le ile la phunyeletsa, la kena litsebeng tsa mofu. Mohlankana a bula mahlo. Jesu A mo tšoara ka letsoho, A mo phahamisa. ‘M’e le mora ba mamarelana ka thabo nako e telele. Matšoele a talima, a khutsitse, joaloka ha eka ba ka pel’a Molimo. “‘Me ba tlotlisa Molimo, ba re: ‘Moporofeta e moholo o teng har’a rona... Molimo o etetse sechaba sa hae.’” Mokoloko o neng o e-ea mabitleng oa khutlela Naine e le mokoloko oa tlhōlo.

Eo Ea ileng A ema pel’a ‘m’e ea llang, Naine, Oa hauha ha re utloile bohloko. Lentsoe la Hae le ntse le le matla joalokaha A ne A bua le mohlankana oa Naine. Sheba Matheu 28:18. Ho bohle ba lumelang ho Eena, e ntse e le Mopholosi ea phelang.

Mora enoa oa mosali enoa, o ile a khutlisetsoa bophelong ba lefatše lena e le ha a tla boetse a mamella masoabi a bona, le ho boela a e-shoa hape. Empa Jesu Oa re khothatsa ha re soabile ka baka la ba shoeleng, ka molaetsa oa tšepo e sa feleng o reng, “Ke ‘na ea phelang. Ke ne ke shoele, empa ke ‘na enoa ke phela kamehla le mehla. Ke tšoare linotlolo tsa lefu le tsa Qalo ea Bafu.” Tsenolo 1:18.

Satane a ke ke a tlamella motho le a mong lefung ha feela motho eo a amohela ka tumelo lentsoe le nang le matla la Krete. “Tsoha, uena morobali, tsoha bafung.” Baefese 5:14. Lentsoe la Molimo le ileng la phelisa motho oa pele, le ntse le fana ka bophelo le kajeno. Lentsoe la Krete le itseng, “Mohlankana, ke re ho uena, tsoha!” le ile la fa mohlangana oa Naine bophelo. E leng ho re, lentsoe lena le reng, “Tsoha bafung” ke bophelo ho motho ea le amohelang.

‘Me “haeba Moea oa ea tsositseng Jesu bafung o phela ka ho lona, ea tsositseng Krete bafung o tla phelisa le ‘mele ea lōna e shoang.” Baroma 8:11; sheba 1 Bathesalonika 4:16,17. Lena ke lentsoe leo A laelang hore re khothatsane ka lona.

## KHAOLO EA 33—JESU LE MATHATA A LELAPA

[217]

*[E itšetlehile ka Matheu 12:22-50 le Mareka 3:20-35.]*

Bara ba Josefa ba ne ba sa utloele Jesu bohlokō mosebetsing oa Hae ho hang. Ba ne ba tšosa ke litlaleho tseo ba li fumanang tsa mosebetsi le bophelo ba Hae. Ba ile ba utloa hore O qeta masiu A ntse a rapela, le hore motšoare O bokaneloa ke batho ‘me O hloka le nako ea lijo. Metsoalle ea Hae e ne e bona hore o iqeta matla; ba ne ba sa utloisise hore na ke eng A sa ikamahanyeng le bafarisi, ‘me ba bang ba ne ba e na le tšabo ea hore e-sebe kelello ea Hae e senyehile.

Bana babo ba ne ba sonngo ka lebaka la Hae. Ba ne ba halefisitsoe ke ha A le khahlanong le Bafarisi. Ba ile ba rera ho Mo qophella hore A tlohele mosebetsi oa Hae, ‘me ba kopa Maria ho ba thusa, hobane ba ne ba nahana hore lerato la Hae ho ‘M’ae le tla etsa hore A itlhokomele.

Bafarisi ba ne ba ‘nile ba Mo qosa ka hore “O leleka bademona ka morena oa bademona.’” Matheu 9:34. Krete O ile A ba bolella hore bao ba Mo buang hampe hobane ba sa elelloe bo-Molimo ba Hae, ba ka tšoareloa; Moea o Halalelang O ka ba bontša phoso ea bona ‘me ba baka. Empa ea hanyetsang mosebetsi oa Moea, o ipea moo Moea o Halalelang o ke keng oa mo fihlela. Ha batho ba hana ho amohela Moea, ‘me ba re o tsoa ho Satane, ba tlosa mocha oo Molimo O ka buisanang le bona ka ona.

Bafarisi ka bobona ba ne ba sa lumele seo ba neng ba qosa Jesu ka sona. Batho bao ba boemo, ba ne ba ile ba utloa Moea ha O bua, ka lipelong tsa bona, O ba bolella hore Ke Motlotsuo oa Iseraele. Ha A ne A le har’a bona, ba ne ba iphumana hore ha ba a hloeka, ‘me ba laba-labela ho hloeka. Empa kamora’ hore ba se ke ba Mo amohela, ba nka e tla ba ho itlontlolla hore ba Mo amohela e le Mesia. Ba ile ba iphapanyetsa ho amohela ‘nete ka ho tšoea lithuto tsa Hae liphoso. Ba ne ba ke ke ba Mo thibela ho etsa mehlolo,

[218]

empa ba ne ba leka ka hohle ho sotha moelelo oa mehlolo eo. Leha ho le joalo, Moea oa Molimo O ile oa 'na oa ba qophella, 'me ba ile ba tlameha ho aha marako ho thibela lenqosa lena le pheellang ho feta ohle a ka tlišoang pelong ea motho.

Molimo ha O foufatse mahlo a batho, kapa hona ho thatafatsa lipelo tsa bona. O ba rōmella leseli, ho lokisa liphoso tsa bona. Ka ho se natse leseli lena, mahlo a ea fofala, 'me pelo e thatafale. Hangata sena ha se bonahale ha se ntse se etsahala. Ha lehlasele le le leng le sa natsoe, eba pono ea moea e qala ho thethefala, 'me lehlasele la bobeli ebe le se le bonahala ka lerootho. Joale lefifi le eketsehe, ho fihlela e e-ba bosiu ka moeeng. Ho bile joalo le ho baetapele bana ba Bajuda. Ba ile ba re mosebetsi oa Moea o Halalelang ke oa Satane. Ka ho etsa joalo ba ikhethela thetso, 'me ho tloha moo ba tsamaisoa ke Satane, ka matla a hae.

Keletso e tšoanang le ea ho siteloa Moea o Halalelang, eo Krete A e faneng, ke ea ho bua mantsoe a mabe a bosaoana. Mantsoe a bontša semelo. "Molomo o bolela se tletseng ka pelong." Mantsoe a buuoang a fetola semelo sa motho. Batho ba susumetsoa ke mantsoe a bona. Hangata batho ba susumetsoa ke Satane ho bua lintho tseo ba sa li lumeleng; 'me ebe mantsoe ao a sebetsa menahanong, 'me ba qetelle ba lumela sena seo ba se buisitsoeng ke Satane. 'Me e re ha ba se ba buile mantsoe ana, kapa ba entse qeto, ebe boikhothomoso bo se bo ba sitisa ho hula mantsoe a bona. Ba leke ho kholisa ba bang ho re ba nepile ho fihlela ba se ba khotsoe hore ba nepile.

[219] Ke kotsi ho bua mantsoe a ho se lumele, ho kotsi ho nyefola le ho hanyetsa leseli. Ho nyefola ho etsoang ka bohlasoa, le ka ho hloka hlomphe, ho fetola semelo, 'me ho tlise ho hloka hlomphe le ho se lumele. Batho ba bangata ba tsoela pele ka mokhoa ona, ho fihlela ba le lekhateng la ho hana Moea o Halalelang. Jesu O itse, "Lentsoe le leng le le leng la bosaoana leo batho ba le buang, ba tla ikarabella holim'a lona ka letsatsi la kahlolo, hobane u tla beoa ea lokileng ka lipolelo tsa hao, kapa u tla ahlōloa ka lipolelo tsa hao."

Eaba Jesu O boela A eletsa ba neng ba na le thahasello lipolelong tsa Hae, empa ba sa inehela hore Moea o Halalelang o lule ka hare ho bona. "Moea o litšila ha o tsoile ho motho, o sōlla mahoatateng, o batla phomolo, empa ha o e fumane. Ebe o re: 'Ke tla khutlela tlung ea ka, moo ke tsoileng teng.' Joale ha o fihla, o e fumana e



le lephaka, e fietsoe, e khabisitsoe. Ebe o ea lata meea e meng e supileng, e o fetang ka bokhopo, ‘me e kene, e ahe teng.’”

Ba bangata mehleng ea Kreste joaloka kajeno, ba ile ba lokolloa, ka mohau oa Molimo, meeng e litšila, e neng e busa pelong tsa bona. Ba thabela lerato la Molimo empa ha ba ipehe ho ‘ona kamehla, e le hore Kreste a lule lipelong tsa bona. ‘Me ha moea o litšila o khutla, le “meeaa e meng e supileng, e o fetang ka bokhopo,” e be moo ba bang matleng a litšila ka ho tlala.

### Matla A Macha A Ea Busa

Ha moea o inehela ho Kreste, matla a macha a busa ka pelong. Phetoho e ba teng, eo motho a ke keng a itlisetsa eona. Moea o inehetseng ho Kreste o fetoha qhobosheane ea Hae, eo A phelang ho eona, lefatšeng la bokoenahi, ‘me A etse hore ho se be matla a mang a ka hapang qhobosheane eo, haese Eena feela. Moea o sirelelitsoeng joalo ke makhotla a leholimo joalo, o sitoa ho kenoa ka liphutuhō tsa Satane.

Empa ha re sa inehle hore re tsamaisoe ke Kreste, re tla laoloa ke e mobe. Ha ho hlokahale hore u be u ikhethetele ‘muso oa lefifi pepenene hore u busoe ke ona. Ho lekane feela hore re tlohele ho ikamahanya le ‘muso oa leseli. Ha re sa sebelisane ‘moho le makhotla a leholimo, Satane o tla lula ka pelong. Tsireletso ea pelo e ngoe feela; ke hore Kreste A lule ka hare ho eona ka tumelo le ho loka ha Hae. Ha re sa hokahana le Molimo ka ho tlala, re sitoa ho lesa boithati le ho qoba meleko le sebe. Re ka nna ra khona ho tlohela litloaelo tse mpe ka nakoana, empa ha re sa inehle ho Kreste motsotso o mong le o mong, le ho buisana le Eena, re mohaung oa sera ‘me re tla qetella re se sebeletsa.

[220]

“Hoo litaba tsa motho eo tsa morao li bang mpe ho feta tsa pele. Ho tla ba joalo le ho molōko ona o khopo.” Ba hanneng pitso ea mohau ba thatafala ho feta bohle. Sesupo se tloaelehileng sa ho siteloa Moea o Halalelang, ke ha motho a tsoela pele ho nyelisa memo ea leholimo ea hore a sokolohe.

Bajuda ba ile ba etsa sebe se senang tšoarelō ka ho hana Jesu; le rōna re ka etsa phoso e tšoanang le eo, ka ho hana memo ea mohau. Re soabisa Khosana ea bophelo ka pel’a Satane le leholimo, ha re hana ho mamela barōmuoa ba Hae bao A ba khethileng, ‘me re

mamela ba khelosang meea ho e tlosa ho Kreste. Motho a ke ke a tšoareloa ha a etsa sena, ‘me o tla qetella a se a se na takatso ea ho boelanngoa le Molimo.

### **Baena Ba Jesu Ba ‘Nete**

Ha Jesu A ntse A ruta batho, ho ile ha fihla molaetsa o reng ‘ma’e le bana babo ba lakatsa ho Mo bona kantle, o tlisoa ke barutuo. “Empa Jesu a araba ea ‘molellang, a re: “Mè ke mang? Bana beso ke bo-mang?” Eaba o otlollela letsoho ho barutuo ba hae, o re: ‘Bonang! ‘Mè le bana beso ke bana. Mang kapa mang ea etsang thato ea Ntate ea maholimong, ke eena eo e leng ngoan’eso, le khaitseli, le ‘mè.’”

Bohle ba amohelang Kreste ka tumelo, ba kopanngoa le Eena ka maqhama a fetang a tsoalano. Ka ho ba molumeli le moetsi oa mantsoe a Hae, ‘ma’e, o ne a le haufinyane le Eena ho feta ka tsoalano. Bana babo ho ne ho se monyetla oo ba tla o fumana ho Eena ka tsoalano, ntle leha ba ne ba ka Mo amohela e le mopholosi oa bona.

Ho se lumele ha bona e ne e le karolo ea mohope o babang oa mahlōkō oo A o menyelelitseng lebitsong la rona.

[221] Bora boo motho a eeng a be le bona evangeling bo ile ba utloisa Jesu bohloko haholo ha A lemoha hore bo teng lelapeng labo. Bana babo bane ba lumela hore e ka khona ba mo eletse. Ba ne ba nahana ho re ha A ka A bua lintho tse amohelang ho Bafarisi, A ka qoba likhohlano pakeng tsa Hae le bona. Ba ne ba nahana hore keello ea Hae ha e sa sebetsa hantle ha A re O fumana matla leholimong. Ba ne ba tseba hore Bafarisi ba batla ho Mo qosa, ‘me ba re Jesu O ba file monyetla o joalo.

Ba ne ba sitoa ho utloisisa thomo ea Hae, ‘me ka lebaka leo, ba ne ba sitoa ho Mo utloela bohloko litekong tsa Hae. Mantsoe a bona a mabe, a senang teboho, a ne a bontša hore ha ba eelloe semelo sa Hae. Sebakeng sa ho Mo khothatsa, ba ne ba Mo utloisa bohloko. Tlhaho ea Hae ea hlōkofatsoa, mabaka ao A etsang lintho ka ona a rehella, ‘me mosebetsi oa Hae oa se ke oa utloisisoa.

Bana babo ba ne ba hopola hore ba ka Mo ruta Eena ea neng A utloisisa ‘nete eohle. Ba ile ba nyefola seo ba sa se utloisiseng. Ba

ne ba nahana hore ba loanela Molimo athe Molimo O ne O le har'a bona, ka sebōpeho sa nama, 'me ha ba ka ba Mo tseba.

Lintho tsena li ile tsa tlatsa tsela ea Jesu meutloa. Jesu O ne A utloisoa bohlokō haholo ke ho se utloisisoe lapeng labo, hoo A neng A phutholoha ha A le moo tsena li leng sieo. O ne A thabela ho chakela lelapa la Lazaro, Maria le Maretha, hobane teng moea oa Hae O ne O phomola kaha ho ne ho le moea oa tumelo le lerato. Empa hangata O ne A fumana phomolo boinotšing le puisanong le Ntat'ae. Bao ba bitsitsoeng ho mamella ho se utloisisoe, le ho se tšeptjoe, ka lebaka la Krete, malapeng a bona, ba ka ikhothatsa ka monahano oa hore Jesu O ile A mamella mathata a joalo. O ba bitsa hore ba etse setsoalle le Eena, me ba fumane phomolo ka ho buisana le Ntate.

Bao ba amohelang Krete, ha ba siuoe feela e le likhutsana ho feta melekong ba le bang. Joaloka litho tsa lelapa la leholimo, O ba mema hore ba bitse Ntat'ae, Ntate oa bona. O ba rata haholo ho feta kamoo batsoali ba rōna ba neng ba re rata ha re sa fokola.

Ha Moheberu a ne a tlameha ho ithekisa e le lekhoba, ka lebaka la bofutsana, boikarabello ba ho mo lokolla bo ne bo ba mahetleng a ea haufinyane ho eena ka tsoalo. Sheba Meetlo 25:25,47-49; Ruthe 2:20. Ka mokhoa o joalo, boikarabello ba ho re lokolla bo ho Eena, ea haufi le rōna ka tsoalo. Krete O fetohile mohahabo rona. O haufi le rōna ho feta ntate, 'm'e, motsoalle oa rōna kapa moratuo. Re sitoa ho utloisisa lerato la Hae, empa re ka ba le maiphihlelo a lona ka lipelong tsa rōna.

[222]

## **KHAOLO EA 34—JOKO EA HAE E BONOLO, MOROALO OA HAE OBOBEBE**

*[E itšetlehile ka Matheu 11:28-30.]*

Tlong ho ‘na, lona bohle ba khathetseng, ba imetsoeng, ‘me ke tla le khatholla.” Mopholosi ha A koalla leha a le mong kantle ho tlhokomelo le lerato la Hae. O ile A sheba ba matšoenyehong, ba imetsoeng lipelo, ba lahlehetsoeng ke tšepo, ba lekileng ho khutsisa se hlokoang ke meea ea bona ka menate ea lefatše, ‘me O ba mema bohle ho fumana phomolo ho Eena.

Ka qenehelo, O re ho ba sebetsang ka thata, “Itjariseng joko ea ka, le ithute ka ‘na, kahobane ke mosa, ke na le pelo e ikokobelitseng, ‘me le tla fumana phomolo.”

Ka mantsoe ana Kreste O bua le motho e mong le e mong. Bohle, ho sa tsotellehe hore na ba a tseba kapa ha ba tsebe, ba imetsoe ke meroalo eo e leng Kreste feela ea ka e tlosang. Moroalo o boima ho feta eohle ke oa sebe. Hoja re ne re ka tlohella ho jara moroalo ona, o ne o tla re ripitla. Empa ea se nang sebe O nkile sebaka sa rōna. “Morena o ‘melesitse makhopo a rōna bohle.” Esaea 53:6. O jere moroalo oa melato ea rōna. O tla jara le moroalo oa tlhokomelo le oa masoabi.

Moholoane oa rōna, oa moloko oa rona, O teroneng e sa feleng. O tseba bofokoli ba botho ka ho feta ho bona; O tseba le seo re se hlokang, le matla a meleko e re tlelang, hobane O ile A lekoa linthong tsohle joaloka rona, empa A se ke A etsa sebe. Na u molekong? O tla u pholosa. Na u a fokola? O tla u fa matla. Na u hloka tsebo? O tla u fa tsebo. Na u tsoile maqeba? O tla u folisa. “O folisa ba pelo li hlabehileng, o tlamella maqeba a bona.” Pesalema 147:3.

[223]

Ho sa tsotellehe hore na matšoenyeho a hao le meleko ke efe, ala litaba tsa hao ka pel’a Jehova. Moea oa hao o tla tiisetsoa hore o be le mamello. Tsela e tla buleha ea hore u itokolle ho tse tlontlollang, le mathata. Ha meroalo ea hao e le boima haholo, u

tla fumana lehlohonolo le leholo, le phomolo, ha u li lahlela ho ea jereng meroalo.

Phomolo eo Kreste a fanang ka eona, e itšetlehile ka lintho tse itseng. Lintho tsena li bonolo, ‘me li hlalositsoe. Ke tseo bohle ba ka khonang ho li etsa.

“Itjariseng joko ea ka.” Joko ke sesebelisuo mosebetsing. Likhomo li pana ka joko ha li il’o sebetsa, ‘me joko ena ea hlokeha, hore li tle li tsebe ho sebetsa hantle. Ka tlhakiso ena, Jesu O re ruta hore re bilelitsoe mosebetsi. Re tšoanela ho inkela joko ea Hae.

Joko ke molao oa Molimo, selekaneng se secha se ngotsoeng ka pelong. E tlamahanya motho ea sebetsang le thato ea Molimo. Ha re ne re ka leseloa ho ea moo re ratang, re ne re tla oela ha Satane. Ka lebaka leo, Molimo O re bokelletsa ka har’a thato ea Hae.

Jesu ka boena O ile A jara joko ea bosebeletsi, A nkile sebōpeho sa botho. O itse “ke theohile leholimong, e seng ho tla etsa thato ea ka, empa ho tla etsa thato ea ea nthōmileng.” Johanne 6:38. Jesu O tllile lefatseng ka lebaka la ho rata Molimo, ho chesehella khanya ea Hae le lerato ho batho ba oeleng. Ana e ne e le ‘ona matla a Mo tsamaisang bophelong ba Hae. O re bitsa hore le rōna re inkele melao ena.

### **Ke Eng Se Etsang Hore Re Khathale Hakaale?**

Ba bangata bao lipelo tsa bona li imetsoeng ke meroalo ea matšoenyeho, ba khethile ho sebelletsa lefatše, ba amohetse matšoenyeho a lona, ba nkile meetlo ea lona. Ka lebaka leo maphelo a bona a fetohile a mokhathala. Moo ba khotsofatsang litakatso tsa lefatše, ba hlabehisa letsoalo, ‘me ba boele ba ikekeletse moroalo oa ho soaba. Morena oa rōna O lakatsa hore ba behelle joko ena ea bokhoba ka thōko. O re “Joko ea ka e bonolo, ‘me thōtō ea ka e bobebe.” O ba biletse hore ba batle ‘muso oa maholimo le ho loka ha ‘ona pele. Ha motho a tšoenyehile, o tšoana le sefofu, o sitoa ho bona tse tla etsahala, empa mathateng afe kapa afe, Jesu O lokisitse tsela ea khatholoho. Ntat’a rōna ea maholimong, O na le tsela tse sekete tsa ho re thusa tseo re sa li tsebeng ho hang. Bao ba beang tlōtla le tšebeletso ea Molimo ka holimo, ba tla bona matšoenyeho a bona a nyamela ‘me ho ba le tsela e totobetse ka pel’a maoto a bona.

“Le ithute ka ‘na’ ho rialo Jesu, “kahobane ke mosa, ke na le pelo e ikokobelitseng, ‘me le tla fumana phomolo.” Re tšoanela ho kena sekolo sa Krete, ‘me re ithute ho Eena. Topollo ke tsela eo ka eona moea o koetlisetsoang leholimo. Koetliso ena e bolela ho lokolloa maikutlong, litloaelong le liketsong tseo re ithutileng tsona sekolong sa khosana ea lefifi.

Ka pelong ea Jesu, ho ne ho e-na le khotso e phethehileng. O ne A sa tlatsoe boitšepi ka ho thooletsoa, A sa nyahamisoe ke ho omanngoa le ho soabisoa. O ne A lula A khotsetse, le har’a khanyetso le ho etsetsoa bokhopo. Empa ba bangata ba balateli ba Hae ba lula ba tšoenyehile lipelo hobane ba tšaba ho tšepa Molimo. Ba honyela ha ba nahana ka tse ka ba hlahelang ha ba inehela Eena ka botlalo. Empa ha ba sa inehela ka botlalo ba ke ke ba fumana khotso.

Ha re tsoetsoe ke leholimo re tla ba le kelello e tšoanang le ea Jesu. Ha re na ho ipatlela litulo tse holimo-limo. Re tla lakatsa ho lula maotong a Jesu ‘me re ithute ho Eena. Re tla utloisisa hore Moea o Halalelang ke ona O etsang hore mosebetsi oa rōna e be oa bohlokoa. Ho tšepa Molimo ho halaletsa kelello le ho etsa lipelo hore li be le mamello.

### **Kamoo Joko Ea Hae E Bebofatsang Mosebetsi**

Joko e beoa melaleng ea likhomo e le ho thusa hore li hule moroalo, le ho o bebofatsa. Ho joalo le ka joko ea Krete. Ha thato ea rōna e metsitsoe ke ea Molimo, re tla fumana moroalo oa bophelo o le bobebe. Ea tsamaeang tseleng ea melao ea Molimo, o tsamaea le Krete, ‘me pelo e phomola leratong la Hae. Ha Moshe a rapela a re, “Ak’u mpontše litsela tsa hao,...ke tie ke u tsebe,” Morena O ile A arabela a re “Ke tla tsamaea le uena, ke e’o u phomotsa.” Phallo 33:13,14.

[225] Bao ba amohelang mantsoe a Krete, ‘me ba nehela maphelo a bona ho tsamaisoa ke Eena, ba tla fumana khotso. Ha ho letho la lefatšeng le ka etsang hore e be batho ba soabileng hobane Jesu O ba fa thabo ka boteng ba Hae. “U boloka khotso ea ba maikutlo a tsitsitseng, hobane bona ba fela ba u tšepile.” Esaea 26:3.

Maphelo a rōna a ka bonahala a le marang-rang, empa ha re inehela ho Monghali ea bohlale oa Mosebetsi, O tla hlahisa setšoantšo

sa bophelo le semelo tse tla Mo tlotlisa. ‘Me semelo se tla bon-tšahatsa khanya eleng semelo se kang sa Kreste, se tla amoheloa Paradeising ea Molimo.

Ha re kena phomolong ka Kreste re tla be re qalile leholimo hona mona. Re ananela memo ea Hae e reng, “Tlong le ithute ho ‘Na,” ‘me ka mokhoa o joalo, re qala bophelo bo sa feleng. Leholimo ke katamelo e sa khaotseng e eang ho Molimo ka Kreste. Ha re ntse re eketsa ho tseba Molimo, le thabo ea rōna e tla ‘ne e eketsehe. Ha re tsamaea le Jesu bophelong bona, re tla tlala lerato la Hae, re khotsofatsoe ke boteng ba Hae. Sohle seo botho bo ka se tsebang ho se jara re ka se fumana hona mona.

**KHAOLO EA 35—HO KHUTSISOA SEFEFO**

*[E itšetlehile ka Matheu 8:23-34; Mareka 4:35-41, 5:1-20; Luka 8:22-39.]*

Ho ne ho ile ha etsahala lintho tse ke keng tsa lebaloa letsatsing leo. Jesu O ne A ile A bua ka lipapiso, lekhetlo la pele, A hlalosa mokhoa oa Muso oa Hae, le ka mokhoa oo o tlang ho hahuo. O ne A ile A bapisa mosebetsi oa Hae le oa mojali; ho hola ha 'Muso oa Hae a ho bapisa le ho hola ha tlhaku ea mosetareta le mosebetsi oa tomoso phofong. O ne A ile A bapisa karohano ea ho qetela ea ba lokileng le ba khopo ka koro le mofoka, hape ka letlooa la litlhapi. O ne A ile A tšoantša linnete tseo A li rutang tsa bohlokoa ka setšoantšo sa letlotlo le patiloeng, le sa perela e theko e boima.

Ha nako ea mantsiboea e atamela, matšoele a ne a ntse a Mo bokanetse. O ne A ile A ba sebeletsa ka letsatsi le letsatsi, A sitoa feela le ke ho re khefu a e-ja. Mantsiboea a ile a Mo fumana A khathetse hoo A ileng A ba A batla sebaka se khutsitseng ka mose ho letša, ho phomola teng. O ile A bitsa barutuo ba Hae hore ba Mo felehetse ho ea moo.

Kamora' hore A qhale matšoele, ba ile ba Mo kenya ka seketsoaneng, 'me ba potlakela moo ba eang. Empa batho ba kena liketsoaneng tse neng li le haufi le seo, 'me ba latela seo sa Hae, hobane ba ne ba ntse ba lapetse ho Mo mamela.

Ka lebaka la mokhathala le tlala, Mopholosi O ile A sekama ka seketsoaneng 'me A ea le sephume sa boroko. Mantsiboea a letsatsi leo e ne e ile ea ba a khutsitseng ha monate, empa ka pele-pele leholimo le ile la fifala, 'me sefeko se matla sa tsoha leoatleng.

Lifeko tse bohale tsa tsosa maqhubu a halefileng, 'me a otlala seketsoana ka matla, ha ba ha bonahala eka a tla se koahela. Lehoja batšoasi bana ba litlhapi ba matla, ba ne ba 'nile ba sesisa liketsoana tsa bona har'a lifeko tse ngata, ka motsotso ona matla le tsebo ea bona li ne li sena thuso. Ba bona seketsoana sa bona se tlala metsi, ho se seo ba ka se etsang.



## Jesu O Ne A Tsotella

Ka ho phathahana ke ho leka ho ipholosa, ba ile ba lebala hore Jesu O teng ka sekepeng. Joale ha ba bona lefu le se le le haufi, ba ile ba hopola hore na ba tšela leoatle ka taelo ea mang. Tsepo ea bona e ne e le ho Jesu feela. “Monghali, Monghali!” Empa mantsoe a bona a ne a koaheloa ke molumo oa sefefe, ‘me ha ba ka ba utloa karabo. Tsabo le ho hloka tšepo li ile tsa ba tšoara. Ebe Eo ea hlotseng mafu le bademona, le lefu, O hloka matla a ho thusa barutuo a joale? Ebe ha A tsotelle tlokotsi ea bona?

Ba hoelehetsa hape empa ho ne ho se karabo haese feela lerata la sefefe se bohale. Ho ne ho bonahala hore ba tla metsoa ke metsi a ba lapetseng.

Hang lehalima la tsekema har’a lefifi, ‘me ba bona Jesu A sekame A robetse, A sa tšoenngoe ke maqhubu. Ka ho makala ba ile ba hoeletsa ba re “Moruti! Na ha u tsotelle ha re timela?”

Sello sa bona sa tsosa Jesu. Ha khanya ea lehalima e Mo bonesa, ba ile ba bona sefahleho sa Hae se tletse khotso ea leholimo. Ba bona A ba talima ka lerato, ‘me ba hoeletsa ba re, “Morena, re pholose, rea timela!”

Ha ho moea o kileng oa lla sello se joalo eaba ha o fumane thuso. Ha barutuo a ba phahamisa lithupa tsa bona ho leka lekhetlo la ho qetela, Jesu A tsoha. Ha sefefe se ntse se foka, ‘me maqhubu a ba koahela, A phahamisa letsoho la Hae ‘me A re ho leoatle le halefileng “Lilimala! Khutsa!”

Maqhubu a ile a khutsa, maru a phetleha, ‘me linaledi tsa chaba. Sekepe sa sesa leoatleng le khutsitseng. Joale Jesu A botsa A soabile A re, “Le boi keng? Na ha le e-s’o be le tumelo?”

Khutso e kholo e ile ea e-ba teng har’a barutuo a. Ba neng ba le ka liketsoaneng tse neng li latetse Jesu, ba ne ba tšohile ba bile ba lahlehetsoe ke tšepo. Sefefe se ne se bokantse liketsoana hammoho. Me bohle ba ho tsona ba ile ba bona mohlolo ona le bona. Ba ile ba botsana ba re, “Ekaba motho eo ke mang, ea mameloang ke moea le ke letša?”

[228]

Ha Jesu A tsosoa ho thusa sefefong, O ne A sa bontše A na le tšabo ha A bua, esita le chebahalo ea Hae. Hona ho ne ho sa etsahale hobane A le matla ohle. O ne A sa khutsa hobane e le “Morena oa lefatše, leoatle le leholimo.” Matla ao O ne A a hlobotse. “Nke ke

ka etsa letho ka bonna.” Johanne 5:30. O ne A tšepile matla a Ntate. E ne e le ka tumelo — tumelo leratong le tlhokomelong ea Molimo, le matleng a lentsoe leo le ileng la khutsisa sefefe leo e neng e le la Molimo. Ke ‘ona ao Jesu A neng A a tšepile.

Ka mokhoa o joalo le rona re tšoanela ho fumana phomolo tlhokomelong ea Mopholosi oa rōna. Tšabo ea barutuo, ha ba ne ba le tsietsing, e ne e senola ho hloka tumelo ha bona. Ba ile ba lebala Jesu, ‘me e bile feela ha ba retelehela ho Eena, A ileng A ka ba thusa.

Hana ke ha kae ha lifefe tsa meleko li foka, re loantšanang le tsona re le bang. Re tšepa matla a rōna ho fihlela re le lekhateng la ho shoa. Ebe joale re hopola Jesu. Ha re bitsa ho Eena hore A re pholose, A ke ke A re tlohela. Ha A lese ho re fa thuso eo re e hloka. Ha ho lebaka la hore re tšohle ha re na le Mopholosi ka lipelong tsa rōna. Molopolli O tla re pholosa kotsing ka mokhoa oo Eena A o bonang o lokile.

“Ba khopo ba tšoana le leoatle le tuluana.” Esaea 57:20. Sebe se sentse khotso ea rona. Ha ho motho ea ka tsebang ho kokobetsa litakatso tse busang ka lipelong tsa rōna. Le rōna joaloka barutuo, re sitoa ho khutsisa lifefe tse re tsukutlang. Empa leha lifefe li ka halefa joang kapa joang, ba talimang ho Jesu ka selo sena, “Morena, re pholose,” ba tla fumana pholoso. Mohau oa Hae o khutsisa ntoea ea litakatso tsa botho, ‘me pelo e phomole leratong la Hae. “A khutsisa sefefe, ‘me maqhubu a khaotsa ho befa. Ba thaba hobane ho khutsitse; a ba sesisetsa koug eo ba neng ba leba ho eona.” Pesalema 107:29,30. “Joale, erekaha re lokafalitsoe ka tumelo, re na le khotso le Molimo ka Morena oa rōna Jesu Krete.” Baroma 5:1.

[229] Mopholosi le ba tsamaeang le Eena, ba ile ba fihla lebopong e sale hoseng haholo. Letsatsi ha le chaba, khanya ea lona e ne e chabetse leoatle le naha ka hlohonolofatso ea khotso. Empa ha ba fihla lebopong, mahlo a bona a ile a teana le pono e tšosang le ho feta sefefe se halefileng. Banna ba babeli ba hlanyang, ba ile ba mathela ho bona joalokaha eka ba tla ba khaola likoto. Liketane tse neng li tlamile banna bana ha ba le litlamong, ‘me ba se ba li khaotse, li ne li ntse li leketla ho bona. Ba ne ba na le maqeba a tsoang mali. Mahlo a bona a ne a rotolohile, me meriri ea bona e le manyetse-nyetse e hlantse. Ba ne ba na le ‘mee e litšila, ba ne ba se ba shebahala joaleka libatana tse hlaha, eseng batho.

Barutuo ba ile ba baleha ke ho tšoha; empa ba phakisa ba qamaka Jesu. O ne A setse A eme moo ba ileng ba mo siea teng. Eena ea ileng A khutsisa sefefe, ha A ka A baleha. Ha banna bana ba khethetsang makoeba ba atamela Jesu, O ile A phahamisa letsoho lane le ileng la khutsisa maqhubu, ‘me banna bana ba sitoa ho Mo atamela.

Jesu A laela ka matla, hore meea e litšila e tsoe ka hare ho bona. Mantsoe a Hae a ile a phunyeletsa likelello tsa banna bana ba malimabe, tse neng li ntšofetse. Ba ile ba elelloa ka lerootho hore enoa ea pel’a bona a ka ba pholosa bademoneng ba ba sotlileng. Empa e ile eare ha ba leka ho phahamisa melomo ea bona ba re ba bua, ho kōpa mohau oa Hae, bademona ba bua ka maleme a bona, ba hoeletsa ba re, “U nkene ka’ng, Jesu Mora oa Molimo ea holimo-limo? Kea u rapela, u se ke ua ntlhōkōfatsa!”

Jesu O ile A botsa A re, “Lebitso la hau u mang?” Oa araba, oa re ho Eena; “Ke Lebōtho.” Bademona ba kōpa Jesu hore A se ke A ba ntša ka hare ho naha. Haufinyana le moo, letsoapong la thaba, ho ne ho e-na le mohlape o moholo oa likolobe o ntseng o fula. Bademona ba ikopela hore ba lelekeloe likolobeng tseo. Hang ka ho panya ha leihlo, mohlape ona oa mathela letšeng, ‘me oa fihla oa itihela ka teng, ‘me oa timela.

Ka eona nako eo, phetoho e kholo ea bonahala ho banna ba neng ba kenoe ke bademona. Kelello tsa bona tsa chabeloa ke leseli, Mahlo a bona a re qoatsi!, ‘me a phatsima ka ho boela malulong. Banna bana ba ile ba rorisa Molimo ka thabo.

Balisa ba mehlape ba ile ba bona tsena tsohle, ba le holim’a thaba, ‘me ba potlaka ho ea tsebisa beng ba bona ka tsena tse etsahetseng. Baahi bohle ba moo ba ile ba khobokana ho khahlanyetsa Jesu, ka ho tšoha le ka ho makala. Batho ba naheng eo ba ne ba ile ba phela ka tšabo ea bademona bao. Ho ne ho se ea ka pholohang, ha a feta moo ba neng ba le teng. Joale banna bana ba ne ba apere, ‘me kelello tsa bona li khutlile, ba mametse Jesu, ‘me ba Mo rorisa, Eena ea neng A ba folisitse. Empa batho ha ba ka ba nyakalla. Ba ne ba saretsoe ke ho lahlehelo ke likolobe, ho feta ho pholoso ha batšoaruo ba ba Satane.

Beng ba likolobe ba ne ba beile likelello tsa bona linthong tsa lefatše, ‘me ba sa tsotelle lintho tsa bohlokoa tsa bophelo ba moea. Jesu O ne A lakatsa ho tlosa ho thotofala ha boikhopolo ho neng ho

ba tšoare e le hore ba tie ba amohela mohau oa Hae. Empa ba ile ba fufatsoa mahlo ke ho halefela tahlehelo ea lintho tsa lefatše, hoo ba ileng ba sitoa ho eelloa mohau oa Mopholosi.

### **Tumelo Tsa Lefeela Li Tlisa Tsabo**

Liketsahalo tsa mehlolo li ile tsa tšosa batho. Ba ile ba nahana hore mohlomong ho ka 'na ha etsahala kotsi tse fetang ena, ha motho enoa oa moeti A ntse A le har'a bona. Ba neng ba tsetse leoatle le Jesu ba ile ba pheta kamoo ba neng ba le kotsing ea maqhubu le kamoo sefefe ka leoatleng se ileng sa khutsisoa. Empa mantsoe a bona ha a ka a natsoa. Ka ho tšoha, batho ba moo ba kōpa Jesu hore A tsamaee, 'me A phethisa kōpa ea bona. A kena ka seketsoaneng 'me A tšelela ka lebōpong le ka nqa e ngoe.

Batho ba Geresene ba ne ba tšaba ho bea maruo a bona a lefatše tsietsing hoo Ea neng A fentse khosana ea lefifi mahlong a bona ba ileng ba Mo nka joaloka ntšunyekhane, 'me ba koalloya mpho ea lehohmo kante. Le joale hona le ba bangata ba hanang ho latela mantsoe a Krete hobane ho a mamela ho tla etsa hore ba lahle lintho tsa lefatše. Ba bangata ba hana mohau oa Hae, 'me ba etse hore moea oa Hae O tsoe kahare ho bona, hobane ba tšaba hore boteng ba Hae bo ka etsa hore ba lahleheloe.

[231] Empa batho bao ba neng ba qeta ho pholoso ba ne ba lakatsa ho ba 'moho le ea ba pholositseng. Ha ba le pel'a Hae ba ne ba iikutloa ba sireletsehile bademoneng ba neng ba ba phelisa habohlōkō ba senya botho ba bona. Ba ile ba tla ho Jesu ha ba bona A atamela seketsoaneng, 'me ba kōpa hore A ba boloke haufi le Eena. Empa Jesu O ile A re ba ee hae 'me ba pake ka lintho tse kholo tseo Morena A ba etselitseng tsona.

Ona e ne e le mosebetsi oo ba tšoanelang ho o etsa -ho ea lelapeng la bohetene, 'me ba pake ka mahlohonolo ao ba a fumaneng ho Jesu. Ho ne ho le thata ho bona ho arohana le Mopholosi. Ba ne ba tla kopana le mathata. Mosebetsi ona o ne o bonahala o tla ba thatafalla, hobane e ne e le khale ba arohane le batho. Empa hang ha Jesu A ba bontša tōkelo ea bona, ba ile ba itōkisetša ho etsa. Ba phunyeletsa naha ea Decapolise, 'me hohle ba phatlalatsa matla a Hae a pholosang, le kamoo a ba lokolotseng bademoneng. Ka ho etsa mosebetsi ona, ba ne ba tla fumana mahlohonolo a fetang a

ha ba ne ba tsamaile le Eena. Re atametsoa pel'a Mopholosi ha re phatlalatsa "Litaba tse molemo" tsa pholoso.

Bademona bana ba babeli, ke bona barōmuoa ba pele bao Krete A ba rōmetseng ho ruta sebakeng sena sa Decapolise. Banna bana ba ile ba fumana tlotla ea hore ka nakoana e seng kae, e be bona feela ba mamelang lithuto tsa Krete. Empa botho ba bona bo fetohileng, e ne e le bopaki ba hore Jesu ke Mesia. Ba ne ba bolela seo ba se tsebang, seo ba se boneng, seo ba se utloileng, le ho se phopholetsa, ka matla a Krete. Sena ke seo e mong le e mong ea utloileng mohau oa Molimo a ka se etsang. Sheba 1 Johanne 1:1-3.

Haeba re 'nile ra latela mehato ea Jesu, re tla ba le seo re ka se bolelang sa kamoo A re tsamaisitseng: kamoo re iteketseng litšepiso tsa Hae 'me ra li fumana e le 'nete. Bona ke bopaki boo Morena oa rōna A re biletsang ho bo fana.

Lehoja batho ba naheng ea Bagerasa ba ne ba sa ka ba amohela Jesu, ha A ka a ba tlohella lefifing leo ba neng ba le khethile. Ba ne ba sa ka ba utloa mantsoe a Hae. Ba ne ba sena tsebo ea sena seo ba neng ba se hana. Ka lebaka leo A ba rōmella leseli hape ka bao ba neng ba keke ba hana ho ba mamela.

Ho timela ha likolobe ho ile ha phaphamisa naha eohle, ho feta kamoo ho neng ho ka etsahala, ho shebisa batho ho Jesu. Banna bao a neng A ba folisitse ba ne ba setse e le lipaki tsa matla a Hae, le mecha ea khanya, e le barōmuoa ba Mora oa Molimo. Monyako o ile oa buloa sebakeng seo. Ha Jesu A khutlela Decapolise, liketekete tsa batho li ile tsa utloa molaetsa. Le tšebeletso ea bobbe e ka fetoloa hore e hlahise molemo.

[232]

Batho bana ba naheng ea Bagerasa, ba neng ba phela mabitleng, ba tlanngoe ke litakatso tse matla tse nyonyehang, tseo ba neng ba sitoa ho itokolla ho tsona, ke pontšo ea seo batho ba ka beng ba fetohile sona, hoja ba tlohella pusong ea Satane. Satane o ntse a susumetsa batho ka linako tsohle, hore a tsamaise likelello tsa bona 'me a ba etse hore ba bake meferefere le botlokotsebe. O fifatsa kelello 'me a silafatse moea. Ka nako tsohle ha batho ba hana memo ea Mopholosi, ba inehela Satane. Ba bangata malapeng, mosebetsing, esita le kerekeng ba etsa sena kajeno. Ka lebaka lena lintoa le botlokotsebe li atile lefatseng 'me 'moo batho ba lulang, lefifi la boitsoaro le khurumelitse. Satane o etella batho pele hore ba etse lintho tse mpe ka ho fetisisa ho fihlela ho tletse bobbe le tšenyeho.

Tsireletso e ngoe feela matleng a Satane, ke boteng ba Jesu. Satane o senotsoe ka pel'a batho le mangeloi hore ke sera sa motho, ke sesinyi; 'me Krete Eena O senotsoe e le motsoalle le Molopolli oa motho.

Molimo O biletsa hore "ba tšoane le Mora oa hae." Baroma 8:29. 'Me meea e nkileng boemo bo tlase ba ho ba lisebelisuo tsa Satane e ka fetoha ka Krete hore e be barōmuoa ba ho loka ba etellang pele ho paka ka tse kholo tseo Molimo O li entseng.

## KHAOLO EA 36—KAMO EA TUMELO E TLISA PHOLISO [233]

*[E itšetlehile ka Matheu 9:18-26; Mareka 5:21-43; Luka 8:4056.]*

Jesu ha A khutla Gergesene, A leba lebopong le ka bophirima la Leoatle la Galelea, ‘me A fihlela matšoele a batho a bokaneng moo ho mo khahlanyetsa. O ile A qeta nako moo, A ntse A ruta, A bile A folisa. Ha A tloha moo, A ea tlung ea LeviMatheu, ho kopana le balekhethe moketeng. E mong oa babusi ba sinagoge ea bitsoang Jairuse, a Mo fumana hona moo. O ile a bua a khathatsehile haholo are, “Morali oa ka o lekheteng la ho shoa; ak’u tle, u ‘mee matsoho, hore a tle a fole, ‘me a phele.”

Jesu A tloha hang le musi enoa hoea lapeng la hae. Barutuo ba ile ba makatsoa ke hore ebe O ile A ananela kōpo ea moruti enoa oa moikhohomosi, empa leha ho le joalo ba ile ba Mo felehetsa, ‘moho le batho ba bang. Jesu le bao A tsamaeang le bona, ba ne ba tsamaea butle hobane batho ba ne ba Mo bokanetse ka nqa tsohle. Jesu O ne A tlameha ho emisa, makhetlo a mangata, ho folisa ba kulang, le ho khothatsa ba mesarelong, ‘me ‘musi o ne a se a feletsoe ke mamello.

Ha ba ntse ba tsamaea, lenqosa le ile la fihla ka molaetsa oa hore morali oa Jairuse o se a shoele. Jesu A utloa molaetsa ona, ‘me A re ho ‘musi oa sinagoge, “Se tšabe; lumela feela, ‘me o tla fola.”

Ba ile ba potlakela lelapeng la ‘musi. Ha A fihla moo, A fumana ba rekiloeng hore ba lle, le ba teang liphala, ba tlatsitse lerata. Jesu O ile A leka ho ba khutsisa, A re, “Ke’ng ha le tlatsa lerata, le lla? Ngoana ha a ea shoa, o mpa a robetse!” Ba ile ba halefisoa ke mantsoe ana a motho eo ba neng ba sa mo tsebe, hobane ba ne ba ile ba bona ngoana enoa ha a e-shoa. Jesu A re ba tsoe, ‘me A kena ka moo mofu a leng ka teng, A e-na le ntate le ‘m’a ngoana, hammoho le Peterose, Jakobo le Johanne. [234]

Jesu A atamela moalong, A tšoara letsoho la ngoanana, eaba o bua ka bonolo A re “Ngoanana, ke re ho uena: Tsoha!”

Kapele-pele setōpō sa sisinyeha, ‘me a tona mahlo joaloka motho ea tsohang borokong, ‘me ngoanana a talima ba neng ba bokane moo ka makalo. A tsoha, ‘me batsoali ba hae ba mo aka ka thabo.

Jesu ha A ntse A tsamaea A e-ea ha musu, A kopana le mosali oa batho, eo ka lilemo tse leshome le metso e ‘meli a neng a tšoeroe ke lefu, le neng le mo sulafallelitse bophelo. O ne a qetile chelete ea hae ka lingaka le litlhare, empa a qetella a bolelletsoe hore lefu la hae ha le na pheko. Tsepo ea hae e ile ea tsoha, ha a utloela ka Krete. Ha a ne a ka fihla ho Eena, o ne a tla fola. Leha a ne a fokola hakaalo, o ile a ea lebōpong la leoatile moo Jesu A neng A ntse A ruta. Me o ile a leka ho itshohlometsa har’a matsoele, ho ea fihla ho Eena, empa a hlōloa. O ile a Mo latela ho tloha ha Levi-Matheu, empa a ‘na a sitoa ho fihla ho Eena. Jesu O ile A feta pel’a moo mosali enoa a neng a le hona teng, moo mosali enoa a seng a khathala matla.

O ne a le pel’a ngaka e kholo! Empa har’a moferefere oo, a sitoa ho bua le Eena, kapa hona ho Mo bona hantle. Ka ho tsoha hore O tloha A mo phonyoha hape, o ile a kenella har’a batho a ntse a itjoetsa a re, “Ha nka mpa ka ama seaparo sa hae, ke tla fola.” Eitse ha Jesu A feta, mosali a atleha ho ama qola ea seaparo sa Hae feela. O ile a ama seaparo sena, ka tumelo eohle eo anang le eona; ‘me hang mahlaba le bofokoli tsa mo lesela, ‘me bakeng sa tsona ha tlala mafolo-folo le bophelo bo phethehileng.

O ile a leka ho tloha har’a mokhopi oo ka pelo e tletseng teboho, empa hang Jesu A ema. A qamaka ‘me A botsa ka lentsoe le utloahalang har’a moferefere oo, A re, “Ea nkamileng ke mang?” Ena e ile ea utloahala e le potso ea mohlolo, hobane O ne A angoa ka nqa tsohle.

Petrose ka mokhoa oa hae, a potlaka a botsa a re, “Monghali, matsoele a penyane holim’a hao, ‘me aa u patisa.’ Empa Jesu a re: ‘Ho na le ea nkamileng, hobane ke utloile hore matla a tsoile ho ‘na.’”

[235] Mopholosi O ne A tseba ho khetholla kamo e entsoeng ka tumelo, ho e sa tsotelleng. Tsepo e joalo e ne e ke ke ea tlohella, ea se ke ea thoolletsoa. O ile A khothatsa mosali enoa oa moikokobetsi, ka mantsoe a tla fetoha lehlohonolo ho balateli ba Hae ho isa qetellong.

Jesu A talima ka lehlakoreng leo mosali a neng a le ka ho lona, ‘me A botsa ka phehello hore na O amiloe ke mang. Mosali a elelloa hore o sitoa ho ipata, ‘me a fetela kapele a thothomela. O ile a pheta



tša tšotleho ea hae, le ka moo a fumaneng pholiso ka likhapha tse tletseng teboho. Jesu A re ho eena: “Morali, tumelo ea hao e u folisitse; e-ea ka khotso!” Ha a ka a lumella hore a tle a nahane hore o folisitsoe ke ho ama qola ea seaparo sa Hae. Pholiso e ile ea tlišoa ke tumelo e ileng ea itšoarella ka matla a Molimo.

### **Tumelo E Phelang Ea Folisa**

Ha ho thuse letho ho etsa bosaoana ka taba tša bolumeli, kapa ho rapela ho se nang botebo le tumelo. Tumelo e amohelang Krete e le Mopholosi feela, oa lefatše e ke ke ea folisa moea. Tumelo ha se feela ho utloisisa ‘nete. Ha hoa lekana ho lumela litaba tša Krete; re tšoanela ho lumela ho Eena. Tumelo e pholosang ke tumellano eo ba amohelang Krete, ba itherehang ho ba le likamano le Molimo. Tumelo ea sebele e tlatsa mafolofolo, le tšepo e tebileng, ‘me e fa moea matla a tlhōlo.

Hoba A folise mosali, Jesu O ile A rata hore a bolele ka lehlohonolo leo a le fumaneng. Melemo e fumanoang lentsoeng, ha ea tšoaneloa ho patoa. Leholimo le sebelisa monyetla oa boipolelo ba ho tšepahala ha Hae ho rona ho senola Krete lefatseng. Bopaki ba maiphihlelo a rōna bo na le tšusumetso e fetisisang. Sheba Esaea 43:12. Bopaki ba rōna ba mohau oa Hae ha bo tšhelitsoe ke bophelo ba bokreste, bona le matla a ke keng a hloloa pholosong ea meea.

Ha balepera ba leshome ba e-tla ho Jesu ho folisoa, ba ile ba hloekisoa kaofela; empa ke a le mong feela, ea ileng a khutla ho Mo fa tlotla. Ke ba bangata hakaakang ba ntseng ba etsa joalo! Morena O phahamisa bakuli, O pholosa ba tsietsing, O rōmela mangelo ho ba pholosa tsietsing, ho ba tšireletsa litlokotsing le tšenyehong; (Pesalema 91:6) empa ha ba tsotelle lerato leo le lehlo la Hae. Ba koalla lipelo tša bona mohau oa Molimo, ka ho hloka teboho.

[236]

Ke molemong oa rōna, hore re hopole limpho tsohle tša Molimo ka nako tsohle. Tumelo ea rōna e tla matlafatsoa. Ha re hopoleng ke hona lerato le mohau oa Molimo. ‘Me ha re ntse re ikhopotsa tseo Molimo o re etselitseng tsona, re ‘ne re ipotse re re, “ke tla buseletsa Morena ka’ng?” Pesalema 116:12.

**KHAOLO EA 37—BA-EVANGELI BA PELE**

*[E itšetlehile ka Matheu 10; Mareka 6:7-11; Luka 9:1-6.]*

Ba-apostola ba ne ba tsamaile le Jesu ka maoto ho feta Galelea. Ba ne ba ile ba tsamaea le ho buisana le Mora oa Molimo ‘me ba ithuta ho sebeletsa batho. Barutuo ba ne ba laba-labela ho bebofatsa mosebetsi oa Jesu oa ho sebeletsa matsoeletšoele. Ba ne ba thusa ka ho Mo tlišetsa ba kulang le ho ba khothatsa. Ba ne ba sheba hore na ho na le thahasello ho ba Mo mametseng, ‘me ba ba hlalositse mangolo.

Empa ba ne ba ntse ba hloka ho ba le maiphihlelo a ho sebetsa ba le bang. Ba ne ba ntse ba hloka ho koetlisoa ka thata le ka mamello. Joale O ile A ba rōmela ho ea e le baemeli ba Hae, A sa ntsane A e-na le bona, e le hore A tle A ba eletse le ho lokisa liphoso tsa bona.

Hangata barutuo ba ne ba makatsoa ke lithuto tsa baprista le bafarisi, ‘me ba ne ba tlišetsa Jesu mathata ana a bona. O ne A ba matlafatsa hore ba itšepele lentsoe la Molimo, ‘me A ba lokolla maqhameng a moetlo. Ha ba arohane le Eena, ba ne ba hopola lentsoe le leng la Hae le mokhoa oo A neng A talima ka ona. Hangata ha ba ne ba loantšana le lira tsa molaetsa, ba ne ba pheta mantsoe a Hae.

Jesu O ile A bokella barutuo ba Hae ba leshome le metso e ‘meli, ‘me A ba rōma har’a metse le metsana ka bobeli. Ka tsela ena ba ne ba ka eletsana, ba rapela ‘moho ‘me ba thusana moo ba fokolang.

Mosebetsi oa ho hasa molaetsa o ne o ka atleha ka ho fetisa ha mohlala ona o ne o ka lateloa.

[238] Barutuo ba ne ba laetsoe hore ba se kene likhang tsa hore na Jesu ke Mesia kapa che; empa ba ne ba laetsoe ho folisa ba kulang le ho tsosa bafu le ho ntlafatsa balepera le ho leleka bademona; “Le amohetse feela, fanang feela.”

Jesu O ne A qeta nako e ngata ho foliseng bakuli ho feta ho ruteng. Hohle moo A neng A e-ea teng, bohle ba ileng ba thusoa, ka

mohau oa Hae, ba ne ba nyakalla bophelong bo botle. Ba bangata ba ne ba qala ho utloa ha motho a bua, ka Eena; ha ba bang, lentsoe la pele leo ba kileng ba le bua e ne e le lebitso la Hae; ba bang ba qalile ho bona sefahleho sa motho ka sa Hae. Ha A ne A feta har'a metse, le metsana, O ne A tšoana le moea oa bohlokoa O hasang bophelo le thabo.

Balateli ba Krete ba tšoanela ho sebetsa joaloka Eena. Re tšoanela ho fepa ba lapileng, ho imolla ba bohlōkōng, le ho tsosolosa tšepo ho ba nyahameng. Lerato la Krete le ipontsang ka ho sebeletsa ba bang ka boitelo, le tla atleha ho fetola ea etsang bobbe ho feta sabole kapa lekhotla la molao. Hangata pelo ha e utloa lerato la Krete ea qhibiliha. Molimo O lakatsa ho ba motšelisi eo lefatše le e-song ho Mo bone ka basebeletsi ba Hae.

Lekhetlong lena la pele la thomo ea bona ba ne ba laetsoe hore ba etele “linkung tse lahlehileng tsa ntlo ea Iseraele” feela. Molimo O ne O rerile hore ha Bajuda ba ne ba ka amohela lentsoe, O ba etse manqosa A ‘ona ho isa lentsoe ho balichaba. Ka lebaka leo ba ne ba tšoanetse ho utloa lentsoe pele.

Leetong lena la bona la pele, barutuoa ba ne ba tšoanetse ho ea libakeng tseo Jesu A neng A se A ile a ba ho tsona ‘me A thea setsoalle. Ba ne ba tšoanetse ho itōkisetša lecto lena ka mokhoa o bobebe. Ba ne ba sa tšoanela ho apara joaloka baruti. Ba ne ba tšoanetse ho apara ka ho tšoana le bafumanehi ba tlase. Ba ne ba sa tšoanela ho bokella batho ‘moho, ho etsa tsebeletso; ba ne ba tšoanetse ho kena ntlo le ntlo. Hohle moo ba eang, ba ne ba tšoanela ho ananela kamohelo ea bao ba neng ba ka ba amohela, joalokaha ba ne ba ka etsa ho Krete. Ha ba kena tlung, ba ne ba tšoanetse ho lumelisa, ba re “khotso e be tlung ena.” Luka 10:5. Lelapa le joalo le ne le tla hlohonolofatsoa ka lithapelo, le lipina tsa bona tsa thoriso, le palo ea mangolo. Molaetsa oo ba neng ba tšoanela ho o tsamaisa e ne e le lentsoe la bophelo bo sa feleng, ‘me bokamoso ba batho bana bo ne bo tla itšetleha ka hore na ba o amohela kapa ba ea o hana. Sheba Matheu 10:14,15.

Jesu O ile A re, “bonang, ke le rōma joaloka linku har’a liphiri; ha ho le joalo le be masene joaloka linōha, ‘me le hloke mano joaloka maeba.” Jesu ha A ka A pata lentsoe leha le le leng feela, la ‘nete, empa O ne A le bua ka pelo e tletseng lerato. O ne A sa buise batho hampe, O ne A ke ke A utloisa moea bohlōkō. O ne

A sa buelle bofokoli ba botho. O ile A supa bobo ba boikaketsi le bokhopo A sa tšabe, empa e le ka lentsoe le tletseng meokho ha A etsa likhalemelo tsena. Moea o mong leo mong e ne e le oa bohlokoa mahlong a Hae.

Basebeletsi ba Krete ba tšoanela ho ba haufi le Molimo esere mohlomong ha ba qholotsoa ebe botho ba bona bo a tsoha, ebe ba bua mantsoe a sa lokang a kang metsi a sefefe, a sa tšoaneng le phoka kapa lipula tsa melupe tse nosetsang lijalo tse seng li omella. Basebeletsi ba Molimo ba tšoanela ho talima botle ba Krete ba sa khaotse, e le hore ba tle ba hase lentsoe ka bokhabane ba leholimo. ‘Me moea o buang ka bonolo leha o qholotsoa, o tla atleha ho buella ‘nete ho feta khang, leha e kaba e na le matla a makae.

### **Re Tlameha Ho Kopana Le Khanyetso**

Jesu ha A tsoela pele ho laea barutuo A re “Hlokomelang batho.” Ba ne ba sa tšoanela ho bea tšepo ea bona ho batho ba sa tsebeng Molimo, le ho ba phetlela lifuba; hobane hona ho ne ho tla fa barōmuoa ba Satane monyetla. Litlhahiso tsa batho li khahlanong le meralo ea Molimo. Molimo O hlabisoa lihlong ‘me lentsoe le tlontlolloe, ha basebeletsi ba Hae ba itšetleha ka likeletso tsa batho ba sa tsamaisoeng ke Moea o Halalelang.

[240] “Ba tla neelana ka lōna makhotleng,...Le tla huleloa kapele ho babusi le mahosi ka baka la ka, hore e be bopaki ho bona le ho bahedene.” Basebeletsi ba Krete ba hlahisoa ka pel’a batho ba phahameng ba lefatše bao ntle le hore ho etsahale joalo, ba neng ba ke ke ba utloa evangeli. Ereka ba ‘nile ba utloa liketselletso feela le seo ba-Krete ba se lumelang, mokhoa o ba mong feela oa hore ba fumane seo e hlileng eleng ‘nete. Mokhoa oo ke ha baqosuoana bana ba arabella tumelo ea bona ka kho- tla. Jesu O ile A re, “Ka eona nako eo le tla neoa hore na le re’ng, hobane ho tla be ho sa bue lōna, empa e tla be e le Moea oa Ntat’a lōna o buang ka lona.” Bao ba hanyetsang ‘nete ba tla ema, ‘me ba qose barutuo. Empa bana ba Morena ba tšoanela ho latela mohlala oa boMolimo oa bonolo. Kahoo, babusi le batho ba tla bona phapang lipakeng tsa maqosa a Satane le baemeli ba Krete.

Basebeletsi ba Krete ba ne ba sa tšoanela ho lokisa mantsoe ao ba neng ba tla a bua ha ba qositsoe. Moea o Halalelang O ne O tla ba

hopotsa linnete tseo ba neng ba tla li bua, tse hlokahalang. Mangolo ao ba ithutileng ona ka hlōkō, a ne a tla chabisoa likelellong tsa bona. Empa haeba ho ne ho e-na le ea sa elang mantsoe a Kreste hlōkō, o ne a ke ke a lebella Moea o Halalelang ho mo hopotsa ona.

### Se Tsoanelang Ho Etsua Ha Lithoriso Li Fihla

Barutuo ba Kreste ba ne ba tla ekoa le ke ba amanang le bona malapeng: “Le tla hlouoa ke bohle ka baka la lebitso la ka, empa ea tla tiisetša ho isa qetellong, o tla pholosa.” Empa o ile a ba laea hore ba se ke ba inehella ho hlorisoa, ha ho sa hlokahale. Eena ka bo-Eena, O na A ee A tlohe sebakeng se seng sa mosebetsi A ee ho se seng, e le ho balehela bao ba batlang ho felisa bophelo ba Hae. Ka mokhoa o joalo basebeletsi ba Hae, ba ne ba sa tsoanela ho khathatsoa matla ke lithoriso, empa ba ne ba tsoanetse ho ea sebakeng se sele, ho sebeletsa meea.

Empa ho sa tsotellehe hore na kotsi ke ea mofuta ofe, balateli ba Kreste ba tsoanetse hore ba se ke ba ipata. Ha ba ea tsoanela hore ba emele hore ba tiisetsoe hore ba tla sireletsoa pele ba ka qala mosebetsi oa ho bolela ‘nete. Jesu O itse, “Seo ke le bolellang sona lefifing, le se phete leseling; seo le se utloang le se nyenyeletsoa, le se phatlalatsa le le holim’ a lihlōhlōlō.”

Jesu ha A e-s’o rekise ka ‘nete. Pelo ea Hae e ne e tšoloha ke lerato la batho, empa O ne A sa ba kothaletse sebe. O ne A ba rata hoo A neng A ke ke A ba tlohella ho etsa lintho tse neng li ka felisa meea ea bona. O ile A sebetsa ka thata hore motho a tsebe ho ikemela, le ho emela lintho tse sa feleng. Basebeletsi ba Kreste, ba bilelitsoeng mosebetsing o tsoanang le ona, ba tsoanetse ho ela [241] hlōkō hore esere ka ho leka ho qoba phapang, ba lahla ‘nete. Khotso ea ‘nete e ke ke ea fumanoa ka ho lahla melao. ‘Me ha ho motho ea ka emelang ‘nete a sa phephetse khanyetso. Jesu O ile A bolella barutuo ba Hae A re, “Le se ke la tšaba ba bolaeang ‘mele, empa ba ke ke ba bolaea moea.” Ba tsoanetse ho tšaba feela hore esere ba koenehela ‘nete, ‘me ba senya ‘nete eo ba hlomphiloeng ka eona.

Satane o sebeletsa ho tlatsa lipelo tsa batho ka pelaelo. O ba leka hore ba oele sebeng, ‘me ebe ba se ba ipona ba le litšila haholo hoo ba ke keng ba atamela Ntate ea maholimong. Morena O utloisisa tsena tsohle. Jesu O tiiselitse barutuo ba Hae hore Molimo O

mohau. O re ha ho mefehelo, kapa lehlaba kapa bohlokō ba pelo tseo ba ka li utloang eaba Molimo ha O li utloe.

Bibele e re bontša hore Molimo sebakeng sa ‘ona se halalelang, ha Oa lula O le mong, O khutsitse, empa O potapotiloe ke likete-kete tsa libōpuoa tse halalelang, tse emetseng ho etsa thato ea ‘ona. O na le likamano le likarolo tsohle tsa ‘muso oa Hae, ka mecha eo re sa e elelloeng, esita le lefatše lena la rōna. Molimo O inametse lefatšeng ho utloa sello sa ba hateletsoeng. O araba thapelo e ‘ngoe le e ‘ngoe e tsoang pelong, ka mantsoe ana, “ke ‘na enoa.” O phahamisa ba matšoenyehong le ba hatikeloang ka maoto. O rōmela lengeloi hore le be haufi ‘me le pholose nakong ea meleko, le mathata.

Jesu O ile A tsoela pele A re: Ha le mpoela pela batho, le ‘na ke tla le bolela pela Molimo le mangeloi a halalelang. Le tšoanetse ho ba lipaki tsa ka lefatšeng, ‘me ‘Na Ke tla ba moemeli oa lōna leholimong. Molimo ha O talime limelo tsa lōna tse fosahetseng, empa O le bona le phethehile ka ‘na. ‘Me e mong le e mong ea nkang karolo sehlabelong sa Ka, bakeng sa ba lahlehileng, o tla nka karolo khanyeng le monyakeng oa ba pholositsoeng.

Ea bolelang ka Jesu, o tšoanetse ho ba le Jesu ka hare ho eena. Leha barutuo ba ka bua ka bokheleke ka lithuto tsa Kereke, empa ha ba se bonolo le lerato le joaleka la Krete ha bo ‘Molele pel’ a batho. Moea o khahlanong le moea oa Krete oa mo latola. Batho ba ka latola Krete ka ho bua hampe, ka ho bua ka boeatla, ka ho bua mantsoe a senang ‘nete, a sa lokang. Ba ka Mo latola ka ho koekoetla meroalo ea bophelo, ka ho ikamahanya le lefatše, ka ho hloka hlomphe, ka ho ikemela, ka ho belaela, le ho ikenya likhathatsong. “Empa ea ntatolang pel’ a batho, le ‘na ke tla mo latola pel’ a Ntate ea maholimong.”

[242]

Mopholosi O itse, “ha kea tlisa khotso, ke tlisitse sabole.” Mefere-fere ha e tlisoa ke evangeli, empa ke hobane batho ba e loantsa. Litlhoriso tse boima ka ho fetisisa ke tse tsoang lapeng, ho furalloa ke metsoalle eo a e ratang ka ho fetisisa lefatšeng. Empa Jesu O ile A re, “Ea ratang ntat’ ae kapa ‘m’ ae ho mpheta ha a ntōkele; ea ratang mora kapa morali ho mpheta ha a ntōkele, ‘me ea se nkeng sefapano sa hae a ntatela ha a ntōkele.”

“Ea le amohelang oa nkamohela, ‘me ea nkamohelang o amohela ea nthomileng.” Molemo o mong le o mong o etsoang ka lebitso la Hae, o tla putsoa. O akaretsa ba fokolang le ba tlase, o re, “Ea

fang e mong oa ba banyenyane bana mohope oa metsi a pholileng kahobane e le morutuo, ruri kea le bolella, ha a ka ke a hloka moputso oa hae.”

Jesu O ile A qetella joalo, ho laea barutuo. Ba leshome le metso e ‘meli ba ile ba ea, joalokaha le Eena A ile A etsa joalo, “ho bolella mafutsana molaetsa o molemo, o nthometse ho phatlalletsa bathopuo tsa tokoloho, le lifofu hore li tla tutuboloha, le ho lokolla ba hateletsoeng.” Luka 4:18.

[243]

## **KHAOLO EA 38—KRESTE LE BA LESHOME LE METSO E ‘MELI BA PHOMOLA**

*[E itšetlehile ka Matheu 14:1,2 12,13; Mareka 6:30-32; Luka 9:7-10.]*

Ha ba khutla leetong la bona la boruti, “Baapostola ba phuthehela ho Jesu, ba mo tsebisa tsohle tseo ba li entseng, le tseo ba li rutileng. A re ho bona: ‘Tloong, re eeng nahathothe moo ho leng ngoèsè, le phomole hanyenyane.’”

Barutuo a ba ile ba tseba ho phetela Jesu ka bōlōkōlōhi, ka maiphihlelo a bona a bo-evangeli, a monate le a bohōkō, hobane ba ne ba na le likamano tse tebileng le Eena. Ha ba ntse ba Mo phetela ka maiphihlelo a bona, O ile A eelloa hore ba hloka ho koetlisoa hape, le hore ba hloka phomolo.

Empa moo ba neng ba le hona teng, ho ne ho sena boikhutso, hobane “ba tlang le ba tlohang ba ne ba le bangata, ‘me ba hloka le sebaka sa ho ja.” Batho ba ne ba bokanetse Jesu, ba batla ho folisoa le ho mamela mantsoe a Hae. O ne A bonahala ho ba bangata joaloka mohloli oa mahlohonolo ohle.

Empa joale Krete O ne A batla ho ikhutsa, hobane O ne A batla ho buisana le barutuo a ba Hae. Ba ne ba ile ba ba le matšoenyeho mosebetsing oa bona, ‘me ba sitoa hore na ba ka etsa joang. Joale ba ne ba hloka hore ba phomole ‘moho le Jesu, ‘me ba buisane, A ba laee hore na ba sebetse joang ka moso. Ba ne ba iteletse ho sebeletsa meea, ‘me ba ne ba khathetse likelellong le ‘meleng. Ho ne ho ba lokela hore ba phomole.

[244] Joaleka ha barutuo a ba ne ba ile ba e-ba le katleho mosebetsing oa bona, ba ne ba le kotsing ea hore ba ka inkela tlōtla ea katleho eo, ‘me ba tlala boikhōhōmōso moeeng, ba oela lerabeng la Satane. Ba ne ba hloka hore ba buisane le Krete, le tlhaho esita le lipelo tsa bona.

Ke ka nako ena, Jesu A ileng A fumana molaetsa oa lefu la Mokolobetsi. Hona ho ile ha tlisa ka mokhoa o hlakileng maikutlong



a Hae hore na le Eena O il' o fella hokae. Baprista le baruti ba ne ba Mo shebile, 'me lihloela tsa bona li ne li Mo lisitse hoohle, 'me liteko tsa ho Mo felisa li ne li ntse li tota.

Litaba tsa Jesu le mosebetsi oa Hae, li ile tsa fihla litsebeng tsa Heroda, 'me o ile a re, "Motho eo ke Johanne Mokolobetsi; o tsohile bafung;" 'me o ne a lakatsa ho bona Jesu. Heroda o ne a le matsoalong ka mehla, hore mefereferere e ka 'na ea tsoha, ea etsa hore a theohe setulong, 'me ebe sechaba sa Bajuda se pholoha jokong ea Baroma. Moea oa ho fetohela puso o ne o tletse bathong. Ho ne ho totobetse hore Krete A ke ke A hlola A etsa mosebetsi oa Hae pepeneng, 'me O ne A laba-labela ho tsoela ka thoko ho se hokae, A tlohe moferefereng oa matšoele.

Barutuo ba Johanne ba ile ba epela setopō se khaotsoeng sa Hae, ka lipelo tse tletseng masoabi. Ha ba qeta "ba nt' o ea tsebisa Jesu." Barutuo bana ba ne ba ile ba shoela Krete mona, 'me ba sa kholoe hore molaetsa oa Hae ke oa leholimo, hobane ha A ka A lokolla Mokolobetsi. Empa joale, ba ne ba laba-labela ho tselisoa tahlehelong ea bona, le ho supisoa tsela bakeng sa mosebetsi oa bona. Ba ile ba tla ho Jesu 'me ba kopanela tšebetso le Eena.

Ka leboea ho letša, ho ne ho e-na le sebaka se itšekileng se setle, se nchafalitsoeng ke botalana ba nako ea hoetla. Ba ile ba leba teng, ka liketsoana tsa bona. Mona lintho tsa tlhaho li ne li phomotsa, li khatholla kelello. Mona Krete O ne A ka tseba ho buisana le bona ho se likhathatso kapa liqoso tsa bangoli le bafarisi tse ka ba tšoenyang.

### Ba Khatholoha

Nako eo Krete le barutuo ba Hae ba e qetileng ba phomotse, e ne e se ea boithabiso. Ba ne ba buisana ka mosebetsi oa Molimo le ka hore na ba ka matlafatsa tšebetso ea bona joang. Krete O ile A tšoea liphoso, 'me A ba bontša mokhoa o motle oa ho buisana le batho. Ba ile ba matlafatsoa ke matla a leholimo, 'me ba tsosolosa ka tšepo le sebete.

Ha Jesu A re kotulo e kholo empa basebetsi ba fokola, O ne A sa khothaletse hore batho ba se ke ba phomola, empa O ile A re, "Rapelang mong' a kotulo hore a romele basebetsi kotulong ea hae."

Matheu 9:38. Molimo O ne O ke ke Oa imetsa ba fokolang feela ka boikarabelo, ebe O tlohella ba bang ba sa etse letho.

Kreste O ntse A bua mantsoe a khauhelo kajeno ho basebetsi ba Hae, o re, “Tloong, re eeng nahathothe moo ho leng ngoèsè, le phomole hanyenyane.” Ha se bohlokoa hore re be mosebetsing oa ho sebeletsa meea ea batho ka nako tsohle, hobane, meea le ‘mele ea rōna li ea khathala. Ho a hlokahala hore re sebetse ka boitelo, empa re tšoanetse hore re hlokomele, esere Satane a nka monyetla nakong eo re khathetseng, ‘me ebe mosebetsi oa Molimo oa senngoa.

Hangata ha mosebetsi o ata, ‘me batho ba atleha mosebetsing oa Molimo, eba ha ba sa rapela haholo, ‘me ebe moo tumelo ea bona le eona e fokotsehang. Ebe re khoehlisa boitšoareello ba rōna ho Molimo, ‘me re nke mosebetsi e le ona Mopholosi oa rōna. Ke matla a Kreste a etsang mosebetsi. Re tšoanetse ho qeta nako re nahana ka taba tsa Molimo, re rapela, re ithuta lentsoe. Ke mosebetsi o entsoeng o tšehelitsoe ka thapelo, o beiloeng o lokile ke Kreste feela o tla qetella o tsoetse molemo.

### **Eba Le Nako Ea Ho Buisana Le Molimo**

Ha ho mosebetsi o kileng oa ba mongata joaloka oa Jesu; empa ke hangata hakae A neng A fumanoa thapelong! Hangata re fumana lipolelo tse ngotsoeng, tse kang tsena, “Eare e sa le ka malungoalungoana, Jesu a tsoha, a tsoa, a ea nahathothe, a rapella teng.” “Matšoelehali a phuthehela ho tla mo mamela le ho folisoa maloetseng a ‘ona. Eena a ikela nahathothe, ‘me a rapela.” “Matsatsing ao ha etsahala hore Jesu a tsoela thabeng ho ea rapela, ‘me a sesa bosiu a ntse a rapela Molimo.” Mareka 1:35; Luka 5:15,16; 6:12.

[246]

Mopholosi O ile A fumana ho hlokahala hore A ke A khaotse ho sebetsa ka thata, le ho thusa batho ka nako e ngoe, e le hore A buisane le Ntat’ae ho se na ntho e kenang lipakeng. Joaleka rōna, O ne A itšetlehile ka Molimo ka ho tlala. Nakong e khutsitseng ea thapelo, O ne A kōpa matla, e le hore A fumane matla a ho phetha mosebetsi le ho fenyha meleko. Jesu O fetile har’a mathata ‘me A utloisoa bohloko moeeng. O ne A tseba ho rolela mahlomola a neng a Mo imetse, ho Molimo. Joaloka motho, O ne A lebisa likōpo tsa Hae teroneng ea Molimo ho fihlela botho ba Hae bo matlafatsoa ke Moea oa leholimo, o kopanyang botho le bo-Molimo. O ne A

~~fumana bophelo ho Molimo, e le hore a tle a tsebe ho fa lefatše bophelo. Le rōna re ka ba le maiphihlelo a joalo.~~

Le kajeno ha re ka nka nako ho ea ho Jesu, re Mo joetsa ka bohloki ba rōna, re ke ke ra soaba. Ke Moeletsi ea makatsang. Re mengoa ho kōpa bohlale ho Eena. “Molimo ea fang bohle ka matsoho a mabeli, a sa khanane.” Jakobo 1:5.

E mong le e mong o hloka maiphihlelo a ho tseba thato ea Molimo. Re tšoanetse ho ikutloela ka borōna, ha A buisana le lipelo tsa rōna. Ha mantsoe ohle A khutsitse ‘me re Mo mametse re khutsitse, khutso e etsa hore lentsoe la Molimo le hlake ho feta. Sheba Pesalema 46:10. Ke mona feela moo phomolo ea ‘nete e ka fumanoang. Moea o nchafalitseng joalo o tla senola matla a boMolimo, a tla fihlela lipelo tsa batho.

[247]

## **KHAOLO EA 39—“BA FEPENG E LE LONA”**

*[E itšetlehile ka Matheu 14:13-21; Mareka 6:32-44; Luka 9:1017; Johanne 6:1-13.]*

Nako ena e sa tloaelehang ea khutso e ile ea fela. Barutuo ba ne ba hopotse hore ha ho letho le tla ba khathatsa, empa hang feela ha matšoele a se a sa bone mosuoe oa leholimo, a ile a botsa a re, “O kae?” Ba bang ba ne ba ile ba bona moo A lebang teng le barutuo ba Hae. Ba bangata ba ile ba Mo latela ka maoto, ha ba bang bona ba ile ba kena liketsoaneng. Paseka e ne e se e atametse, ‘me baeti ba bangata ba neng ba le leetong la ho ea Jerusalema, ba ile ba bokana ho bona Jesu ho fihlela ho se ho bokane batho ba likete tse hlano, ho sa baloe bana le basali.

Jesu A talima letšoele lena, A le leralleng ‘me “a le utloela bohlōkō, hobane le ne le le joaloka linku tse hlokang molisa.” O ile A tloha moo A neng A phomotse teng ‘me A ea moo A neng A tla tseba ho ba thusa.

Batho ba ile ba mamela mantsoe a mohau, a neng a tsoa ho Mora oa Molimo, mantsoe a neng a folisa meea ea bona. Pholiso ea Hae e halalelang, e ne e tlisa bophelo ho ba shoang, phomolo le bophelo bo botle ho ba kulang. Letsatsi leo e ne e ka ba leholimong, ‘me ba ile ba lebala hore ba qetile nako e telele ba e-s’o ho je.

Letsatsi joale le ne le e-ea malikelong, empa batho ba ile ba ‘na ba lula. Jesu O ne A sebelitse letsatsi lohle, A sa ka A ja kapa hona ho phomola, empa O ne A sitoa ho arohana le matšoele ao a neng a Mo bokanetse.

Barutuo ba ile ba kōpa hore batho bana ba lokolloe ba tsamaee molemong oa bona. Ba bangata ba ne ba e-so ho je letho esale ba tsoha. Ba ne ba ka tseba ho reka lijo litorotsoaneng tse neng li le pel’a moo. Empa Jesu O ile A re, “ba fepeng e le lōna.” O ile A retelehela ho Filipi ‘me A botsa A re, “Re ka reka bohobe kae, hore batho baa ba je?” O ne A botša potso ena, e le ho leka tumelo ea morutuo enoa. Filipi o ile a talima bongata boo ba batho ba neng

[248]

ba bokane moo ‘me a araba ka hore, le ha ho ka rekoa bohobe ka lipeni tse makholo a mabeli, bo ke ke ba lekana ho fepa sechaba seo.

Jesu O ile A botsa hore na ho ka fumanoa lijo tse kae, ho batho ba neng ba bokane moo. Andrease o ile a araba a re, “Moshanyana o teng mona, ea nang le linkhoa tse hano tsa harese le litlhapi tse peli, empa hoo e ka ba eng ho batho ba bangata hakaale?” Jesu A laela hore ba li tlise ho Eena, le hore barutuo ba lulise batho fatše, ka lihlotšoana tsa mashome a mahlano kapa tsa lekholo, e le hore bohle e tle e be lipaki tsa seo A tla se etsa. Ha sena se se se etsahetse, Jesu “a nka linkhoa tse hano le litlhapi tse peli, a lelalla leholimong, a boka, a ngoatha bohobe, a bo nea barutuo ba hae, hore ba abele batho, le litlhapi tse peli a li arolela bohle. Bohle ba e-ja, ba khōra, eaba ho bōkelloa makumane le marathana a litlhapi a ileng a tlatsa lirōtō tse leshome le metso e ‘meli.” Eo ea neng A rutile batho tsela ea ho bopa khotso le thabo, O ne A tsotella le bohloki ba bona ba nama joaloka ba moea.

Jesu O ne A sa etse mohlolo haese ha A thusa bohloking, ‘me mohlolo o mong le o mong, o ne o etsetsoa ho tataisetsa batho sefateng sa bophelo. Lijo tsena tse neng li fepjoa batho ke barutuo, li ne li na le thuto ea bohlokoa. Lijo tsena e ne e le tse tloaelehileng ho batšoasi ba lihlapa. Jesu A ka be A ntse A ba etselitse lijo tsa boemo, empa li ne li tla sebetsa feela ho khotsofatsa litakatso tsa bona, ‘me li ba hlokele molemo le thuto. Batho bana ba ile ba thabela lijo tsena tse tlase tseo ba li lokiselitsoeng ke Jesu ho feta kamoo ho neng ho ka ba ka teng hoja e ne e le lijo tsa boemo.

Haeba batho ba ne ba ka tlohela lintho tsa bophahamo, ba latela melao ea tlhaho, ho ne ho tla ba le lijo tse ngata, ho lekana lelapa la batho. Batho ba ne ba sa tl’o batla lintho tsa mehlolo, ‘me ba ne ba tla fumana menyetla e mengata ea ho sebetsa ka litsela tsa Molimo. Empa boikhabo le ho tloaela litatso tse sa tloaelehang, li tlišitse sebe le masoabi lefatšeng.

Ho matšoele ao a khathetseng a lapileng, thuto e bonolo e bile tiisetso e seng ea matla a Jesu feela, empa le tlhokomelo ea Hae linthong tseo ba li hlokanang ka mehla bophelong. Mopholosi ha A tšepisa balateli ba Hae maruo. Ba ka phela bophelo bo tlase, ba bohloki, ba bofutsana. Empa lentsoe la Hae le tiisa hore ba tla fuoa seo ba se hlokanang, ‘me O ba tšepisitse se seholo ho feta lintho tsa lefatše, e leng boteng ba Hae bo tšelisang.

Molimo O etsa mohlolo tsatsi le leng le le leng ka ho hlahisa kotulo ea lefatše. Mosebetsi o tšoanang le oa ho fepa bongata o ntse o phethoa, ka lintho tsa tlhaho. Batho ba lema mobu ‘me ba jale peo, empa bophelo bo tsoang ho Molimo ke bona bo etsang hore peo e mele. Molimo ke ‘Ona O fepang likete-kete tsa batho, kotulong ea masimo a lefatše ka letsatsi le letsatsi. Batho ba nkile tšebetso ena ea matla a Hae e tlišoa ke lintho tsa tlhaho, kapa tšebetso ea batho. Ebe ho rorisoa motho sebakeng sa Molimo, ‘me ebe limpho tseo A li fanang, ka mohau, li etsoa thohako ho fapana le lehlohonolo. Molimo O lakatsa hore re bone Eena limphong tseo A re fang tsona. Mehlolo ea Jesu e ile ea etsoa ho phethisa sena.

### **Thuto Ea Bohlokoa Ea Ho Baballa**

Kamora’ hore bongata bo fepjoe ho ile ha sala lijo tse ngata. Empa Jesu O ile A re, “Bokellang makumane a setseng, hore ho se ke ha senyeha letho.” Thuto ena e ne e na le ntlha tse peli. Ha ho letho le tšoanetseng ho senngoa. Ho ke ho bokelloe sohle se ka thusang ba lapileng. Le lintho tsa moea li tšoanetse ho hlokomeloa ka mokhoa o tšoanang le ona. Batho ba ne ba lakatsa ho arolelana le metsoalle ea bona hae bohobe bo hlohonolofalitsoeng ke Kreste. Ka tsela e tšoanang ba neng ba le moketeng ba ne ba lokela ho fa ba bang bohobe bo theohang leholimong ho khorisa meea e lapileng. Ba ne ba lokela ho pheta tse molemo tseo ba ithutileng tsona ka lintho tse makatsang tsa Molimo. Ho ne ho se letho le tšoanelang ho lahleha.

[250] Mohlolo ona oa katiso ea mahobe o re ruta ho itšetleha ho Molimo. Ha Kreste A fepa batho ba likete tse hlano, ho ne ho sena lijo. Re Mo bona mona A le nahathothe. Empa O ne A tseba hore matsoele ana a batho a tla lapa ‘me a felloe ke matla, hobane O ne A tšoana le bona ka ho hloka lijo. Ba ne ba le hole le hae, ‘me ba bangata ba bona, ba ne ba hloka seo ba ka rekang lijo ka sona. Molimo O ne O beile Jesu moo ka mabaka ‘me Eena O ne A itsetlehile ho Ntat’ae ho fumana mokhoa oa ho thusa batho bana.

Le rōna re tsoanetse ho itsetleha ka Molimo. Ha rea tšoanela ho itahlela har’a mathata, ‘me ebe re sebelisa bohloko Molimo O re fileng bona hampe. Empa kamora’ hore re latele tataiso ea Hae, ha re feta har’a mathata, re tsoanetse ho kōpa thuso ho Eena Ea nang le

mekhoa e mengata ea ho re thusa. O thusa moea o mong le o mong o thulanang le mathata ha o leka ho bōlōka litsela tsa Hae.

### Hangata Re Hloka Tumelo Joaloka Andrease

Kreste O re rōmile A re, “E-eang lefatseng lohle, le phatlal-letse libōpuoa tsohle molaetsa o molemo.” Mareka 16:15. Empa ke hangata hakae, re felloang ke tumelo, ha re lemoha ho re bohloki bo boholo ‘me tse ka sebelisoang lia fokola. Hangata rea tsieleha, joaloka Andrease, ‘me re qea-qee, ho fana ka sohle seo re nang le sona, re tšabe hore re sebetse ‘me re sebelisoe, molemong oa ba bang. Empa Jesu O re laetse hore “Ba fepeng e le lona.” Taelo ena ea Hae e setsoe morao ke matla a tšoanang le a ileng a fepa matšoele pel’a leoatle.

Ketso ena ea Kreste, e phuthetse thuto e tebileng ea moea, bakeng sa basebetsi ba Hae. Kreste O ne A fuoa ke Ntate, ‘me Eena A fetisetsa ho barutuoana ba Hae; ‘me bona ba fetisetsa ho matšoele, ‘me batho bana bona ba fetisetsa ho ba bang. Ka mokhoa o joalo, bohle ba ikopantseng le Jesu, ba tla fumana bohobe ba bophelo ho Eena, ‘me bona ba tla bo fetisetsa ho ba bang. Jesu O ile A nka lingoathoana, ‘me leha li ne li lekane barutuoana ba Hae feela, ha A ka A ba fa tsona hore ba li je, empa O ile A li arola A ba fa tsona, ‘me A ba laela hore ba fepe sechaba. Lijo tsena li ile tsa eketseha ka har’a matsoho a bona; le matsoho a barutuoana. Kamora’ hore batho ba fumane bohobe Kreste le barutuoana ba Hae, ba qala hoja ‘moho lijo tsena tse fanoeng ke leholimo.

Barutuoana e ne e le mecha ea puisano lipakeng tsa Kreste le batho. Esita le ba bohlale ka ho fetisisa, le ba inehetseng ka botlalo, ba ka fana feela ho ea ka moo ba fumaneng ka teng. Re ka tseba ho fana ka seo re se fumaneng ho Kreste feela; ‘me re ka fumana feela ha re fa ba bang. Ha re eketsa ho fana, re tla fumana haholo ho feta.

Hangata mosebeletsi oa Kreste o sitoa ho elelloa boikarabello ba hae. O rōlela moroalo oa hae ho baetapele, bakeng sa hore a itšetlehe ka Eena eo e leng mohloli oa matla. Katleho mosebetsing oa Kreste ha ea itšetleha ka talenta, empa e itšetlehile ka tumelo e nang le cheseho. Bakeng sa ho rōlela boikarabelo ba hao ho e mong eo u hopolang hore a ka khona ho u feta, sebetsa kamoo u ka khonang kateng. Ha potso e fihla ho uena e re, “Re ka reka bohobe

[251]

kae, hore batho baa ba je?” Se ke ua araba ka mokhoa o hlokang tumelo. Ha batho ba lapetse bohobe ba bophelo, na re tla rōmella motho ea tsoang hole ho tla ba fepa? Krete O itse “lulisang batho fatše,” ‘me O tla ba fepa. Ka mokhoa o joalo, ha o pota-potiloe ke meea e hlokang, tseba hobane Krete O teng. Tlisa lingoathoana tsa hau ho Jesu. Bonyane bo sebelisoang ka bohlale mosebetsing oa Morena bo tla eketseha ha bo ntse bo sebelisoa.

Morena O re “Fanang, ‘me le tla fuoa.” “Ea sitsang mojali ka peō, le ka bohobe boo a ka bo jang, le lona o tla le sitsa ka peō, a be a e ngatafatse, ‘me a le atisetse litholoana tsa ho loka ha lona. O tla le ruisa kahohlehohle, hoo le ka tsebang ho fana ka matsoho a mabeli.” Luka 6:38; 2 Bakorinthe 9:10.11.



## KHAOLO EA 40—BOSIU LEOATLENG

[252]

*[E itšetlehile ka Matheu 14:22-33; Mareka 6:45-52; Johanne 6:14-21.]*

Batho ba ile ba e-ja lijo tseo Krete A ba fileng tsona, ba lutse mohloeng, mantsiboea. Bohle ba ne ba thabetse mohlolo oo oa mahobe. Molimo O ne O ile oa fepa Baiseraele manna lefeelleng, joale ebe Eo ea ba fepileng kajeno ke mang haese Eena eo Moshe a boletseng ka Eena pele? Ba ile ba bolellana ba re. “Kannete enoa ke eena moprofeta ea lōkelang ho tla lefatšeng.”

Ketso eo e Mo roesitseng moqhaka e ne e le tiiso ea hore Mopholosi eo esaleng ba Mo lebelletse O har’a bona. Enoa ke Eena ea neng A tla etsa Judea hore e be parateisi e lefatšeng, lefatše le kollang lebese le linotši. O ne A ka roba matla a Baroma ba neng ba hloiloe haholo. O ne A ka folisa masole a tsoileng likotsi ntoeng. O ne A ka fepa mabotho a masole. O ne A ka fa Iseraele muso oo esaleng ba o batla!

Batho ba ne ba batla ho Mo roesa moqhaka oa borena hang hang. Ba ne ba bona A sa nke bohato ho inkela tlōtla, ‘me ba ne ba tšaba hore mohlomong Ha A sa tla inkela setulo sa puso sa Davida. Ba ile ba ipuo a hore ba Mo behe setulong ka mahahapa, ‘me ba Mo phatlalatse e le Morena oa Iseraele. Barutuo a le bona ba ile ba lumellana le matšoele hore ho phatlalatsoe terone ea Davide e loketse monga bona; le hore baprista le babusi ba tlamelloe ho Mo fa tlōtla.

Empa Jesu A elelloa se tlang. Mefere-fere le phetohelo ea ‘muso li ne li tla tsoha, me li khine mosebetsi oa ‘Muso oa moea. O ile A tlameha ho thibela sena hang hang. A bitsa barutuo a ba Hae, ‘me A ba kōpa hore ba kene ka seketsoaneng ‘me ba khutlele Kaperenauma hang, ha Eena A sala A qhala batho.

Har’a litaelo tseo o Krete A kileng A ba fa tsona, ho ne ho se e kileng eaba boima joaloka ena. Ona e ne e le motsotso oa bohlokoa, oo Mong’a bona A neng A tla lula teroneng ea Iseraele. Ho ne ho le

[253]

thata hore ba tsamae ba le bang, ba siee Mong' a bona A le mong. Ba ile ba etsa khanyetso, empa Jesu A ba laela ka mokhoa o matla, oo A neng A e-so ka A O sebelisa ho bona. 'Me ba kena seketsoaneng ba thotse.

Jesu O ile A laela matšoele ho qhalana, 'me A ba laela ka mokhoa oo ba neng ba tlameha ho phethisa. Ha ba leka ho Mo nka ka matla mehato ea bona ea emisa. Sebōpeho sa Hae sa borena, le mantsoe a seng makae, a bonolo, a ferekanya merero ea bona. Ba lemoha hore O na le matla a kaholimo ho a lefatše 'me ba mamela taelo ea Hae ntle le ho qea-qea.

Jesu ha A setse A le mong, "A nyolohela thabeng ho ea rapela boinotšing." O ile A qeta lihora tse ngata A rapella matla, hore A tsebe ho senolela batho sebōpeho sa thōmo ea Hae, e halalelang, hore Satane a tle a se ke a ba fofatsa, 'me a senya kutloisiso tsa bona. O ne A tseba hore matsatsi A Hae lefatseng a se a fihlile qetellong, le hore ke ba fokolang feela ba ba tla Mo amohela. Barutuo ba Hae ba ne ba tla fumana teko e bohlōkō le ho soabisa. Sebakeng sa hore A phahamisetsoe teroneng ea Davida, ba ne ba tla bona A thakhisoa. Thakhiso ea Hae e ne e tla ba ona moqhaka oa Hae; empa ba ne ba sa elelloe, 'me ba ne ba hloka Moea o Halalelang e le hore tumelo ea bona e tiee. A ba rapella ka meokho le mefehelo.

Barutuo ba ile ba lieha ho tloha, ka tšepo ea hore Jesu O ntse A e-tla. Empa ha ho fifala, "ba kena ka sekepeng, ba tšelela Kapere-nauma." Ba ne ba belaela, hobane ba ne ba sa fumana monyetla oa ho Mo roesa moqhaka oa borena. Ba ne ba ipona molato, 'me ba nahana hore hoja ba hla ba tiisa matla ba ka be ba atlehile ho Mo bea borena.

Likelello le lipelo tsa bona li ne li tletse ho se lumele. Ba ne ba fofalitsoe ke ho rata tlōtla. Ba ne ba chesehella ho bona Jesu A phahamisetsoa litulong tse Mo lokelang. Ebe ba tla bitsoa balateli ba moporofeta oa bohata ho fihlela neng? Ebe keng A sa sebeliseng matla A Hae ho hlahisa boemo ba Hae ba 'nete, 'me A nolofatsa tsela ea bona? Ke eng Ha A sa ka A pholosa Johanne Mokolobetsi lefung le sehloho? Barutuo ba inahana ka ntho tsena, ho fihlela meea ea bona e ntšofetse. Ba ipotsa hore ebe Jesu ke ntsunya-khare, joaloka ha bafarisi ba bolela.

### Sefefo Lipelong Tsa Barutuo

Mehopolo ea letsatsi leo le khanyang, la bohlokoa, e kabe e ba tlatsitse ka tumelo le tšepo, empa tseo tsohle ba ne ba li lebetse. Mehopolo ea bona e ne e loebehlana, e sa tsitsa, ‘me Morena A ba tlisetsa bothata bo bong, ho tšoenya meea ea bona le hore likelello tsa bona li nahane ka eona. Hangata Molimo O ee O etse joalo ha batho ba ipakela likhathatso le mathata. Barutuo ba ne ba sa lokela ho ipakela likhathatso. Ho ne ho ena le kotsi e tlang e ba lebile, e potlakile.

Sefefo se matla se ne se ntse se ba nanarela, ‘me ba ne ba sa itōkisetse sona. Se ile sa fihla hang, ka tšohanyetso, ‘me sa ba tšosa. Ba lebala ho hloka tumelo, ho belaela le ho hloka mamello ha bona. E mong le e mong oa bona, a sebetsa ka mafolofolo ho leka ho pholosa sekepe. Ha ho khutsitse, leeto lena le ne le nka lihora tse fokolang; empa joale sefefo sa fefola sekepe, sa se isa hole le moo ba eang teng. Ba sebetsa ka thata ho fihlela tebelo ea bone ea bosiu, ‘me eare ha ba se ba khathetse, ba lahla tšepo, ba nka hore ba lahlehile. Ba laba-labela boteng ba Mong’a bona, tsietsing eo ea bona.

Molebeli ea lebopong, O ile A bona banna bao ba tšohileng, ba loantšanang le sefefo. Mahlo A Hae A latella seketsoana seo se neng se tsukutloa ke maqhubu, se tšetseng thepa ea bohlokoa, hobane banna bana ba ne ba tšoanetse ho ba leseli la lefatše. Eare ha lipelo tsa bona li kokobela, ho laba-labela lintho tse sa halaleleng ho fela, ‘me ba rapela ka boikokobetso hore ba thusoe, ba fumana thuso.

Nakong eo ba neng ba lumela hore ba lahlehile, ho ile ha hlaha khanya, ‘me ba ile ba bona ntho eo ba sa e tsebeng e e-tla e ba lebile, e tsamaea holim’a metsi. Empa Enoa ea tlil’o ba thusa, ba ile ba Mo nka e le sera. Tsabo ea ba aparela. Matsoho a bona a tlohela ho tsamaisa sekepe. Sekepe sa tsukutloa ke maqhubu; mahlo ohle a ne a talimme sebōpeho sena sa motho se neng se tsamaea holim’a [255] maqhubu a leoatle.

Ba ile ba nahana hore ke sethotsela se supang timelo ea bora ‘me ba hoeletsa ba tšohile. Jesu A atamela eka O a feta, empa ba ellelloa hore ke Eena, ba Mo kōpa thuso. Lentsoe la Hae la khutsisa matsoalo a bona ha A re, “Ke ‘na; se tšabeng!”

Hang ha ba utloa tsena tse molemo, Peterose o ile a hoeletsa a re, “Morena, haeba ke uena, ntaele hore ke tle ho uena ke tsamaea holim’a metsi.” A re: “Tloo!”

### **Ho Iphahamisa Le Ho Oa Ha Peterose**

Peterose o ile a talima ho Jesu, ‘me a tsamaea ho se kotsi, empa eitse ha a hetla ho sheba metsoalle ea hae ka sekepeng, a khaotsa ho talima Mopholosi. Maqhubu a phahama ‘me a tšoha. Tumelo ea hae ea qepha ka motsotsonyana feela ha a se a sa bone Krete. Eaba o qala ho teba. Empa a phahamisa mahlo a hae, ka holima maqhubu ao a halefileng, ‘me a hoeletsa a re “Morena, mpholose!” Jesu A tšoara letsoho la Peterose le neng le otlolotsoe, ‘me A re ho eena. “Uena ea tumelo e fokolang! U belaeletse ka lebaka la’ng?”

Peterose o ile a tsamaea le Mong’a hae, ba tšoarane ka matsoho, ‘me ba kena sekepeng ‘moho. Peterose o ne a se a thotse a ikokobelitse. O ne a ile a batla a lahlehelo ke bophelo ba hae ka lebaka la ho se lumele le boikhōhōmōso.

Hangata ha re tleloa ke likhathatso, re talima maqhubu ho fapana le ho talima Mopholosi. Ebe moo maqhubu a hloellang meeng ea rōna ka boikhōhōmōso. Jesu ha A re meme ho Mo latela empa A tla re lahla. O re, “U se ke oa tšaba,...ha u tšela har’a maliba ke tla ba le uena; ha u tšela linōka ha li ka ke tsa u nka....Ke ‘na Morena Molimo oa hao, Ea Halalelang oa Iseraele, Mopholosi oa hao.” Esaea 43:1-3.

[256] Ketsahalang ena ea leoatleng, Jesu O ne A lakatsa ho senolela Peterose hore o tla tšireletseha feela ha A itšetlehile matleng a leholimo ka nako tsohle. Har’a maqhubu a meleko, o ne a ka tseba ho feta ha feela a itšepetse Mopholosi. Moo Peterose a neng a hopola hore o matla, ke hona moo a neng a fokola. Hoja a utloisisa thuto ena maiphihlelong a hae a leoatleng, a ka be a sa ka a hloleha ha hlahlobo e kholo e mo tlela.

Molimo O ntse A laea bana ba Hae ka letsatsi le letsatsi. O ba lokisetsa ho nka karolo mosebetsing o moholo oo O ba lokiselitseng ‘ona ka lintho tse etsahalang ho bona ka letsatsi le letsatsi bophelong. Ka motsotso oa joale, re ka nahana hore re eme re tsitsitse ‘me re ke ke ra sisinyeha. Re ka nahana ka tieo, hore ha ho se ka sisinyang tumelo ea rōna ho Molimo le ho lentsoe la Hae. Empa Satane o rerile ho sebelisa monyetla oa bofokoli ba rōna ba lefutso le tlhaho.

Ke ha re elelloa bofokoli ba rona, ‘me re talima ho Jesu ntle le ho qea-qea, re ka tsamaeang re sireletsehile.

Hang ha Jesu A kena ka sekepeng sefefe se ile sa khutsa, “‘Me hang-hang sekepe sa fihla lebopong leo ba eang ho lona.’” Barutuo le ba neng ba le ka seketsoaneng, ba khumama maotong a Jesu, ka lipelo tse tletseng teboho ba re: “Kannete u Mora oa Molimo!”

[257]

## **KHAOLO EA 41—BOEMO BA TSITSIPANO GALELEA**

*[Khaolo ena itšetlehile ka Johanne 6:22-71.]*

Kreste A tseba hore nako ea liphetofo e fihlile paleng ea bophelo ba Hae. Matšoele a lakalitseng ho Mo phahamisetsa teroneng kajeno a ne a tla Mo furalla hosasane. Tsaretso ea boipatlo boholong e ne e tla fetolela lerato ho lehloeo, le tlotliso ho lithohako.

Leha-ho-le-joalo ha A ka A nka likhato ho phema phetoho ena. E sa le sethathong ha A ka A ba le tšepo ea ho phafshoa ke lefatše. Ho ba neng ba kopane le Eena joale, bongata bo ne bo hohetsoe ke tšepo ea ‘muso oa lefatše. Ba ne ba lokela e be ba sa thetsoeng.

E sa le ka meso ka le hlahlamang batho ba phuthehela Bethesaida ka bongata bo boholo. Ba ileng ba khaohana le Jesu bosiueng bo ka pele, ba khutlela, ba lebeletse ho fumana A sa le teng; kaha ha hoa ka ha ba le sekepana seo A neng a ka tšelela mose oane ka sona. Empa patlo ea bona ha ea ba le thuso.

Lekhatheng lena o ne A se A fihlile Genesareta, kamora’ ho ba sieo letsatsi feela. Ba neng ba tsoa Bethesaida ba ne ba utloile ka barutuo ba Hae kamoo A neng A ile A tšela leoatle. Pefo ea sefefe, lihora tse ngata tsa meea e mapuku-puku, Ho tsamaea ha Kreste holim’a metsi, mantsoe a Hae a kothatsang, tsietsi ea Petrose, ho khutsisoa hang-hang hoa sefefe le ho ema hoa sekepana, tsohle tsa phetsoa ka bokhabane ho letšoele le maketseng. Ba bangata ba ne ba sa kholiseha ke sena, ‘me ba lebella ho ikutloela molomong oa Kreste ka bo-Eena hlaloso ea mohlolo ona.

[258] Jesu ha A ka A khotsofatsa takatso ea bona. Ka ho hlomoha A re, “Le mpatla e seng hobane le bone mehlolo, empa e le hobane le jele bohobe, ‘me la khora. Le se ke la sebeletsa lijo tse senyehang, empa le sebeletse lijo tse hlolang ho isa bophelong bo sa feleng.” Se batleng feela se khotsofatsang ‘mele, empa e be sejo sa moea.

Ka motsotsoana ho tjantjella ha bamameli ha tsosoloha. “Re ka etsa eng hore re sebetse mesebetsi ea Molimo?” Potso ea bona e ne

e bolela, “Re tla etsa joang hore re tle re lokeloe ke leholimo? Re hlokoa ho lefa bokae e le ho fihlela bophelo bo tlang?”

Jesu A araba, “Mosebetsi oa Molimo ke hore le lumele ho eo a mo rōmileng.” Theko ea leholimo ke Jesu. Tsela e eang leholimong ke ka tumelo ho Konyana ea Molimo.

### **Tšepo Tsa Boithati Ha Li Phethahatsoe**

Jesu O ne A ile A etsa ‘ona mosebetsi oo boporofeta bo hlileng ba o bolela e sa le pele hore Mesia O tla o etsa, empa batho ba ne ba e-s’o be lipaki tsa seo litakatso tsa bona tsa boithati li neng li se tšoantšitse e le mosebetsi oa Hae. Mehlang ea Moshe Iseraele o ne a ile a feptjoa manna ka mengoaha e mashome a mane, ‘me ha lebelloa mahlohonolo a maholo ka ho fetisisa a tsoang ho Mesia. Ke ha joang Jesu A neng A keke A fana bophelo, matla le maruo bathong ba Hae bohle, A ba lopolla ho batubi ba bona, ‘me A ba phahamisetsa matleng le hlomphehong? O bolelisitse E le Ea rōmiloeng ke Molimo, leha ho le joalo A latola hore ke morena oa Iseraele! Hona ea e-ba sephiri seo ba neng ba sitoa ho se lekanya. Na ebe O tšaba ho lōkōlisa litokelo tsa Hae e le hobane Eena ka-Bo-Eena A ipelaela semelo sa Hae sa bo-Molimo sa thorno?

Eka oa soma-soma moruti oa molao a botsa: “U etsa mohlolo ofe, hore re bone, ‘me re lumele ho uena? U sebetsa eng? Bontat’a rōna ba jele manna feelleng, joalokaha ho ngotsoe, ho thoe: ‘O ba fepile ka bohobe bo tsoang leholimong.’”

“Jesu a re ho bona, ‘Kannete-nete, kea le bolella, hase Moshe ea le neileng bohobe bo tsoang leholimong.’” Mofani oa manna O ne A eme har’a bona. Kreste Bo-eena o ne A tsamaisa Baheberu, ‘me o ba fepile kamehla ka bohobe bo tsoang leholimong. Sejo seo e ne e le setšoantšo sa bohobe ba sebele bo tsoang leholimong. Moea O fanang ka bophelo ke manna a ‘nete. “Hobane bohobe ba Molimo ke ea theohang leholimong, ea fang lefatše bophelo.” Johanne 6:33.

[259]

Ba sa ntsane ba nahana ka hore O bua ka lijo tsa ‘mele, ba bang ba hōoa ba re, “Morena, re fe bohobe bona kamehla.” Eaba Jesu o bua phatlalatsa A re, “Ke ‘na bohobe ba bophelo.”

Moshe o n’a ile a re, “Motho ha a phele ka bohobe feela, empa o phela le ka polelo e ‘ngoe le e ‘ngoe e tsoang molomong oa Morena.” Lipolelo 8:3. Le Jeremia o kile a ngola a re, “Lipolelo tsa hao, li

ile tsa ka bohobe ho ‘na, ka li ja, ea eba thabo le monyaka oa pelo ea ka.” Jeremia 15:16. Thuto ea baporofeta e ne e ile ea bonesetsa thuto ea moea e boleloang ke mohlolo oa lipolokoe. Hoja bamameli ba Krete ntlong ea thapelo ba utloisisitse Mangolo, ba ka be ba ile ba utloisisa mantsoe a Hae ha A re, “Ke ‘Na bohobe ba bophelo.” Joalekaha matsoele a ile a fumantšoa matla ‘meleng ka bohobe boo A ileng A ba neela bona ka la maobane, ka tsela e joalo ho Krete ba ne ba ka fumana matlafatso ea moea ho isa bophelong bo sa feleng. “Ea tlang ho ‘na,” A rialo, “A ke ke a lapa le ka mohla, ‘me ea lumelang ho ‘na ha a ke ke a nyoroa le ka mohla.” Empa A eketsa, “Leha le mpone, ha le lumele.”

Ba ne ba ile ba bona Krete ka bopaki ba Moea o Halalelang ka tšenolo ea Molimo meeeng ea bona. Lipontšo tse phelang tsa matla a Hae li bile ka pele ho bona letsatsi le letsatsi, leha ho le joalo ba ‘na ba kōpa pontšo e ‘ngoe. Haeba ba sa ka ba kholiseha ke seo ba se boneng le ho se utloa, ho ne ho se thuso ho ba bontša mesebetsi e meng e hlolang. Ho se lumele e tla be esale ho fumana lebaka la moitatolo ‘me ho qhelele thōko kholiso e tiileng.

Hape Krete A boela A ipiletsa lipelong tseo tse manganga A re: “Ea tlang ho ‘na ha nka ke ka mo lahlela kantle.” A re bohle ba Mo amohetseng tumelong ba tla ba le bophelo bo sa feleng. Ha ho sa hlokeha hore batho ba llele bafu ba bona ka masoabi a hloakang tšepo. “Thato ea ea nthōmileng ke hore ho bohle bao a ‘neileng bona, ho se ke ha lahleha le ea mong oa bona, empa ke ba tsose ka letsatsi la ho qetela.”

[260] Empa batsamaisi ba khopeha. “Na Jesu eo hase mor’a Josefa, eo re tsebang ntat’ae le ‘m’ae? Joale o bolela joang ha a re: ‘Ke theohile leholimong?’” Ba bua ka ho khesa tlhaho ea Jesu e tlase, le ho bolela ka nyeliso hore lapa la bo ke la bofutsana, le tlase. “Boipolelo ba ‘metli enoa oa lifate, ea sa rutehang,” ba rialo, “ha bo hloke hore re bo mamele.” Ka lebaka la tlhaho ea Hae e sa utloisisoeng ba Mo kobisa ka hore ke ea botsoaluo ba belaetsang.

Jesu ha A ka leka ho hlalosa sephiri sa tsoalo ea Hae, joalekaha A sa ka A arabela lipotso tse amanang le ho tšela leoatile ha Hae. O ne A ile A ithaopa ho se itumise ‘me A nka sebōpeho sa mohlanka. Empa mantsoe a Hae le mesebetsi tsa senola semelo sa Hae.

Mohono oa Bafarisi o ne o tsoaloa ke bokhopo ba lipelo tsa bona. Lentsoe le leng le le leng le ketso e ‘ngoe le e ‘ngoe tsa Jesu tsa



tsosa bohanyetsi ho bona; kaha moea oo ba neng ba ipoloketse oona o ne o hanana le oa Hae. “Ha ho ea ka tlang ho ‘na, haese ha Ntate ea nthōmileng A ka mo hohela....Ho ngotsoe ho Baporofeta, ho thoe: ‘Bohle ba tla rutoa ke Molimo.’ E mong le e mong ea utloileng le ho ithuta ho Ntate o tla ho ‘na.” Le ka mohla ha ho ea tla tla ho Kreste, haese bao ba tla arabela ka ho amohela lerato la Ntate. Empa Molimo O hulela lipelo tsohle ho Oona, ‘me ke feela ba hanyetsang katametso ea Hae ba tla latola ho tla ho Kreste. Bao ba ithutileng ka Molimo ba ile ba mamela Mor’a oa Oona, ‘me ho Jesu oa Nazaretha ba ka tseba Ea boletseng Ntate.

### Ha Leholimo Le Qaleha

“Kannete-nete, kea le bolella, ea lumelang o na le bophelo bo sa feleng.” Eaba Jesu O re, “Ke tla mo tsosa ka letsatsi la ho qetela.” Kreste O fetohile nama e le ‘ngoe le rōna, e le hore re fetohle moea o le mong le Eena. Ka molemo oa kopano ena re tla tsoa lebitleng hobane ka tumelo bophelo ba Hae bo fetoha ba rona. Ba bonang Kreste ‘me ba Mo amohela pelong, ba na le bophelo bo sa feleng. Ka moea, Kreste O aha ka har’a rona; ‘me Moea oa Molimo, O amohetsoeng ka tumelo, ke qaleho ea bophelo bo sa feleng.

Manna ao bo-ntate ba a jeleng felleng ha a ka a thibela lefu leha e le ho fana ka tiiso ea ho se shoe, empa bohobe ba leholimo bo ka fepa moea ho isa bophelong bo sa feleng. Mopholosi A re, “Bona ke bohobe bo theohang leholimong, hore motho a bo je, ‘me a se ke a shoa.” Ke ka ho shoa feela Kreste A neng A ka abela batho bophelo, ‘me O supa lefung la Hae e le lona tekanyo ea pholoso: “Bohobe boo ke tla fana ka bona ka baka la bophelo ba lefatše, ke nama ea ka.”

[261]

Ka setšoantšo sa konyana ea Paseka Majuda ha a ka a lemoha ‘mele oa Morena. ‘Nete eona eo e ile ea rutoa ka mantsoe a Kreste, empa e ‘nile ea se ke ea lemohua.

Joale baruti ba molao ba hōoa ka khalefo, “Eo a ka re nea nama ea hae joang, ra e ja?” Ka mohlomong ba ne ba elelloa se boleloang ke Jesu, empa ka ho nea mantsoe a Hae moelelo osele ba ne ba tšepile ho Mo qabanya le batho.

Kreste A pheta ‘nete hape ka mantsoe a matla A re, “Kannetenete, kea le bolella, ha le sa je nama ea Mor’a Motho, le sa noe

mali a hae, ha le na bophelo ka ho lōna. Ea jang nama ea ka, a e-noa mali a ka, o na le bophelo bo sa feleng, ‘me ke tla mo tsosa ka letsatsi la ho qetela. Nama ea ka ke sejo sa ‘nete, le mali a ka ke seno sa ‘nete. Ea jang nama ea ka, a e-noa mali a ka, o lula ka ho ‘na, le ‘na ka ho eena.’

Seo sejo se leng sona ‘meleng, Krete O tšoanela ho ba sona moeeng. Sejo se ke ke sa ba molemo ho rōna ntle le ha se fetoha boleng ba rōna. Ka hona tsebo e sa theoang holim’a liketso kapa taba e tsejoang e ke ke ea re thusa ka letho. Re tšoanetse ho feptjoa ho Krete. Bophelo ba Hae, lerato la Hae, mohau oa Hae, li tšoanetse ho amoheleha e le karolo ea rōna.

“Joalekaha Ntate ea phelang a nthōmile, ‘me ke phela ka Ntate, le ea ntjang o tla phela ka ‘na.’” Jesu O ne A ineetse ka botlalo thatong ea Molimo hoo eleng Ntate feela ea neng A bonahala bophelong ba Hae. Leha A lekilo e lintlheng tsohle joaleka rōna, O eme A sa netoa ke bokhopo bo neng bo Mo potapotile. Ke ha joalo le rōna re lokelang ho hlōla joalekaha Krete a hlōtse.

A u molateli oa Krete? Ha hole joalo sohle se ngoliloeng bakeng sa bophelo ba moea u ka se fihlela ka ho ikopanya ha hao le Jesu. A lerato la hao la pele le tapile? Amohela hape lerato la Krete. Ja nama ea Hae, noa mali a Hae, ‘me u tla fetoha ntho e le ‘ngoe le Ntate le Mor’a.

[262] Ka molao oa moetlo Majuda a ne a hanetsoe ho latsoa mali, ‘me joale ba fana ka moelelo osele mantsoeng a Krete ka hore ke a hlompholang mesebetsi ea kereke. Bongata esita le ba -barutuo ba re “Polelo ena e thata; ke mang ea ka e mamellang?”

Mopholosi A ba araba A re, “Na hoo hoa le khōpisa? Joale ho tla ba joang ha le bona Mor’a Motho a nyolohela moo a neng a le teng pele? Moea ke oona o phelisang, nama ha e thuse letho; lipolelo tseo ke li buileng ho lōna ke moea, ‘me ke bophelo.’”

### **Bophelo Lentsoeng**

Bophelo ba Krete bo fanang bophelo ho lefatše bo lentsoeng la Hae. Ka lentsoe la Hae Jesu A phekola boloetse ‘me A leleka bademona; ka lentsoe la Hae A khutsisa leoatle ‘me O tsositse bafu. Biblele eohle ke ponahatso ea Krete, ‘me Mopholosi A lakatsa ho

tiisa tumelo ea balateli ba Hae holim'a lentsoe. Mohla ba seng ba sa 'mone, lentsoe le lokela e be mohloli oa bona oa matla.

Joalekaha bophelo ba rōna ba 'mele bo tšhelitsoe ka lijo, ka mokhoa o tšoanang bophelo ba rōna ba moea bo tšhelitsoe ka Lentsoe la Molimo. Joalekaha re itjella ka bo-rōna ka mokhoa o joalo re lokela ho amohela lentsoe ka borōna. Re lokela ho ithuta Biblele ka hlōkō, re kōpe Molimo tlatsetso ea Moea o Halalelang, hore re utloisise Lentsoe la Oona. Re lokela ho nka temana e le 'ngoe, re batlisise khopolo eo Molimo O re beetseng eona temaneng eo, 'me re lule holim'a khopolo eo ho fihlela e e-ba ea rōna.

Litšepisong le litemosong tsa Hae, Jesu O bolela 'na. Molimo O ratile lefatše hakalo, O bile Oa le nea Mor'a oa Oona, hore 'na ka ho lumela ho Eena, ke se ke ka timela, ke mpe ke be le bophelo bo sa feleng. Maiphihlelo a phetoang Lentsoeng la Molimo a lokela e be maphihlelo a ka. Thapelo le tšepiso ke tsa ka. "Ke thakhisitsoe le Kreste; kahoo bophelo boo ke bo phelang ha e sa le ba ka, empa e se e le ba Kreste ea phelang ka ho 'na. Bophelo boo ke bo phelang lefatšeng joale, ke bo phela ka ho lumela ho Mora oa Molimo, ea nthatileng, 'me a itella 'na." Bagalata 2:19,20. Ha tumelo le metheo ea 'nete li tlamahana joalo li fetoha karolo ea boleng le se susumetsang matla a bophelo. Lentsoe le bōpa mehopolo 'me le

[263]

kena mothèong oa semelo.

Molimo O tla tlisa tšenolelo tsa bohlokoa bathong ba Hae ba lapileng, ba nyoriloeng. Ha ba e-ja Lentsoe la Hae, ba fumana e le moea le bophelo. Lentsoe le timetsa tlhaho ea tlholeho ea sebōpeho sa lefatše, 'me le fana ka bophelo bo bocha ho Kreste. Moea o Halalelang O tla E le Moemeli. Ka mohau oa Molimo, morutuo oa fetoha 'mopuo ea mocha. Lerato le nka sebaka sa lehloeo, le pelo e amohela tšoano e joalo e tsoang ho Molimo. Hona ke ho ja Bohobe bo theohang leholimong.

Kreste O ne A tsebile semelo sa bao ba bolelisang ho ba barutuo ba Hae, 'me mantsoe a Hae a nonya tumelo ea bona. A bolela hore ba loketse ho kholoa 'me ba etse ho latela thuto ea Hae 'me ba lumellane le semelo sa Hae. Hona ho akaretsa ho tela litakatso tse thahaselloang. Ho ne ho hloka boineelo bo phethahetseng ho Jesu. Ba ne ba bilelitsoe ho iketsa sehlabelo, ho ba mosa le boikokobetso pelong, ho tsamaea tseleng e tšesane e tsamailoeng ke Motho oa Golgotha.

## Mantsoe A Krete A Mo Furallisa Bongata

Teko e bile kholo haholo. Cheseho ea ba neng ba batla ho nka Jesu ka matla ‘me ba Mo etsa morena ea tapa. Thuto ena e butse mahlo a bona. Ha ho meputso ea lefatše e neng e ka lebelloa ha ba ikopanya le Eena. Ba ne ba thabetse matla a Hae a ho etsa mehlolo empa ba sitoa ho teanela kutloelo-bohlōkō ea bophelo ba Hae ba ho iketsa sehlabelo. Ha A ne A ke ke A fihlela tōkōlōho ea bona ho Baroma, ba ne ba ke ke ba tsotella letho ka Eena.

Jesu A ba bolella phatlalatsa A re, “Empa ba bang ba teng ho lōna ba sa lumeleng,” A phaella A re, “ka baka leo, ke le boleletse hore ha ho ea ka tlang ho ‘na ha a sa ho neoa ke Ntate.” Ha ba sa huleloe ho Eena, ebile hobane lipelo tsa bona li ne li sa ka tsa bulehela Moea o Halalelang.

[264] Ka ho nyatsa ho se lumele ha bona pontšeng barutuoana bana ba ‘na ba tsoela pele ho furalla Jesu. Ka ho labalabela ho hlaba Mopholosi ‘me ba thabise lonya la Bafarisi, ba Mo furalla ‘me ba Mo tlohela ka nyeliso. Ba ne ba entse boikhetlo ba; se ke ba hlola ba tsamaea le Jesu.

Lipolelo tsa ‘nete tsa khetha ‘mōkō korong. Talima Matheu 3:12. Ka hobane ba ne ba ikentse ba lokileng hoo ba ke keng ba amohela khalemelo, ba bangata ba Mo fetohela. Meea e ea lekoa le kajeno joaleka barutuoana bale ba ntlong ea thapelo Kaperenauma. Ha ‘nete e tlisitsoe pelong, ba bona bohloki ba phetoho e tletseng, empa ha ba lumele ketso ea boinehelo. Ba tloha ba khopehile, ba luma-luma ba re, “Polelo ena e thata; ke mang ea ka e mamellang?”

### ‘Nete Ha E Thabeloe

Ha matšoele a latela le bongata bo fepjoa le litlatse tsa motlotlo li utloahala, mantsoe a bona a phefa ho thothokisa; empa ha Moea oa Molimo O senola sebe, O ba laela ho khaohana le sona, ba furalla ‘nete.

Ha barutuoana bao ba sa amehang ba kheloha, moea osele oa ba tšoara, ho ba tsamaisa. Ba ne ba se ba sa bone letho le hohelang ho Jesu Eo pele ba kileng ba fumana ho mo tjantjella haholo. Ba hlalosa mantsoe a Hae hampe, ba shanofatsa taba tsa Hae, ‘me ba eisa mabaka a Hae, ba bokella ntho efe kapa efe eo A ka hanyetsoang

ka eona. Litlaleho tsena tse hloakang ‘nete tsa tsosa khalefo e entseng hore bophelo ba Hae bo be tsietsing.

Litaba tsa hasana ka potlako hore, ka boipolelo ba Hae, Jesu oa Nazaretha ha se Mesia. Ka tsela ena maikutlo a sechaba sa Galelea a Mo loantša joalekaha, ka selemo se ka pele ho bile joalo Judea. Iseraele o lahlile Mopholosi oa bona hobane ba ne ba batlile sejo se felang eseng se bang teng ho fihlela bophelo bo sa feleng.

Ka pelo e bohlokō Jesu A bona bao e neng e le barutuoa ba Hae ba tlōha. Mohauhelo oa Hae o ne o sa thabeloa, lerato la Hae le sa lebohuoa, polōko ea Hae e lahliloe -hona ha Mo tlatša masoabi a ke keng a boleloa. Liketsahalo tse joaloka tsena tsa Mo etsa “motho oa mahlomola, ea tsebang mahlōkō.” Esaea 53:3.

Kantle ho ho leka ho thibela bao ba neng ba tloha, Jesu A retelehela ho ba Leshome le Metso e ‘Meli ‘me A re, “Na le lona le rata ho ikela na?”

Petrose a arabela ka ho botsa, “Morena, re tla ea ho mang na? U na le mantsoe a bophelo bo sa feleng; rona re lumetse, ‘me re tsebile hore u Ea Halalelang oa Molimo.”

[265]

“Re tla ea ho mang?” Ha esale ba amohela Krete barutuoa ba ne ba fumane khotso le thabo e fetang ea maphelo a bona a pele. Ba ne ba ka khutlela joang ho bao ba nyelisitseng ‘me ba hlorisitseng Motsoalle oa baetsalibe?

“Re tla ea ho mang?” Lefifing la ho se lumele, bokhopong ba lefatše? Petrose a hlalosa tumelo ea barutuoa — “U Krete eane.” Ho hloka Mopholosi ho ne ho le joaleka sekepe se tsoileng taolong sefefong, leoatleng, lefifing le letšoletšo.

Lentsoe le leng le le leng le ketso e ‘ngoe le e ‘ngoe ea Jesu e ne e e-na le sephèo se hlakileng se sa hloakang pelaelo, mosebetsing oa topollo ea rōna. Ha ha joale re ke ke ra utloisisa litsela tsa Molimo, re ka lemoha lerato la Hae le leholo leo e leng motheo oa litšebeletso tsohle tsa Hae le batho. Ea phelang haufi le Jesu o tla tseba mohau o lekang semelo ‘me o senola morero oa pelo.

### Lerato Litšebeletsong Tsohle Tsa Hae

Jesu O ne A tsebile seo e tla ba tholoana ea mantsoe a Hae. A bonela pele hore mahlomola a ho shoa ha Hae Gethesemane, keko ea Hae le thakhiso ho barutuoa ba Hae ba ratoang li ne li tla ba hlahlobo

e thata ea semelo. Hoja ho se be le teko e ileng ea neelanoa pele, bongata bo khannoang feela ke mabaka a boithati bo ka be bo ile ba ikhokahanya le bona. E ne etlare ha Morena oa bona A ahlōloa, ha bongata bo ileng ba Mo lumelisa e le Morena oa bona bo etsa lerata, bo Mo nyefola, ha letšoele le soma le Mo ja litšeho, le hōoa le re, “Mo thakhiseng!” -bana ba Mo latelang ka boikhabo, eba ba ntse ba ikamahantse le barutuo, ba ne ba tla tlisetsa barutuo mahlomola a masetla-pelo bohlokōng ba bona; ba eketse masoabing a seng a ntse a ba aparetse ha ba sa fumana seo ba neng ba se lebeletse. Mohlala oa ba neng ba tla Mo furalla o ka be o ile oa hohola le ba bang. Empa Jesu A tliša phetoho ena nakong eo, ka boteng ba Hae ka sebele A ka tsebang ho matlafatsa tumelo ea balateli ba Hae ba sebele.

[266] Molopolli ea mosa, ea neng a tseba hantle tsuo e Mo tlelang, ka mosa A batalatsa tsela ea barutuo, A ba lokisetsa teko ea bona e matla-matla ‘me A ba matlafaletsa teko ea qetello.

## KHAOLO EA 42—KRESTE O POROFETA HO FOTHOLOA HO HOHOLO

[267]

*[E itšetlehile ka khaolo ea Matheu 15:1-20; Mareka 7:1-23.]*

Thōmo ea ba Leshome le Metso e Meli, e neng e supa boholo ba mosebetsi oa Kreste, e ne e boetse e hlohlollelitse hape mohono oa batsamaisi Jerusalema. Lihloela tse rōmetsoeng Kaperenauma karolong ea ho qala ea bolisa ba Kreste tsa ferekana, empa joale ha rōmelo maqosa asele ho lebelo metsamao ea Hae, ‘me bafihlele seo e ka bang qoso khahlanong le Eena.

Joaleka pele, mothèo oa ho belaelloa ba Hae e bile kheso ea Hae ea taelo tse neanoang ka molomo li bolelisoa li reretsoe ho sireletsa poloko ea molao. Har’a tse hlokomeloang ke Bajuda e neng e qobella haholo e ne e le ea moetlo oa ho itlhoekisa. Ho se tsotelle tse lōkeloang ho eloa hlōkō pele ho jeoa ho ne ho hlaloso e le sebe se sehlo.

Bophelo ba ba lekileng ho ela hlōkō melaoana ea baruti ba molao oa Bajuda ebile bo thata bo lehang ho ikamahanya le moetlo oa tšilafatso. Ha batho ba tšoarehile ke ho ela hlōkō ntho tse se nang taba, ba furalla methèo e meholo ea molao oa Molimo.

Kreste le barutuo ba Hae ha ba ka ba bōlōka meetlo ea litlhatsuo. Litlhoela, leha ho le joalo, ha lia ka tsa futuhela Kreste ka kotloloho empa ba Mo supisa liphoso tsa barutuo ba Hae ba re, “Ke ka baka la’ng ha barutuo ba hao ba sa hlomphe moetlo oa baholo-holo? Ha ba hatlele ha ba e-ja.”

Jesu ha A ka A leka ho itsereletsa kapa ho sireletsa barutuo ba Hae. A tsoela pele ho bontša moea o susumetsang baphehelli bana ba melao e neanoang ea batho. A ba nea mohlala oa seo ba neng ba se etsa khafetsa: “Le tseba hantle ho beela taelo ea Molimo kathōko, e le hore le bōlōke meetlo ea Iona! Moshe o itse: ‘Hlomphe ntat’ao le ‘m’ao,’ a ba a re: ‘Ea rōhakang ntat’ae kapa ‘m’ae a bolaoe.’ Empa lōna le re: ‘Ha motho a e-na le seo a ka thusang ntat’ae kapa ‘m’ae ka sona, feela a re: Hona ke korobane, ke ho re, ‘mpho ho Molimo/

[268]

ha le sa mo lumella ho etsetsa ntat'ae kapa 'm'ae letho." Ngoana ea sa utloeng o ne a ka bua hang feela lentsoe lena 'Korobane' thepeng eo e leng ea hae, 'me o ne a k'a hana le eona a itšebelisetsa eona bophelong ba hae, 'me kamora' lefu la hae e fetisetsoe tšebeletsong ea tempele. Ka hona o ne a le bōlōkōlōhing ho hlompholla le ho amoha batsoali ba hae tōkelo ea bona tlas'a sekhurumetso sa ho etsa hoja eka ke boineelo ho Molimo.

Jesu O ile A rorisa mosali oa mofumanehi ea faneng ka sohle sa hae polokelong ea tempele. Empa se neng se bonahala e le cheseho ea baprista le baruti ba molao ho Molimo e bile boikaketsi bo patang ho ipatla boholong. Esita le barutuo ba Krete ba ne ba ntse ba ena le tšekamelo tse joalo ka tsa bona le tsa borabbi. Ka ho pepesa moea oo ehlileng eleng ona oa baruti ba molao, Jesu O ne A batla ho lokolla bohle ba neng ba lakatsa ka ho sebeletsa Molimo ka sebele.

"Baikaketsi ting! Esaea o porofetile hantle ka lōna, ha a re: 'Sechaba sena se ntlhompha ka melomo ea sona feela, empa lipelo tsa sona li hole le 'na; se nkhumamella lefeela, empa se ruta lithuto tseo e leng litaelo tsa batho.'" Krete A bolela hore ka ho bea melao ea bona kaholimo ho litaelo tsa Molimo, baruti ba molao ba ne ba ipea kaholimo ho Molimo. Jesu O hlalositse hore tsilafalo ha e tsoe kantle, empa e tsoa kahare. Hloeko le tšilafalo li etsahala moeeng.

### **Khalefo Ea Lihloela**

Barutuo ba lemoha khalefo ea lihloela 'me ba utloa mantsoe a bueloang fatše a ho se khotsofale le ho batla ho iphetetsa. Ka tšepo ea hore A ka nolofatsa batho bana ba halefileng ba re ho Krete, "Na ua tseba hore Bafarisi ba khopisitsoe ke seo u ileng ua se bua?"

[269]

A araba A re, "Semela se seng le se seng se sa lengoang ke Ntate ea maholimong se tla motsuloa." Mekhoa le taba e neanoang ka molomo, tse e leng lintho tsa bohlokoa haholo ho baruti ba molao, li sitiloe ho emellana le ho nonngoa ke Molimo. Boiqapelo bo bong le bo bong ba motho bo neng bo nkile sebaka sa melao ea Molimo bo tla fumaneha bo se na thuso tsatsing lela ha "Liketso tsohle Molimo o tla li ahlōla, esita le tsona tsohle tse entsoeng bofihla, ebang li ntle kapa li mpe." Moruti 12:14.

Esita le har'a Bakreste ho fumanoa mekhoha le litšebeletso tseo mothò oa tsona eleng mekhoha ea baholoholo. Batho ba khomarela



mekhoeng ea bona ‘me ba hloea ba ba bontšang phoso ea bona. Le kajeno, ha re memeloa hore re bōlōke melao ea Molimo le tumelo ho Jesu, re bona lehloeo le kang le bonahetseng mehleng ea Kreste. Ha ho buuo ka batho ba masala a Molimo ho ngoliloe tjena, “Khanyapa ea halefela mosali, ‘me ea loantša litlōhōlō tsohle tsa hae, e leng ba bōlōkang litaelo tsa Molimo, ba nang le bopaki ba Jesu.” Tsenolo 12:17.

Empa “semela se seng le se seng se sa lengoang ke Ntate ea maholimong se tla motsuloa.” Ho e na le ho amohela se laetsoeng ke ba bitsoang baholo ba kereke, Molimo o re bolella ho amohela lentsoe la Ntate oa kamehla, Morena oa leholimo le lefatše. Ke teng qha! moo ‘nete e sa tsoakoang le leshano. “Se nkhumamella lefeela, empa se ruta lithuto tseo e leng litaelo tsa batho.”

[270]

## **KHAOLO EA 43—KRESTE O HELE TSA MARA KO A MERABE**

*[E itšetlehile ka khaolo ea Matheu 15:21-28; Mareka 7:24-30]*

Kamorao ho ho teana le Bafarisi Jesu A tloha Kaperenauma A haola ka Galelea, naheng ea maralla, meeling ea Fenesia. Ha A talima nq’ a bophirimela O ne a bona metse ea khale ea Tire le Sidone ka litempele tsa eona tsa bohedene. Mane ke Leoatle le Leholo, mose ho teng maqosa a evangeli a lōketse ho isa litaba tsa eona tse molemo metseng e meholo ea ‘muso oa lefatše. Mosebetsi o tobaneng le Eena joale e ne e le oa ho lōkisetša barutuoā ba Hae borōmuoa ba bona.

“Eaba mosali oa Mokbanana, ea tsoang teng, o tla a hōoa a re, ‘Morena, Mor’ a Davida, nkutloele bohlokō! Morali oa ka o tšoenngoā hampe ke modemona.’” Batho ba karolo ena ba ne ba rapela litšoantšo, ba nyelisoa ‘me ba hlouoe ke Bajuda. Mosali eo ea tiileng ho Jesu e ne e le mohedene, ‘me ka baka leo o ne a se na kabelo melemong E neng e fumanoa ke Bajuda.

Litaba tse molemo tsa mosebetsi oa Krete li ne li tsejoa hohle naheng ena. Mosali enoa o ne a ile a utloela ka moporofeta eo ho thoeng, o phekotse maloetse a mefutafuta. Tsepo ea hlaha pelong ea hae. Ka ho susumetsoa ke motlopotlo oa ho tsoala, a rera ho hlahisa taba ea morali oa hae ho Eena. O lōketse ho folisa ngoana oa hae. Nako tse ling o ne a lekeha ka hore, ke’ng seo Moruti eo oa Mojuda a ka nkets’ang sona? Empa o ne a utloile hore O phekola maloetse a mefuta-futa, ho sa khethoe hore na motho ke morui kapa mofutsana.

[271] Krete O ne A se A ntse A tseba hore mosali enoa o nyoretsoe ho ‘Mona, ‘me A ipea moo mosali enoa a tla feta teng. Ka ho thusa mahlomoleng a hae, O ne A ka fana ka mohlala o utloahalang oa thuto eo A rerileng ho e ruta. Ke ka baka leo A ileng A tliša barutuoā ba Hae sebakeng sena. A ba lakaletša ho bona ho hloka tsebo ho teng metseng le metsaneng e haufi le Iseraele. Batho ba neng ba filoe ‘nete ba ne ba sa etse ka matla ho thusa meea e lefifing. Lerako

la karohano le neng le ahiloe ho latela boikhōhōmōso ba Bajuda le ne le koaletse esita le barutuo a hore ba se utloele bohloko lefatše la bohedene. Marako ana a ne a lōkela ho heletsoa.

Kreste A amohela moemeli enoa oa morabe o nyelisoang A iphapantse, A sa bontše khauhelo joalekaha Mojuda a ne a tla etsa. Empa mosali h'a ka felloa ke tumelo. Ha Jesu A feta eka h'a mo utloele le ho mo utloa mosali a latela a ntse a etsa likōpo tsa hae. Ka ho teneha, barutuo a ba kōpa Jesu ho mo leleka. Ba elelloa hore Moruti oa bona O bua le eena a sa mo tsotelle 'me ba lekanya hore tsekamelo tsa Bajuda malebana le Bakanana lia Mo thabisa.

Empa ebile Mopholosi Ea hauhelang ea ileng A araba A re “Ha ho moo ke rōmiloeng, haese linkung tsa ntlo ea Iseraele tse lahlehileng.” Leha karabo ena e bonahetse e leka ho ea ka tsekamelo tsa Bajuda, e ne e reretsoe ho nyatsa barutuo a. Hamorao ba ile ba e utloisisa e le ho ba hopotsa seo A hlotseng A ba bolella sona -hore O tlike lefatšeng ho pholosa bohle ba tla Mo amohela.

Mosali a buella taba ea hae ka pheello e eketsehileng, a khumama maotong a Kreste, 'me a hōoa a re, “Nthuse, Morena!” Leha ho le joalo Jesu A bonahala eka O hana likōpo tsa hae 'me A araba A re, “Hase hantle ho nka bohobe ba bana, bo akheloe lintja.” Hona e ne e le ho tiisa ka bokhabane hore ha ho ea nepahala ho abela melata le balichaba mahlohonolo a tliselitsoeng batho ba rekolohetsoeng ba Molimo. Karabo ena e ka be e nyahamisitse motho ea sa pheelleng. Empa mosali a lemoha hore nako e tšoanehelang e fihlile.

Tlas'a ho neng ho bonahala e le tatolelo ea Jesu, a bona khauhelo eo A neng A ke ke A e pata. “Ke 'nete, Morena, empa le tsona lintja li ja makumane a oang tafoleng ea mong'a tsona.” Esita le lintja ha li tloheloe li sa feptjoa! Ha ho le joalo, ha ho bile le mahlohonolo a mangata tjee a abetsoeng Iseraele, a ho ne ho se lehlohonolo la hae le eena na? O ne a nkoa joaleka ntja 'me he, na joale h'a na tōkelo ea ntja lekumaneng le tsoang boruing ba Hae? Ha e-ba a e-na le tōkelo ea ntja, o ne a lumela ho nahanoa joaleka ntja; 'me kapele-pele a lumela hore Jesu ke molopolli, ebile ke ea lōkelang ho etsa sohle seo a Mo kōpileng sona.

## **Tumelo Ho Kreste E Mo Etsetsa Molemo O Moholo**

Mopholosi A khotsofala. O ne A lekile tumelo ea hae. O ne a bontšitse hore eena ea neng a nkoa e le molahluoa ho Iseraele e ne e se e se molichaba, empa e le ngoana oa ntlo ea Molimo. Joaleka ngoana e ne e le tōkelo ea hae ho ba le kabelo mphong tsa Ntate. Kreste joale A lumela kōpo ea hae ‘me ka eona ketso eo A qetela thuto ea hae ho barutuo. A retelehela ho eena, A mo talima ka khauhelo le lerato, A re, “Mosali, tumelo ea hau e kaakang! A ho etsoe kamoo u lakatsang kateng.” Ka hora eona eo morali oa hae a fola. Mosali a tloha, a lumetse Mopholosi oa hae, ‘me a thabile ha thapelo ea hae e lumetsoe.

Ebile ho ea phetha mohlolo ona Jesu A ileng a ea meeling ea Tire le Sidone. O lakalitše ho thusa mosali ea mahlomoleng ‘me ka nqa ‘ngoe a siee mohlala oa mohau molemong oa barutuo ba Hae -mohlala o tla sebetsa ha A se A le sieo ho bona. O lakalitse ho ba ruta ho tjantjella le ho sebeletsa batho ba bang ka thōko ho sechaba sa habo bona.

Jesu O ne A laba-labela ho phutholla liphiri tse tebileng tsa ‘nete eleng hore balichaba ke majalefa hammoho le Bajuda, ke ‘mele o le mong le bona, “ho Kreste Jesu, ka molaetsa o molemo...ba na le kabelo tšepisong e le ‘ngoe.” Baefese 3:6. Ka ho putsa tumelo ea molaoli oa lekhola, Kaperenauma, le ka ho ruta Sikare, O ne A hla A bontša hore Ha A ikamahanye le khethollo ea Bajuda. Joale khetlong lena Jesu O kopanya barutuo ba Hae le mohedene eo ba mo nkileng a se na tōkelo ea ho lebella mohau ho Eena. O ne A bontša hore lerato la Hae ha lea seeloa meeli ea merabe kapa lichaba.

[273] Ha A re, “Ha ho moo ke rōmiloeng, haese linkung tsa ntlo ea Iseraele tse lahlehileng,” O boletse ‘nete. Mosali enoa e ne e le e ‘ngoe ea linku tse lahlehileng tseo Iseraele a ka beng a li pholositse. Kreste O ne A etsa mosebetsi oo ba o tlohetseng.

Ketso ena ea bulela likelello tsa barutuo ho bona ka botlalo mosebetsi o ba emetseng har’a Balichaba. Ba bona batho ba mameletseng mahlomola a maholo ba sa tsejoeng ke ba maemong a kaholimo, ba laba-labeletseng thuso e tsoang ho Mophekoli e moholo, ba lapetseng ‘nete. Hamorao, mohla lerako le arohantseng Bajuda le balichaba le helelitsoang ke lefu la Kreste, thuto ena ea e-ba le matla a kholisang ho baemeli ba Kreste.

Ketelo ea Mopholosi Fenesia le mohlolo o entsoeng teng li bile le sepheo se phatlaletseng ka ho fetisisa hamorao. Kajeno, boikhōhōmōso le tšekamelō tse tšōanang le hola, li ahile marako a matla a karohano lipakeng tsa mefuta e fapaneng ea batho. Bongata bo ikutloa bo koaletsoe kantle ho evangeli. Empa ha ba se ke ba ikutloa ba koaletsoe hole le Kreste.

Ka tumelo mosali oa Fenesia a ikakhela marakong e ahiloeng lipakeng tsa Mojuda le Molichaba. A loana le nyahamo, A loana le tse neng li bonahala eka li teng, tse neng li ka mo tlišetsa ho belaela, a tšepa lerato la Mopholosi. Kreste O lakatsa hore re Mo tšepe joalo. Mahlohonolo a poloko ke a motho e mong le e mong. Ha ho letho le ka thibelang mang kapa mang ho ba le kabelo pallong ea Kreste ka evangeli ntle le boikhethelo ba motho ka boeena.

Khethollano ea maemo ea ileha ho Molimo. O sheba batho bohle ka theko e lekanang. O “entse lichaba tsohle ka mali a motho a le mong,...e le hore li batle Molimo, haeba li ka mo phōphōletsa, tsa mo fumana, le hoja ruri a se hole le e mong le e mong oa rōna.” Liketso 17:26,27. Bohle re memeloa ho tla ho Eena ‘me re phele. “Hobane Kreste ke eena Morena oa bohle, ea ruisang bohle ba mo rapelang. Mang le mang ea tla rapela Morena, o tla pholoso.” Baroma 10:12,13.

**KHAOLO EA 44—PONTŠO EA ‘NETE**

*[E itšetlehile ho Matheu 15:29-39; 16:1-13; Mareka 7:31-37; 8:1-21.]*

Dekapolese, moo batho ba nang le bademona ba Gadara ba ileng ba folisoa, batho ba ile ba qophella Jesu ho tloha. Empa ba ile ba mamela maqosa ao A a siileng. Ha A boela hape naheng eo, letšoele la bokellana, ‘me ha tlisoa ho Eena motho ea tsebetutu, ea semumu. Ha A mo nketse kathōko, Jesu A mo kenya menoana litsebeng A mo ama leleme. A fehelo a ha A hopola litsebe tse sitiloeng ho mamela ‘nete, le leleme le hlohang ho bua ka Molopolli. Ha lentsoe le re, “Thiboloha,” mothapo oa leleme la hae oa lōkōlōha, ‘me a bua hantle.

Jesu A nyolohela thabeng, ‘me teng matšoele a phutsehela ka bongata ho Eena, a tlisa bakuli le lihlotsa. A ba folisa bohle; ‘me batho, leha e ne e le bahedene, ba tlōtlisa Molimo oa Iseraele. Ka matsatsi a mararo ba khobokana ho Mopholosi, ba robala kantle bosiu, ‘me motšoare ba subuhlellana ho mamela mantsoe a Krete le ho bona mesebetsi ea Hae.

Kamora’ matsatsi a mararo ba felloa ke lijo. Jesu A sitoa ho ba khutlisa le tlala, ‘me a bitsa barutuo a ba Hae ho ba abela lijo. Bethesaida teng ba ne ba ile ba bona kamoo lijo tsa bona tse neng li fokola li ileng tsa anela ho fepa bongata; leha ho le joalo nakong ena ha ba ka ba tlisa sohle seo ba nang le sona ho Eena, ba tsepile matlang a Hae ho se atisetsa matšoele a lapileng. Barutuo a ba boela ba bonahatsa ho se lumele ha bona. Bao A ba fepileng Bethesaida e ne e le Bajuda; Mona e ne e le Balichaba le bahedene. Ho khesa batho ba bang ha Bajuda ho ne ho ntse ho le matla lipelong tsa barutuo. “Ekaba har’a lefeella lee re ka fumana hokae bohobe bo lekaneng ho khōrisa letšoele le lekaale?”

Empa ka ho mamela lentsoe la Hae ba Mo tlišetsa seo ba nang le sona -mahobe a supileng le lihlapu tse peli. Bongata ba abelo a, ha ba ha thonakoa lingoathoana tse setseng tsa tlatsa liroto tse supileng.

Ba jeleng e ne e le banna ba kete tse 'ne, ha ho sa baloe basali le bana.

Eaba Jesu 'moho le barutuo ba Hae, ba tšela letša ba ea Magadala. Moeling oa Tire le Sidone moea oa Hae o ne o khatholositsoe ke tšepo e tebileng ea mosali oa mofuta oa baSiro-Fenisia. Batho ba bohedene ba Dekapolese ba ne ba Mo amohetse ka thabo. Joale ha A boetse A theoha sekepeng Galelea, moo mesebetsi ea Hae boholo, ea mohau e etsahetseng, A teana le ho se lumele ho nyelisang.

### Babusi Ba Eisa Kreste

Lihlopha tse peli tsa tumelo tse fapaneng -Bafarisi le Basaduke - ba ne ba bile le tlhoeano e kholo, empa joale ba kopanela ho hanyetsa Kreste, ba kōpa pontšo e tsoang leholimong. Ha Iseraele e futuhela Bakanana BeteHorone, letsatsi la na la ema ka taelo ea Joshua. Jesu O ne A batloa pontšo e joalo. Empa bopaki bo bonoang bo joalo bo ne bo ke ke ba ba tsoela molemo.

Jesu A re, “O lōna boikaketsi, le tseba ho hlalosa sebōpeho sa leholimo;” -ka ho ithuta leholimo ba ee ba tsebe ha le tla tsoha le sele le ha le tla luma -“athe le sitoa ho hlalosa litšupo tsa linako tsee!” Mantsoe a Kreste bo-oona, a builoeng ka matla a Moea o Halalelang, ebile pontšo eo Molimo O e faneng. Pina ea mangeloi ho balisana, naleli e ileng ea tsamaisa banna ba bohlale, lentsoe le tsoileng leholimong, kolobetsong ea Hae ebile lipaki tsa Hae.

“Jesu a sisimoloha moeeng, a re: ‘Molōko ona o batlela’ng sesupo?’” “O ke ke oa neoa sesupo, haese sa Jonase.” Joalekaha thuto ea Jonase ebile sesupo ho Baninife, ke ha joalo thuto ea Jesu e bileng sesupo molōkong oa mehla ea Hae. Empa ebile phapang e kaakang ea tsela eo ba amohetseng lentsoe ka eona. Batho ba motse o moholo oa bohedene ba ne ba ikokobetsa; ba boholong le ba tlase ba hōoa ho Molimo oa leholimo, ‘me ba neoa mohau oa Oona.

Kreste A na A re, “Mohl’ a kahlōlo batho ba Ninife ba tla ema, ba qose molōko ona, ba o ahlōle, hobane ba ne ba bake ha ba rutoa ke Jonase, empa bonang, mona ho teng ea fetang Jonase.” Matheu 12:41.

[276]

Mohlolo o mong le o mong oo Kreste A o entseng ebile pontšo ea bo-Molimo ba Hae, empa ho Bafarisi mesebetsi ena ea mohau ebile khopiso e kholo. Batsamaisi ba Bajuda ba ne ba sa tšotelle

mahlomola a batho. Hangata mahlomola ana a ne a bakuo e ke bona empa Krete A ntša batho ho ona. Ke ka hona mehlolo ea Hae e bileng sekhobo ho bona.

### **Bopaki Ba ‘Nete Ba Hore Krete O Theohile Ho Molimo**

Se entseng hore Bajuda ba lahle Mopholosi ebile sona bopaki bo boholo ba semelo sa Hae sa bo-Molimo. Mehlolo ea Hae ebile e reretsoeng hlohonolofatso ea batho. Bophelo ba Hae bo senotse semelo sa Molimo. O entse mesebetsi ‘me a bua mantsoe a Molimo. Bophelo bo joalo ke mohlolo o moholo ho eohle.

Bongata mehlang ena, joaleka Bajuda, bo ea hōoa bo re, ‘Re hlahisetse pontšo; etsa mohlolo.’ Krete h’a re abele matla ho itšireletsa kapa ho kholisa ho se lumele le boikhōhōmōso. Feela na ha se mohlolo hore e be re ka tsoa tlamong tsa Satane? Ka tlhaho motho haa hloea Satane. Lehleo le joalo le hlomiloe ka mohau oa Molimo. Ha motho ea neng a tsamaisoa ke manganga ea ikhantsang, a ineela tsamaisong ea Molimo mohlolo o entsoe. Ho joalo le ha motho ea thetsitsoeng haholo a fihlela ‘nete ka sebele. Phetoho lipelong tsa batho, phetoho ka botlalo semelong sa motho, ke mohlolo o senolang Mopholosi Eo esaleng A phela. Ho ruteng Lentsoe la Molimo, pontšo e lōkelang e bonahale hona joale le kamehla ke boteng ba Moea o Halelang, hore Lentsoe e be matla a tsosolosang ho ba mamelang.

Ba neng ba kopa mohlolo ho Jesu ba ne ba thatafalitse lipelo tsa bona. Ba sitiloe ho bona hore thōmo ea Hae ke phethahatso ea Mangolo. “Ha ba sa utloe Moshe le Baporofeta, ha ba ka ke ba kholoa leha e mong a ka tsoha bafung.” Luka 16:31.

[277] Jesu A tloha sehlopheng sa banyatsi, A boela A kena sekepeng le barutuo ba Hae. Ka khutso e masoabi ba boela ba tšela letša hape. Ha ba fihla ka mose aone Jesu A re, “E-bang seli, le hlokomele tomōso ea Bafarisi le Basaduke.” Bajuda ba ne ba rutiloe ho nka tomōso e le setšoantšo sa sebe. Ka ho tloha ba tatile Magadane barutuo ba ile ba lebala ho nka bohobe. Ba utloisisa e ka Krete O ba lemosa ho se reke bohobe ho Bafarisi kapa Basaduke. Ho hloka kutloisiso ea pono ea moea ha bona hangata ho ne ho ba etsa hore ba Mo utloelle mantsoeng a Hae.



Joale Jesu A ba nyatsetsa ho nahana hore Eena Ea kileng A fepa likete ka lihlahapi tse seng kae le lipolokoe tsa harese, temosong ea Hae e matla O nea bua ka lijo tsa 'mele feela. Ho ne ho na le kotsi ea hore mehopollo ea Bafarisi le Basuduke e ka lomosa barutuo ba Hae ka ho se lumele.

Barutuo ba sekametse ho nahaneng hore Moruti oa bona hoja A fana ka pontšo maholimong. Hona O ne A ka ho etsa 'me pontšo e joalo e ne e tla khutsisa lira tsa Hae. Barutuo ba ne ba sa lemohe boikaketsi ba bahanyetsi bana. Likhoeli kamorao ho mona Jesu A pheta thuto e tšoanang A re, "Hlokomelang tomōso ea Bafarisi, e leng boikaketsi." Luka 12:1.

### **Boithetso Ka Lebaka La Boikhabo**

Tomōso e sebetsa ka tsela e ke keng ea lemohuo, e fetolele phofo boleng ba eona e inotši. Ka tsela e tšoanang ha boikaketsi bo lumelloa pelong, bo thophothela semelo le bophelo. Mohlala o makatsang ebile oa tloaelo ea ho sebelisa Korobane, eo ka eona bohlasoa ba ho se e le hlōkō tšoanelo ea borapeli bo neng bo patoa. Ebe ho thoe motho o il'o fana tempeleng. Bangoli le Bafarisi ba ne ba pata tsekamelo ea sebele ea thuto tsa bona, ba li kenya ka masene kelellong tsa bamameli ba bona. Thuto ena ea thetso ea etsa hore batho ba thatafalloe ke ho amohela mantsoe a Krete.

Tsusumetso e joalo e ntse e sebetsa ho ba lehang ho hlalosa molao oa Molimo ho o etsa hore o lumellane le mekhoha ea bona. Sehlopha sena ha se loantše molao phatlalatsa, empa se hlahisa litlhaloso tseo ba inahanetseng tsona tse nyehlisang metheo ea ona. Ba o hlalosa ka tsela e etsang hore o felloe ke matla a ona.

Boikaketsi ba Bafarisi ebile tholoana ea boipatlo. Hona ho entse hore ba khelose le ho sebelisa Mangolo ka phoso. Bokhopo bona bo masene esita le barutuo ba Krete ba ne ba le kotsing ea ho bo amohela. Balateli ba Jesu ba ne ba anngoe haholo ke mehopollo ea Bafarisi, hangata ba ne ba tsokotseha pakeng tsa tumelo le ho se lumele. Esita le barutuo ka lipelong ba ne ba sa khaotsa ho ipatlela lintho tse kholo. Moea ona oa akofisa khang ea hore na ke mang ea lōkelang ho ba e moholo. Hona ha qephisa thahasello ea bona thomong ea Krete ea boitelo. Joalekaha tomōso e bolisa, ka

[278]

tsela e joalo moea oa boipatlo, ha u bōlōkiloe, o sebetsa tšilafalo le tšenyeho ea moea.

Kajeno, joaleka khale, sebe sena se thetsang, se masene se atile hakaakang! Ke hangata ha kae tšebeletso ea rōna ho Krete e senngoang ke takatso ea lekunutu ea ho ipahahamisa! Ho ratoa hakaakang ke batho ho ikotla sefuba le ho amohela thoriso! Boipatlo le ho lakatsa tsela e bobebe ho feta eo Molimo O e khethileng, li etsa hore batho ba behe lithuto tsa batho le taba tse neanoang sebakeng sa taelo tsa Molimo.

Thuto ea Krete ke ‘nete ka ho tlala. Ho chesehella tlotliso ea Molimo ke matla a tlišoang ke Moea o Halalelang, ‘me kematla a Molimo feela a ka lelekang boipatlo le boikaketsi. Phetoho e joalo ke pontšo ea tšebetso ea Hae. Ha tumelo eo re e amohelang e timetsa boithati le boiketsiso, ha e re tsamaisetsa ho batla tlotliso ea Molimo eseng ea rōna, re ka tseba hore ke e nepahetseng. “Ntate, tlotlisa lebitso la hao,” (Johanne 12:28) ena ebile sona sepheo se laolang bophelong ba Krete, ‘me ha re Mo latela sena e tlabā se laolang maphelong a rōna.

## KHAOLO EA 45—SERITI SA SEFAPANO

[279]

*[E itšetlehile ka Matheu 16:13-28; Mareka 8:27-38; Luka 9:18-27.]*

Le pele Kreste A nka sebōpeho sa botho, O bone bolelele bohle ba tsela eo A tšoanelang ho e tsamaea ho pholosa ba neng ba lahlehile. Bohlōkō bo bong le bo bong bo Mo harasoantseng pelo, thohako e ‘ngoe le e ‘ngoe e bokelloang hloohong ea Hae, bofutsana bo bong le bo bong boo A neng A tla bo mamella, tsena kaofela tsa hlaka ponong ea Hae pele A hlobola moqhaka le seaparo sa Hae sa borena ‘me A theoha teroneng ho apesa bo-Molimo ba Hae ka botho. O tsebile mahlomola a tla Mo tlela leha ho le joalo A re, “Bona, kea tla. Ho ngotsoe ka ‘na Bukeng ea Molao: Ke thabela ho etsa thato ea hao, Molimo oa ka. Molao oa hao o ka pelong ea ka.” Pesalema 40:8,9.

Bophelo ba Hae lefatseng, bo tletseng boima le ho iketsa sehlabelo, bo khothalitsoe ke tšepo ea hore ka ho tela bophelo ba Hae, O tla khutlisetsa lefatše botšepeling ho Molimo. Leha A ne A lōkela ho amohela kolobetso ea mali pele, leha libe tsa lefatše li lokela ho Mo imela moeeng oa Hae o hlohang molato; leha moriti oa bomalimabe bo ke keng ba lekanngoa o bile holim’a Hae; ka lebaka la thabo eo A e lōkiselitsoeng, A khetha ho mamella mahlomola.

Nako e ne e atametse eo ka eona metsoalle ea hae eo A e khethileng e tlang ho bona eo ba Mo ratileng le ho Mo tšepa, A leketlile sefapanong sa Gologotha. Haufi O lokela ho khaohana le bona ba talimane le lefatše ho se khotatso ea boteng ba Hae bo bonoang. Lehloeo le fetisisang le ho se lumele le ne le tla ba hlorisa, ‘me A lakatsa ho ba lōkisetsa liteko tsa bona.

Jesu le barutuoa ba ne ba fihlile metsaneng ea Sesarea oa Filipi. Ba ne ba le ka mose ho Galelea, naheng eo tšebeletso ea litšoantšo e neng e atile. Ho ba pota ho ne ho e-na le boemeli ba libōpeho tseo eleng tumèla-khoèla tse teng ka likarolo tsohle tsa lefatše. Jesu A lakatsa hore eka pono ea lintho tsena e ka hulela barutuoa ho utloisisa boikarabelo ba bona ho bahedene.

[280]

O n'a s'a le lekhateng la ho ba bolella ka mahlomola a Mo emetseng. Empa pele A rapela hore lipelo tsa bona li lōkisetsoe ho amohela mantsoe a Hae. H'a ka tsebisa hang seo A lakalitseng ho se aba, empa A ba nea nako e lōkelang hore ba ipolele tumelo ea bona ho Eena. A botsa A re, "Batho ba re 'na Mor'a motho ke mang na?"

Ka masoabi barutuo ba lumela hore Iseraele o sitiloe ho lumela Mesia oa bona. Bongata Bethsaida bo ne bo lakalitse ho Mo tumisa e le Morena oa Iseraele. Ba bangata ba ne ba itōkiselitse ho Mo amohela e le moporofeta, empa ha ba ka ba lumela hore ke Mesia.

Jesu joale A botsa potso ea bobeli, e tobile barutuo ka bō bona, "Empa lona le re 'na ke mang?" Petrose a araba, "U Kreste, Mora oa Molimo ea phelang."

Haesale Petrose a lumetse hore Jesu ke Mesia. Ba bang ba bangata ba neng ba amohetse Kreste ba qala ho belaella borōmuoa ba Johanne ha a kenngoa teronkong le ho bolaoa, 'me joale ba belaella le Eena Jesu hore ke Mesia. Bongata bo neng bo lebeletse Jesu ho nka sebaka sa Hae teroneng ea Davida ba Mo tlohela ha ba lemoha hore ha A na morero o joalo. Empa tsela ea ho qea-qea ea bao ba Mo tlōtlisitseng ka la maobane 'me ba tsoha ba Mo nyatsa, ha oa ka oa felisa tumelo ea molateli oa 'nete oa Mopholosi. Petrose a bolela a re, "U Kreste, Mora oa Molimo ea phelang." O ne a sa lebella hore A apesoe borena pele a ka Mo roesa mofapahloho, empa A Mo amohela A le joalo, A ikokobelitse.

Puong ena Petrose o ne a boletse tumelo ea ba Leshome le Metso e 'Meli. Empa khanyetso ea baprista le babusi e ne e ntse e ba tlisetsa tsieleho e kholo. Ha hoa ka ha hlaka ho bona. Thuto eo ba hotseng ka eona, thuto eo ba e nkileng ho baruti ba molao, matla a litaba tse neanoang, ntho tsena li ne li sira pono ea bona. Mahlaseli a bohlokoa a leseli a ne a ba khanyetsa empa hangata ba ne ba le joaleka batho ba phopholetsang lefifing. Empa tsatsing lena, Moea o Halalelang oa lula ho bona ka matla. Ba lemoha tlōtla ea Mora oa Molimo tlas'a botho boo A bo apereng.

[281]

Jesu A araba Petrose A re, "U lehlohonolo, Simone mor'a Jona, kahobane hase motho oa nama le mali ea u senoletseng hona, empa ke Ntate ea maholimong."

'Nete eo Petrose a neng a e boletse ke mothèo oa tumelo ea molumeli. Empa e ne e se ka bohlale kapa molemo oa hae Petrose a senoletsoeng tsena. Taba ea hore e be Petrose o lemohile khanya ea

Kreste ebile pontšo e kholisang hore o “rutiloe ke Molimo.” Talima Pesalema 25:14; Johanne 6:45.

Jesu A tsoela pele A re: “Joale le ‘na kea u bolella, ke re: ‘U Petrose, ‘me holim’ a lefika lena ke tla haha kereke ea ka, ‘me monyako oa Qalo ea Bafu o ke ke oa e hlōla.’” Lentsoe Petrose le hlalosa hore lejoe — lejoe le phikolohang. Petrose e ne e se lefika leo kereke e theiloeng holim’ a lona. Likhoro tsa qalo ea bafu li ile tsa mo hlōla mohla a latolang Morena oa hae ka ho rohakana le ho hlapaola. Kereke ea na ea ahoa holim’ a Eo likhoro tsa qalo ea bafu li ke keng tsa atleha ho loana le Eena.

### Kreste Ke Lefika

Moshe o ne a ile a supa Lefika la poloko ea Iseraele. Talima Lipolelo 32:4. Mopesalema a na a bina ka “lefika la ka le pholoho.” Pesalema 62:7. Esaea o ne a ngotse a re, “Kahoo Morena o bua tjena: ‘Ke bea lejoe le mothèò Sione, lejoe le lekiloeng,...la mothèò.’” Esaea 28:16. Petrose eena o lebisatse boporofeta bona ho Jesu. “Ha feela le latsoitse molemo oa Morena. Tloong ho eo e leng lejoe le phelang, le lahliloeng ke batho, e le la bohlokoa. Tloong le le majoe a phelang, a sebelisoang ho haha tempele ea moea.” I Petrose 2:3-5. “Ha ho ea ka etsang mothèò o mong kantle ho o seng o le teng, e leng Jesu Kreste.” I Bakorinthe 3:11. “Ka holim’ a lefika leo,” Jesu O thehile kereke ea Hae holim’ a Lefika le phelang eleng -Boena. ‘Mèlè oa Hae Sebele, o pshatlehile ‘me oa tetetsoa bakeng sa rōna. Kereke e hahiloeng mothèong ona likhoro tsa qalo ea bafu ha li ka ke tsa e hlōla ha li e loantša.

Ha Kreste A ne A bua mantsoe ana kereke e ne e bonahala e fokola hakaakang! Balumeli e ne e le sehlotšoana feela, bao matla a bademona le batho a neng a tla lebisoa ho bona; leha ho le joalo ba ne ba sa tšoanela ho tšaba; ba ne ba ke ke ba hloloa.

[282]

Petrose o ne a boletse ka ho hlaka ‘nete eo e leng mothèò oa tumelo ea Kereke, ‘me Jesu joale A mo hlompha e le moemeli oa sehlopha sa balumeli. “Ke tla u nea linotlolo tsa ‘Muso oa maholimo: seo u se tlamang lefatseng se tla tlangoa leholimong, ‘me seo u se lokollang lefatseng se tla lokolloa leholimong.’”

“Linotlolo tsa ‘Muso oa maholimo’ ke mantsoe a Kreste. Mantsoe ohle a Lengolo le Halalelang ke a Hae. Mantsoe ana a na

le matla a ho bula le ho koala leholimo. Mosebetsi oa bao ba rutang Lentsoe la Molimo e kaba tsela ea bophelo bo isang bophelong kapa lefu le isang lefung.

Mopholosi H'a ka bea mosebetsi oa evangeli ho Petrose a le mong. Hamorao, ha A pheta mantsoe ao A a buileng ho Petrose, O ile A a tobisa ho kereke le ho ba Leshome le metso e 'Meli lebitsong la balumeli bohle. Haeba Jesu A ne A neelane ka matla a ikhethang ho morutuo a le mong kaholim'a ba bang, re ka be re sa fumane ba ntse ba tsekisana hore na ea tla ba moholo har'a bona ke mang. Ba ka be ba hlonephile ea khethiloeng. Bakeng sa ho thonya eo e tla ba hlooho ea bona, Krete A re, "Le se ke la bitsoa 'Moruti.'" "Le se ke la bitsoa 'Batsamaisi,' hobane le na le Motsamaisi a le mong, e leng Krete." Matheu 23:8,10.

"Kreste ke hlooho ea monna e mong le e mong." Molimo, O beileng lintho tsohle katlas'a maoto a Mopholosi, O ile A 'mea holim'a tsohle, o mo entse hlooho ea kereke, eo e leng 'mele oa hae, o phelisoang ke eena ka ho tlala, eena ea phelisoang ke Molimo ka ho tlala. I Bakorinthe 11:3; Baefese 1:22,23. Kereke e hahilo holim'a Krete e le mothèo ea eona. Ha ea itšoarella ka motho leha e le ho tsamaisoa ke motho. Ba bangata ba bolelisa hore boemo boo ba bo filoeng ka kerekeng bo ba nea matla a ho laela seo batho ba bang ba lokelang ho se etsa. Mopholosi O bolela hore "Bohle le bana ba motho." Matheu 23:8. Re ke ke ra itšetleha mothong ea shoang hore a re tsamaise. Lefika la tumelo ke boteng bo phelang ba Krete ka kerekeng. Bao ba ikhopolang ba le matla ka ho fetisisa [283] ba tla iphumana ba fokola ka ho fetisisa ha feela ba sa etse Krete bohlale ba bona. Talima Jeremia 17:5; Pesalema 2:12.

Jesu A laela barutuo a ho se bolelle motho hore ke Krete. Batho, esita le barutuo a, ba ne ba na le kutloisiso e fosahetseng ka Mesia hoo ho Mo tumisa pontšeng ho neng ho ke ke hoa ba nea 'nete ea semelo kapa mosebetsi oa Hae.

### **Barutuo a Ba Ne Ba Sa Nahana Sefapano Se Tlang**

Barutuo a le joale ba ne ba ntse ba lebeletse Krete ho busa e le morena oa bophelo ba joale. Ba ne ba lumela hore O ne A ke ke A ipata nako eohle le hore nako e ne e atametse ea ho hloma 'Muso oa Hae. Hore ebe Krete A ka lahloa ke sechaba sa Habo, A ahlōloa

joaleka mothetsi, ‘me A thakhisoa joaleka sesinyi — e ne e le ntho e thata ho barutuoana ho e amohela. Jesu O tšoanela ho bea pepeneneng ho barutuoana ba Hae ntoa e tlang e ba tobile. O ne A hlomohile ka ha A ea A lebile teko.

Ho tla fihla nakong ena O ne A ile A lesella ho ba tsebisa eng kapa eng malebana le mahlomola A Hae le lefu. Puisanong ea Hae le Nikodema O ne A itse, “Joalokaha Moshe a ne a phahamise nōha felleng, eka khona Mor’a Motho a phahamisoe joalo, hore e mong le e mong ea lumelang ho eena a be le bophelo bo sa feleng.” Johanne 3:14,15. Empa barutuoana ha ba ka ba utloa taba ena. Joale nako e ne e fihlile hore lesira le sitileng bokamoso le suthisoe: “Ho tloha ka nako eo Jesu a qala ho qaqisetsa barutuoana ba hae hore eka khona a ee Jerusalema, a e’o hlōkōfatsoa haholo ke baholo, le baprista ba baholo, le Litsebi tsa Molao, a bolaoe, ‘me ka tsatsi la boraro a tsōsoe bafung.”

Ba hloka puo ke masoabi le ho makala. Barutuoana ba mamela. Krete O ne A amohetse ho lumela ha Petrose ka Eena e le Mora oa Molimo. Joale mantsoe a Hae a supang mahlomola a Hae le lefu a bonahala a sa utloahale. Petrose a sitoa ho thola. A tšoara moruti oa hae, joalekaha eka o Mo hulela thoko le tsuo ea Hae e Mo okametseng a re, “Morena Molimo a hauhe! Hona ha ho ka ke ha etsahala ho uena.”

Petrose o ne a rata Morena oa hae empa Jesu h’a ka mo rorisa ka takatso ea ho Mo sireletsa mahlomoleng. Mantsoe a Petrose e ne e se thuso le tšelisoe ho Jesu tekong e kholo e kapele ho Eena. Mantsoe a hae a ne a sa lumellane le morero oa Molimo oa mohau lefatseng le lahlehileng, leha e le thuto ea ho iketsa sehlabelo eo Jesu A tiileng ho e ruta ka mohlala ka bo-Eena. Se neng se tla hlahisoa ke mantsoe a Petrose se ne se tla loants’ana ka kotloloho le seo Krete A lakalitseng ho se siea kelellong tsa balateli ba Hae. Hona ha etsa hore A bue e ‘ngoe ea likhalemelo tse matla-matla, tse thata-thata tse kileng tsa tsoa molomong oa Hae: “Tloha ho ‘na Satane! U sekhōpi ho ‘na; kahobane ha u hopole tsa Molimo, u hopola tsa botho.”

[284]

### Satane O Ne A Leka Ho Fihlela Krete

Satane o ne a leka ho tepeletsa Jesu ‘me a Mo fapose thōmo ea Hae, ‘me Petrose o ‘ne a buisoa ke moleki. Morena oa bokhopo,

moqapi oa mohopolo o na o buuoang ke Petrose, ke eena ea neng a buisa Petrose joalo. Satane o ne a hlahiselitse Krete borena ba lefatše a re a ka Mo fa bona ha feela Krete A ne A ka tlohela tsela ea tlotlōllo le sehlabelo. Joale o ne a batla ho tiisa shebisa Petrose linthong tsa lefatše, eseng sefapanong. Ka Petrose, o ne a boetse a pheta moleko oo a kileng a leka Jesu ka ona.

Empa Mopholosi ha A ka A o natsa. Khopolo ea Hae e ne e le ho morutuo oa Hae. Satane o ne a ile a kena lipakeng tsa Petrose le Moruti oa hae. Mantsoe A Krete a builoe a lebisoa ho ea lehang ho mo arohanya Petrose le Molopolli oa hae: “Tloha ho ‘Na, Satane.” Ntlohelle Ke talimane le Petrose ‘me Ke mo koahollele sephiri sa lerato la Ka.

Ebile thuto e bohlōkō, eo Petrose a e fumaneng empa butle-butle. Tsela ea Krete e ne e tla tsamaea har’a mahlomola le nyeliso. Empa lebatameng la mollo oa sebōpi morutuo enoa o ne a tla ho ithuta lehlohonolo la eona. Morao-rao o ngola a re, “Thabo ea lōna e ke e lekane le kabelo eo le nang le eona mahlōkōng a Krete, e le hore le tle le thabe, le nyakalle, mohla tlōtla ea hae e bonahatsoang.” 1 Petrose 4:13.

[285] Joale Jesu A hlaloesetsa barutuo ba Hae hore bophelo ba Hae ba boitelo ebile mohlala oa kamoo ba bona bo lōketseng ho ba kateng: “Haeba mang kapa mang a rata ho ntatela, a itele, a inkele sefapano, a ntatele.” Sefapano, sesebelisoa sa ‘muso oa Roma, ebile mokhoa o sehloho, o tletseng nyeliso, oa lefu. Batloli ba melao ba ne ba hlokoa ho itjarela sefapano ho ea sebakeng sa polao. Hangata ha se ne se beoa mahetleng a bona feela, ba ne ba tlakalla ka pefo le nto, ho fihlelea ba hlōloa. Ho barutuo mantsoe a Jesu, leha a ne a utloisisoa ka lerootho, a ne a supa ho ikokobeletsa lefu ka lebaka la Krete.

Mantsoe a Mopholosi a tšoantšitse phethahalo e tletseng ea boineelo. Empa sena sohle O ne A se amohetse bakeng sa bona. O siile lehae la leholimo la borena A nka bophelo ba hlomphollo le nyeliso, le lefu la lihlong. Eena Ea neng A ruile letlotlo le ke keng la rekoa la leholimo, A fetoha Ea fumanehileng e le hore ka bofutsana ba Hae re be barui. Re lokela ho latela tsela eo A e tsamaileng.

Ho rata meea ho bolela thakhiso ea boithati. Eo eleng ngoana oa Molimo o lōkela ho ipona e le lehokela ketaneng e lepelelitsoeng tlase ho pholosa lefatše, a lumellana le Krete, a tsamaea le Eena ho



batla le ho pholosa ba lahlehileng. Mokreste o ikhethetse Molimo, ‘me ka semelo o lokela ho tsebahatsa Krete ho lefatše.

“Mang le mang ea ratang ho baballa bophelo ba hae bo tla mo senyehela, empa mang le mang ea senyeheloang ke bophelo ba hae ka baka la ka o tla bo rua.” Boithato ke lefu. Pelo, ha e hloleha ho fepela letsoho le hlooho mali a phelising kapele e ka felloa ke matla. Le joalo lerato la Krete ha le hasantsoe karolong e ‘ngoe le e ‘ngoe ea ‘mèlè oa Hae. Re litho e mong ho e mong, ‘me moea o hanang ho aba o tla timela. “Ebe motho a ka boelloa ke eng haeba a ka rua lefatše lohle, empa a senyeheloa ke bophelo ba hae? Kapa motho a ka rekanya bophelo ba hae ka eng?”

Krete A supisa barutuo a ka ho tla ha Hae ka khanya A e-na le makhotla a leholimo. ‘Me mohlang oo, “O tla putsa motho ka mong ka ho ea ka seo a se entseng.” Ha A ba khotatsa A ba tšepisa a re, “Ruri kea le bolella: Ho na le ba bang har’a ba emeng mona ba ke keng ba tseba lefu hofihlela ba bona Mor’a Motho a e-tla ka ‘Muso oa hae.”

Empa barutuo a ha ba ka ba utloisisa mantsoe a Hae. Maikutlo a bona a ne a tsepame holim’a bofutsana, nyeliso, le mahlomola. Na ba ne ba sa tl’o bona morena oa bona A phahamisetsoa teroneng ea Davida? Ebe Krete O lōkeloa ho nyelisoa le ho lahloa ‘me A bolaoe? Masoabi a imela lipelo tsa bona, ka ha ho ne ho sa utloahale hore Mora oa Molimo A ka ba tlas’a nyeliso e sehloho joalo. O ikisetsang Jerusalema moo A il’o tšoaroa ka sehloho joalo? Ho tla joang hore A ipee tlokotsing ee ebe O ba siea lefifing le fetang leo ba neng ba phopholetsa har’a lōna pele A itšenoletsa bona?

[286]

Naheng ea Sesarea oa Filipi, barutuo a ba ne ba utloisisa hore Krete ha ho letho leo A ka le tšabang la lehloeo la Bajuda kapa ona matla a Baroma. Ha A sebetse teng ke’ng? Ke’ng ha A ineela lefu? Haeba A lōkela ho shoa, ‘muso oa Hae o ka thehoa ka ho tiea joang hoo likhoro tsa qalo ea bafu li ke keng tsa o hlōla? Hona ruri e bile sephiri.

Hona joale ba ne ba e-ea nqa motseng moo tšepo eohle ea bona e neng e tla fela. Ba ne ba buela tlase hammoho ka ho hlomoha, ba bua ka bokamoso. Mohlomong taba e sa lebelloang e ka suthisa tsuo e bonahetseng e emetse Morena oa bona. Ka hona ba belaela, ba tšepa, ‘me ba tšoha, ka litšiu tse telele, tse tšeletseng, tsa tepello.

**KHAOLO EA 46—JESU A FETOHA**

*[E itšetlehile ka Matheu 17:1-8; Mareka 9:2-8; Luka 9:28-36.]*

Ene e se e e-ba mantsiboea ha Jesu A bitsetsa Petrose, Jakobo, le Johanne ho Eena, ‘me A ea le bona hole, thoko thabeng, moo ho khutsitseng. Ba ne ba qetile letsatsi ba ntse ba tsamaea joale ho hloa moepa ha eketsa mokhathala oa bona. Letsatsi la phakisa la likela, ‘me batsamai bao ba koaheloa ke lefifi. Botšo bo ba potapotileng ba bonahala bo lumellana le bophelo ba bona ba mahlomola, bo neng bo aparcloa ke maru.

Barutuo a ha ba ka ba itekela ho botsa Krete hore na O ea kae, ka morero ofe. Hangata O ne A ee A qete masiu a tletseng thabeng A rapela; O ne A thabela ho ba inotši moo ho khutsitseng. Empa barutuo a ba ne ba ipotsa hore na ke’ng ha Morena oa bona A ba hloesa moepa o boimahali ona ba se ntse ba khathetse, le Eena ka boena A hloka ho phomola.

Hang-hang Krete A ba bolella hore ha ba sa ea pele. Hoba A emele thokoana ho bona, Motho oa mahlomola A keketla likeleli thapelong ea Hae ea boikokobetso. A kōpa matla ho mamella teko bakeng sa batho. O tšoanela ho itšoarella ka matlamatla ho Ea-matla-Ohle, hobane ke teng feela A ka talimanang le bokamoso. A rapella barutuo a ba Hae hore ba se nyahame tumelong. O ne A letse phoka haholo ‘meleng oa Hae O kebileng, empa O ne A sa e utloe. Nako ea ‘na ea ikela butle-butle.

Qalong barutuo a ba kopanela thapelo le Eena. Empa kamora’ nakonyana ba be se ba ithobaletse. Jesu O ne A ile A ba bolella ka mahlomola a Hae, A lakalitse ho imolla masoabi a bona ka ho ba fa tiiso ea hore tumelo ea bona ha ea ba ea lefeela. Ha se bohle, esitana le ho ba Leshome le Metso e ‘Meli, ba neng ba ka fumana tšcnolo eo A neng A lakalitse ho e fana. Ke ba boraro bana feela ba neng ba tla bona mahlomola a Hae Gethesemane, ba neng ba khethiloe ho ba le Eena thabeng. Joale thapelo ea Hae e ne e le hore ba bone ponahatso e tla ba tšelisa nakong ea mahlomola a Hae a maholo a

ho shoa; e le ha ba tseba hore ke ka tieo eleng Mora oa Molimo le hore lefu la Hae le hlabisang lihlong ke morero oa topollo.

Thapelo ea Hae e ile ea mameloa. Hang maholimo a buleha, ‘me khanya e halalelang ea theohela thabeng, ea koahela ‘mele oa Mopholosi. Bo-Molimo bo hlahang kahare ho Krete ba tsoela kantle ‘me ba khahlanyetsa khanya e theohang leholimong. Krete A phahama moo A neng A kobotetse teng, A ema bokhabaneng ba boMolimo. Sefahleho sa Hae sa khanya “joaloka letsatsi,” ‘me liaparo tsa Hae tsa e-ba tšoeu “joaloka leseli.”

Barutuo, ha ba tsoha, ba boha ka tšabo le makalo sebōpeho se khanyang sa Mong’a bona. Ha ba se ba tloetse leseli le makatsang, ba bona haufi le Jesu libōpuoa tse peli tsa leholimo -Moshe, eo holim’a Sinai a kileng a bua le Molimo; le Elia, ea kileng a neoa lehlohonolo le leholo la hore le ka mohla a se ke a ba tlas’a matla a lefu.

Ka lebaka la sebe sa hae ha a le Meriba, e ile ea e-ba hore Moshe a ke ke a neoa tokelo ea ho kena Kanana. O ne a sa tl’o neoa thabo ea ho fihlisa Iseraele lefeng la bo-ntat’ae. Ho fella lehoatateng e bile pakane ea tšebetso e thata le ea tlhokomelo ea boitelo ho Iseraele ka lilemo tse mashome a mane. Moshe o fetile tlas’a matla a puso ea lefu, empa ha a ka a hlōla lebitleng. Krete ka sebele O mo bitselitse bophelong. Talima Juda 9.

Moshe thabeng ea ponahalo o ne a emetse ba tla tsoa mabitleng mohla tsoho ea bafu ba lōkileng. Elia ea ileng a nyolleloa leholimong a sa ka a bona lefu, o emetse ba tla be ba phela ho tlang la bobeli ha Krete, “kaofela re tla fetoha, hang-hang, ka ho panya ha ntši, ha ho lla terompeta ea mehla ea bofelo.” I Bakorinthe 15:51,52. Jesu O ne A apere kamoo A tla bonahala ha A etla lekhetlo la bobeli “ka tlōtla ea Ntat’ae, a e-na le mangeloi a halalelang.” Mareka 8:38; Talima Baheberu 9:28. Moo holim’a thaba ‘muso o tlang oa khanya o ile oa tšoantšoa hanyenyane — Krete e le Morena, Moshe e le moemeli oa bahalaleli ba tsositsoeng, le Elia e le oa ba tla fetolcloa ‘meleng e khanyang ba sa ka ba e-shoa.

### Petrose Ha A Hlile Ha A Utloisise

[289]

Barutuo ba thaba hore ebe Enoa Ea mosa, Ea ikokobelitseng, Ea phaitseng ka hohle-hohle, molata o se nang ea o thusang, O tlōtlisoa

ke ba rekolohetsoeng ba leholimo. Ba ne ba lumela hore Elia o tlike ho tla ba behela hore ‘muso o se o tla hlangoa lefatšeng. Ba lakatsa ho lula hona mono. Petrose a bua a re, “Morena, ke hantle ha re le mona; ha u rata ke tla hloma maphephe a mararo mona, le leng e be la hao, le leng e be la Moshe, le leng e be la Elia.” Barutuo ba ne ba tšepa hore Moshe le Elia ba rōmetsoe ho tla sireletsa Monghali oa bona le ho hloma ‘muso oa Hae e le morena.

Empa pele ho mofapahloho ho lōkela ho tle sefapano. O ne A mameletse mofokolo oa botho, A imetsoe ke mahlomola a ona le sebe, A tsamaea A inotši har’a batho. Eare ha lefifi la teko e tlang le hatellana holim’a Hae, A ba bolutung moeeng, lefatšeng le sa kang la Mo tseba. Esita le barutuo ba Hae ba ratoang ha ba ka ba utloisisa thomo ea Hae. Lefatšeng leo A le bopileng O bile bolutung. Joale leholimo ke lena le romile maqosa; eseng mangeloi, empa batho ba ileng ba mamella mahlomola le masoabi, ‘me ba ka utloelang Mopholosi bohlōkō.

Moshe le Elia ebile basebetsi ‘moho le Krete. Ba ne ba bile ba abelane takatso e tšoanang le ea Hae ea hore batho ba bolokehe. Moshe o rapeletse Iseraele A re, “Joale, ak’u se tšoarele sebe sena sa sona hle! Ho seng joalo hlakola lebitso la ka bukeng eo u e ngotseng.” Phallo 32:32. Elia o bile le ho hloro, e le ha ka lilemo tse tharo le sekoto tsa tlala a ne a mameletse lehloeo le tsietsi tsa sechaba. A na a balehela lefelleng a le mong, a nyahame. Batho bana ba ne ba tlil’o buisana le Jesu ka mahlomola a Hae le ho Mo tšclisa. Polokeho ea motho e mong le e mong e ne e le sona seo ho neng ho buisanoa ka sona kopanong ea bona.

Kaha ba ne ba tšoeroe ke boroko, barutuo ba utloa ho honyenyane haholo puisanong ea Krete le maqosa a leholimo. Ba hloloa ho fumana seo Molimo O neng O lakalitse ho ba nea sona — ho tseba mahlomola a Krete le khanya e tla a latela. Ba lahlehetsoe ke lehlohonolo leo e kabeng e bile la bona. Leha ho le joalo ba tiiselitsoe hore leholimo lohle le tsebile ka sebe sa sechaba sa Bajuda sa ho lahla Krete. Ba ile ba neoa pono e hlakileng mosebetsing oa Molopolli. Ea e-ba “lipaki tse boneng botlōtlehi ba hae” (2 Petrose 1:16) ba bontšisa hore Jesu efela E le Mesia le hore O tsejoa joalo ke lihloliloeng tsohle lefatseng le maholimong.

[290]

Eare ba sa ntse ba bohile pono eo, leru le khanyang la ba khurumetsa; ‘me ha utloahala lentsoe le tsoang lerung, le re, “Enoa ke

Mora oa ka eo ke mo ratang, ea nkhahlang; mo mameleng.” Ha ba utloa lentsoe la Molimo le bua ka matla a tšabehang a thothomet-sang lithaba, barutuo ba oa ka lifahleho tsa bona, ba ikhurumelitse lifahleho, ho fihlela Jesu A atamela, A ba ama, A re ka lentsoe la Hae le tloaelehileng, “Emang, se tšabeng!” Khanya ea leholimo e ne e fetile, Moshe le Elia ba ne ba nyametse. Ba ne ba se ba le bang le Jesu.

[291] **KHAOLO EA 47—NTOA LE MEEA EA SATANE**

*[Khaolo ena e itšetlehile ka Matheu 17:19-21; Mareka 9:9-29; Luka 9:37-45.]*

Ha tsatsi le chaba, Jesu le barutuo ba Hae ba theohela lehoatateng. Barutuo ba ne ba hapehile mehopolong, ba tšohile, ‘me ba khutsitse. Ba ka be ba thabetse ho hlōla ho se hokae qalong eo e khethehileng, empa ho ne ho e-na le mosebetsi o lōkelang ho phethoa.

Mosikong oa thaba phutheho e kholo e ne e khobokane. Ha Mopholosi A ntse A atamela, A laea moifo oa Hae oa ba bararo hore ba se re letho ka seo ba se boneng, A re, “Le se ke la bolella motho ka pono ena, ho fihlela ha Mor’a motho a se a tsositsoe bafung.” Matheu 17:9. Ho qaqisa seo ba se boneng ho bongata ho ne ho ka hlohlelletsa litšomo feela kapa ho hlolloa ho sa reng letho. Ba ne ba lieha ho utloisisa. Esitana le ba bararo ba rekolohetsoeng ho hloka kutloisiso ha bona, ho bonahala ka ho botsana ha bona hore na ho tsoha bafung ho bolelang. Empa ba se ke ba kōpa tlhaloetso ho Jesu.

Eitse ha batho ba neng ba le lehoatateng ba bona Jesu, ba Mo mathela ho Mo lumelisa. Leha ho le joalo ka ho panya ha leihlo A lemoha hore ho na le ho etsahetseng ho baketseng barutuo masoabi a maholo le nyenyefatso. Motho e mong o n’a tlisitse mor’a hae ho phekoloa moeeng o semumu o neng o mo hlōkōfatsa. Barutuo ba ne ba neiloe matla a ho leleka meea e litšila mohla Jesu A neng A ba rōmela ho ruta Galelea eohle. Ho tloheng ha bona ba le matla tumelong, meea e litšila ea na ea utloa lentsoe la bona. Lekhetlong lena ba laela moea o hlōkōfatsang, ka lebitso la Jesu, ho lesa motho [292] eo o mo hlōkōfatsang, empa modemona oa ba soma. Barutuo, ka ho sitoa ho hlalosa ho hlōleha ha bona, ba ikutloa ba tlisitse tlōtlōlo ho bona le ho Moruti oa bona. Har’a letšoele leo ho ne ho le teng bangoli ba neng ba batla ho kholisa batho hore bona (barutuo) le Moruti oa bona ebile bathetsi. Ba re ke ona moea o litšila oo

barutuo a esita le Kreste ka Boena ba neng ba ke ke ba o hlōla! Moea oa tello le ho sōma oa tlala letšoele leo.

Empa hang Jesu le barutuo a ba bararo ba bonoa ba atamela. Bosiu boo ba kopaneng le khanya ea leholimo bo ne bo siile leseli le ileng la tšosa ba ba bonang. Mopholosi A atamela sebakeng sena sa ntoa, ‘me A sheba bangoli, A botsa A re, “Ke eng eo le pheang khang ka eona le bona?”

Empa mantsoe a neng a sa tšabe letho, a bile a phephetsa, a ne a khutsitse. Joale ntate ea hlomohileng a fohla letšoele. Hoba a khumame maotong a Jesu, a pheta ho tšoenyeha le masoabi a hae.

A re, “Moruti ke tlisitse mora oa ka ea nang le moea o semumu ho uena. Kae le kae moo o mo tšoarang, o mo tabanya fatse...Ke ile ka kōpa barutuo a ba hao hore ba o leleke, empa ba ile ba hlōleha.”

Jesu A bala ho se lumele pelong ea e mong le e mong, ‘me A hōoa A re, “A molōko o sa lumeleng! Ke tla ba le lona ho fihlela neng? Ke tla le mamella ho fihlela neneng?” A nto laela ntate ea tsielehileng A re, “Mo tliseng ho ‘na!”

Moshanyana a tlišoa, ‘me moea o litšila oa mo lahla fatše ka bohlokō bo boholo. A rapalla a ntse a pitika, a khethetsa makoeba, a meketsa habohlōkō.

Morena oa bophelo le morena oa lefifi ba boela ba teana lebaleng la ntoa -Kreste A tlišo “phatlalletsa bathopuo a tsa tōkōlōho,...ho lokolla ba hateletsoeng” (Luka 4:18), Satane a batla ho bōlōka eo a mo tšoereng litlalmong tsa hae. Ha nakoana, Jesu A lumella moea o litšila ho bonahatsa matla a ona.

Jesu A botsa, “E se e le nako e kae a hlahetsoe ke hoo?” Ntat’ae a re, ke ha a sa le monyenyanane. Ka lilemo-lemo o mo utloisa bohlokō. ‘Me ka ho hloka mamello, a hōoa a re, “Haeba u ka etsa ho hong, re hauhele, ‘me u re thuse.” “Haeba u ka etsa!” Esita le joale ntat’ae o sa belaela matla a Kreste.

Jesu A araba, “Tsohle li ka etsahala ho ea lumelang.” Ka meokho e tšolohang, a bontšisa bofokoli ba hae, ntat’a a itahlola mohaung oa Kreste: “Kea lumela; thusa ho hloka tumelo ha ka.”

Jesu A retelehela ho ea mahlomoleng ‘me A re: “Moea o semumu, o tsebetutu, kea u laela, tsoa ho eena, ‘me u seke ua hlola u kena ho eena hape!” Eaba o tsoa, o ntse o hōoa, o sisinya ngoana ka bohale. A ba joaloka mofu. Ba bangata ba ba ba re, “O shoele.” Empa Jesu A mo tšoara ka letsoho, A mo tšosa, ‘me a ema A mo

nea ntata'ae, a phela hantle kelellong le 'meleng. Mora le ntat'ae ba rorisa Molopolli oa bona; athe bangoli, ba tloha ba hlolehile 'me ba tepeletse ka pelo tse ntšo.

### **Tumelo E Re Kopanya Le Leholimo**

“Empa haeba u ka etsa ho hong, re hauhele, ‘me u re thuse.” Ke meea e mengata hakaakang e imetsoeng ke sebe e phetileng thapelo eo! ‘Me ho bohle karabo ke, “Tsohle li ka etsahala ho ea lumelang.” Ka Krete, Molimo O lōkisitse mokhoa oa ho hlōla tšekamelo e ‘ngoe le e ‘ngoe ea sebe le ho hanyetsa moleko o mong le o mong, leha o ka ba matla ha kae. Empa ba bangata ba ikutloa ba hloka tumelo, ‘me ka hona ba sala ba le thōko ho Krete. Meea ena e se ke ea icheba, e mpe e shebe ho Krete. Tumelo e tla ka Lentsoe la Molimo. Isoara tšepiso ea Hae, “‘Me ea tlang ho ‘na ha nka ke ka mo lahlela kantle.” Johanne 6:37. Itihele maotong a Hae ka mohoo, “Kea lumela; thusa ho hloka tumelo ha ka.” U ke ke le ka mohla o le mong ua timela ha u etsa sena -le ka mohla o le mong, le hanyenyane.

Ka nako e khutšoanyane barutuo a ba rekolohetsoeng ba ne ba ile ba bona ha motho a fetohela setšoantšong sa Molimo, ba ba ba bona ha a theoletsoe ho tšoaneng le Satane. Ba ne ba bone Jesu A tlōtlisitsoe A le boemong ba Molimo, ‘me ba ‘Mone ha A teana le moshanyana ea hlanyang, ea tsikitlanyang meno habōhlōkō. Mopholosi enoa ea matla, eo nakoana e khutšoanyane pele ho mona A neng A eme A tlōtleha, A inama ho emisa motho ea sotloang ke Satane fatše, ‘me A mo busetsa ho ntat'ae le lehaeng labo.

[294]

E ne e le thuto ea pheello ea topollo -Eo-E Molimo A inama ho pholosa se lahlehileng. E ne e emetse hape borōmuoa ba barutuo a. Bophelo ba bahlanka ba Krete ha boa lokela ho fella holim'a thaba. Tlase mane lehoatateng, meea eo Satane a e kentseng bokhobeng e emetse lentsoe la tumelo le thapelo ho ba lopolla.

Eare ha Jesu A boetse A le mong hape le barutuo a ba robileng mono o le mong, ba botsa ba re, “Ke ka baka la'ng rōna re sitiloeng ho leleka modemona?” Jesu A re ho bona, “Ke hobane tumelo ea lona ea fokola. Kannete kea le bolella, ke re: Hoja le na le tumelo e kaa ka tlhaku ea mosetareta le ne le tla re ho thaba ena: ‘Suthu mona, u ee mane,’ ‘me e ne e tla sutha. Ha ho letho le ka le sitang.



Mofuta ona ha o tsoe haese ka thapelo le ka ho itima lijo.” Ho se lumele hoa bona, ho ba entseng hore ba se utloele Krete bohlōkō, le bohlasoa boo ba nkileng mosebetsi o khethehileng ka bona, o siiloeng ho bona, li entse hore ba hlolehe. Barutuoana bana ba neng ba setse ba ne ba ile ba honohela ba bararo ba felehelitseng Jesu. Ba bua ba tletse ho nyahama le ho utloa bohlōkō. Ke boemong bo tjena ba ileng ba shebana le moea o litšila oa Satane.

Hore ba tle ba atlehe ntoeng ea mofuta ona, tumelo ea bona e lokela e matlafatsoe ka thapelo e matla, ho itima lijo le boikokobetso ba pelo. Ba tlameha ba itlhophare bo-bona ‘me ba tlatsoe Moea le matla a Molimo. Tumelo e isang boitšoarellong bo phethehileng ho Molimo le boineelo bo sa sieang letho mosebetsing oa Hae, ke tsona feela tse tlišetsang batho thuso ea Moea o Halalelang ntoeng e loantšanang le meea e khopo.

Itšoarelle lentsoeng la Molimo le ho lisebelisuoana tsohle tse nang le thuso tseo A li khethileng. Ke ha joalo tumelo ea hau e tlang ho matlafala. Lithibelo tse bokeletsoeng ke Satane ka ho li haha a li fapakanya tseleng ea hao tse bonahalang eka li ke ke tsa hlōloa, tse joaleka maralla a sa feleng, li tla nyamela ha u kōpa ka tumelo. “Ha ho letho le ka u sitang.”

**KHAOLO EA 48—E MOHOLO KE MANG?**

*[Khaolo ena e itšetlehile ho Matheu 17:22-27; 18:1-20; Mareka 9:30-50; Luka 9:46-48.]*

Ha A khutlela Kaperenauma, Jesu ka mokhoa o khut sitseng A batla ntlo e tla ba lehae la Hae la motsotso o se okae. Nakong e setseng ea ho lula ha Hae Galelea, ebile sepheo sa Hae ho eletsa barutuoana ho e-na le ho sebeletsa matšoele.

Hape Krete O ne A ile A ba bolella hore O tla bolaoa homme A tsohe hape. ‘Me A phaella ka hore O tla ekela matsohong a lira tsa Hae. Barutuoana le ha joale ha ba ka ba utloisisa mantsoe a Hae. Leha seriti sa mahlomola a maholo se ba aparetse ba pheha khang bo-bona hore na ke mang ea lōkelang ho ba e moholo ‘musong. Phapang ena ba hopola ho e patela Jesu. Jesu A bala mehopolo ea bona A lakatsa le ho ba eletsa, feela A emela nako e lōkelang eo lipelo tsa bona li tla be li bulehile ho amohela mantsoe a Hae.

Hang ha ba fihla motseng ‘mokelli oa lekhetho la tempele a botsa Petrose a re, “Na moruti oa lōna o ntša lekhetho la Tempele?” Tlatsetso ena ea borapeli e ne e koptjoe ho Mojuda e mong le e mong ka selemo hore a e lefe. Ho hana ho lefa, ho latela tekanyo ea baruti ba Majuda, e ne e ka ba sebe se soabisang. Joale lira tsa Hae tsa bona monyetla oa ho Mo hobosa. Ba sebelisa ‘mokelli oa nyehelo.

[296] Ka ho chesehella tlotliso ho Moruti oa hae, Petrose a akofa ho araba hore Jesu A ka lefa nyehelo. Athe meloko e meng e ne e lokolotsoe ho ntšeng nyehelo. Baprista le Balevi, le joale ba ne ba ntse ba nkuoa e le ba khethetsoeng tempele, ‘me ba ne ba sa koptjoe ho ntša nyehelo ea selemo e le tšebetso ea eona. Baporofeta le bona ba ne ba sa koptjoe ho ntša nyehelo. Ka ho batla nyehelo ho Jesu, baruti ba ne ba qhelela thōko tōkelo ea Hae e le moporofeta ‘me ba Mo etsa joaleka mang kapa mang feela. Ho hana ho lefa ho ne ho ka bontša ho hlokela tempele hlompho; ka nqa e ‘ngoe, tefo e ne e ka nkoa e le tōkafatso ea ho Mo hana ha bona ha ba re ha se

moporofeta. Ka karabo ea hae ho ‘mokelli, Petrose ka bokhabane a tiisa khopolo e fosahetseng eo baprista le babusi ba neng ba leka ho e kenya tšebelisong.

Ha Petrose a kena ka tlung, Mopholosi ha A ka A bua letho ka se etsahetseng, empa A botsa, “Uena u re’ng, Simone? Mahosi a lefatše a bokella lekhetho la khoebo kapa la monna ho bomang? Ho bara ba ‘ona kapa ho balichaba?” Petrose a re ho Eena, “Ho balichaba.” Jesu A re ho eena, “Ha ho le joalo, bara ba lokolohile.” Ha batho ba khafisoa ho tšehetsa morena oa bona, bana ba morena e moholo ha ba tlangoe. Ka hona Iseraele, joaloka sechaba sa Molimo, o ne a koptjoa ho tšehetsa mosebetsi oa Molimo; empa Jesu, Mora oa Molimo, O ne A se tlamehong e joalo.

Hoja Jesu O ne A lefile nyehelo kantle ho khanyetso, e ne e le hore O lumetse tōka ea kōpo e batloang ho Eena ‘me ka hona e-be O latotse bo-Molimo ba Hae. Empa A latola kōpo kamoo e tlišoang kateng. Ka ho lōkisetša hore ho lefshoe lekhetho leo O pakile bo-Molimo ba Hae ‘me ka hona O ne A sa ntse nyehelo joaloka mohlanka oa ‘muso.

“E-ea leoatleng,” A laela Petrose, “u akhele selope, ‘me tlhapi eo u tla e tšoasa pele, u e nke, u e ahlamolle, ‘me u tla fumana setatera; u se nke, u ba nee sona ho lefella rōna le uena.”

Ha Jesu A buile phatlalatsa hore ha A tlameha ho lefa lekhetho, A se ke A phea khang ka taba ena. A etsa seo ka nepo A neng A ke ke A kōptjoa ho se etsa esere mohlomong A khopisa ka ho se ntše nyehelo. Thuto ena e ne e tla ba ea bohlokoa haholo ho barutuoā ba Hae. Ba ne ba sa lokela ho ipea khahlanong kantle ho mabaka ho hanyetsa tsamaiso e lateloang. Bakreste ha ba lokele ho tela taba ea mothèo le ha e le ‘ngoe ea ‘nete, empa ba lokela ho phema khang e telele kamehla ha ho ka etsahala.

Ha Petrose a sa ile leoatleng, Jesu A bitsetša barutuoā ba bang ho Eena, A nt’o botsa, “Le ne le pheisana khang ea eng tseleng?” Ke lihlong le ho itsoa ba khutsa. Jesu O ne A se A ba boleletse hore O lokela ho ba shoela, ‘me takatso tsa bona tsa boithati ba boholo li ne li hanana ha bohlōkō le lerato la Hae le hlokang boithati. Empa leha A ne A buile ka mokhoa o hlakileng joalo ka se Mo tlelang, ho bolela ha Hae ka taba ea hore haufinyane C lokela ho ea Jerusalema hape ha hotetsa tšepo ea bona hore ‘muso o se o tla hlangoa. Hona ha etsa hore ba botse hore na ke mang ea tla ba moholo ‘musong oa

Hae. Qetellong e mong a itekela ho botsa Jesu, “E moholo ‘Musong oa maholimo ke mang?’”

### **Khang Bakeng Sa Boholo**

Mopholosi A re ho bona, “Haeba mang kapa mang a rata ho ba oa pele, e be oa ho qetela ho bohle le mosebeletsi oa bohle.” Ha ba ka ba hlalohanya mofuta oa ‘muso oa Krete, ‘me sena e ne e le sesosa se bonahalang sa khang ea bona. Empa seo e hlileng e leng sesosa sebele se lutse se tebile. Esita leha ba se ba amohetse tsebo e tletseng ka ho fetisisa, potso efe kapa efe ea ho rata ho ho ba ka pele ho ba bang e ne e ka ‘na tsosolosa khathatso. Ka tsela ena kotsi e ka be e tlisitsoe kerekeng kamora’ nyolohelo ea Krete. Tseko ena ea ho ba moholo ke tholoana ea oona moea ola o qalileng khang e kholo leholimong e leng khang e ileng ea theola Krete leholimong hore A tl’o shoa. Ha hlaha ka pele ho Eena pono ea Lucifere, ea ileng a re, “Ke itekanye le Ea Phahametseng tsohle.” Esaea 14:14. Takatso ea boiphahamiso e tlisitse moferefere makhohleng a leholimo. O ile a batla se ka holimolimo, ‘me ‘mopuo a e mong le e mong ea khannoang ke moea oa hae o tla etsa se tsoanang. ‘Muso oa Satane ke ‘muso oa likhoka, motho e mong le e mong o nka e mong osele e le tšitiso tseleng ea hae ea tsoelo-pele, kapa e le mothati oo ka oona a ka hloellang sebakeng se ka holimo.

[298] Ha Lucifere a ntse a batla ho lekana le Molimo, Krete Eena “o ile a iketsa lefeela, a inkela boleng ba lekhoba, a tsoana le batho, a phela joaloka motho. O ile a inyeneyefatsa, ea e-ba ea mamelang ho isa lefung, le hona lefu la sefapano.” Bafilipi 2:7,8. Joale ho ne ho fihlile moo sefapano se leng ka pele ho Eena; athe barutuo a ba Hae bona ba ne ba tletse boipatlo hoo ba neng ba ke ke ba e-ba kutloelong-bohlōkō le Morena oa bona, kapa esita le ho Mo utloisisa ha A bua ka khoboso ea Hae eo A tla e etsoa ka baka la bona.

Jesu A leka ho lokisa phoso. A bontša seo eleng mothèo oa boitšoaro ‘musong oa leholimo le seo boholo ba sebele bo leng sona. Ba neng ba khannoa ke boikhōhōmōso le lerato la ho ipatla ba ne ba inahanella bo-bona feela le melemo eo ba tla ba le eona. Ba joalo ba ne ba ke ke ba e-ba le sebaka ‘musong oa leholimo, hobane ba ne ba ikamahanya le balateli ba Satane.

Pele ho hlomphe ke boikokobetso. Ho tlatsa tulo e phahameng bathong, Leholimo le khetha mosebeletsi ea amohelang sebaka se fatše ka pele ho Molimo. Morutuo ea joaleka ngoana haholo ke ea phethahetseng haholo tšebeletsong ea Molimo. Ea ikutloang bohloki ba hae ba ho hloka thuso ea Molimo o tla bo rapella. Ha a se a kopane le Krete o tla tsoela pele ho sebetsa, a tlotselitsoe thōmo ea hae, ‘me a atlehe moo ba bangata, ba bohlaele kelellong, ba ka hlolehang.

Empa ha batho ba iphahamisa, ba ikutloa hore ho ke ke ha etsa-hala letho la katleho mosebetsing oa Molimo ha ba le sieo Morena O etsa hore ba beeloe ka thōko. Mosebetsi ha o eme empa o tsoela pele ka matla a maholo.

Ho ne ho sa lekana bakeng sa barutuo ba Jesu ho rutoa ka mofuta oa ‘muso oa Hae. Seo ba neng ba se hloka e ne e le phetoho ea pelo. Jesu A bitsa ngoana, A ‘mea har’ a bona, A mo sika, A re, “Ha le sa fetohle le tsoana le bana, le ke ke la kena ‘Musong oa maholimo.’” Bonolo, boitebalo, le lerato la ho tšepa la ngoana e monyenyanane ke tseo leholimo le li hlokang, tseo eleng tsa boholo ba sebele. Maotong a Jesu hlomphe le ho ikalatisa li lebetsoe. Barui le mafutsana, barutehi le batho feela ba teana hammoho e le meea e rekiloeng ka mali, ho sa natsoe maemo a hore na o mofo kapa morena.

Molimo O bea letšoao la Oona ho batho, eseng ka maemo, eseng ka leruo, eseng ka bophahamo ba thuto, empa ka kopano ea bona le Krete, “U ‘nea, thèbè ea hao e pholosang, letsoho la hao le letona lea ntšehetsa, paballo ea hao ea nkhōlisa.” Pesalema 18:36.

Mantsoe a Mopholosi a etsa hore barutuo ba ikutloe ba sa itšepa. Johanne a botsa hore na tabeng e itseng O ile a nepa na. A re, “Moruti, re bone e mong a leleka bademona ka lebitso la hao, ‘me ra mo thibela, hobane a sa re latele.”

Jakobo le Johanne ba hopola hore ka ho hanela motho enoa ba boulela tlōtliso ea Morena oa bona; Joale ba bona hore ba ne ba ipoulella bo-bona. Ba lumela phoso ea bona, ‘me ba amohela khalemelo ea Jesu e reng, “Le seke la mo thibela, kahobane ha ho ea ka etsang ketso e hlollang ka lebitso la ka, ebe a ka phakisa a mpua hampe.” Bongata bo ne bo ile ba ameha haholo ka botebo ke semelo le mosebetsi oa Krete e leng bao lipelo tsa bona li neng li ‘Mulehetse ka tumelo. Barutuo ba tšoanela ho hlokomela ho se

[299]

tepeletse meea ena. Ba tšoanela ho bonahatsa kutloelo-bohlōkō e tebileng e kang eo ba e boneng ho Moruti oa bona.

Kreste ke Mosuo e Moholo. Re lokela ho lula maotong a Hae ‘me re ithute ka Eena. Motho e mong le e mong eo Molimo O mo entseng hore a lumele ke tsela eo ka eona Kreste A tla senola lerato la Hae le tšoarelang. Re lokela ho ba hlokolosi hakaakang esere mohlomong ra tepeletsa le leng la maqosa a Molimo, ‘me ka mokhoa o joalo ra thibela mahlaseli ao A lakatsang hore a khanyetse lefatše!

Ketso e joaloka ea Johanne ea ho hanela e mong ho etsa mehlolo ka lebitso la Kreste e ka ‘na ea etsa hore moea o lahlehe. Ho e-na le hore motho a etse hona, Jesu O re, “Ho molemo ho eena ha a tlanelloa leloala molaleng, ‘me a lahleloa leoatleng.”

Ke baka lang A etsa puo e matla hakaale? Hobane, “Mora Motho o tlike ho batla le ho pholosa ba lahlehileng” Luka 19:10. Na barutuoa ba Hae ba ka bontša hlokomelo e nyenyane bakeng sa meea ea balekane ba bona ho feta eo Morena oa leholimo A e bonahalitseng? Se tšabeha hakaakang sebe sa ho leleka moea o le mong, oo lerato la Mopholosi le mahlomola a ho shoa li sa tlong ho o tsoela molemo!

[300] “Ho malimabe lefatše ka baka la likhopiso! Likhopiso li tlameha ho hlaha.” Lefatše ka ho tiea le tla hanyetsa balateli ba Kreste, empa ho malimabe ea nkileng lebitso la Kreste empa a fumanoa a etsa likhopiso. Matšoele a khelosa ‘me a isoa tseleng tseo eseng tsa ‘nete ke ba ipolelang ba Mo sebeletsa empa ba hlahisa semelo sa Hae hampe.

### **Ntho Efe Le Efe E Isang Sebeng E TSoanela Ho Tlosoa**

Sebe se le seng se bokotsoang se lekane ho theola semelo le ho lahla ba bang. Haeba leoto kapa letsoho li lekana ho khaoloa, esita leihlo ho honngoa e le ho pholosa ‘mele lefung, re lokela ho pheella hakaakang ho beela ka thōko sebe se tlisang lefu moeeng!

Tšebeletsong ea moetlo letsoai le ne le noko a sehlabelong se seng le se seng. Hona joaleka nyehelo ea libano, ho ne ho bolela hore ke ho loka ha Kreste feela ho ka etsang hore tšebeletso e amohelhe ho Molimo. Ha a bua ka taba eo Jesu A re, “E-bang le letsoai ka ho lona, ‘me le phelisane ka khotso.” Bohle le tšoanela ho kopa letsoai

le pholosang, ho loka ha Mopholosi oa rōna. Joale ba fetoha “letsoai la lefatše,” ba thibela bokhopo har’a batho, joaleka ha letsoai le thibela ho bola. Matheu 5:13. Empa ha letsoai le tapile, bophelo bo ke ke ba hlhisetsa lefatše matla a pholosang. Jesu O re, “Le be selekaneng sa mohau oa Ka, hore le be le ho latsoeha ha bophelo ho isang bophelong. Ha ho le joalo ha ho na ho ba le tsekisano, ha ho na hoba le boipatlo, ha ho na ho ba le takatso ea ho phahamela ba bang.

Ha re bona Jesu, Motho oa Mahlomola, ea tloaetseng masoabi, A sebeletsa ho pholosa ba lahlehileng, A eisoa, A nyelisoa, A tsamaisoa hohle metseng ho fihlela thōmo ea Hae e phetheha; ha re ‘Mona Gethesemane, A keketla khōrōrō tsa mali, ‘me sefapanong A e-shoa ka mahlomola -ha re bona sena bonna ha bo sa tla rata ho bonahala. Re tla thabela ho jara sefapano re latetse Jesu, ho mamella teko, lihlolong kapa hloriso ka baka la Hae.

Ho se be moea o lumelang ho Krete o ka nkeloang tlase. Ka lintho tse re fang molemo ka holim’a ba bang eleng — thuto, ntlafalo, bokhabane ba semelo, maiphihlelo a borapeli -ka tsena tsohle re molatong ho ba sa neoang haholo. Ha re le matla, re lokela ho tšehetsa matsoho a ba fokolang. Kamehla mangeloi a na le ba tobaneng le ntoa e thatha-thata ea ho loana le bo-’na, ba nang le mekhoha e mebe semelong, le ba potapotiloeng ke tse nyahamisang haholo. Boliseng bona balateli ba ‘nete ba Krete ba tla sebetsa ‘moho. Jesu A re, “Le re’ng na? Ha motho a e-na le linku tse lekholo, [301] ‘me e ‘ngoe ea tsona e lahleha, na a ke ke a siea tse mashome a robong a metso a robong lithabeng, a ea batla e lahlehileng? Haeba a ka e fumana, ruri, ke re ho lona, o tla e thabela ho feta tse mashome a robong a metso e robong tse sa kang tsa lahleha. Ka mokhoa o joalo, Ntat’a lona ea maholimong ha a rate hore ho timele le ea mong oa ba banyenyane bana.”

### **Bohloki Ba Kamo E Mosa**

U se ke ua hlabisa ea fositseng lihlolong ka ho pepesa phoso tsa hae ho batho ba bang. Hape u se tlise tlōtlōllo ho Krete ka ho pepesa sebe sa ea jereng lebitso la Hae. Ea khelohileng o lokela ho bontšoa phoso ea hae, e le hore a tle a khutle; empa ha u lokele ho ahlōla leha e le ho tsoa. Ho phekoleng maqeba a moea, ho hlokeha haholo

kamano e qenehelang. Ke lerato le kopotsang ho Ea Utloisoang Bohlōkō oa Gologotha feela le ka thusang tabeng ena. Ha u atleha, u tla “pholosa moea lefung,” ebe “u apesitse libe tse ngata-ngata.” Jakobo 5:20.

Empa esita le teko ena e ka ‘na ea se ke ea atleha. Joale Jesu A re, “Nka motho a le mong kapa ba babeli.” Ke feela haeba a sa ba utloe, ke teng feela taba ea hae e ka bolelloang kereke eohle. Ha litho tsa kereke li ke li kopanele thapelo le thapelisiso ea lerato hore motloli a tsosolose. Moea o Halalelang O tla bua ka bahlanka ba Oona, O qekele moleleri ho khutlela ho Molimo: “Rea le kōpa lebitsong la Krete: Boelanang le Molimo.” 2 Bakorinthe 5:20. Ea hanang katamelo ena e kopanetsoeng o khaola leqhama le mo tlamahanyang ho Krete, ‘me ka tsela ena o ikhaotse kopanong ea kereke. Jesu A re ho tloha joale, “Mo talime e le mohedene le molekhetho.” Empa a se ke a khesoa kapa a lahloa ke bana babo ba pele. Mo tšoareng ka mosa le khauhelo.

Ha motho a sa hlokomele tsela eo Krete A e laetseng, ea ho leka ho khutlisa ba leng phosong le sebeng, o fetoha ea thusanang le moetsalibe. Talima Meetlo 19:17. Ha re tlohella makhopo ao re ka beng re a thibetse, rea tlohella ho tsoela pele, re na le boikarabello joalokaha eka re molato oa liketso ka bo-tsona.

[302]

Ha re lokele ho ‘na re pheta leha e le ho qoqa ka phoso ea motho e mong. Ha re batla ho ntša ngoan’abo rōna liphoso, re mo sireletse kahohle kamoo re ka etsang kateng ho baena ba hae, me ka ho fetisisa re mo sireletse nyatsong ea lefatše le sa lumelang. Kamoo re lakatsang hore Krete A re etse kateng, O re re etsane joalo le rōna. “Seo u se tlamang lefatseng se tla tlangoa leholimong, ‘me seo u se lokollang lefatseng se tla lokolloa leholimong.” Matheu 16:19. Litholoana tsa mosebetsi oa lōna ke tsa bo sa feleng!

Empa ha se hore re jare boikarabello bona bo boholo re inotsi. Kae le kae moo lentsoe la Hae le mametsoeng ka pelo ea ‘nete, Krete O teng. Liphuthehong tsa kereke, le moo barutuo ba phuthehileng, leha ba se bakae, ba kopaneng ka lebitso la Hae, le teng O tla ba teng. “Haeba ba babeli ba lona ba e-ba ntsoeleng nthong e ‘ngoe le e ‘ngoe eo ba e kōpang lefatseng, ba tla e etsetsoa ke Ntate ea maholimong.” Ha ka botho ba Hae Jesu e le moabelani le barutuo ba Hae litekong tsa bona ‘me A ba utloela bohlōkō mahlomoleng a bona, ka boMolimo ba Hae O hokahane le terone ea Rabosafeleng.



Ke tsepio e makatsang hakaakang! Matla 'ohle a leholimo a kopana le bohlae ba batho ho huleleng meea ho Krete.

## KHAOLO EA 49—“EA NYORILOENG, A KE A’ILE”

*E itšetlehile ka Johanne 7:1-15; 37-39.*

Hararo ka selemo Majuda a ne a hlokoa ho phuthehela Jerusalema ka mekete ea borapeli. Mokete oa metlotloane e ne e le phutheho e koalang selemo. Ho ne ho bokeletsoe kotulo e hlahang likhohlong le lithoteng tsa Palestina. Ho ne ho khuoe likhunoane tsa mohloare. Palema e ne e entse moliko oa eona. Masihla a morara o bofubelu bo boputsoa a ne a se a tlhotliloe.

Mokete o ne o nka matsatsi a supileng ‘me tlōtlisong ea oona baahi ba Palestina, le ba bangata ba hlahang naheng tse ling, ba ne ba tla Jerusalema. Ba baholo le ba banyenyane, barui le mafutsana, bohle ba ne ba tlisa mpho e itseng e le nyehelo ea teboho ho Ea tlōtlisitseng selemo ka melemo ea Hae. Sohle se neng se ka sa fana ka pontšo ea thabo kahohle se ne se khuoa merung; motse o ne o shebahala joaloka moru o motle.

Mokete e ne e se feela oa teboho ea kotulo empa oa khopotso ea tlhokomelo ea Molimo ho Iseraele feelleng. Boikhopotsong ba bophelo ba bona ba litenteng Baiseraele nakong ea mokete ba ne ba lula metlotloaneng e entsoeng ka makala a matala e entsoeng litseleng, mabaleng a tempele kapa kaholim’a matlo. Maralla le likhohlo tse teetseng Jerusalema hare li ne li itsoe qaa! qaa! Ka liahelo tsena tsa makala barapeli ba ne ba tlōtlisa ketsahalo ena ka lithōko le liteboho.

Pejana ho mokete ona ho ne ho le teng Letsatsi la Lipheko leo ka lona batho ba neng ba tlameha ho boelana le Molimo. Thōko e reng, “Bokang Morena,...mohau oa hae ke oa kamehla eohle,” (Pesalema [304] 106:1) e ne e binoa ka matla, ‘me le tsona liletsa li kopana ‘minong oo ka mefuta ea tsona.

Tempele e ne e le setsi sa thabo ea sechaba sohle. Ka lehlakore le leng le le leng la methati ea tempele e entsoeng ka mahakoe a masoeu sehlopha sa libini sa Balevi se ne se tsamaisa tšebeletso ea

pina. Mino o ne o amoheloa ke mantsoe haufi le hole, ho fihlela maralla a pota-potileng a hoasa ke ‘mino.

Bosiu tempele e ne e bonesoa ka khanya ea maiketsetso. ‘Mino le ho tsokotsoa ha makala a lipalema, le batho ba phetheselang bao holim’a bona ho neng ho oela khanya e hlahang maboneng a fanyehiloeng, le tsamaiso ea litšebeletso, li ne li ama balebelli maikutlo ka mokhoa o tebileng. Empa tšebeletso e neng e tebile ka ho fetisisa maikutlong e ne e le e neng e hopotsa ketsahalo ea ha Iseraele a Tula lefeelleng.

Ka meso baprista ba ne ba tilinya literompeta tsa bona tsa silevera ka matla, ‘me mehōo ea thabo ea batho ba metlotloaneng ea bona e ne e amohela tsatsi la nyakallo ka mofuthu. Joale moprista a khe metsi ka nkho nokeng e phallang ea Kiderone. A phahamiselitse nkho holimo, literompeta li ntse li letsoa, a hloe methati e batsi ea tempele, a e-ea le morethetho oa ‘mino o eang butle.

Aletareng e ka lebaleng la baprista ho ne ho e-na le merifi e ‘meli ea silevera. Metsi a ne a tšelo a ho o mong, le nkho ea veine ho o mong; ‘me tse tšetsoeng ka ho tsona bobeli li phallela nokeng ea Kiderone ‘me li lebe Leoatleng la Letsoai. Metsi ana a khethehileng a ne a emetse seliba seo, ka taelo ea Molimo, se kileng sa kolla lefikeng ho kholisa bana ba Iseraele.

Ha bara ba Josefa ba ntse ba itokisetsa ho ba teng moketeng oo ba lemoha hore Krete ha A etse letho le bontšang hore O tla ba teng. Haesale ho tloha ka pholiso e entsoeng Bethesaida O ne A e-s’o be teng liphuthehong tsa sechaba. Ho qoba ntoa e se nang thuso Jerusalema, O ne A sebetsa Galelea feela. Ho se tsotelle mekete e mehola ea bolumeli ba Hae le lehloeo leo A le hloiloeng ke baprista le baruti, ea e-ba ntho e tsietsang barutuo a ba Hae le mehahabo haholo. Lithutong tsa Hae, O ne A buile ka mahlohonolo a kutlo empa Eena-Ka-Boena A bonahala A sa hlomphe tšebeletso tsa theiloeng ke Molimo.

Ho kopana ba Hae le baleketho, ho se tsotelle lithuto tsa baruti ba molao, le ho qhelela kathōko lithibelo tse etselitsoeng Sabatha ke baholo-holo, tsena kaofela tsa ‘meha khanyetsanong le baokameli ba tsa borapeli. Bana babo ba ne ba nahana hore ke phoso ho ikhetholla ho batho ba baholo ba barutehi sechabeng. Ba ne ba lumela hore batho bana ba lokela e-ba ba nepile. Empa e ne e le lipaki tsa hore bophelo ba Jesu ha bo na ho nyatsuo a ba bile ba amehile ka botebo

ke mesebetsi ea Hae. Ba ne ba sa ntse ba tšepile hore O tla bontša Bafarisi hore ke Mesia, Morena oa Iseraele! Ba chacheha ke khopolo ena ka motlōtlō o moholo.

Ba ne ba chesehile hoo ba ileng ba susumetsa Krete ho ea Jerusalema. “Tloha mona” ba rialo, “u ee Judea, hore le barutuo ba hao ba bone mesebetsi eo u e etsang, hobane ha ho ea etsang letho sephiring, ha a batla ho ba pepeneng. Ha u etsa tsena, iponahatse ho lefatše.” Haeba A tseba hore ke Mesia keng ha A khoechelletse morao tjee? Ke hobaneng A sa eeng ka sebete Jerusalema ‘me A phèthè mesebetsi e tsotelang e boleloang ka Eena Galelea? ‘U se ke ua ipata naheng tse ka thōko/ba rialo. ‘Itlhahise motse moholo, hapa tšebetso ea baprista le babusi, ‘me U hlome ‘muso o mocha.’

### **Mabaka A Boithati A Hlahatsoa**

Bana bana babo Jesu ba itšetlehile ka tsela ea boithati e sebelisoang ke ba batlang ho iponahatsa. “Jesu a re ho bona: ‘Nako ea ka ha e e-s’o fihle, athe nako ea lōna ke eona kamehla. Lefatše le ke ke la le hloea, empa ‘na le ntlhoile, kahobane ‘na ke paka hore mesebetsi ea lona e mebe. Lōna, eeang moketeng; ‘na ha ke ee moketeng ona, hobane nako ea ka ha e e-s’o fihle.’ Hoba a ba bolelle tsena, a sala Galelea.” Bana babo ba ne ba bua le Eena ka ho Mo laela. A ba araba ka nyatso A bontša A sa ba balelle ho barutuo ba hae ba itetseng, empa A ba balella ho lefatše. Lefatše ha le hloee ba tšoanang le lona ka moea; le ba rata e le ba lona.

[306] Krete O ne A sa ikakase, A sa lokele ho khorohela kotsing, A sa lokele ho potlakisa kotsi. O tsebile hore O lokela ho amohela lehloeo la lefatše. O tsebile hore mesebetsi oa Hae o tla fella ka lefu; empa ho itlhahatsa e e-s’o be nako e ne e ke ke ea e-ba thato ea Ntat’ae.

Bongata bo hlahang likarolong tsohle tsa lefatše bo ne bo tlile Moketeng oa Metlotloane ka tšepo ea ho bona Krete. Bafarisi le babusi ba ne ba ‘matla, ba tšepile ho fumana sebaka sa ho Mo tsoa. Ba botsa ba khathatsehile, “O kae?” empa ho ne ho se ea tsebang. Ha se be le ea mong ea reng ke Mesia, empa hohle ho ne ho bueloa fatše, ho buisanoa ka Eena. Bongata ba ‘Muella, ba re O romiloe ke Molimo, ha ba bang ba Mo qosa ba re Ke mothetsi.

Athe Jesu O se A fihlile Jerusalema ka lenyele ka tsela e sa tsamauoeng khafetsa. Hoja A kenella sehlopha sa baeti ba bahoebi, bohle ba ka be ba Mo etse hlōkō, ‘me pontšo ea sechaba e ka be e raositse ba boholong ho Mo loantša.

Hoba mokete o loele, A kena lebaleng la tempele, pontšeng ea bongata. Ho ne ho itsoe A ke ke A hlahela pontšeng ea baprista le babusi. Bohle ba makala ke boteng ba Hae. Mantsoe ohle a khutsisoa.

A ema joalo, e le Eena ea shebueeng ke bohle moo, ‘me A bua le bona ka mokhoa oo ho e-s’o be le ea mong ea kileng a bua joalo. Mantsoe a Hae a bontša tsebo ea tšebeletso ea mahlabelo le lithuto tsa baporofeta ka ho fetisisa baprista le baruti ba molao. Joaleka ha e le ea kileng a bona Ea Sabonoeng, A bua ka matla a Morena oa lefatše le oa leholimo. Ho tšoana le Kaperenauma, batho ba tsota thuto ea Hae, “hobane mantsoe a hae a ne a e-na le matla.” Luka 4:32. A leka kahohle ho ba tlisa pakong. O ne A ke ke A lahloa le ho bolaoa ka sehlōhō ke sechaba sa Habo haeba A ne A ka ba pholosa molatong oa ketso e joalo.

Ba botsana ba re, “O tseba tsa thuto joang, a sa ithuta?” Jesu le Johanne Mokolobetsi bobeli ba ne ba hlahisoa ba sa tsebe letho hobane ba ne ba sa ka ba kena likolong tsa baruti ba molao. Ba ba utloileng ba ne ba makatsoa ke tsebo ea bona ea Mangolo, athe Molimo oa Leholimo e ne e le Eena mosuoe oa bona. Ha Jesu A ntse A bua lebakeng la tempele, batho ba sala ba maketse. Batho ba neng ba Mo befetse hampe-mpe ba utloa ba hloka matla a ho Mo ntša kotsi.

### **Mokhathala Oa Barapeli Oa Hlokomeleha**

[307]

Meso ea letsatsi la ho qetela la mokete e fihletse batho ba khatsetse ke ho keteka nako e telele. Hang-hang Jesu A phahamisa lentsoe la Hae A re, “Ha motho a nyoriloe, a tie ho ‘na, a noe. Ea lumelang ho ‘na, joalokaha Mangolo a boletse, linōka tsa metsi a kollang li tla phalla li e-tsoa ka ho eena.” Batho ba ne ba ‘nile ba nkeha ke pono ena e ntseng a tsoella ea bokhabane bo boholo le keteko, mahlo a bona a hapeha ke leseli le mebala, le tsèbè tsa bona li thabisitsoe ke ‘mino o monate-nate; empa ho ne ho se letho le

khotsofatsang litlhoko tsa moea, ho se letho le ka timang lenyora la moea.

Hoseng hono moprista o ne a ile a tsoa ho ea phetha tšebeletso e neng e hopotsa ho otloa ha lefika lefeelleng. Lefika leo le ne le tšoantša Eo ka lefu la Hae A ka tlang ho etsa hore metsi a kollelle poloko. Eaba hona moo pontšeng ea bongata Krete O ipea kathōko ho otloa, e le hore metsi a bophelo a phallele lefatseng. Ha Jesu A bua, lipelo tsa bona tsa kenoa ke tšabo esele. Ba bangata ba lokela ho hōoa sa mosali oa Samaria ba re, “Ak’u mphe metsi ao, hore ke se ke ka hlola ke nyoroa.” Johanne 4:15.

Ba bangata ba mametseng Jesu e ne e le balli ba kileng ba soabisoa, ho le teng ba nang le tse ba hlabileng tse patiloeng, kapa ba batla ho kholisa takatso tse tjolomisang tsa bona ka lintho tsa lefatše; ‘me har’a thabo e neng e le moo ba nee ba ba hlorile, ba sa khotsofala. Mohōo oo o neng o re, “Ha motho a nyoriloe,” oa ba tšosa, ‘me eare ha ba utloa mantsoe a latelang, kelello tsa bona tsa hotetsoa ka tšepo e ncha. Ba bona pontšong e ka pele ho bona neo ea bohlokoa e leng mpho ea poloko.

Mohōo oa Krete ho moea o nyoriloeng o ntse o tsoela pele le joale, ‘me o ipiletsa ho rōna ka matla a maholo ho fetisa a ba o utloileng ka tempeleng, tsatsing la ho qetela la mokete. O re, “Ea nyoriloeng a ke a tle; ea ratang a ke a noe metsi a bophelo, a fanoang feela.” Tšenolo 22:17

*Khaolo ena e itšetlehile ho Johanne 7:16-36; 40-53; 8:1-11.*

Nakong eohle ea mokete Jesu O ne A lika-likelitsoe ka lihloela. Letsatsi ka letsatsi ho ne ho lekoa mano a macha ho Mo khutsisa. Baprista le babusi ba ne ba rera ho Mo thibela ka leqholo. Tsatsing la Hae la pele moketeng ba botsa hore na ke ka matla a tsoang ho mang A rutang.

Jesu A re, “Thuto ea ka hase ea ka, empa ke ea ea nthōmileng; ha motho a rata ho etsa thato ea ea nthōmileng, o tla tseba hore na thuto eo e tsoa ho Molimo, kapa ke bua ka bonna.” A re temoho le kananelo ea ‘nete li itšetlehile pelong ho fetisa maikutlong. ‘Nete e hloka hore thato ea motho e ikokobeletse eona. E amoheloa ka tšebetso ea mohau pelong; ‘me ho e utloisisa ho itšetlehile holim’a ho furalla sebe se seng le se seng seo Moea oa Molimo o se senolang. Ho lokela ho be le boikemisetso ba ho lahla tloaelo e ‘ngoe le e ‘ngoe le ketso ka ‘ngoe e hananang le methèo ea ‘nete. Ba ineelang ho Molimo ka tsela ena ba tla tseba ho hlalohanya pakeng tsa ba buang tsa Molimo le ba ipuelang tsa bona feela. Bafarisi ba ne ba sa batle ho tseba ‘nete, ba ne ba mpa ba batla ho fumana mokhoa oa ho e qoba. Ke eona taba e entseng hore ba se utloisise thuto tsa Kreste.

“Ea ipolelang o ipatlela tlōtla, athe ea batlang tlōtla ea ea mo rōmileng, eena ke oa ‘nete, ‘me ho se lōke ha ho eo ho eena.” Moea oa boipatlo o se o ntse o ipolela hore na o tsoa kae. Empa Kreste O ne A batla tlōtliso ea Molimo. Hona e ne e le bopaki ba hore na matla a Hae a boruti a tsoa kae.

Jesu A fa baruti ba molao pontšo e kholisang ea boMolimo ba Hae ka ho bontša hore O bala lipelo tsa bona. Ba ne ‘nile ba rera ho ‘molaea, ka hona ba ne ba roba molao oo ba neng ba bolelisa ho o sireletsa. A re, “Na Moshe ha aa ka a le nea Molao? Empa ha ho le ea mong ea phethang Molao oo. Ke ka baka la’ng ha le batla ho mpolaea?”

Joaleka khanya ea liseli e potlakileng mantsoe ana a senola lemena la tahleho leo haufi ba tla oela ho lona. Ka motsotsoana ba bona hore ba ntoeng le Ea-Matla-Ohle. Empa ba ne ba sa rate ho eletsoa. Ba rera ho pata merero ea bona ea bobolai. E le ho leka ho baleha potso ka bohlale, ba hōoa ba re, “U na le modemona; ke mang ea batlang ho u bolaea?”

Puong e sothiloeng e reng mesebetsi ea Hae e makatsang e susumetsoa ke moea o litšila, Krete A se ke A e tsotella. A tsoela pele ho bontša hore ketso ea Hae ea ho phekola Bethesaida e nepahetse ho latela tlhaloso eo Bajuda ba hlalolang Sabatha ka eona. Ka ho ea ka molao, ngoana e mong le e mong o lokela ho bōlōtsoa ka letsatsi la borobeli. Haeba nako e khethiloeng e e-ba ka Sabatha, moetlo o ne o tšoanela ho phethoa hang-hang. Ha hole joalo ho nepahetse hakaakang ho folisa motho “kahohlehohle ka Sabatha?” A ba lemosa A re, “Se ahlōleng ho ea ka tšobotsi, empa ahlōlang ka kahlōlo e lōkileng.” Babusi ba tholisoa.

### **Khopolo Tse Fosahetseng Ka Mesia Le Hotla Ha Hae**

Ba bangata bao e neng e le baahi Jerusalema ba ikutloa ba huleloa ho Krete ke matla a ke keng a haneloa. Kholiso ea ba pheella ea hore ke Mora oa Molimo. Empa Satane o ne a se a itōkiselitse ho hlahisa pelaelo. Ho ne ho lumeloa ka kakaretso hore Krete O tla tsoalloa Betlelehema, le hore kamora' nakoana O tla nyamela, 'me ho hlaheng ha Hae labobeli ha ho ea tla tseba moo A tsoang. Ba bangata ba ne ba lumela hore Mesia ha A na ho ba le leloko la Hae la tlhaho bothong.

Ha bongata bo ntse bo lika-lika joalo pakeng tsa pelaelo le tumelo, Jesu A sebelisa se mehopolong ea bona: “Lea ntseba, le tseba le moo ke tsoang teng; ha kea tla ka bonna, empa ea nthōmileng ke oa 'nete, eo le sa mo tsebeng.” Mantsoe a Krete e bile pheto ea polelo eo A neng A e entse pontseng ea Lekhotla la Sanhedrin,

[310]

li khoeling tse ngata pele, ho moo, ha A ipolela hore ke Mora oa Molimo.

Har'a sechaba bongata ba lumela ho Eena, 'me ba re, “Ha Krete a e-tla, na o tla etsa mehlole e mengata ho feta e entsoeng ke eo?” Baetapele ba Bafarisi, ba ntse ba falimehetse kamoo ketsahalo li tsamaeang kateng, ba elelloa lipuo se Mo kutloelobohlōkō har'a



letšoele. Ba potlakela ho baprista ba baholo, ba hlahisa merero ea bona ea ho Mo tšoara ha A le inotši, kaha ba ne ba tšaba ho Mo tšoara pontšeng ea batho.

Bongata bo neng bo kholisehile hore Jesu ke Mora oa Molimo bo ne bo khelositsoe ke thetso tsa baprista le baruti ba molao. Baruti bana ba ne ba phetile, ka matla a maholo, boporofeta bo buang ka Mesia, ba re o tla “busa Sione le Jerusalema, baholo a ba senolela tlōtla ea hae,” A “buse ho tloha leoatleng le leng ho isa ho le leng, le ho tloha Nokeng ho isa pheletsong tsa lefatše.” Esaea 24:23; Pesalema 72:8. Eaba ba bapisa khanya e boleloang Mangolong, ba e bapisa le ponahalo e ikokobelitseng ea Jesu. Hoja batho ba ne ba ithutile Lentsoe ka bo-bona, ba ka be ba sa ka ba kheloso. Esaea Khaolo ea 61 e paka hore Kreste O ne A lokela ho etsa ‘ona mosebetsi oo A o entseng. Khaolo ea 53 e hlahisa ho lahloa ha Hae ke chaba sa Habo; ‘me khaolo ea 59 e hlalosa semelo sa baprista le baruti ba molao.

### **Matla A Ho Arola Pakeng Tsa Ho Nepahetseng Le Ho Fosahetseng**

Molimo ho O qobcile batho ho tela ho se lumele ha bona. Morero oa Hae ke hore batho ba rere eseng ka nama empa ka boima ba bopaki, ka hlōkō ba bapise lengolo le lengolo. Hoja Bajuda ba na ba bapisa boporofeta bo ngotsoeng le likctsa halo, ba ka be ba ile ba lemoha tumellano e ntle pakeng tsa boporofeta le phethahatso ea bona bophelong le boliscng ba Mogalelea ea ikokobctsang.

Bongata bo khelositsoe kajeno ka tsela e tšoanang le ea Majuda. Baruti ba borapeli ba bala Bibeke ka tsela ea nceletsano ea litaba; ‘me le batho ha ba batlisise Mangolo ka bo-bona, empa ba tlohella ho iketsetsa qeto ea bona, ebe ba lesella meea ea bona ho balisa ba bona. Mang kapa mang ea ithutang Bibeke ka morero oa ho e mamela o tla fumana ponsetso ho Molimo. O tla utloisisa Mangolo. “Ha motho a rata ho etsa thato ea ea nthōmileng, o tla tseba hore na thuto eo e tsoa ho Molimo, kapa ke bua ka bonna.”

Tsatsing la ho qetela la Mokete, balaoli ba neng ba rōmetsoe ho ea tsoara Jesu ba khutla kantle ho Eena. Ba botsoa ka khalefelo ha thoe, “Ke ka baka la’ng le sa mo tlisang?” Ba araba ba re, “Ha ho motho ea kileng a bua joaloka motho enoa.”

Leha lipelo tsa bona li ne li se li thatafetse li ile tsa nolofatsoa ke mantsoe a Hae. E ne e ile eare ha A ntse A bua, ba lika-lika haufi, ho fumana ho hong ho neng ho ka lebisoa ho Eena ho Mo loantša ka hona. Empa ha ba ntse ba mametse, Krete A itšenola meeeng ea bona. Ba bona seo baprista le babusi ba neng ba hlōtsoe ho se bona eleng bōtho bo apesitsoeng ka khanya ea bo-Molimo.

Baprista le babusi, ha ba qala ho teana le Jesu, ba ne ba ile ba utloa ba kholiseha ka tsela e tšoanang. Lipelo tsa bona li ne li ile tsa ameha ka mokhoa o tebileng ‘me ba ba le khopolo, e reng, “Ha ho motho ea kileng a bua joaloka motho enoa.” Empa ba na ba tima kholiso ea Moea o Halalelang. Eaba ba hōoa ka khalefo ba re, “Na le lōna le khelositsoe? Na o teng ho babusi kapa ho Bafarisi ea lumetseng ho eena? Empa mahōōhōō ana a sa tsebeng Molao a rōhakehile.”

Bao bao molaetsa oa ‘nete o buuoang ho bona ke ka seoelo, ba botsang ba re “A ke ‘nete?’” empa ba ee ba re, “E buelloa ke mang?” Matšoele-tšoele a e lekanya ka bongata ba batho bo e amohelang. Le kajeno potso ena e sa ntse e botsoa, “Na o teng ho babusi kapa ho Bafarisi ea lumetseng ho eena?” Hore e-be taba ke ‘nete hase hobane batho ba bangata ba ikemiselitse ho e amohela, kapa hore ha e amohelhe ho batho ba hlomphehang lefatšeng, leha e le hore baetapele ba tsa bolumeli ba e amohela kapa che.

[312] Ha boetse ha tiisoa hore ha Jesu A ka tlohella A lokolohile o tla hula batho A ba tlose ho baetapele ba tsebahalang. Tsela e ‘ngoe feela. Ke ho Mo tholisa ntle ho tieho ea letho. Nakong eo phetolano ea bona e loetseng ba kenoa hanong hang-hang. Nikodema a botsa, “Na Molao oa rōna o ahlōla motho a e-s’o ikarabelle, le ho tseba seo a sè entseng?” Phutheho ea khutsa. Ba ne ba ke ke ba ahlōla motho a sa ka a mameloa. Empa babusi ba ikhohomosang ba nyaroha ‘me ba soabisoa ke hore e be e mong oa hlakore la bona ka sebele o se a hapehile haholo ke Jesu hoo a bileng a hlahisang lentsoe le Mo sireletsang. Ba re “Na le uena u tsoa Galelea? Fuputsa, ‘me u tla bona hore ha ho moporofeta ea tsoang Galelea.”

Ka lebaka la khanyetso eo babusi ba lula ba hlōtsoe ha nakoana ‘me “e mong le e mong a ea tlung ea hae.”

## Jesu O Sebetsa Nyeoe Ea Bofebe

Ho tloha pherekanong ea motse, ho tloha matšoeleng a labalabelang ho hong, le ho baruti ba tletseng boeki Jesu A ea moo ho khutsitseng, merunyaneng ea mehloare, moo A ka bang boinotšing le Molimo. Empa e sa le hoseng A khutlela tempeleng, 'me batho ba 'Mokanela.

Hang-hang A kenoa hanong. Sehlopha sa Bafarisi le bangoli sa atamela, se hulanya mosali ea tšohileng. Ka manlsoe a matla, a laba-labelang ho hong ba mo qosa ka ho tlōla molao oa bosupa. Hoba ba mo sutumetse pontšeng ho Jesu, ba re, "Molaong Moshe o laetse hore ba joalo re ba tlepetse ka majoe; uena u re'ng?"

Ba ne ba nkile monyetla ka nako ena ho fumana seo A ka ahlōloang ka sona; ba nahanne hore taelong efe kapa efe eo A ka e etsang, ba tla fumana lebaka la ho Mo qosa. Ha A ka lokolla mosali, O na A ka qosoa ka hore O nyelisa molao oa Moshe. Ha A na A ka mo phatlalatsa a lokela lefu, O ne A ka qosoa ho Maroma ka ho inkela matla ao eleng a bona feela.

Jesu A talima ketsahalo ena -phofu e tlakaselang lihlonng tsa eona, batho ba maemo a hlomphehang ba fahleho li thata, ba hlokgang mohau. O bala pelo 'me A ba A tseba semelo le pale ea bophelo ba e mong le e mong oa bona. A se ke A ba bontša hore O utloa potso ea bona. A inama 'me A qala ho ngola leroleng.

Ka ho khentšoa ke tieho ea Hae le boiphapanyo ba Hae, baqosi ba atamela haufi-ufi. Empa hoba mahlo a bona a tsepame maotong a Hae, tšobotsi tsa lifahleho tsa bona tsa fetoha. Teng ba bona ho hlahisitsoe ka pele ho bona, makunutu a ba tsoang a bophelo ba bona ka sebele. Batho ba bona phetoho e potlakileng ea puo ea bona, 'me ba petetsana ho ea ka pele ho ea bona hore na keng seo ba neng ba se hlokometse ka makalo e kaalo le lihlong.

Ka boipolelo bohle ba bona ba hore ba hlompha molao, baruti bana ba ne ba sa e le hlōkō lithōkō tsa ona. Ea neng a lokela ho qosa e ne e le monna oa mosali; 'me batho ba entseng bohlola ba khalemeloe ka ho lekana. Ketso ea baqosi bana e ne e se ea molao. Leha ho le joalo Jesu A ba tšoara ka ntho ea bona. Molao o topile hore lipaki nyeoeng e be tsona tsa pele ho betsa lejoe. Joale ha A inamoloha 'me A tsepamisa mahlo a Hae ho baholo ba neng ba rerile

polao, Jesu A re, “Ea se nang sebe ho lona, a ‘metse pele ka lejoe!” A ntoo boela A ngola fatše.

Joale baqosi, ha ba hlōtsoe, seaparo sa bona sa ho iketsa ba khalalelo sa ba tabohela, ba ema ba le molato ba tsuoe pontšeng ea Bohloeki bo se nang Bofelo. Ba tsoa ba salane morao, ka hloho tse kebileng le mahlo a tepeletseng, ba siea motho eo ba mo hobosang le Mopholosi ea nang le qenehelo.

Eaba Jesu oa inamoloha, ‘me ha A talima mosali A re, “Mosali, ba kae? Ha ho ea u tsoileng?” A re: “Ha a eo, Morena.” Jesu A re: “Le ‘na ha ke u tsoe; e-ea, ‘me ho tloha joale u se ke ua hlola u etsa sebe.”

Mosali o ne a eme ka pele ho Jesu a kobotetse ke tšoho. Mantsoe a Hae, “Ea se nang sebe ho lōna, a ‘metse pele ka lejoe!” a mo fihlela joaleka kahlōlo ea lefu. Ka mokhoa o khutsitseng o ne a lebeletse tsuo ea hae. Ho hlolloeng a bona baqosi ba hae ba tloha, ho se puo ‘me ba ferekane; eaba o utloa mantsoe ao a tšepo a reng, “Le ‘na ha ke u tsoe; e-ea, ‘me ho tloha joale u se ke ua hlola u etsa sebe.” Pelo ea hae ea qhibiliha, ‘me ka ho sisa pelo ke lerato la hae la teboho, ka lillo tse bohloko a ipolela libe.

Hona ebile qaleho ea bophelo ba hloeko le khotso ho eena. Ka ho phahamisa moea ona o oeleng, Jesu O phethile mohlolo o moholo haholo ho fetisa ho folisa boloetse ba ‘mèle bo utloisang bohloko ka ho fetisisa. O folisitse boloetse ba moea bo isang lefung la bo sa feleng. Mosali enoa ea soabetseng libe tsa hae ‘me a li baketse ea e-ba e mong oa balateli ba Hae ba tiileng ka ho fetisisa.

[314] Jesu ha A bapalise sebe leha e le ho nyenyefatsa molato, empa O batla ho pholosa. Ea Hlokoang Sebe O hauhela bofokoli ba moetsalibe ‘me A nanabetse letsoho le thusang. Molateli oa Krete ha a lese hore ba latele tsela ea tšenyeho. Batho ba hloile moetsalibe athe ba rata sebe. Krete O hloile sebe, empa O rata moetsalibe. Ona e tla ba moea oa bohle ba Mo latelang. Lerato la Bokreste le lieha ho nyatsa, le phakisa ho lemoha masoabi, le itōkiselitse ho tšoarela, ho khothatsa le ho bea moleleri tseleng ea khalalelo.

## KHAOLO EA 51—LESELI LA BOPHELO

[315]

*[E itšetlehile ka Johanne 8:12-59; 9.]*

Ke ‘na leseli la lefatše; ea ntatelang ha a ka ke a tsamaea lefifing, empa o tla ba le leseli la bophelo.”

E ne e le hoseng; letsatsi le sa tsoa chabela holim’a thaba ea Mehloare, ‘me mahlaseli a lōna a otlala holim’a mekhabiso ea matlo a borena ka khanya e bohale, ‘me a khantša khauta ea marako a tempele. Ke moo Jesu A itšupileng, A re, “Ke ‘na leseli la lefatše.” Kamorao ho nako e telele, mantsoe ana a ile a boela a phetoa ke moapostola Johanne, ka molaetsa o tlōtlisang, a re, “Bophelo bo ne bo le ka ho lona, ‘me bophelo e ne e le leseli la batho; leseli le khanya lefifing, empa lefifi ha lea ka la le hlōla.” “Leseli la ‘nete le bonesetsang motho e mong le e mong, le ne le e-tla lefatšeng.” Johanne 1:4,5,9. Molimo ke leseli; ‘me ka mantsoe ana, “Ke ‘na leseli la lefatše,” Krete O ne A phatlalatsa bonngoe ba Hae le Molimo, le kamano ea Hae le lelapa la bōtho ka kakaretso. Ke Eena eo qalong A entseng hore, “Leseli le khanye lefifing.” 2 Bakorinthe 4:6. Ke Eena khanya ea letsatsi, khoeli le linaleli. Joalekaha mahlaseli a phunyelletsisa le likhutloana tse likeletseng tsa lefatše, le leseli la Letsatsi la ho Loka le khanya joalo moeng oa motho e mong le e mong.

“Leseli la ‘nete le bonesetsang motho e mong le e mong, le ne le e-tla lefatšeng.” Johanne 1:9. Banna ba likelello tse kholohali le lipatlisiso tse hlolang, bao lipolelo tsa bona li butsenseng mecha ea litsebo tse pharaletseng, ba tlōtlisoa e le ba bohlokoa sechabeng sa habo bona. Empa e mong O teng ea ba phahametseng. “Empa bohle ba le amohetseng, e leng ba lumelang ho lōna, le ba neile tokelo ea ho fetoha bana ba Molimo.” “Ha ho ea kileng a bona Molimo le ka mohla; Mora ea tsoetsoeng a ‘notši, eo e leng Molimo, ea leng sefubeng sa Ntate, ke eena ea re tsebisitseng Molimo.” Johanne 1:12,18. Re ka lōkōlisa lethathamō la mesuoe e meholo ea lefatše lena, ho ea morao moo litaba tsa bōtho li qalileng teng; empa leseli

[316]

le bile teng pele ho eona. Joalekaha khoeli le linaledi tse sebakeng li bonesa ka khanya ea letsatsi, ho joalo le ka bahlalefi ba lefatše lena, moo lithuto tsa bona e leng tsa ‘nete, ba senola mahlaseli a Letsatsi la ho Loka. “Thuto e phahameng” ea ‘nete e fanoa ke Eena “moo matlotlo ‘ohle a bohlale le a tsebo a patiloeng teng.” Bakolose 2:3. “Ea ntatelang ha a ka ke a tsamaea lefifing, empa o tla ba le leseli la bophelo.”

Ha Jesu A ne A re, “Ke ‘na leseli la lefatše,” batho ha ba ka ba hlōloa ho lemoha hore O ipolela hore ke Eena Mesia Ea tšepisitsoeng. Ho bafarisi le babusi boipolelo bona e ne e le boikakaso. Ba sitoa ho mamella hore motho ea tšoanang le bona a etse boikakaso bo joalo. Ba botsa, ba re, “U mang?” Ba ne ba leka ho Mo qobella hore A ipolele e le Kreste. Lira tsa Hae li ne li lumela hore chebahalo ea Hae, le mesebetsi ea Hae li fapane le se lebeletsoeng ke batho, hoo boipolelo ba Hae bo totobetse, ba hore ke Mesia, bo neng bo tla etsa hore batho ba Mo lahle ka hore ke moikaketsi.

Empa Jesu A araba, A re, “Hantle ke buela’ng le lona?”. Eena e ne e le tiiso ea linnete tseo A neng A li ruta. A tsoela pele A re, “Ea nthōmileng o na le ‘na; ha a ea ntlohela ke ‘notši, hobane ke etsa tse mo khahlisang kamehla.” O ne A sa leke ho pakahatsa boipolelo ba Hae ba hore ke Mesia, empa A bontša kopano ea Hae le Molimo.

Har’a ba ileng ba Mo utloa, ba bangata ba ile ba huleloa ho Eena ka tumelo, ‘me ho bona A re, “Ha le tiisetsa lentsoeng la ka, le barutuo ba ka kannete; le tla tseba ‘nete, ‘me ‘nete e tla le lōkōlla.”

Mantsoe ana a khopisa Bafarisi. Ba Mo araba, ba re, “Re litlōhōlō tsa Aborahama, ‘me ha re e-s’o ka re e-ba makhoba a motho le ka mohla. U bolela joang ha u re: ‘Le tla lōkōlōha?’” Jesu A sheba banna bana, bao e leng makhoba a mohono, ‘me A ba araba [317] ka masoabi A re, “Kannete-nete, kea le bolella hore e mong le e mong ea etsang sebe ke lekhoba la sebe.” Ba ne ba le bokhobeng bo bobe haholo -ba busoa ke moea o litšila.

Motho e mong le e mong ea hanang ho inehela ho Molimo, o laoloa ke matla a sele. O ba bokhobeng bo tšabehang, ‘me kelello ea hae e ba tras’a taolo ea Satane. Kreste O tlike ho tla khaola maqhama a bokhoba ba sebe ho motho. Ha ho le joalo, “Joale ha Mora a le lōkōlla, le tla be le lōkōlōhile ka sebele.”

Mosebetsing oa topollo ha ho qobello. Motho o na le bōlōkōlohi ba ho ikhethela eo a tlang ho mo sebeletsa. Ha motho a inehela ho

Kreste, o ba le bōlōkōlohi bo boholo. Motho ka boena o leleka sebe. Ha re lakatsa ho lōkōlōha sebeng, ‘me re hoeletsa, re kōpa matla a sa tsoeng ho rōna, a kaholimo, re tlatsoa ka matla a Moea o Halalelang, ‘me re phethe takatso eo ka ho etsa thato ea Molimo.

Boemo bo bong feela bo ka phethahatsang topollo ea motho, ke ho ikopanya le Kreste. Sebe se ka atleha ha feela se ka bolaea bōlōkōlohi ba motho. Ho inehela ho Molimo ho re buseletsa boleng ba rona, le khanya ea rōna, le tlhompheo ea rōna. Molao oa leholimo, oo re beoang tlas’ a oona, ke “molao oa tokoloho.” Jakobo 2:12.

Bafarisi ba ne ba ipoletse e le bana ba Aborahama. Empa bana bao e leng bona hantle, ba ne ba ke ke ba leka ho bolaea Ea neng A bua ‘nete eo A e neiloeng ke Molimo. Ho ba oa leloko la Aborahama ka nama, ha ho na molemo oa letho. Ha ba hloka moea o tšoanang le oa hae, ba sa etse mesebetsi e tšoanang le ea hae, e ne e se bana ba hae.

### Taba Ea Tlhahlamano Ea Baapostola

Joalokaha ho pakiloe hore ho ba setloholo sa Aborahama, ha se ka lebitso kapa tsoalo, empa ke ka ho tšoana ha semelo, ka mokhoa o tšoanang le eona tlhahlamano ea boapostola ha ea itšetleha ka neheletsano ea matla a bokereke, empa e itšetlehile ka likamano tsa moea. Pontšo ea ‘nete ea ho latela boapostola, ke ho phela bophelo bo laoloang ke moea o neng o laola baapostola, le ho lumela le ho ruta ‘nete eo ba neng ba e ruta.

Jesu A re, “Lōna le etsa liketso tsa ntat’ a lona.” Bajuda ba araba ka ho soma ba re, “Ha rea tsoaloa ka bohloa; re na le Ntate a le mong, e leng Molimo.” Mantsoe ana, a ne a bapisoa le mokhoa oo A tsoetsoeng ka oona, a ne a reretsoe ho hlaba Kreste pontšeng ea batho ba neng ba qala ho lumela ho Eena. Jesu A se ke A tsotella taba eo, A mpa A re, “Ha Molimo e ne e le Ntat’ a lona, le ka be le nthata, hobane ke tšile ke e-tsoa ho Molimo; ha kea tla ka bonna, empa ke eena ea nthomileng.” [318]

“Le tsoa ho ntat’ a lona, Diabolosi,” ha rialo Jesu. “‘me le rata ho phetha litakatso tsa ntat’ a lōna. Eena e bile ‘molai ho tloha tšimolohong, ‘me ha aa ka a ema ‘neteng, hobane ha ho ‘nete ka ho eena....Ha ke bolela ‘nete, ke ba baka la’ng ha le sa ntumele?’ Taba ea hore Jesu O ne A bua ‘nete ka ho tiea, ke eona e entseng hore

baetapele ba Bajuda ba se ke ba Mo amohela. ‘Nete e ne e khopisa batho bana ba neng ba ipona ba lōkile. ‘Nete e ne e totobatsa liphoso tsa bona, e tsoa lithuto le mekhoha ea bona; ‘me e ne e sa amohelehe. Ha ba ka ba rata ‘nete.

### **Ha Ho Sebe Ho Jesu**

“Ke mang ho lona ea ka mpeang molato oa sebe? Ha ke bolela ‘nete, ke ka baka la’ng ha le sa ntumele?” Ka letsatsi le letsatsi ka lilemo tse tharo, lira tsa Krete li ne li ntse li leka ho fumana koli scmelong sa Hae. Satane o ne a ntse a batla mokhoa oa ho Mo hlōla, empa a se ke a fumana letho ho Eena, le ka mo fang monyetla o joalo. Esita le meea e litšila e ile ea tlameha ho bolela hore, “U Ea halalelang oa Molimo!” Mareka 1:24. Jesu A phela ka mokhoa o hlokoang ke molao, pontšeng ea leholimo le pontšeng ea mafatše a sa oelang sebeng, le pontšeng ea batho ba oetseng sebeng. O ne A ile A bua kante ho qholotso, mantsoe ao, hoja a buuo a ke e mong, ho ka beng ho thoe oa nyefola, A re: “Ke hlompha Ntate.”

Bajuda ba ne ba sa hlokomele lentsoe la Molimo ka har’a molaetsa oo oa Mora oa Hae. Bona ba ne ba hopola hore ba ahlōla Krete; empa ba ne ba ikahlōla bo-bona. Jesu A re, “Ea tsoang ho Molimo o utloa lipolelo tsa Molimo; ke ka baka lena le sa utloeng, hobane ha le tsoe ho Molimo.”

[319] Ba bangata ba thabelang ho pheha khang, le ho tšoaea liphoso, ba ntse ba batla seo ba ka se hanyetsang Lentsoeng la Molimo, ba nahana hore hona ke pontšo ea hore likelello tsa bona lia phela, ebile li chatsi. Empa ho phenyekolla lintho tse hlokoang thuso, ho bontša semelo se fokolang sa bo-lefatše, le pelo e lahleheloang ke matla a ho rata, Molimo. Joalokaha palesa e retelehela letsatsing, hore mahlaseli a khanyang a e chabele ka botle ba ‘ona, le motho o retelehela joalo ho Letsatsi la ho Loka, hore khanya ea leholimo e ntlafatse semelo sa hae, ka mehauhelo ea Krete.

Jesu A tsoela pele A re, “Aborahama, ntat’a lona, o ile a nyakallela hore a bone letsatsi la ka, a ba a le bona, ‘me a thaba.” Aborahama o ile a etsa thapelo e mahlonoko haholo, hore pele ho lefu la hae, a ke a bone Mesia. Eaba o fuoa leseli le kaholimo ho la tlhaho. A fuoa setšoantšo sa sehlabelo sa leholimo bakeng sa sebe. Sehlabelo sena, o ile a se senoleloa ka maiphihlelo ao e leng a hae



ka sebele. Taelo ea tla ho eena ea re, “Joale nka mora oa hao ea mong feela, eo u mo ratang, Isaka,...’me ka eena u etse sehlabelo sa secheso.” Tsimoloho 22:2. A rapalatsa mora oa hae oa pallo holim’a aletare, A phahamisa thipa ho phethahatsa taelo ea Molimo. Eaba o utloa lentsoe le tsoang leholimong le re, “U se ke ua isa letsoho la hao ho moshanyana; u se ke ua mo etsa letho, hobane joale kea tseba hore u tšaba Molimo, ha u sa ka ua nkanela ka mora oa hao ea mong feela.” Tsimoloho 22:12. Ketsahalo ena e tšosang, e ile ea hlahisetsoa Aborahama, e le hore a bone letsatsi la Krete, ‘me a lemohe lerato le leholo leo Molimo A ratang lefatše ka lona, le leholo hoo A ileng A fana ka Mora oa Hae ea tsoetsoeng A inotši, ho tla qaolla lefatše tšenyehong ea lona.

Ka ho phethahatsa boinehelo bo tletseng; Aborahama o ne a bontšoa hore Molimo ka ho fana ka Mora oa Hae ea inotši, ho pholosa baetsalibe timelong e safeleng, O ne A etsa sehlabelo se sehlo haholo, se hlollang haholo ho feta seo motho a ka lelang ho se etsa.

Ha Molimo A fana ka nku ea sehlabelo sebakeng sa Isaka, e ne e le phatlalatso ea hore ha ho motho ea ka iketsetsang tefelo ea libe ka boena. Mokhoa oa bohedene oa mahlabelo o ne o sa amohelehe ho hang ho Molimo. Ho ne ho se ntate ea ka fanang ka mora kapa morali oa hae e le nyehelo ea sebe. Ke Mora oa Molimo feela ea ka jarang molato oa lefatše.

[320]

Lipolelo tsa Krete malebana le Aborahama, ha lia ka tsa ba le bohlokoa bo tebileng, ho ba Mo mametseng. Ho tsona ba bona feela monyetla o mocha oa ho tšoea liphoso. Ba reteleha ka ho phoqa, eka hoja ba leka ho pakahatsa hore Jesu ke lehlanya. Ba re, “Ha u e-s’o be le lilemo tse mashome a mahlano, na u bone Aborahama na?”

Ka boitlhompho bo boholo, Jesu A araba A re, “Kannete-nete kea le bolella, Aborahama a e-s’o tsoaloe, ‘na e ne se ntse e le ‘na.’”

Khutso ea aparela phutheho eo e kholo. Lebitso la Molimo, le neng le neilo Moshe, hore a le phalalatse hore O teng ka ho sa feleng, joale le ikhapetsoe ke Moruti enoa oa Galelea. O ipoletse ka boena hore ke EENA EO E NTSENG ELE EENA, Eena “eo leloko la hae le qalehileng khale, la qaleha mehleng ea baholo-holo.” Mikiea 5:2.

Baprista le baruti ba boela ba hoeletsa, ba re Jesu ke monyefoli. Kahobane e ne e le Mora oa Molimo, ebile A ipolela hore ke Eena, ba ne ba batla ho Mo timetsa. Batho ba bangata ba neng ba lumellana le baprista le baruti, ba thonaka majoe hore ba tle ba Mo betse ka 'ona. "Empa Jesu a tsoa ka Tempeleng, a ipata."

### **Monna Ea Hlahileng E Le Sefofu**

"Ha Jesu a feta, a bona monna ea tsoetsoeng e le sefofu. Barutuo ba hae ba 'motsa, ba re: 'Rabbi, ea entseng sebe ke mang, ke eena, kapa ke batsoali ba hae, ha e le moo a tsoetsoe a fofetse?' Jesu a araba a re: 'Hase eena ea entseng sebe, leha e le batsoali ba hae, empa e le hore mesebetsi ea Molimo e bonahale ho eena' ....Ha buile tsena, a tšoele fatše, a luba seretse ka mathe, a tlotse mahlo a sefofu ka sona, 'me a re ho sona: 'E-ea u iphotle letšeng la Silōoame' ke ho re: Morōmuoa. Sa ea, sa iphotla, sa khutla se bona."

[321] E ne e le tumelo e tloaelehileng har'a Bajuda, hore kahlōlo ea sebe e hlaha bophelong bona bona. Satane, eo e leng moqapi oa sebe le litholoana tsa sona, o ratile batho hore ba bone ho kula le lefu e le lintho tse tsoang ho Molimo. Motho ha a oetsoe ke mahlomola a maholo, o ne a jarisoa molato oa hore ke moetsalibe e moholo. Ka mokhoa oona, Bajuda ba ne ba betleloa tsela ea ho lahla Jesu. Eena "o ipelesitse mahlōkō a rōna, maloetsi a rōna le 'ona a inkela 'ona,'" empa Bajuda ba Mo lekantse hoba "e le ea otloang, ea shapuoang, le ho hlōkōfatsoa ke Molimo," le eo batho "ba tšabang ho mo talima." Esaea 53:4,3.

Barutuo ba Krete, ba ne ba tšoele tumelo ea Bajuda malebana le likamano tsa sebe le ho kula. Hoba A tlotse mahlo a monna oa sefofu, Jesu A mo rōma ho ea iphotla letšeng la Silōoame, 'me motho eo a bona. Jesu A arabela potso ea barutuo ka liketso. Barutuo ba ne ba sa lōkela ho botsana tsa hore na ke mang ea entseng sebe, kapa ke mang ea sa se etsang, empa ba ne ba lōkela hore ba utloisise mohau oa Molimo, ka ho neha sefofu pono. Ho ne ho se matla a pholiso seretseng seo, empa matla a ne a le ho Krete.

## Mohlolo Ka Sabatha

Bafarisi ba makatsoa ke pholiso eo, empa ba tlala lehloeo ho feta pele, hobane mohlolo oo o entsoe ka letsatsi la Sabatha.

Baahisani ba neng ba tseba mohlankana eo nakong ea bofofu ba hae, ba mo sheba ba na le khoao, hoba eitse ha mahlo a hae a buleha, le chebahalo ea hae e ile ea fetoha, ea khanya, ‘me a bonahala eka ke motho o sele. Ba bang ba re, “ke eena,” ba bang ba re, “Che, o mpa a tšoana le eena.” Eaba o rarolla taba eo ka ho re, “Ke ‘na.” Eaba o ba bolella ka Jesu, le mokhoa oo a folisitsoeng ka oona, ‘me ba botsa ba re, “O kae?” A re, ‘Ha ke tsebe.’”

Monna eo a botsoa, lekhotleng la Bafarisi, hore na o fumane pholiso ea hae joang. “A re ho bona: ‘O ile a tlotsa mahlo a ka ka seretse; ka ea iphotla, ‘me ka bona.’ Ba bang ba Bafarisi ba re: ‘Motho eo ha a tsoe ho Molimo, hobane ha a bōlōke Sabatha.’” Bafarisi ba ne ba bonahala ba chesehela poloko ea Sabatha, empa ba ne ba ntse ba rera tsa polao ka lona letsatsi leo. Empa ba bangata ba ne ba kholisehile hore, Ea tutubolotseng mahlo a sefofu seo, ha se motho feela. Ba re, “Motho oa moetsalibe a ka tseba joang ho etsa mehlo e joalo?”

Baruti ba boela ba ipiletsa ho monna oa sefofu ba re, “Uena [322] u re’ng ka eena, ha e le moo a u tutubolotse mahlo?” Sa re: “Ke moporofeta.” Bafarisi joale ba tiisa hore motho eo o ne a sa tsoaloe a foufetse. Ba bitsa batsoali ba hae, ‘me ba ba botsa ba re, “Na eo ke mora oa Iona, eo le reng o tsoetsoe a foufetse?”

Monna eo ke boeena, o ne a le teng a hlalosa hore o ne a tsoetsoe a foufetse, ‘me joale oa bona; empa Bafarisi ba ikhethela ho hanyetsa bopaki bona ka likelello tsa bona, ho e-na le hore ba lumele hore ba entse phoso. Ho nyatsa motho ke ntho e matla hakaakang, ‘me ho lōka ha Bofarisi ho sotha litaba hakaakang.

Bafarisi joale ba salloa ke tšepo e le ‘ngoe feela, ‘me e ne e le ea ho tšosa batsoali ba monna eo. Ba ba botsa, ba re, “O bona joang joale?” Ho ne ho phatlalalitsoe hore mang kapa mang, ea tla bolela hore Jesu ke Krete, “o tla khaoloa phutsehong,” ke hore o tla behelloa ka thōko ka matsatsi a mashome a mararo. Kahlōlo eo e ne e nkoa e le bomalimabe bo boholo. Mosebetsi o moholo o entsoeng ho mora oa bona o ne o kholisitse batsoali, empa ba araba ka hore, “Rea tseba hore enoa ke mora oa rōna, le hore o tsoetsoe

a foufetse; empa ha re tsebe hore na o bona joang joale, le hore na ea mo tutubolotseng mahlo ke mang, ha re tsebe; ‘motseng, o se a le moholo, o tla ipuella.’” Ka tsela eo ba rolcla boikarabello bohle holim’a mora oa bona.

### **Mohlolo O Ne O Ke Ke Oa Latoloa**

Lipotso le linyatso tsa Bafarisi, le hona ho se lumele lintlha tsa taba ena, tsa tutubolla mahlo a ba bangata. Boipotso ka likelellong tse ngata, ea ba hore, Na Molimo O ne A ka sebelisa moikaketsi ho phetha mesebetsi e meholo hakaalo, joalekaha Bafarisi ba ne ba tiisa hore Jesu ke mothetsi?

Bafarisi ba ne ba sitoa ho latola mohlolo oo. Motho ea neng a foufetse, eena o ne a tletse thabo le teboho, ‘me a pheta maiphihlelo a hae ka bolokolohi. Bafarisi ba boela ba leka ho mo khutsisa. Ba re ho eena, “‘Bua ‘nete ea Molimo; rea tseba hore motho eno ke moetsalibe.’” Hoo ke ho re, Se hlole u re Motho eo, ke eena ea u tutubolotseng, ke Molimo ea entseng sena.

[323] Monna ea neng a foufetse a araba a re, “‘Ha ke tsebe hore ke moetsalibe, ke tseba ntho e le ‘ngoe, e leng hore ke ne ke foufetse, joale kea bona.’”

Ha baikaketsi bana ba ntse ba leka ho mo khelosa, Molimo A mo thusa hore a bontše ka matla, le ka likarabo tse totobetse, hore a ke ke a tšoasoa ka leraba. A ba araba, a re, “‘Ke se ke le boleletse, ‘me ha lea ka la mamela; le rata ho utloa hape ka baka la’ng? Na le lona le rata ho fetoha barutuo a ba hae?’ Ba mo hlapaola, ba re: ‘Ke uena morutuo a ba hae, rōna re barutuo a ba Moshe; rea tseba hore Molimo o ile a bua le Moshe, empa enoa ha re tsebe hore na o tsoa kae.’”

Morena O ile A fa motho enoa mohau le matla a ho bua, hore a fetohle paki ea Krete, ka mantsoe a nang le khalemelo e bohale ho ba neng ba mo hloma lipotso. Motho ke enoa, Ea neng A etsa mehlolo, ‘me ba ne ba itatola hore ha ba tsebe mohloli oa matla a hae. A boela a re, “‘Ke taba e makatsang ha le sa tsebe hore na o tsoa kae, empa a ntutubolotse mahlo. Rea tseba hore Molimo ha a utlole baetsalibe; empa ha motho a tšaba Molimo, a etsa thato ea hae, Molimo oa mo utloa. Ha ho e-s’o ka ho utloahala le ka mohla,

hore motho o kile a tutubolla mahlo a ea tsoetsoeng e le sefofu. Ha motho enoa a ne a sa tsoe ho Molimo, o ne a ke ke a etsa letho.”

Mabaka a monna enoa a ne a ke ke a fetoloa. Bafarisi ba hlōlloa ke lipolelo tsa hae tse tiileng, tse totobetseng. Ha khutsa metsotso e se mekae. Eaba baprista le baruti ba phutha likobo tsa bona, ba hloentse ka mahlong, eka hoja ba tšaba ho itšilafatsa ka kamano ea bona le monna enoa. Ba re ho eena, “U tsoetsoe u le moetsalibe ka ho tlala, empa joale ua re ruta?”

Jesu A utloa tse etsahetseng, ‘me ha A mo fumana kamoraonyana ho tseo, A re, “Na u lumela ho Mor’ a Motho?”

E ne e le lekhetlo la pele monna oa sefofu a bona sefahleho sa Mopholosi ea hae. O ne a ile a bona batsoali ba hae ba khathatsehile ebile ba maketse; a bona le lifahleho tse hloentseng tsa baruti, ‘me joale mahlo a hae a bona sefahleho sa Jesu, se tletseng lerato le khotso. O ne a se a ikentse khathatsong e kholo, ka ho phatlalatsa hore Jesu ke morōmuoa oa leholimo; ‘me joale a fuoa tšenolo e phahameng. Monna oa sefofu ha a araba potso ea Jesu, A botsa a re, [324] “Ekaba ke mang, Morena, ke tle ke lumele ho eena?” Jesu A re ho eena, ‘U ‘mone, ebile ke eena ea buang le uena.” Monna eo a itihela maotong a Mopholosi, a Mo khumamela. Krete O ne A senotsoe bophelong ba hae, ‘me a Mo amohela e le Morōmuoa oa Molimo.

Sehlopha sa Bafarisi se ne se bokane haufi le moo, ‘me Jesu ha A ba bona, A hlokomela phapang e hlahisitsoeng ke mantsoe le mesebetsi ea Hae. Eaba O re, “Ke tletse kahlōlo lefatšeng lena, hore ba sa boneng ba bone, ‘me ba bonang ba foufale.”

Ka ho fihla ha Mopholosi, batho ba ne ba sitsitsoe ka phethahalo e tletseng ea boteng ba leholimo ho feta kamoo ba neng ba kile ba sitsoa pele. Empa ka eona tšenolelo eo, ba ne ba filoe le kahlōlo. Limelo tsa bona li ne li hlahlojoa, ‘me le bokamoso ba bona bo etsetsoa qeto.

Ba bang ho ba Mo mametseng, ba utloa hore mantsoe a Krete a tobile bona, ‘me ba botsa ba re, “Na le rōna re foufetse?” Jesu A araba, A re, “Ha le ne le foufetse, le ka be le se na sebe.” Haeba Molimo A ne A entse hore le se ke la bona ‘nete, ho se tsebe ha lōna, ho ka be ho hloka molato. “Empa joale le re, ‘Rea bona.’” Le lumela hore lea bona, empa le latola mokhoa oo e leng oona feela, o ka le nehang pono. Bafarisi ba hana ho tla ho Krete ka hona ba sala ba foufetse. Jesu A re ho bona, “Ka hona sebe sa lona ha se hlakoloe.”

**KHAOLO EA 52—MOLISA EA MOLEMO**

*[E itšetlehile ka khaolo ea Johanne 10:1-30.]*

Ke ‘na molisa ea molemo...’ me ke tella linku tsa ka bophelo ba ka.” Johanne 10:11,15.

Jesu A fumana tsela e ntle ea ho buisana le bamameli ba Hae, ka lintho tse tloaelehileng ho bona. Ka setšoantšo se setle sa bolisana A bontša likamano tsa Hae le ba lumelang ho Eena. Sena ebile setšoantšo se hlakileng hantle likelellong tsa bamameli ba Hae. E ne e tlare ha barutuo a ha ba hopola thuto ea Mopholosi, ba tšoantše molisa e mong le e mong ea tšepahalang le Krete, ‘me ha e le bona ba itšoantše le mohlape o senang thuso, o tšepileng molisana.

Bafarisi ba ne ba sa tsoa leleka e mong ka har’a mohlape hobane a ne a paka matla a Krete. Ba khaola motho eo Molisa oa ‘nete A neng A mo hulela ho Eena. Ka ketso ena ba ipontša hore ha ba na tōkelo ea ho bitsoa balisa ba mohlape ba tšepahalang. Ha joale Jesu A itšupa e le Eena ‘molisa ea tšepahalang oa mohlape oa Morena.

“Ea sa keneng lesakeng la linku ka monyako, a mpa a tlolela le kahosele, ke lesholu le senokoane, empa ea kenang ka monyako ke molisa oa linku.” Ha Bafarisi ba ntse ba inahana hantle lipelong tsa bona ka moelelo oa taba tsena, Jesu A ba bolella ka mokhoa o utloahalang, A re, “Ke ‘na monyako; ha motho a kena ka ‘na o tla pholosa, ‘me o tla kena, a tsoe, a fumane lekhulo. Lesholu le tlela feela ho utsoa, le ho bolaea, le ho timetsa; ‘na ke tšile hore li be le bophelo, ‘me li be le bophelo ka ho tlala.”

Kreste ke Eena monyako oa lesaka oa Molimo. Batho bohle ba Hae ho tloha khale ba fumane ho kena ka monyako ona. Ntlha e neng e tširiloe ke lipapiso, joale ea totobatsoa ke tšenolo ea baporofeta, ea koaholloa le ke lithuto tse neiloeng barutuo a, le ke mehlolo e entsoeng, ‘me ba bona, “Konyana ea Molimo e tlosang sebe sa lefatše.” Johanne 1:29. Batho ba iketselitse mekhoha le mekete eo ka eona ba hopolang hore ba ka fumana ho lokofatsoa le khotso, ho Molimo. Empa bohle ba behang ho hong ho nka sebaka sa

Kreste, hore ba tie ba kene mohlapeng ka tsela esele, ke masholu le linokoane.

Baruti le babusi, bangoli le Bafirisi, ba sentse makhulo a phelang, ba silafatsa liliba tsa metsi a bophelo. Mangolo a hlalosa balisa bana ba bohata, ka hore, “Ha le matlafatse tse tsetang, tse kulang ha le li phekole, tse robhileng ha le li tlamise, tse khelohileng ha le li phuthe, tsa malahleha ha le li batle, empa le li khanna ka thata, lea li hlekefetsa.” Esekiele 34:4.

Sechaba ka seng sa bahedene se bile le mesuoe e babatsehang le borapeli bo fosahetseng bo khelosang batho mabapi le moo pholoho ea ‘nete e fumanehang teng, e leng ho Kreste, ka baka leo sechaba sa furalla Ntate, ‘me sa tlala tšabo. Likete-kete li litlamong tsa borapeli ba bohata, bo ba hlokisang tšepo le thabo lefatšeng lena, ‘me ba nahana ka bokamoso ka matsoalo. Thu to ea mohau oa Molimo ke eona feela e ka tsosolosang moea. Lerato la Molimo le bontšitsoeng ho Mora le tla tlatsa pelo ‘me le tsosolose matla a moea ho feta eng kapa eng. Mang kapa mang ea khelosang batho ho Kreste, o ba khelosa mohloling oa ‘nete o holisang, ‘me o ba hlokisa tšepo le khanya bophelong bona. Motho eo ke lesholu le senokoane.

### **Boikarabelo Ba Molisa Ea Tsepahalang**

Linaheng tsa Bochabela, ho alosa mohlape, e ne e le mosebetsi oa nako eohle, o sa khathatseng ho molisa. Masholu kapa libatana li ne li lalla mohlape ho o bolaea. Molisa o ne a alosa a sa tsotelle se tla etsahala ka bophelo ba hae. Jakobo, ea neng a alosa mohlape oa Labane, a re, “Motšeara letsatsi le ne le nchesa, bosiu ke hatsela, ‘me ke hlobaela. Ke sco ke neng ke le sona.” Tsimoloho 31:40. Moshanyana Davida, ha a ntse a lisitse linku tsa ntat’ae, o ile a pholosa makonyana a neng a utsoitsoe ke tau le phiri, a sa hlomela ka letho.

Maqhama a tiileng a kopanya molisa le se tlas’a bolisa ba hae. [327] Nku e ‘ngoe le e ‘ngoe e na le lebitso ‘me e utloa pitso ea molisa. E, le molisa ea molemo O tseba mohlape oa Hae o hasahasane kahohle lefatšeng. Jesu, O re, “Ke u bitsitse ka lebitso, ke u bitsitse, u oa ka.” Esaea 43:1. Jesu O tseba e mong le e mong oa rōna ka bonngoe, ‘me O re utloela bohlokō ka mefokolo ea rōna. O tseba matlo ao re phelang ka ho oona. O kile A rōma basebetsi ba Hae ho

ea seterateng se itseng, motse-moholo o itseng, ntlong e itseng, ho ea fumana e ‘ngoe ea linku tsa Hae.

Jesu O tseba motho e mong le e mong ka botlalo, joalokaha e ka ke eena a le mong feela, eo Mopholosi A mo shoetseng. Matšoenyeho a e mong le e mong a ama pelo ea Hae. O tlile ho hulela motho e mong le e mong ho Eena. O tseba hore na ke mang ea utloang pitso ea Hae ka thabo, ‘me ea itlhopetseng ho ba tlas’a tlhokomelo ea Hae. O re, “Linku tsa ka li utloa lentsoe la ka, kea li tseba, ‘me lia ntatela.”

### **Ke Hobaneng Ha Linku Tsa Hae Li Mo Latela Ka Thabo**

Linaheng tsa Bochabela molisa ha a khanne linku tsa hae. Ha a sebelise khatello kapa tšoso, empa o li etella pele, a li bitse. Ho joalo le Mopholosi, E leng Molisa, O etsa joalo linkung tsa Hae. O re, “Ke u ratile ka lerato la mchla eohle, ka u atametsa ho ‘na ka kutloelo-bohlōkō.” Jeremia 31:3.

Ha se tšabo ea kahlōlo kapa tebello ea moputso o sa feleng e entseng hore barutuoa ba Krete ba Mo latele. Ba bone lerato la Mopholosi le senang tekanyo, le bontšitsoeng ho tloha setaleng Betlelehema ho fihlela sefapanong sa Golgotha, ‘me ponahalo ea Hae ea ba hohela, ea ba nolofatsa, ea ba hapa meea. Lerato la tsoha ka lipelong. Ba utloa lentsoe la Hae ‘me ba Mo latela.

Molisa o etella linku tsa hae pele, ke eena ea tla teana le kotsi pele. Jesu O etsa joalo ho batho ba Hae. Tsela e eang leholimong e khakotsoe ka mehato ea maoto a Mopholosi.

[328] Leha e le mona A lutse teroneng ea leholimo, Jesu ha A felloa ke mohau oa Hae ho hang. Kajeno letsoho la Hae le neng le hlabilo, le otlohile, le hlohonolofatsa batho ba Hae lefatšeng. “‘Me ha li ka ke tsa timela le ka mohla. Ha ho ea tla li hloibila matsohong a ka.’” Pelo e inehetseng ho Krete e bohlokoa ho Eena ho feta lefatše lohle. A ke ke A lahla eo A mo shoetseng. O tla ba le balateli ba Hae ka linako tsohle, ntle le ha bona ba ikhethela ho Mo tlohela.

### **Kreste E Ntse E Le Molisa Oa Motho Ka Mong**

Mothusi oa rōna ea sa hlōloeng ha A re siee re le bang hore re loantšane le teko, ‘me qetellong re iphumane re hlōkōfalitsoe ke



meroalo le mahlomola. Leha e le mona mahlo a nama a sa ‘mone, tsebe ea tumelo e kanna ea utloa lentsoe la Hae, ha le re, Se tšabe; ke na le uena. Ke tseba mahlomola a hao, ke na le maiphihlelo a ntoea eo u e loanang, ke ile ka teana le liteko tseo le uena u teanang le tsona. Ke tseba meokho ea hao, le ‘Na nkile ka lla. Ke tseba mahlomola a tebileng ho feta kamoo tsebe ea motho e ka bolelloang ka teng. Ha ua lahloa. Leha bohloko ba hao bo sa ame pelo efe kapa efe lefatšeng, sheba ho ‘Na ‘me u phele. Sheba Esaea 54:10.

Jesu O re rata joaloka bana ba Hae hobane re mpho ea Ntat’ae, ‘me re litholoana tsa mosebetsi oa Hae. Oa u rata. Leholimo ka bolōna, le ke ke la fana ka ho hong, ho fetang ka boholo kapa ka molemo. Kahoo tšepa.

Jesu A nahana ka meea eohle lefatšeng e neng e khelositsoe ke balisa ba bohata, e lahletsoe ka har’a liphiri, ‘me A re, “Ke sa na le linku tse ling, tseo e seng tsa lesaka lena. Le tsona eka khona ke li tlise; li tla utloa lentsoe la ka, ‘me mohlape o tla ba mong, molisa a be mong.”

“Ke ka lebaka lena Ntate a nthatang, hobane ke tela bophelo ba ka, hore ke tle ka boele ke bo fumane....Ke na le tokelo ea ho bo tela, ke na le tokelo ea ho bo fumana hape.” E le setho sa lelapa la botho, Jesu O ne A e-na le ‘mele o shoang, ‘me E le Molimo, E ne E le seliba sa bophelo lefatšeng. A ka be A hlotse liteko tsa lefu, empa A ikhethela ho fana ka bophelo ba Hae, e le hore A re tlietse bophelo le ho se shoe. “O il’a hlajoa ka baka la litšito tsa rōna, a tetetsoa ka baka la libe tsa rōna, kotlo e re tlietsang khotso ea mo oela holimo, ra folisoa ke maqeba a hae. Rōna bohle re tšoana le linku tsa malahleha, motho ka mong o iketse ka tselana ea hae, Morena o ‘melesitse makhopo a rōna bohle.” Esaea 53:5,6.

[329]

## **KHAOLO EA 53—LEETO LA HO QETELA LA HO TSOA GALELEA**

*[E itšetlehile ka khaolo ea Luka 9:51-56; 10:1-24.]*

Eitse ha mosebetsi oa Krete o ea pheletsong, ha bonahala ho na le phetoho ho mokhoa oo A sebetsang ka oona. O ne A lekile ho qoba ho pepesoa, A hanne thoriso eo batho ba Mo fang eona, ‘me A ba laea hore ho se be le ea mong oa bona ea boelang hore ke Eena Krete.

Ke nako ea mokete oa litabanakele O ile A etela Jerusalema ka ho thoba, A kena motse-moholo ka lenyele. Empa ho ne ho se joalo leetong la Hae la ho qetela. Lekhetlong lena A tsamaea ka mokhoa o totobetseng haholo, A eteletsoe pele ka liphatlalatso tse tsebisang hore Oa tla, tseo pele li neng li sa etsoe. O ne A ea moo sehlabelo sa Hae se seholo se tla etsetsoa teng, ‘me A rata hore batho ba eellelo taba ena.

“Joalokaha Moshe a ne a phahamise nōha felleng, eka khona Mor’a Motho a phahamiso joalo.” Johanne 3:14. Mahlo ‘ohle a lōkela ho sheba ho Krete, eleng sehlabelo se tlisang topollo lefatseng le lahlehileng.

Barutuo ba ne ba lakalitse ho Mo thibela ho nka leeto lena la ho ea Jerusalema. Ba ne ba tseba lehloeo le isang lefung, la batsamaisi ba tumelo. Ho Krete e ne e le tšebetso e utloisang bohlōkō hore A ise barutuo ba Hae ba ratehang Jerusalema, moo ba il’o fumana mahlomola le ho nyahama pelo. Joale Satane a kenella ka liteko tsa hae, tse kang tsena: Ke’ng ha A ea Jerusalema, moo A tsebang hantle hore o il’a bolauoa? Hohle ho ne ho tletse bakuli ba emetseng pholiso ea Hae. O ne A tletse matla le sehlaho joaloka monna. Ke hobaneng ha A sa pharalle le lefatše, A ise mantsoe a Hae a tletseng mohau, le matla a Hae a ho folisa? Ke’ng ha A sa fane ka leseli le thabo ho ba likete-kete ba lefifing le matšoenyehong? Ke hobaneng ha A ikisa lefung hona joale, ‘me A siea mosebetsi o sa le qalehong? Sera se ile sa hlasela Krete ka liteko tse matla ‘me tse masene. Hoja

[330]

Jesu O ile A ka fetola maikutlo ‘me A leka ho itopolla, lefatše lohle le ka be le lahlehile.

Empa Jesu O ile “a ikemisetsa ho leba Jerusalema.” Molao o le mong bophelong ba Hae ea eba ho phetha thato ea Ntate. Bongoaeng ba Hae, O ile A re ho Maria, “Na le ne le sa tsebe hore ke tšoaetse ho ba mosebetsing oa Ntate?” Luka 2:49. Empa morerong o moholo oa Molimo, hora ea ho fana ka Eena bakeng sa libe tsa batho e ne e atametse. O ne A ke ke A hlōloa kapa hona ho fetoha. E ne e le khale lira tsa Hae li rerile ho nka bophelo ba Hae, ‘me ha joale e se e le hore A nehelane ka bona.

‘Me Eena “a rōma barōmuoa ho mo etella pele. Ba kena motseng o mong oa Basamaria ho mo lokisetsa.” Empa batho ba hana ho Mo amohela, hobane O ne A leba Jerusalema. Ba sitoa ho lemoha hore seo ba se lelekang matlung a bona, ke mpho ea bohlokoahali e tsoang leholimong. ‘Me Basamaria ba lahlehelo ke tsohle ka baka la litšekamelo le litloaelo tsa bona tse khethollang.

Jakobo le Johanne, eleng baromuoa ba Krete, ba teneha haholo ke thohako eo; ‘me ba tlala bohale hobane A ile A tšoaroa hampe ke Basamaria. Ba bolella Krete hore batho ba hanne le ho ba fa boroko matlung a bona. Ha ba bona thaba ea Karmele sebakana, moo Eliea a neng a bolaele baporofeta ba bohata teng, ba re, “Morena, na u rata hore re re mollo o theohe leholimong, o ba felise?” Ba mpa ba makatsoa ke khalemelo ea Jesu, ha A re, “Ha le tsebe hoba le ba moea o joang! Hobane Mor’a motho O tlile, eseng ho timetsa meea ea batho, empa e le ho e pholosa.” A ntoo fetela motsaneng o mong.

Kreste ha A qobelle batho hore ba Mo amohele. O lakatsa feela ho sebeletsoa ka boithalelo, le ho inehela ka boikhethelo ba pelo e khannoang ke lerato. Haeba re ka ba boemong ba ho hlōkōfatsa le ho timetsa ba sa amoheleng mosebetsi oa rōna, le ba loantšanang le maikutlo a rōna, re tla be re fana ka bopaki bo phethahetseng ba hore re tsamaisoa ke moea oa Satane. Ha ho letho le ka nyatsehang ho Molimo ho feta ha batho, ka tumelo ea litšekamelo, ba tlisa matšoenyeho ho bao ba rekiloeng ka mali a Mopholosi.

Nako e ngata likhoeling tsa ho qetela tsa mosebetsi oa Krete, ea e ba Berea, eleng motse o mose ho Jordane, ho tloha Judea. Sheba Mareka 10:1. Mona bongata ba boela ba bokana ho Eena ‘me A pheta bongata ba lithuto tseo A neng A ile A li ruta.

Joalokaha A ne A rōmile ba leshome le metso e ‘meli, “a khetha ba bang ba mashome a supileng a metso e ‘meli, a ba rōma ka bobeli ho mo etella pele motseng o mong le o mong le sebakeng se seng le se seng moo a neng a hopotse ho ea teng.” Barutuo ba ne ba ile ba koetlisetsoa mosebetsi oa bona, nako e itseng. Ba bile le monyetla oa ho ba haufi haholo le Eena, ‘me ba fumana le litaelo tse tobileng motho ka mong.

Taelo e filoeng ba leshome le metso e ‘meli, ea hore ba se ke ba kena motseng ofe kapa ofe oa Balichaba, ena e ne e sa fanoa ho ba mashome a supileng. Le ha e le moo Krete A ile A lelekoa ke Basamaria, lerato la Hae ho bona le ne le sa fetoha. Ba mashome a supileng, ba etetse metseng ea Basamaria pele, ka lebitso la Krete.

### **Basamaria Ba Amohela Lerato La Krete**

Jesu ha a roma barutuo ba Hae, pele a nyolohela leholimong, O ile A hlhisa Samaria le Jerusalema le Judea e le libaka tsa pele tseo ba tšoanetseng ho qala ho ruta molaetsa o molemo, ho tsona. Ha ba ea Samaria, ba fumana batho ba ba lebeleletseng. Basamaria ba elelloa hore Jesu O na le maikutlo a lerato feela ho bona, A sa natse hore ba ile ba Mo tšoara hampe, ‘me lipelo tsa bona tsa hapeha. Kamora’ hore Jesu A nyolohela leholimong, barutuo ba ile ba bōkeletsa kotulo e babatsehang hara bao e kileng ea eba lira tse kholo tsa bona. “Ha a ke ke a roba lehlaka le tenyetsehile, ha a ka ke a tima lebone, a le tima le taitsa. O tla ahlōla bohle ka botšepahi.” Esaea 42:3.

[332] Ha A rōma ba mashome a supileng, Jesu A ba laela hore ba se lule moo ba sa amoheleheng. A re, “Motseng ofe le ofe oo le kenang ho oona, ‘me ba sa le amohele, le tsoele litseleng tsa oona, le re: ‘Le lerōle la motse oa lona, le re khomaretseng maotong, re le hlōhlōrela lona e le bopaki bo le qosang. Feela le tsebe hona, hore ‘Muso oa Molimo o se o fihlile.’” Hona, ba ne ba sa ho etse ka lebaka la ho hlabeha kapa ho tlontloloa, empa e le ka ho bontša kamoo ho leng bohlokō ho latola molaetsa oa Morena. Ho latolela basebeletsi ba Morena ke ho latolela Krete ka bo-Eena.

## **Baetapele Ba Tumelo Ba Khelosa Ba Bangata Ho Krete**

Jesu A eketsa A re, “Kea le bolella hore ka letsatsi leo kahlōlo ea Sodoma e tla ba bobebe ho feta ea motse oo.” Joale menahano ea Hae ea leba metseng ea Galelea moo tšebetso e ngata ea Hae e bileng hona teng. Ka letsatsi le letsatsi Khosi ea bophelo O ne A kena A tsoa har’a bona. Khanya ea Molimo e ne e khantšetsa matšoeletšoele a neng a bokana maotong ea Mopholosi. Empa leha hole joalo ba hanne Mpho ea leholimo.

Borabbi ba ba eletsa hore ba se ke ba amohela lithuto tse rutoang ke mosuoe enoa e mocha. Sebakeng sa hore ba ipatlele kutloisiso ea lentsoe la Molimo ka bo bona, batho ba mamela baruti le bobabusi, ba latola ‘nete, ‘me ba bōlōka meetlo ea bona. Ba bangata ba batla ba kholiseha ke ‘nete, empa ba se ke ba e latella. ‘Me kahoo ba bangata ba lahlile ‘nete e neng e bontša topollo ea moea.

Paki ea ‘nete O re, “Bona, ke eme monyako, ‘me kea kokota.” Tsenolo 3:20. Kōpo e ‘ngoe le e ‘ngoe e etsoang ke Lentsoe kapa ke maqosa a Molimo e kokota monyakong oa pelo. Ke lentsoe la Jesu, le kōpa ho kena. Ho kokota ho hong le ho hong ho sa eloeng hlōkō, ho etsa hore thahasello ea ho bula e fokotsehe. ‘Me ha tšutšumetso ea Moea o Halalelang e sa tsotelloe kajeno, e ke ke ea boela ea tla ka matla hosasa. Pelo e felloa ke thahasello, ‘me e fihleloe ke kotsi ea ho nyebella e sa ikutloe, hona ho khaole bophelo ba eona, esita le bo sa feleng, bo tlang. Kahlōlong re tla tsuoa, e seng hobane re entse liphoso, empa lebaka e le hobane ha rea ka ra tsotella menyetla eo re e filoeng ke leholimo, hore re ithute seo e leng ‘nete.

Ha mosebetsi oa bona o felile, ba mashome a supileng ba khutla ba thabile, ba re, “Morena, esita le bademona ba ikokobeletsa rōna ka baka la lebitso la hao!” Jesu A re ho bona, “Ke bone Satane a e-oa leholimong joaloka lehalima.” Jesu O ne A shebetse pele, ka mose ho sefapano sa Golgotha, ‘moho le mahlomola le lihlong tsa sona, mohla letsatsi le lehlo la ho qetela, ha Satane a timetsoa lefatšeng lena leo ka nako e telele, le seatsoeng ke bokoenehi ba hae.

Ho tloha ka nako eo, balateli ba Krete ba lokela ho bona Satane e le sera se hlōtsoeng. Jesu O ba fumanetse tlhōlo sefapanong, ‘me tlhōlo eo O lakatsa hore ba e amohele e le ea bona. A re, “Bonang, ke le neile matla a ho hata linōha le liphepheng, le a ho hlōla matla ‘ohle a sera, ‘me ha le ka ke la ntšuo kotsi ke letho.”

Matla a sa feleng a Moea o Halalelang ke tšireletso ea motho e mong le e mong ea soabetseng sebe. Krete A ke ke A lumela hore le ea mong oa ba inehetseng ka botlalo le tumelo, ebile a kōpa tšireletso ea Hae, a oele matleng a sera. Ha liteko le meleko li e tla, sheba ho Jesu, mothusi oa hao. Re leboha Molimo, hoba re na le Mopholosi ea matla ‘ohle, Ea lahletseng ea khopo kantle ho leholimo. Ke hobaneng ha re sa bolele ka Eena? Molimo A ke ke A lahla batho ba Hae ha ba loantsana le bokhopo.

### **Lekunutu La Matla A Bo-'na**

Jesu A eketsa, A re, “Leha ho le joalo le se ke la thabela hobane meea e litšila e ikokobeletsa lōna, empa le thabele hobane mabitso a lona a ngotsoe maholimong.” Hlokomelang e se re boitjaro ba kena ka ho lona, ‘me la sebetse ka matla a lona. Ka linako tsohle, bo-'na bo ikemiselitse ho inkela tlōtla, moo tšebetso e bontšang katleho. Ha re elelloa bofokoli ea rōna, re ithuta ho itšetleha ka matla a mang, a seng ka ho rōna. Sheba 2 Bakorinthe 12:10. Ha ho letho le ka fihlelang maikutlo hantle ka botebo, joaloka ho tseba lerato le tšoareleng la Krete. Re tšoanetse ho ikamahanya le Molimo, ‘me re tla apesoa ka Moea o Halalelang, O tla re thusa ho ikopanya le batho bao re phelang le bona. Ha u ikopanya haholo le Mohlōli oa khanya le matla, o tla ba le matla a hlolang a ho sebeletsa Molimo.

[334] Ha ba mashome a supileng ba ntse ba mametse Krete, Moea o Halalelang, O ne O ntse O ngola ‘nete lipelong tsa bona. Le ha matšoele-tšoele a ne a ba potapotile, e ne e ka ba na le Molimo boinotšing.

Ka ho tseba hore ba fumane tšutšumetso ea nako eo, Jesu A inyakallela moeeng, A re, “Kea u boka, Ntate, Morena oa leholimo le oa lefatše, hobane litaba tsena u li patetse ba bohlale le ba seli, ‘me u li senoletse masea. E, Ntate, hobane u khahliloe joalo.”

Bahlomphehi ba lefatše, ba bitsoang ka hore ba baholo, ba bohlale ba ile ba sitoa ho utloisisa semelo sa Krete. Empa batšoasi ba lithlapi le batho feela ba filoe ho bona tse sa bonoeng. Nako le nako, ha ba ntse ba inehela ho matla a Moea o Halalelang, likelello tsa barutuo a li ne li fetoloa. Ba elelloa hore Molimo O matla ‘ohle, O teng har’ a bona, A apere seaparo sa botho. Hangata ha A ne A ba bolella ka Mangolo a Testamente ea Khale, ‘me A bontša kamano

ea Hae le ‘Ona, likelello tsa bona li ne phahamisetsoa leholimong. Ba fumana kutloisiso e hlakileng le ho feta ea bao e leng bona ba ngotseng litaba tseo sethathong. Kamorao ho moo, ba batla ho bala Ma-ngolo a Testamente ea Khale joaloka tšenolo e ncha e tsoang ho Molimo. Ba ne ba bone Eo “e leng Moea oa ‘nete, oo lefatše le ke keng la o amohela, hobane ha le o bone leha e le ho o tseba.” Johanne 14:17.

Mokhoa o mong oo re ka fumanang kutloisiso e phethahetseng haholo ea ‘nete, ke ka ho bōlōka lipelo tsa rōna li nolofetse li thapisitsoe ke moea oa Krete. Mahlale a botho a fokola haholo hore a ka utloisisa leano la topollo. Leha e le tsebo e kholo e ke ke ea hlalosa sena. Empa mahlale a topollo a ka tsejoa ka maiphihlelo. Ea bonang boetsa-libe ba hae ke eena feela ea ka utloisisang bohlokoa ba Mopholosi.

Lithuto tseo Krete A li rutileng ha A ntse A le leetong la Hae ho ea Jerusalema, li ne li tletse tataiso. Batho ba Berea, ba ne ba sa tsamaisoe ke bopaki ba bohata ba Bajuda, joaloka ba Judea, ‘me kahoo lithuto tsa Jesu li ile tsa fumana sebaka lipelong tsa bona.

Likhoeling tsa ho qetela, bongata ba lipale tsa Krete, li ne li boleloa. Baprista le baruti ba ne ba utloisisa hantle tlhakisetso ea Jesu, joale ba sa fumane letho leo ba ka Mo qosang ka lona. Krete A pheta hape setšoantso sa nku e lahlehileng. A ntšetsa pele thuto ena, ka ho bolela tsa setšoantšo sa chelete e lahlehileng le ngoana oa lehlasoa. Kamora’ hore ba tšolleloe Moea o Halalelang, barutuo ha ba e tsoa ka lebitso la Morena, ‘me ba teana le nyatso, bofutsana le hlōkōfatso, ba ne ba ikhothatsa lipelong kamehla, ka ho pheta-pheta mantsoe a khothatso ao Morena A neng A a buoe ha A le leetong la ho qetela, ha A re: “Se tšabeng, mohlatsana, hobane Ntat’a lōna o khahliloe ke ho le nea ‘Musō. Rekisang maruo a lōna, ‘me le thuse mafutsana; iketsetseng mekotlana e sa tsofaleng, letlotlo le sa feleng, maholimong, moo ho sa atameleng lesholu, leha e le tšoèlè ho senya, hobane moo letlotlo la lōna le leng teng, le lipelo tsa lona li tla ba hona teng.” Luka 12:32-34.

*[E itšetlehile ka khaolo ea Luka 10:25-37.]*

Ha Krete A ntse A ruta batho, “ha ema Setsebi se seng sa Molao, ‘me ka ho leka Jesu, sa re: ‘Moruti, eka khona ke etse’ng hore ke tle ke rue bophelo bo sa feleng?’” Baprista le baruti ba ne ba tšepile hore ba ka tšoasa Krete, ka hore Setsebi sa molao se ‘motse potso ena. Empa, Mopholosi A se ke A etsa khang. A re ho eena, “Ho ngotsoe’ng Molaong? U o bala joang?” Potso eo ea topollo, A e fetolela polokong ea molao oa Molimo.

Setsebi sa molao, sa re, “U tla rata Morena Molimo oa hao ka pelo ea hao eohle, le ka moea oa hao oohle, le ka matla a hao ‘ohle, le ka maikutlo a hao ‘ohle, ‘me u rate oa heno joalokaha u ithata.” Jesu A re, ho eena, “U arabile hantle. Etsa hoo, ‘me u tla phela.”

Setsebi sa molao se ne se bala Mangolo a halalelang ho ithuta bo‘nete ba oona. Karabong ea hae malebana le se hlokoang ke molao, ha a hlahisa letho la bohlokoa ka melao ea mekete le meetlo, empa a hlahisa melao e ‘meli e meholo, eo ho eona ho itšetlehileng molao oohle le boporofeta. Karabo ena, hoba Krete A e amohele e nepahetse, ea beha Mopholosi mocheng o motle ho baruti.

“Etsa hoo, ‘me u tla phela,” ho rialo Jesu. A bontša molao e le kopano e halalelang. Ha ho bobebe ho bōlōka molao o le mong, ‘me o robe e mong, hobane mothèo o e akaretsang oa tšoana. Lerato le leholo ho Molimo le ho rata batho ho se khethollo, ke eona melao e tšoanelang ho sebeletsoa bophelong.

Setsebi sa molao se ile sa ahlōloa ke mantsoe a Krete a batlisisang. O ne a se bontša lerato ho batho ba bang. Empa sebakeng sa hore a bake, a leka ho ipea ea lōkileng, a re ho Jesu, “Oa heso ke mang?”

Ho Bajuda potso ena e ne e baka likhang tse sa feleng. Bahedene le Basamaria e ne e le batho feela ‘me e le lira, empa tlhalohanyo ene e ka etsoa joang ka har’a batho ba sechaba sa habo bona ba maemo a fapaneng? Na ba ne ba tšoanetse ho nka batho bao ba



bangata ba sa rutehang ba bohlasoa, ba “sa hloekang” e le ba habo bona?

### Leleka Lefifi Ka Ho Amohela Leseli

Jesu ha A ka A nyatsa khethollo ea bao ba neng ba laletse ho Mo tsoa. Empa ka pale e bonolo, O ile A hlahisa setšoantšo sa lerato le khaphatsehang, le tsoang leholimong, le ileng la ama lipelo tsa bohle, ‘me la etsa hore Setsebi sa Molao se pake hoo e leng ‘nete. Mokhoa o nepahetseng oa ho hlaola phoso, ke ho hlahisa hoo e leng ‘nete. Jesu A bua A re, “Motho e mong o na theoa Jerusalema a e-ea Jeriko, ‘me a oela har’a linokoane tse ileng tsa mo hlobolisa, tsa mo khakhatha, tsa mo siea a le makhatheng a ho shoa. Ha etsahala hore moprista e mong a theohe ka tsela eo, ‘me ha a ‘mona a mo koekoetla. Ka mokhoa oona oo le Molevi a fihla sebakeng seo, ha a ‘mona a mo koekoetla.” Hona e ne e le ketsahalo e etsahetseng, e neng e tsebahala hore e joalokaha e boleloa. Moruti le Molevi ba ne ba le teng mokhopping o neng o mametse mantsoe a Krete.

Ho tloha Jerusalema ho ea Jeriko, ho ne ho ena le tsela e fetang khohloaneng e mpe e mafika eneng e tletse linokoane, ha ngata ho ne ho hlaha likotsi moo. Motsamai enoa, o ile a hlaseloa sebakeng seo, ‘me a siuo a le makhatheng a ho shoa. Moprista o ile a mo nyemotsa feela monna eo ea mabea. Molevi o ne a tseba hantle seo a tšoanelang ho se etsa, empa a ipolella hore taba e joalo ha e mo ame ka letho.

Banna bana bobeli e ne e le ba boemo bo khethehileng, e le baemeli ba Molimo ho batho. Ba ne ba tšoanetse ho “qenehela ba sa tsebeng le ba kheloihileng.” Baheberu 5:2.

Mangeloi a leholimo a sheba matšoenyeho a lelapa la Molimo lefatšeng, ‘me a itukisilitse ho thusana le batho ho ba lopolla bokhobeng le matšoenyehong. Leholimo kaofela le ne le shebile ho bona hore na moprista le Molevi ba ne ba tla ba le kutloelo bohloko bathong ba kotsing na. Mopholosi O ile A laea Baheberu ha ba le lefelleng, ‘me O ne A rutila thuto e fapaneng ho hang le eo batho ba neng ba e amohela joale, e tsoa ho baprista, le baruti. Molaetsa o ne o fanoe ka Moshe oa hore Morena Molimo oa bona, “o ahlola khutsana le mohlolohali ka toka, o rata mojaki,” “ka baka leo, ratang

bajaki.” “Le mo rate joalokaha le ithata.” Lipolelo 10:18,19; Meetlo 19:34.

Empa, ka ha ba ne ba koetlisitsoe sekolong se nang le khethollo ea bochaba, moprista le Molevi ba ne ba ikhohomosa ebile ba khetholla. Ha ba sheba monna ea ntšitsoeng maqeba, ho ne ho le bonolo ho tseba hore na ke oa sechaba sa habo bona. Ba nahana hore mohlomong ke Mosamaria, ‘me ba mo koekoetla.

Empa joale ha fihla Mosamaria moo monna ea hlōkōfalitsoeng a leng teng, ‘me a mo utloela bohlokō. Mosamaria o ne a tseba hantle hore haeba maemo a tjena a ne a oetse Mosamaria e mong, moeti enoa oa Mojuda o ne a tla mo feta feela a sa tsotelle. Eena ka boeena, o ne a ka ‘na a ba kotsing ea ho hlaseloa ha a ka lieha ho feta sebakeng seo. Empa kapele ho eena, ho ne ho na le motho ea tsietsing, ‘me ea utloang bohlokō, hona ho ne ho lekane hore a mo thuse. A hlobola seaparo sa hae a mo apesa sona. Ole le veine tseo a neng a li nketse leeto la hae, a li sebelisa ho folisa le ho thoba monna eo ea khakhathiloeng. A ‘meeapeleseng ea hae, ‘me a e khanna butle e le hore moeti a se thonkhehe ‘me a se utloe bohlokō. A mo isa tlung ea baeti, a mo hlokomela bosiu kaofela, ka tlhokomelo e babatsehang.

Esale hoseng, Mosamaria pele a tsoela pele leetong la hae, a beha monna eo tlhokomelong ea mong’ a ntlo, a ba a lefa litšenyeholo, a siea le chelete e behelelitseng hore monna eo a ‘ne a thusoe. ‘Me a se ke a khotsofala hore ho lekane, a lōkisetsa le bohloki bo ka tšoanang bo hlaha, ka ho re, “Ak’u mo oke, ‘me seo u ka se sebelisang kathōko ho sena, ke tla u buseletsa sona ha ke khutla.”

Pale ea fela, ‘me Jesu A hlaba Setsebi sa molao ka mahlo, A re ho eena, “Ho ba bararo bao, u re eo e bileng oa habo motho ea ileng a oela har’a linokoane ke mang na?” Setsebi sa molao sa araba, sa re, “Ke ea ileng a mo etsetsa mohau.” Eaba, Jesu O re ho eena, “E-ea, u etse joalo le uena.”

[339] Potso ena, “oa heso ke mang?” e arabeletsoe mengoaha eohle. Oa habo rōna ke motho e mong le e mong ea hloakang thuso ea rōna, moea o mong le o mong o hlōkōfalitsoeng ke sera, le e mong le e mong eo e leng thepa ea Molimo.

Paleng ea Mosamaria ea molemo, Jesu O fane ka setšoantšo sa Hae le mosebetsi oa Hae. Motho o ne a hlōkōfalitsoe, a utsoelitsoe, ‘me a siiloe a le makhatheng a lefu ke Satane. Eaba Mopholosi O

siea khanya ea Hae ho tla re pholosa. A folisa maqeba a rōna. A re apesa ka seaparo sa Hae sa ho lōka. A re lōkisetša tlhokomelo e phethahetseng, ka litšenyehelo tsa Hae. Ha A supa mohlala oa Hae, O re ho balateli ba Hae, “joalokaha ke le ratile, le lona le ratane.” Johanne 13:34.

Mosamaria o ile a mamela litaelo tsa ho ba le pelo e bonolo, e mosa, ‘me ka hona a ipontša e le moetsi oa molao. Krete A laela Setsebi sa molao, A re “E-ea, u etse joalo le uena!”

Thuto ena e ntse e hlokahala le kajeno. Boikhabo le kamohelo tse seng mofuthu li timme mollo oa lerato, ‘me tsa tlosa mohau o natefisang semelo sa motho. Ba bangata ba ipolelang ka lebitso la Hae, ba lebala hore balateli ba Krete ba tsoanetse ho emela Krete. Ha re hloka boitelo boinehelo bo phethahetseng molemong oa ba bang, kae kapa kae moo re leng teng, ho sa tsotelleha hore na tšebetso ea rōna ke efe, ha re balateli ba Krete.

Krete O re kōpa hore re be bang le Eena molemong oa ho pholosa botho. Jesu O re, “Le amohetse feela, fanang feela.” Matheu 10:8. Batho ba bangata ba etsa liphoso ‘me ba ikutloa ba soabile e le liphogo. Ba lapetse khotatso. Ba shebane le liphoso tsa bona ho fihlela ba felloa ke tšepo. Haeba re Bakrete, ha re bona batho ba bang ba nyahame, ka baka la matšoenyeho, kapa ka baka la sebe, re se ke ra re, tsena ha li ame ‘na.

Pale ea Mosamaria ea molemo le semelo sa Jesu li bontša bohlokoa ba ‘nete ba molao, le hore na ho boleloang ka ho rata oa heno joalokaha u ithata. ‘Me ha bana ba Molimo ba bontša lerato ho batho bohle, ba paka sebōpeho sa semelo sa molao oa leholimo. “Ha re ratana, Molimo o phela ka ho rōna, ‘me lerato la hae le phethehile ka ho rōna.” 1 Johanne 4:12.

[340] **KHAOLO EA 55—E SENG KA HO IPONAHATSA**

*[E itšetlehile ka Luka 17:20-22.]*

Lilemo tse fetang boraro li ne li fetile kamora' hore Johanne Mokolobetsi a fane ka molaetsa o na, “Muso oa maholimo o atametse.” Matheu 3:2. Ba bangata ba ba latotseng Johanne ‘me ba bile ba hanyetsana le Jesu ka mekhoha e mengata ba ne ba nahana hore thōmo ea Hae e hlōtsoe.

Jesu A araba, A re, “Muso oa Molimo ha o tle ka mokhoa o bonoang; hape ho ke be ha thoe: ‘Bonang, o mona, kapa o mane!’ ‘Muso oa Molimo o har’a lōna.’ ‘Muso oa Molimo o qala ka pelong. Se shebe matla a lefatše ho bontša ho tla hoa oona.

“Ho tla tla matsatsi,” Jesu A rialo A retelehela ho barutuo ba Hae, “ao ka ‘ona le tla labalabela ho bona le leng la matsatsi a Mor’a Motho, empa le ke ke la le bona.” Ha le eelloe monyetla o moholo oo le nang le oona ha joale, oa ho ba le Eena eo e leng bophelo le leseli la batho. Le tla hetla morao ka tlholohelo e kholo, le lakatsa menyetla eo le nang le eona ha joale ea ho thabela ho tsamaea le ho bua le Mora oa Molimo.

Ebile kamora' nyolohelo ea Krete leholimong le kamora' ho tla ha Moea o Halalelang, ha barutuo ba qala ho utloisisa ka botlalo semelo sa Mopholosi le thōmo ea Hae. Ba qala ho eelloa hore ba bile ka har’a khanya ea Morena. Sheba Johanne 1:14. Likelello tsa bona li ile tsa buleha hore ba utloisise boporofeta le mehlolo eo A e entseng. Ba ne ba tšoana le batho ba phaphamang torong. Barutuo ba ne ba sa khathale ho pheta-pheta mantsoe a Krete le mesebetsi ea Hae. Lithuto tsa Hae joale tsa ba tlela joaleka tšenolo e ncha. Mangolo ho bona ea e-ba buka e ncha.

Ha barutuo ba ntse ba batlisisa boporofeta bo pakang ka Krete, ba ile ba fumana ho kopana le Molimo, ‘me ba ithuta ka Eena, Eena A nyolohetseng leholimong, ho ea qetela mesebetsi oo A neng A o qalile lefatšeng. Ba boela ba bala hape, ka ho makala, tlhaloso ea boporofeta, malebane le mesebetsi oa Hae le semelo sa Hae. Ba

ne ba ile ba utloisisa Mangolo a boporofeta ka mokhoa o fokolang haholo. Ha ba Mo shebile A tsamaea e le motho har'a batho, ba ne ba sa utloisise mohlolo oa Hae oa ho nka sebōpeho sa motho. Ba ne ba sa elelloe ka botlalo bo-Molimo bo ka har'a botho. Empa kamora' hore ba hlakisetsoe ke Moea o Halalelang, ba ne ba laba-labela ho 'mona hape, 'me ba lakatsa hore eke A ka ba hlaloesetsa Mangolo a halalelang, haholo moo ba sa utloisiseng. Krete O ne A bolela eng, ha A re, "Ke sa na le tse ngata tseo nkabeng ke le bolella tsona, empa le ke ke la li kopa hajoale"? Johanne 16:12. Ba utloa bohlokō hore e be tumelo ea bona e ile ea fokola hakaalo, ho utloisisa seo e leng 'nete.

Motho ea makatsang eo Johanne a neng a bolele ka eena o bile le bona ka nako e fetang lilemo tse mashome a mararo, 'me ha ba ea tseba hore ke Eena ea rōmetsoeng ho tsoa ho Molimo. Barutuo ba ne ba ile ba lumella hore ho se lumele ho neng ho atile, ho koahele kutloisiso ea bona. Ha ngata ba ne ba pheta-pheta puisano tsa Hae, ba ipotsa, ba re, ke hobaneng ha re ile ra lumella linyatso tsa baprista le baruti ho ferekanya maikutlo a rōna, eaba re sitoa ho utloisisa hore ea neng A le har'a rōna O moholo ho feta Moshe, 'me Ea neng A re ruta O bohlae ho feta Solomone? Li tsebe tsa rōna li ile tsa thibana hakaakang!

Ha ba tlisoa ka pele ho lekhotla 'me ba lahleloa chankaneng, balateli ba Krete ba ne ba thabile "hobane ba fumanoe ba lokeloa ke ho tlontlolloa ka baka la lebitso la Jesu." Liketso 5:41. Ba elelloa khanya ea Krete, 'me ba khetha ho Mo latela, leha eba ba ka lahlehelo a ke lintho tsohle.

'Muso oa Molimo ha o tle ka ho iponahatsa. Molaetsa o molemo, ka moea oa oona oa boitelo, o ke ke oa tsamaea 'moho le moea oa lefatše. Empa kajeno matšoele-tšoele a lakatsa ho etsa Morena oa rōna 'musi oa mebuso ea lefatše lena, 'musi oa makhotla a lona, matlong a marena, le mapatlelong a metse ea bona. Ba lebeletse hore A buse ka ho tiisa melao e behiloeng ke batho ba ka sehloohong. Erekaha Krete A le sieo ka bo-Eena, ke bona ba tla nka sebaka sa Hae. Bajuda ba ne ba labalabela 'muso o joalo, mehleng ea Krete. Empa A re, "Muso oa ka hase oa lefatše lena." Johanne 18:36.

'Muso oo Jesu A neng A phela tlas'a oona o ne o senyehile 'me e le oa khatello. Ka linako tsohle ho ne ho ena le lillo tsa hlōkōfatso le litlatlapo, lintho tse ke keng tsa mamelloa, esita le bokhopo bo

makatsang. Le ha ho le joalo Mopholosi ha A ka A leka ho loantšana le liketso tsena, leha e le ho hlasela litlatlapo tsa sechaba, kapa hona ho tsoa lira tsa sechaba. Ha A ka A itšunyatsunya litabeng tsa ba matleng a puso. Eo E neng E le mohlala ho rōna, O ile A ipeha thōko le mebuso ea lefatše, e se hobane A ne A iphapanyetsa mahlomola a batho, empa e le hobane pheko e ne e ke ke ea hlaha ka matla a botho kapa ka mehato e ka bonoang. Empa pheko e tlameha ho tloha pelong.

‘Muso oa Krete ha oa etsoa ka makhotla kapa matlo a bothchi ba melao, empa e le ka ho hloma sebōpeho sa Hae bothong ka mosebetsi oa Moea o Halalelang. Ana ke ‘ona feela matla a ka phahamisang motho. ‘Me seo motho a ka se etsang ho phethahatsa mosebetsi ona ke ho ruta le ho phetha kamoo lentsoe la Molimo le laeang ka teng.

Ha joale, joaloka mehleng ea Krete, mosebetsi oa ‘muso oa Molimo ha oa beoa holim’a bao ba batlang ho bonoa, le ho tšehetsoa ke babusi ba lefatše le melao ea batho, empa o beiloe ho bao ba bolellang batho linnete tse halalelang ka lebitso la Hae, ‘me li phethe kahare ho ea li amohetseng maiphihlelo a kang a Paulosi, ha a re, “Ke thakhisitsoe le Krete; kahoo bophelo boo ke bo phelang ha e sa le ba ka, empa e se e le ba Krete ea phelang ka ho ‘na.” Bagalata 2:19,20.

## KHAOLO EA 56—LERATO LA JESU HO BANA

[343]

*[E itšetlehile ka Matheu 19:13-15; Mareka 10:13-16; Luka 18:15-17.]*

Jesu E ne E le moratuo oa bana. O ne A amohela matšelisō a bona a bongoana ka lerato le phutholohileng. Lithōko tsa teboho tse tsoang melomong ea bona, li ne li khatholla moea oa Hae haholo ha A ne A utloisitsoe bohōkō ke likamano tsa Hae le batho ba ikaketsang. Hohle moo A neng A ea teng, semelo sa Hae se mosa se ne se hapa maikutlo a bona.

E ne e le tloaelo hore bana ba tlišoe ho moruti e le hore a ba behe matsoho a ba hlohonolofatse. Empa ha batsoali ba ba tliša ho Jesu, barutuo ba Hae ba ba thibela. Ba ne ba nahana hore bana bana ba banyenyane haholo hore ba ka fumana molemo ka ho tlišoa ho Jesu, ‘me ba qeta ka hore Jesu A ka se thabele ketso ena. Empa A se ke A thabisoa ke ketso eo ea barutuo. Mopholosi O ne A utloisisa boima boo bo-’mè ba nang le bona koetlisong ea bana ba bona. Eena ka bo-Eena O ile A ba bitsetsa ho Eena.

Bo-’mè ba se bakae ba bokana hammoho le bana ba bona, ba il’o hore Jesu A hlohonolofatse bana. Jesu A utloa kōpo eo ba e etsang ka letsoalo le likhapha, ‘me A hauha. Empa A lebella ho bona hore na barutuo ba tla ba tšoara joang. Ha A bona ba leleka batsoali bao, A ba bontša phoso ea bona, ka ho re, “Lesang bana ba tie ho ‘na, le se ke la ba thibela, hobane ‘Musō oa Molimo ke oa ba joaloka bona.” A nka bana, A ba fa hlohonolofatso eo ba neng ba tšile ho e fumana.

‘Me batsoali ba ile ba matlafatsoa ke mantsoe a Krete, ‘me ba khothaletsoa ho jara boikarabelo ba bona ka thabo e ncha. Batsoali ba kajeno ba tšoanetse ho amohela mantsoe a Hae ka tumelo e tšoanang. Krete ke Mopholosi oa motho ka mong, ‘me ka ‘nete ke mothusi oa batsoali kajeno joalokaha A ile A nka bana mane Judea.

Jesu O tseba mathata a ka pelong ea motsoali e mong le e mong. O ile A nka leeto le le telele ho ea thoba pelo ea mosali oa Mōkanana.

[344]

A tsosa bafung mora ea mong feela, oa mosali oa mohlolohali oa Naine, ‘me le mahlokong a Hae sefapanong O ile A hopola ‘mè oa Hae. Le kajeno O angoa ke mahlomola a batsoali. Bohlōkōng bohle le bohloking O tla fana ka matšelisō le thuso.

Eena A ileng A re, “Lesang bana ba tle ho ‘na, le se ke la ba thibela,” O ntse A mema batsoali ho tlisa bana ho Eena ho tla hlohonolofatsoa. Esita le lesea le liatleng tsa ‘mè oa lona le ka lula tlas’a moriti oa ea Matla ‘ohle ka tumelo le thapelo ea motsoali. Johanne Mokolobetsi o ne a tletse Moea o Halalelang ho tloha tsoalong ea Hae. Ha re phela ka lipuisano le Molimo, le rōna re ka lebella Moea o Halalelang ho bopa bana ba rōna, esita le ho tloha bonyenyaneng ba bona.

Jesu A elelloa hore ba bang ba bana ba tlišitsoeng ho Eena e tla ba ba-shoela-tumelo ka baka la lebitso la Hae. Bana bana ba ka Mo amohela e le Mopholosi oa bona kapele le ho feta kamoo batho ba baholo ba ka etsang kateng. Motlotlehi oa Leholimo A araba lipotso tsa bona ‘me A nolofatsa lithuto tsa Hae e le ho fihlela kutloisiso ea bona ea bongoana.

### **Mohlala Ho Bo-’mè le Bo-ntate**

Bana ba ka angoa haholo ke lithuto tsa Mangolo a halalelang, lipelo tsa bona li matla hoo li tsebang ho bōlōka lithuto tseo ba li fumanang. Bana ba banyenyane ekaba ba-Kreste ho latela lilemo tsa bona.

Batsoali ba tšoanetse ho sheba bana ba bona e le litho tse nyane tsa lelapa la Morena, tse beiloeng matsohong a bona ho li rupella bakeng sa leholimo. Lehae la boKreste le fetoha sekolo, ‘me batsoali e le mesuoe e menyane, ha Kreste Eena e le Morupelli ea ka sehlohong. Re tšoanetse ho ruta bana ba rōna ho tlisa libe tsa bona ho Jesu, ba kōpe tšoarelō ‘me ba lumele hore Oa ba tšoarella joalokaha A ile A amohela bana ha A ne A phela lefatšeng.

[345]

Joalokaha ‘mè a ruta bana ba hae ho mo hlonepa hobane ba mo rata, o se a ntse a ba ruta thuto ea pele bophelong ba bo-Kreste. Lerato la ‘mè ho ngoana le emetse lerato la Kreste, ‘me ba banyenyane ba tšepang, le ho mamela batsoali ba ithuta ho tšepa le ho mamela Mopholosi.



Jesu hape E ne E le mohlala oa ntate. Lentsoe la Hae le ne le na le matla, empa le ho batho ba sa hlonepheng ba khopo, ha A ka A etsa letho le khopo kapa le tlōntlollang. Ha mohau oa Krete o le ka pelong o tla nolofatsa tsohle tse sa thabiseng ‘me o kokobetse tsohle tse hlōkōfatsang. O tla etsa hore batsoali ba tšoare bana ba bona ka mokhoa o tšoanang le oo bona ba ratang ho tšoaroa ka oona.

Batsoali, ha le ntse le koetlisa bana ba lona, ithuteng lithuto tseo Molimo O faneng ka tsona tlholehong. Haeba u batla ho koetlisa palesa kapa mohalalitoe, seo o ka se etsa ka mokhoa o joang? Botsa molemi hore na o etsa joang hore ka lekala le leng le le leng, esita le makhasi, li bopehe ka mokhoa oo o lekaneng ka hohle ‘me o ratehang. O tla o bolella, a re, e ne e se ka tšoaro e mpe, kapa ka mokhoa oa hlōkōfatso, hobane hoo ho ne ho ka roba kutu tseo tse bonojoana. Empa e bile ka tlhokomelo e fokolang, e phetoa-phetoang hangata. O ile a nolofatsa mobu ‘me a sireletsa limela tse holang, hore li se hlōkōfatsoe ke meea e bohale le letsatsi le chesang ha bohlokō, ‘me Molimo A etse hore li thunye li boheha. Ka tšoaro e bonolo, lehang ho fetola limelo tsa bana ba lōna hore li tšoane le semelo sa Krete.

Khothaletsang pontšo ea lerato ho Molimo le ho batho ba bang. Lebaka leo ka lōna re nang le banna le basali ba pelo li thata lefatšeng ke hobane lerato la ‘nete ha le ea ka la khothaletsoa, le ile la hatelloa. Boleng bo botle ba batho bana bo ile ba hatelloa bongoaneng ba bona, ‘me ntle le hore lerato la leholimo le qhibilihise serame sena sa boikhabo, thabo ea bona e tla senyeha ho isa khale. Haeba re lakatsa hore bana ba rona ba be le moea o bonolo oa Jesu, re tsoanetse ho khothaletsa limelo tse molemo tsa lerato, tsa bongoaneng.

Ruta bana ho bona Krete tlholehong. Ba nkele ka ntle sebakeng, kapa tlas’ a lifate tse hlomphehang, kapa ka jareteng. Linthong tsohle tse babatsehang tsa mesebetsi ea tlholeho, ruta bana ho bona lerato la Krete. O entse melao e busang tsohle tse phelang, ‘me A etsa melao bakeng sa thabo le monyaka oa rona. Se ba khathatse ka lithapelo tse telele le ka maikutlo a thata, empa ba rute ho hlonepha molao oa Molimo ka lithuto tsa tlholeho.

Ha o leka ho hlakisa linnete tsa topollo, shebisa bana ho Krete, E leng Eena Mopholosi oa motho ka mang. Mangeloi a tlabala lehlakoreng la hao. Morena O tla fa batsoali mohau oa ho thahasellisa bana ka pale ea bohlokoa ea Lesea la Betlelehema.

Se khelose bana ho Jesu ka likomang le khalefo. Se ke ua etsa hore ba be le maikutlo a hore leholimong ho ke ke ha ba monate haeba le uena u ka ba teng moo. Se bue hampe ka molaetsa o molemo, ka hore bana ba ka sitoa ho o utloisisa. Se fane ka maikutlo a fosahetseng mabapi le tumelo ho Kreste, joalokaha eka motho o tšoanetse ho hlonama ha e le molumeli, ‘me ha a tla ho Mopholosi o tšoanetse ho tlohela tsohle tse etsang hore bophelo bo be monate.

Ha Moea o Halalelang O tsamaisa lipelo tsa bana, sebetsa ‘moho le Oona. Mopholosi oa ba bitsa. Ha ho letho le ka Mo thabisang ho fetisa ha ba nehela maphelo a bona ho Eena bocheng ba bona. Pelo ea Hae e tsoile, e seng feela bakeng sa bana ba itšoereng hantle, empa le bakeng sa bao ba futsisitsoeng limelo tse nyatsehang. Batsoali ba bangata ba hloka bonolo le bohlae ba ho tšoara bana ba khelohileng, empa e le bona ba ba entseng seo ba leng sona. Empa Jesu O sheba bana bana ka kutloelo-bohlōkō.

E bang lisebelisoa tsa Kreste ho tlisa bana bana ho Mopholosi. Ka bohlae le kutloisiso ba feng khotatso le tšepo. Ka mohau oa Morena ba tla fetoloa boitšoarong, e le hore ho tle ho thoe ka bona, “Muso oa maholimo ke oa ba joaloka bona.”

## **KHAOLO EA 57—MOHLANKANA OA MORUI O NE A HLOKA NTHO E LE ‘NGOE**

[347]

*[E itšetlehile ka Matheu 19:16-22; Mareka 10:17-22; Luka  
18:18-23.]*

Ha Jesu a tsoela tseleng, monna e mong a mathela ho eena, a khumama kapele ho eena, a ‘motsa, a re: ‘Moruti ea Molemo, nka etsa’ng hore ke tie ke rue bophelo bo sa feleng?’”

Mohlankana enoa oa ‘musi, o ne a ruile haholo ‘me a le litulong tsa boikarabelo bo boholo. O ile a bona lerato leo Krete a le bon-tšitseng bana, ‘me pelo ea hae e ne e chesehela lerato la Mopholosi. O ne a amehile haholo hoo a bileng a mathela Krete, a khumama maotong a Hae, ‘me ka ‘nete le ho tiea, a botsa potso eo e leng ea bohlokoa moeeng oa hae, esita le ho batho bohle.

“U mpitsetsa’ng ea molemo?” Ho rialo Jesu, “Ha ho ea molemo haese Molimo feela.” Jesu O ne A lakatsa ho fumana ho eena, hore na ke ka mokhoa o fe a Mo bonang A le molemo. Na o ile a elelloa hore enoa eo a buoang le Eena ke Mora oa Molimo? Khopolo ea ‘nete pelong ea hae e ne e le efe?

‘Musi enoa o ne a na le maikutlo a phahameng haholo ka ho lōka ha hae, empa o ile a ikutloa hore ho na le ntho e ‘ngoe eo a neng a sena eona. Na e be Jesu O tla mo hlohonolofatsa ‘me a khotsofatse bohloki ba moea oa hae?

Ho araba potso ea hae, Jesu A mo bolella hore ho hlokahala hore a hlonephe molao oa Molimo, haeba a lakatsa ho fumana bophelo bo sa feleng. Karabo ea ‘musi e ne e totobetse, ha a re, “tsena tsohle ke li bōlōkile ho tloha bocheng ba ka, ke sa hloka eng?”

Kreste A sheba mohlanka mahlong, joalokaha e ka O bala bophelo ba hae, O batlisisa semelo sa hae. O ne A mo rata ‘me A lapetse ho mo fa khotso le thabo. “U haelloa ke ntho e le ‘ngoe: E-ea, u rekise tsohle tseo u nang le tsona, u abele mafutsana chelete eo, ‘me u tla ba le letlotlo leholimong; joale u tle, u ntatele!”

[348]

Kreste A hapeha ke mohlankana enoa. Mopholosi O ne A labalabela ho bopa kahare ho eena tlhalohanyo, hore a tle a utloisise bohlokoa ba pelo e inehetseng. A laba-labela ho bona ka ho eena boikokobetso le pelo e robhileng, e behang bohloki ba eona ba ho se phethehe ho Kreste.

Jesu A bona ka ho ‘musi enoa thuso eo A neng A e hloka mosebetsing oa topollo. Ha a ne a ka ipcha tlas’a tataiso ea Kreste, e ne e tla ba sebetsa se setle. Kreste, ka ho bona semelo sa hae, O ile A mo rata. Ho rata Kreste ho ile ha qaleha ka pelong ea ‘musi, hobane lerato le tsoala lerato. Jesu A labalabela ho ‘mona e le mosebetsi ‘moho le Eena. A lakatsa ho ntlafaletsa semelo sa hae maamong a phethahetseng, ‘me a se halaletse hore Morena A tie A mo sebelise. Hoja ‘musi o ile a inehela ho Kreste, bokamoso ba hae bo ka be bo fetohile!

“U haelloa ke ntho e le ‘ngoe:” Ho rialo Jesu. “E-ea, u rekise ka tsohle tseo u nang le tsona, u abele mafutsana chelete eo, ‘me u tla ba le letlotlo leholimong; joale u tle, u ntatele!” Kreste O ile A bala pelo ea ‘musi. Ntho e ‘ngoe feela eo a e hlokanang, ‘me hoo e ne e le molao oa bohlokoa. O ne a hloka lerato la Molimo moeeng. Bohloki bona, ntle le hore bo khotsofatsoe, ho hlaha lefu. Semelo sa hae sohle se ka senyeha. Hore a tie a amohele lerato la Molimo, o ne a tsoanela ho lahla boithati ba hae ba bohlohali, a inehela.

Kreste A mo laeletsa hore a khethe pakeng tsa maruo a leholimo le botumo ba lefatše. Bo-’na bo tsoanetse ho inehela; ‘me lithato tsa hae li beoe tlas’a tsamaiso ea Kreste. Mohlankana oa morui o ne a e-na le monyetla oa ho ba mojalefa oa matlotlo a leholimo le Kreste. Empa o ne a tsoanetse ho nka sefapano ‘me a latele Mopholosi tseleng ea boinehelo.

[349] Khetho e ne e sallane le eena. Jesu O ne A mo bontšitse ho leng phoso semelong sa hae. Haeba a ne a ile a khetha ho latela Kreste o ne a tsoanetse ho tlohela litakatso tsa ho iphahamisa ka matlotlo a hae. Mopholosi A sheba mohlanka ka cheseho e kholo, A tšepile hore o tla amohela memo ea Moea oa Molimo.

Mantsoe a Kreste e ne e le mantsoe a bohlae, leha e le mona a bonahetse e ka a matla haholo. Ho a amohela le ho a hlonepha, e ne e le oona feela mokhoa oo ‘musi eo, a neng a ka fumana topollo ka oona. Boemo ba hae le maruo, li ne li mo hohela, ‘me li khannela

semelo sa hae tšenyehong. <sup>NGOE</sup> ‘Me ha li ne li ka tsa holisoa li ne li ka <sup>cccxxxvii</sup> leleka Molimo ka ho eena.

### Na Jesu O Na Batla Ntho E Thata?

‘Musi a utloisisa kapele seo mantsoe a Kreste a se bolelang, ‘me a soaba. E ne e le setho sa lekhotla le hlomphehang la Bajuda, ‘me Satane o ne a mo nonosa maemo a bonahalang a le matle a bokamoso. O ne a batla letlotlo la leholimo, empa hape o ne a batla ho fumana melemo eo maruo a hae a ka mo tlisetsang eona. O ne a laba-labela bophelo bo sa feleng, empa sehlabelo se ne se bonahala se le sehlole haholo, ‘me a ikela a soabile, ‘hobane o ne a ruile haholo.’

Polelo ea hae ea hore o bōlōkile molao oa Molimo e ne e le thetso. O bontšitse hore maruo e ne e le molingoana oa hae. O ne a rata limpho tsa Molimo ho feta kamoo a ratang Mofani oa tsona. Kreste O fane ka monyetla ho mohlankana oa ho ikopanya le Eena. “Ntatele,” A rialo. Empa Mopholosi O ne A se maikutlong a mohlankana enoa, joaloka maruo a hae kapa lona lebitso la hae sechabeng. Ho tela tse bonoang molemong oa tse sa bonoeng e ne e le kotsi e kholo. O hanne neo ea bophelo bo sa feleng, ‘me a ikela. Kamora’ moo, haesale lefatše le amohela khumamelō eo ea hae. Liketekete li feta tlas’ a maemo a joalo, ba bapisa Kreste le tsa lefatše, ‘me ba bangata ba khetha lefatše.

Mokhoa oo Kreste a sebetsaneng le mohlankana enoa ka oona ke thuto. Molimo O fane ka molao oa tataiso oo bahlanka ba Hae ba tšoanetseng ho o latela. Ke hore re hlonephe molao oa Hae, e seng feela ho phethisa molao, empa e be hlomphe e kenang bophelong ‘me e bonahale semelong. Ke bao feela ba tla re, Morena, tsohle tseo ke nang le tsona, le sohle seo ke leng sona, ke tsa Hau, ba tla nkoa e le bara le barali ba Molimo. Nahana hore na ke ho bolelang hore Che ho Kreste. Mopholosi O batla ho arolelana le rōna mosebetsi oo Molimo A re fileng hore re o etse. Ke ka mokhoa oona feela A ka re pholosang.

Molimo O file batho mekhoha, litalenta le menyetla, e le hore e be mahlahana a Hae ho thusa bafumanehi le ba hlopheleng. Ea sebelisang limpho tseo Molimo O mo fileng tsona joalokaha Molimo A bontšitse e ba mosebetsi ‘moho le Mopholosi.

Ho bao, ba leng maemong a phahameng joaloka mo-hlankana oa morui, ‘me ba na le maruo a maholo, ho ka bonahala e ka ke sehlabelo se seholo ho fana ka tsohle molemong oa ho latela Krete. Empa ha ho letho le hlokang hlomphe le ka amoheloang. Boinehelo ke moko oa lithuto tsa Krete. Ha ho mokhoa o mong oa ho pholosa motho, haese ho mo arohanya le lintho tseo tse ka senyang boleng ba hae ka kakaretso, haeba a li etsa.

Ha balateli ba Krete ba khutlisetsa ho Morena seo e leng sa Hae, ba bokella letlotlo leo ba tlang ho le neoa ha ba utloa mantsoe a na, “Ke hantle, mohlanka ea khabane, ea tsepahalang;...Kena, u thabe le mong’a hao!” Matheu 25:23. Thabo ea ho bona meea e pholositsoeng ka ho sa feleng ke moputso oa bohle ba ileng ba be-ha maoto a bona mehatong ea Krete A neng A re, “Ntatele.”

## KHAOLO EA 58—TSOSO EA LASARO

[351]

*[E itšetlehile ka Luka 10:38-42; Johanne 11:1-44.]*

Har'a barutuo a ba 'nete ba Krete ho ne ho na le Lasaro oa Bethania, 'me o ne a ratoa haholo ke Mopholosi. Krete O ile A etsa mohlolo o moholo ka ho fetisa, ho Lasaro. Mopholosi O rata setho se seng le se seng sa lelapa la botho, empa ho ba bang a tlangoa ke likamano tse khethehileng.

Lelapeng la Lasaro, Jesu O ne A fumana phomolo hangata. Mopholosi O ne A se na lehae leo e leng la habo. Ha A khathetse, 'me A nyoretsoe ho kopana le batho, O ne A thabela ho balehela lehaeng lena la khotso. Mona O ne A fumana kamohelo ea 'nete 'me e hloekileng, sona setsoalle se halalelang.

Ha matšoele-tšoele a ne a latetse Krete har'a masimo, A ba manollala botle ba lefatše ba tlhaho. Empa bongata bona bo ne bo lieha ho utloisisa, 'me Krete O ne A fumana phomolo mokhathaleng oa Hae, o bakiloeng ke likhang tsa bophelo ba sechaba. Mona O ne A sa hloke ho buoa ka litšoantšo.

Ha Krete A ntse A fana ka lithuto tsa Hae tse makatsang, Maria o ne a lula maotong a Hae, e le momameli ea seli ea inehetseng. Ka nako e 'ngoe, ha Krete A ne A etetse Bethania lekhetlo la pele; Maretha ea neng a ntse a lōkisa lijo, a ea ho Eena a re, "Morena, na ha u tsotelle ha ngoan'eso a ntlohela ke sebetsa ke le mong? Ak'u re ho eena a nthuse hie!" Jesu A araba ka bonolo, 'me ka mantsoe a tletseng mamello, A re, "Maretha, Maretha, ua itšoenya, 'me u ikhathatsa ka tse ngata, empa ho hlokeha ntho e le 'ngoe: Maria o ikhethetse se molemo, seo a ke keng a se amohuo." Maria o ne a ipolokela ka kelellong ea hae mantsoe a tsoang molomong oa Mopholosi, mantsoe a neng a le bohlokoa ho feta mahakoe a theko e holimo a lefatše.

[352]

Maretha o ne a sa tšoanela ho ikhathatsa haholo ka lintho tse fetang, a mpe a kothalle haholo lintho tse se nang ho feta. Mosebetsi oa Krete o hloka bo-Maretha, ka mafōlōfōlō a bona mosebetsing oa

bolumeli; empa ha ba ke ba qale ka ho lula ‘moho le Maria, maotong a Jesu. Ha cheseho le matla li halaletsoe ka mohau oa Kreste.

Mahlomola a kena lapeng la khotso moo Jesu A neng A phomola teng. Lasaro a kula ka potlako, ‘me bo-khaitseli ba hae ba rōmela ho Jesu, ba re, “Morena, tseba, eo u mo ratang oa kula.” Ba ne ba hlokomela matla a lefu le tšoereng khaitseli ea bona, empa ba ne ba tseba hore Kreste O bontšitse hore O tseba ho phekola mafu a mefuta eohle. Kahoo ha ba ka ba etsa kōpo e potlakileng hore A tl’o ba teng kapele, ba mpa ba nahana hore O tla ba le bona hang feela ha A fihla Bethania.

Ba lebella ka cheseho. Ha feela tlhase ea bophelo e sa le teng ho eo khaitseli’e, ba rapela ba ntse ba lebetse ho fihla ha Jesu. Empa moromuoa a khutla a le mong. Feel a fihla le molaetsa o reng, “Ho kula hona ha ho ise lefung,” ‘me ba ba le tšepo ea hore Lasaro o tla phela. Ha mokuli a e-shoa ba ile ba nyahama haholo, empa ba utloa mohau oa Kreste o ba tiisa.

Ha Kreste A utloa molaetsa, ha ka A bontša masoabi ao barutuo a neng ba lebeletse ho a bona ho Eena. A re, “Ho kula hono ha ho ise ho lefung, empa ho isa tlotlisong ea Molimo, hore Mora oa Molimo a tlotlisoe ka hona.” Jesu A hla A lula matsatsi a mabeli moo A neng A leng teng. Tieho ena e ne e le mohlolo ho barutuo a, hobane ho ne ho tsebahala hantle hore O rata lelapa leo le Bethania haholo.

[353] Ka nako ea matsatsi a mabeli, ho ile ha bonahala e ka Kreste o ntšitse molaetsa kelellong ea Hae. Barutuo a ba hopola Johanne Mokolobetsi. Jesu o ne a na le matla a ho etsa mehlolo, ekaba ke hobaneng ha A ile A lumella hore Johanne a senyehle chankaneng, ‘me a shoe lefu leo le sehlōhō? Bafarisi ba ile ba hlahisa potso ena, ka mokhoa o sa hlokeng karabo, ha ba ntse ba nyatsa Kreste ka ho ipolela hore ke Mora oa Molimo. Mopholosi O ne A ile A elets a barutuo a ba Hae hore ho tla hlaha liteko, tahlehelo, esita le litlhoriso. Na e be O tla ba lahla ha liteko li hlaha? Bohle ba ne ba khathatsehile haholo.

Eitse hoba matsatsi a mabeli a fete, Jesu A re, “A re eeng Judea hape.” Barutuo a ba botsana hore na haeba Jesu A e-ea Judea, O ile A liehelang ka matsatsi a mabeli. Empa ho neng ho le matla haholo likelellong tsa bona, ke ho khathatseha ka Kreste, le bona ka bo-bona. Ba ne ba bona kotsi feela, leetong leo A neng A le



lekhateng la ho le nka. Ba re, “Rabbi, Bajuda ba sa tsoa batla ba u tlepetsa ka majoe; na u sa ea teng hape?” Jesu A araba A re, “Na hora tsa letsatsi ha li leshome le metso e ‘meli na?” Ke tlas’a tataiso ea Ntate, ‘me ha feela ke etsa thato ea Hae, bophelo ba ka bo bōlōkehile. Ke kene karolong ea ho qetela ea letsatsi la ka, ‘me ha karolonyana ea Iona e sa le teng, ke tla bōlōkeha.

“Ha motho a tsamaea motšoare, ha a khoptjoe, kahobane o bona leseli la lefatše lena.” Leseli la Moea oa Molimo O tataisang le mo fa pono e phethahetseng mosebetsing oa Hae ‘me le mo tataisa ho fihlela mosebetsi oa hae o felile. “Empa ha motho a tsamaea bosiu oa khoptjoe, kahobane o hloka leseli.” Ea ikhethelang ho tsamaea litseleng tsa hae o tla khoptjoe. Hohle moo a leng teng, ha a baballeha.

“A bolela litaba tsena, ‘me kamorao ho moo a re ho bona: ‘Lasaro, motšoalle oa rōna, o robetse, empa kea ea, hore ke tle ke mo tsose.’” Ka ho nahana ka mahlomola ao Morena oa bona A tlang ho teana le ona Jerusalema, barutuo ba ne ba bile ba lebetse ka lelapa le shoeletsoeng mane Bethania. Empa ho Krete ho ne ho se joalo. Barutuo ba ne ba se ba belaetse hore Jesu O ne A hloka lerato la ‘nete ho Lasaro le likhaiseli tsa hae, ho fapana le ha ba ne ba lumela pele hore oa ba rata. Empa mantsoe a Hae ha A re, “Lasaro, motšoalle oa rōna,” a ile a tsosa menahano ea ‘nete maikutlong a bona. Krete O ne A sa lebala metšoalle ea Hae e bohlokōng.

“Eaba barutuo ba re ho eena: ‘Morena, ha a robetse, o tla fola.’ Jesu O ne A bua ka ho shoa ha Lasaro, empa bona ba hopola hore o bua ka boroko ba mehla.” Krete O bua ka lefu e le ho robala ho bana ba Hae ba lumelang. Maphelo a bona a patiloe le Krete ho Molimo, ‘me ho fihlela terompeta ea morao e lla, ba shoang ba tla roballa ho Krete. Sheba 1 Bakorinthe 15:51-54.

“Ea e-ba moo Jesu a ba bolellang phatlalatsa, a re: ‘Lasaro o shoele, ‘me ke ka baka la lona, ke thabela hore ebe ke ne ke le sieo, le tie le lumele, empa a re eeng ho eena.’”

[354]

Barutuo ba tsota mantsoe a Krete ha A re, “Lasaro o shoele. ‘Me...ke thabela hore ebe ke ne ke le sieo.’ Na Mopholosi O ne A khethile ho tšabella lehae la metšoalle ea Hae ha ba le mahlomoleng? Empa Krete O ne A bone pono eo ka botlalo, ‘me le bokhaiseli ba shoeletsoeng ba ne ba tšeelitsoe ke mohau oa Hae. Jesu O ile A

bona bohlōkō bo neng bo le lipelong tsa bona ha khaitsemi ea bona a loantšana le lefu. Empa e ne e se baratuoā ba Bethania feela, bao Krete A neng A ka nahana ka bona, O ne A lokela ho hlokomela le koetliso ea baratuoā ba Hae. Ba ne ba tsoanetse hoba baemeli ba Hae lefatšeng. Molemong oa bona O ile A tlohela Lasaro hore a shoe. Hoja O ile A mo folisa ho kuleng ha hae, ho mo tlisa bophelong bo botle, mohlolo oo e neng e tlabā bopaki ba ‘nete ba semelo sa Hae sa boMolimo, o ne o ke ke oa phethahala.

Hoja Krete O ne A le teng ka tlung ea kokelo, tsenene ea lefu ekabe e sa hlaba Lasaro. Kahoo Morena O ile A ba sieo. O ile A lumella hore bo-khaitsemi bao ba hlomohileng ba bone ngoan’abo bona a patoa lebitleng. O ile A hlajoa ke bohlōkō bohle boo ba bileng har’a bona. Ho lieha ha Hae ho ne ho sa bontše ho hloka lerato, empa O ne A tseba hore molemong oa bona le Lasaro, le Eena, esita le molemong oa baratuoā ba Hae, hlōlo e ne e tsoanetse ho fihleloa.

Ho bohle ba phopholetsang, ho nanabela letsoho le tataisang la Molimo, ha ba fihleloa ke ho nyahama ho holohali, ke nako eo thuso ea Molimo e leng haufi-ufi. Ba tla hetla morao ka teboho ho bona lefifi le tšabehang le neng le le tseleng ea bona. Melekong le litekong tsohle Morena O tla ba ntša ka tumelo e tiileng le maiphihlelo a matlafetseng.

[355] Krete O ile A lieha, e le hore ka ho tsosa Lasaro bafung, A ke A fane ka pontšo ho batho ba Hae ba manganga, ba sa lumeleng, A etse bopaki bo bong ba hore, ruri ke Eena “tsoho le bophelo.” O ne A sa batle ho lahla tšepo eohle ka batho ba Iseraele, ‘me A ikemisetsa hore A ba fe bopaki bo bong hape ba hore ke Eena A ‘notši A ka fanang ka bophelo le ho se shoe. Ke ka lebaka lona lena A ileng A lieha ho ea Bethania.

Ha A fihla Bethania Jesu A rōmela morōmuoa ho Maretha le Maria ka molaetsa oa hore O fihlile, empa A ka emisa kathōko ho tsela moo ho khutsitseng. Boitlhahiso bo boholo bo neng bo etsoa ke Bajuda mafung a metsoalle kapa ba lelapa, e ne e le ntho e sa lumellaneng le moea ea Krete. Jesu O ile A utloa selo se tsoang ho batho ba hiretsoeng ho lla, ‘me A lakatsa hore A se ke A teana le likhaitsemi tseo kahar’a mofere-ferere. Har’a metsoalle e neng e lla, ho ne hole teng bao e leng lira tse kholo tsa Jesu. Krete O ne A

tseba merero ea bona, ‘me A se ke A etsa hore boteng ba Hae bo tsebahale hang hang.

Molaetsa oa fihla ho Maretha ka lenyele hoo ba bang, esita le Maria, ba sa kang ba utloa. Maretha a tsoa ho ea teana le Morena oa hae, empa Maria a lula a khutsitse a hlomohile, a sa lle ka ho hoeletsa.

Pelo ea Maretha e ne e ferekane ke maikutlo a loantšanang. Sefahlehong sa Krete se bohehang a bona bonolo le lerato tsa kamehla, empa a nahana ka khaitsetsi ea hae eo a neng a mo rata haholo. Pelo ea hore ea tlala bohlokō kahobane Krete A liehile ho fihla, ‘me a re, “Morena, hoja ua ba teng mona, khaitsetsi ea ka e ka be e sa shoa.” Likhaitsetsi tsa Lasaro li ne li pheta-phetile mantsoe ana hangata.

Maretha o ne a se na maikutlo a ho buoa ka tse fetileng, a mpa a sheba sefahleho seo se tletseng lerato, a eketsa a re, “Empa le joale kea tseba hore tsohle tseo u li kōpang ho Molimo, Molimo o tla u nea tsona.”

Jesu A mo khothatsa A re, “Khaitsetsi ea hao e tla tsoha.” Karabo ea Hae ea tsepamisa menahano ea Maretha holim’a tsoho ea ba lokileng, e le hore ka tsoho ea Lasaro, a tle a bone tiiso ea hore bohle ba lokileng ba shoeleng ba tla tsoha.

Maretha a araba, a re, “Kea tseba hore e tla tsoha mohl’a tsōho ea bafu, ka letsatsi la bofelo.” Jesu ka ho batla ho neha tumelo ea hae tsela ea ‘nete, A re, “Ke ‘na tsōho le bophelo.” Ho Krete ho na le bophelo, bo phethahetseng, bo sa alingoang, kapa ba nkuoa ho motho e mong. “Ea nang le Mora o na le bophelo.” 1 Johanne 5:12. Jesu A re, “Ea lumelang ho ‘na leha a ka shoa o tla phela. Mang le mang ea phelang, ‘me a lumela ho ‘na, ha a ka ke a shoa le ka mohla o le mong; na u lumela hona na?” Mona Krete O ne A shebetse pele nako ea ho tla ha Hae la bobeli. Ka nako ea ho tla ha Hae la bobeli, ba shoeleng ba lokileng ba tla tsohela ho se bole, ‘me ba lokileng ba phelang ba tla fetoleloa leholimong ba sa ka ba bona lefu. Tsoso ea Lasaro e ne e tla emela tsōho ea bafu ba shoetseng ho lōkeng. Ka mantsoe le mesebetsi ea Hae, Jesu O ne A bontša tōkelo ea Hae le matla a ho fana ka bophelo bo sa feleng.

Ha a araba potso ea Mopholosi, e reng, “Na u lumela hona na?” Maretha a re, “E, Morena; kea lumela hore u Krete, Mora oa Molimo, ea tlang lefatšeng.” A bolela tumelo ea hae ka boMolimo

ba Hae, le tšepo eo a nang le eona ea hore O na le hona ho phetha eng kapa eng eo A ka khahloang ho e etsa.

“Hoba a rialo, a ea bitsa ngoan’abo Maria ka lekunutu, a re: ‘Moruti o teng, ‘me oa u bitsa.’” O ile a fana ka molaetsa oa hae a sa etse lerata, hobane baprista le babusi ba ne ba ikemiselitse ho tšoara Jesu ha monyetla o ka hlaha. Sello sa ba-siameng se ile sa koahela mantsoe a hae hore a se ke a utluoa ke ba bang.

Ha a utloa molaetsa, Maria a ema ka potlako ‘me a tsoa ka tlung. Ka khopolo ea hore o ea lebitleng ho lla teng, ba mo tšelisang ba mo latela. Eitse ha a fihla moo Jesu A leng teng, a re ho Eena, ka lentsoe le thothomelang, “Morena, hoja oa ba teng mona, khaitseli ea ka e ka be e sa shoa.” Sello sa ba mo tšelisang se ne se mo hlaba ha bohlokō, haholo hobane a ne a laba-labela hoba le metsotso e se mekae ea khutso ea ho bua le Jesu ba le bang.

“Jesu ha a bona Maria a ntse a lla, le Bajuda ba tšileng le eena ba ntse ba lla, a hlabeha moeeng, a ferekana.” Ho ba bangata, A bona hore ho neng ho bonahala e ka ke tšiamo, e ne e le boiketsiso. Ba bang ba ba bontšang ho hlabeha hoo ha boikaketsi, ba tla kena morerong oa ho bolaea, e seng feela enoa ea etsang mehlolo e mohlolo, empa le eena enoa ea tlang ho tsosoa bafung. “Le ‘meile kae?” Jesu A botsa. “Morena, tloo, u bone.” Ba ea lebitleng hammoho. Lasaro o ne a ratoa haholo, ‘me bo khaitseli ba hae ba ne ba lla ka lipelo tse robhileng, ‘me le metsoalle ea hae e lla ‘moho le bona. Ka [357] ho hlokomela bohlokō bona bo bathong, le taba ea hore metsoalle e hlabehileng e ne e lla empa Mopholosi oa lefatše A eme feela, “Jesu a keketla likeleli.” Mora oa Molimo O ne A nkile sebōpeho sa botho, ‘me A angoa ke mahlomola a batho. Pelo ea Hae e bonolo, e utloelang bohlokō, e ne e tlala kutloelobohlōkō kamehla, ka lebaka la mahlomola.

Jesu O ne A sa llisoa feela ke ho utloela Maria le Maretha bohlokō. Krete O ile A lla hobane boima ba masisa-pelo a mengoaha eohle bo ne bo le holim’a Hae. A bona litholoana tse bohlokō, tse hlahisitsoeng ke ho tlola molao oa Molimo. A bona hore toantšano e pakeng tsa botle le bobbe ha e khaotse. A bona mahlomola le masoabi, likhapha, le lefu, tse neng li lokela ho ba lefa la lelapa la botho ka mengoaha eohle, libakeng tsohle. Mathata a sechaba sa baetsalibe a ba boima holim’a moea oa Hae, ‘me mohloli oa

likhapha tsa Hae o ile oa buleha ha A ne A lohotha mokhoa oa ho lopolla sechaba litsietsing tsa sona kaofela.

Lasaro o ne a patiloe ka lehaheng, ‘me letlapa le leholohali le ne le beiloe monyako oa lebitla. Jesu A re, “Tlosang letlapa.” Ka khopolo ea hore Jesu O mpa A lakatsa ho bona mofu, Maretha a mo latolela ka hore setōpo se na le matsatsi a mane se bōlōkiloe, ‘me se se se senyeha. Polelo ena e buuoeng pele Lasaro a tsosoa, ea hlokisa lira tsa Krete menyetla oa hore ba tle ba re ho sebelitsoe ka thetso. Ha Krete A tsosa morali oa Jairuse, O ne A ile A re, “Ngoana ha a ea shoa, o mpa a robetse.” Mareka 5:39. Ereka ha a ile a tsosoa hang kamora’ lefu hore a shoe, Bafarisi ba ile ba bolela hore o ne a sa shoa, ebile Krete ka bo-Eena O ile A bolela hore o ne a robetse feela. Ba ne ba batla hore ho hlahe eka ho na le bolotsana bo tsamaeang le mehlolo ea Jesu. Empa lekhetlong lena, ho ne ho se ea ka hanyetsang hore Lasaro o ne a shoele.

Ha Morena A batla ho etsa mosebetsi, Satane o kena ka ho e mong hore a hanyetse tšebetso eo. Maretha o ne a sa rate hore setōpō seo se bolileng se tlišoe pontšeng. Tumelo ea hae e ne e sa itšoarella ‘neteng ea seo tšepiso ea Jesu e se bolelang. Krete A hlakisetsa Maretha ka bonolo bohle A re, “Na ha kea u bolella hore, ha u lumela, u tla bona tlōtla ea Molimo?” U fumane lentsoe la ka Ha ho letho ho tse hloliloeng le ka sitisang mosebetsi oa Molimo ho tsoela pele. Ho se lumele ha se boikokobetso. Ho inehela ka botlalo lentsoeng la Krete ke boikokobetso ba ‘nete, ‘me ke boinehelo ba ‘nete.

[358]

“Tlosang letlapa.” Krete A ka be A laetse mangeloi a haufi le Eena hore a tlose letlapa. Empa O ne A batla ho bontša hore batho ba tšoanetse ho sebetsa ‘moho le Molimo. Seo matla a botho a ka se etsang ha se tlame matla a Molimo ho ka se etsa.

Taelo e ile ea phethisoa. Lejoe le ile la tlosoa. Tsohle tsa etsetsoa pontšeng ka bōlōkōlōhi. Bohle ba bona hore ha ho thetso ea letho e entsoeng. Setōpō sa Lasaro se ne se rapaletse moo, se bata ‘me se khutsitse se shoele. Batho ba ema pel’ a lebitla, ba makatse ebile ba lebeletse, ba emetse ho bona se tlang ho etsahala.

Motsotso o halalelang o mahlōnōkō oa fihlela bohle ba leng moo. Krete A atamela haufi le lebitla. A lelaletsa rnahlo a Hae leholimong, A re, “Ntate, kea u leboha ha u nkutloile.” Lira tsa Krete li ne li ile tsa Mo qosa ka hore Oa nyefola ka ho ipitsa Mora

oa Molimo. Empa ka sebetse se phethahetseng, Krete A bolela hore ke Mora oa Molimo.

Kreste O ne A le hlōkōlōsi ho bontša hore ha A sebetse ka ntle ho Ntate oa Hae; O ne A phetha mehlolo ea Hae ka tumelo le thapelo. Krete O ne A chesehela hore bohle ba tsebe likamano tsa Hae le Ntate. A re, “Ntate, kea u leboha ha u nkutloile. ‘Na kea tseba hore u nkutloa kamehla, empa ke buile ka baka la letšoele le nteetseng hare, hore le tie le lumele hore u nthōmile.’” Mona e ne e le ho bontša barutuo a le batho hore boipolelo ba Krete ha se thetso.

“Hoba a rialo, a hōoa ke lentsoe le phahameng, a re: ‘Lasaro, tsoa!’” Khanya ea Molimo ea kena bothong. Sefahlehong sa Hae, se neng se bonesitsoe ke khanya ea Molimo, batho ba bona tiiso ea matla a Hae. Mahlo ‘ohle a ne a shebile lehaheng, litsebe tsohle li qahame ho amohela molumo ofe kapa ofe o tlang. Ka thahasello e kholo bohle ba lebella pontšo e tlang ho matlafatsa boipolelo ba Krete, ba hore ke Mora oa Molimo, ho seng joalo tšepo e time ka ho sa feleng.

[359] Ha ba le tšisinyeho ka har’a lebitla le khutsitseng; ‘me ea neng a shoele a ema monyako oa lebitla. A sitoa ho tsamaea hantle ka baka la masela a mo thatetseng, ‘me Krete A re ho ba mo shebileng ba maketse, “Mo tlamolleng, le mo lese a ikele.” Hape ba ne ba bontšoa hore batho ba tšoanetse ho thusana. Lasaro o ile a lōkōlloa ‘me a ema ka pel’a mokhopi oa batho, e se eena eane ea fokolisitsoeng ke ho kula, empa e le motho ea tletseng bophelo. Mahlo a hae a phatsima a tletse bohlale le lerato bakeng sa Mopholosi oa hae. A itihela maotong a Jesu ho Mo khumamela.

Ba bonang pono ena, pele ba ne ba thotse ke ho makala, empa ha latela thabo e ke keng ea hlaloso. Likhaitseli tsa amohela ngoan’abo bona, a phela hape, e le mpho ea Molimo, ‘me ka meokho ea thabo, ba lebisa liteboho tse tebileng ho Mopholosi. Eare ha bohle ba sa thabile joalo kopanong ena, Jesu A nyamela pontšeng. Ha ba batla Mofani oa bophelo, ho ne ho se moo A fumanehang teng.

## **KHAOLO EA 59—BAPRISTA LE BABUSI BA TSOELA PELE HO RERA**

[360]

*E itšetlehile ka Johanne 11:47-54.*

Litaba tsa tsoho ea Lasaro hang hang tsa fihla Jerusalema. Babusi ba Bajuda ba tseba litaba tsena ka pele-pele ka lihloela. Lekhotla la kopana hang-hang ho tla etsa qeto ea hore na ho ka etsoa eng. Mohlolo oo o moholo e ne e le sehlohlolo sa bopaki bo fanoang ke Molimo hore O rōmetse Mor'a Hae lefatšeng ho tla le lopolla. E ne e le pontšo ea matla a maholo, e lekaneng ho susumetsa kelello e 'ngoe le e 'ngoe e nang le letsoalo le hlaphohetseng, e utloisisang mabaka.

Empa baprista ba ile ba halefisoa ke mohlolo ona o mocha. Mofu o ile a tsosoa letsatsi le chabile, pontšeng ea sehlopha seo e bileng lipaki. Ha ho leqheka le ka latolang bopaki bo joalo. Ka lebaka lena baprista ba ikemisetsa le ho feta pele, ho felisa mosebetsi oa Krete.

Basaduke ba ne ba se khahlanong e matla haholo mabapi le Jesu joaloka Bafarisi, empa ha joale ba ne ba tšohile haholo. Ba ne ba sa lumele tsoho ea bafu, ba hlalosa hore ho ke ke ha etsahala hore 'mele o shoeleng o ka boela bophelong hape. Empa ka lipolelo tse seng kae tse tsoang ho Krete, ba ile ba bonahala hore ha ba tsebe Mangolo, ebile ha ba tsebe le matla a Molimo. Ebe batho ba ka arohanngoa joang le Eo ea hlotseng ka ho amoha lebitla bafu ba lona? Mohlolo o ne o ke ke oa latoloa, 'me ba sa tsebe le hore na ba ka loantša matla a oona joang. Kamora' tsoho ea Lasaro, Basaduke ba etsa qeto ea hore ke feela hore ba Mo bolae, e le hore likhanyetso tsa Hae tse sa tšabeng letho li tle li fele.

Bafarisi ba ne ba lumela tsoho, ba ne ba bone letho le leng, haese hore mohlolo ona e ne e le bopaki ba hore Mesia O ne A le teng har'a bona. Empa ba ile ba Mo hloea ho tloha qalong, hobane O ile A tabola lekoko leo ba neng ba patile boitšoaro ba bona bo khopo ka tlas'a lona. Bolumeli bo hloekileng boo A neng A bo ruta bo nyatsitse boipolelo ba bona bo feela, bo mpang bo nketsoe holimo.

[361]

Ba ne ba nyoretsoe ho iphetetsa kahobane likhalemelo tsa Hae li ne li ba toba. Ba lekile ho Mo tlepetsa ka majoe ka mokhetlo a mangata, empa O ne A ba nyamella A itholetse.

E le ho tsosa Baroma hore ba Mo loantše, Bafarisi ba hlahisa taba ea hore Jesu O ntse A leka ho liha ‘muso oa bona. Ba ne ba lekile ka mekhoha eohle ho Mo thibela ho susumetsa batho. Empa maleke a bona a hloleha. Matšoele-tšoele a boneng mesebetsi ea Hae, ‘me a kileng a utloa lithuto tsa Hae tse phethahetseng, a ne a tseba hore mesebetsi eo le litaba tseo, ha se tsa motho ea robang Sabatha kapa mothetsi. Ka ho lahla tšepo Bajuda ba qetella ba entse molao o reng, e mong le e mong ea bolelang a na le tumelo ho Jesu a ntšoe ntlong ea thapelo.

Joale Bafarisi le Basaduke ba ile ba kopana ‘moho le ho feta pele. Ba e ba le maikutlo a le mang khahlanong le Jesu.

Lekhotla la Sanhedrin ka nako eo le ne le sa hlophisoa ka molao. Le ne le eba teng feela ha ho khoneha. Ba bang ba litho ba botsa hore na e tla be e le bohlae ba ho bolaea Krete. Ba tšaba hore ketso ena e ka tsosa mofere-ferere. Basaduke ba ne ba kopane le baprista lehloeong la bona ho Jesu, ba tlameha ho ba seli kaha ba ne ba tšaba hore Maroma a tla ba tima maemo a phahameng.

### **Kamoo Moea O Halalelang O Lekileng Ho Ba Thusa**

Lekhotleng lena, moo ho neng ho kopano e ho tla rera lefu la Krete, Paki e utloileng mantsoe a boikakaso a Nebukadnesare, ‘me e bone mekete ea ho khumamela litšoantšo ea Belshatsare, ha joale e ne e lemosa babusi ka mosebetsi oo ba neng ba se ba tla o etsa. Liketsahalo tsa bophelo ba Krete tsa hlaha ka pele ho bona li hlakile hangle ba bileng ba tšoha. Ba hopola ha Jesu e le ngoana ea lilemo li leshome le metso e ‘meli, A eme ka pel’a lingaka tsa molao tse

[362]

rutehileng, A botsa lipotso tse ileng tsa ba makatsa. Mohlolo oo A sa tsoa o etsa, oa fana ka bopaki ba hore Jesu ha se motho feela, empa ke Mora oa Molimo. Ka ho makala le ho tsieloa, babusi ba botsa ba re, “Re tla ets’ang?” Ha eba le karohano ka lekhotleng.

Ha lekhotla le sa ferekane joalo, Kaiafa, moprista e moholo a ema. A ikhohomositse a le khopo, a sa tsotelle a hloka mamello, a bua ka matla a maholo le kholiso, a re, “Ha le tsebe letho, leha e le ho utloisisa, hore ho molemo ho lona hore motho a le mong



a shoele sechaba, e seng hore sechaba sohle se timele.” Leha Jesu A ne A se na molato, O ne A tsoanetse ho tlosoa tseleng. O ne A nyenyefatsa matla a babusi, ‘me haeba batho ba ne ba ka hloka tšepo ho babusi ba bona, matla a sechaba a ne a tla senyeha. Kamora’ mohlolo ona, balateli ba Jesu ba ne ba ka ‘na ba tsosa ntoa. A bolela hore Maroma a ka tla, a koala tempele ea rōna, ‘me a re felisa re le sechaba. Bophelo ba mo-Galelea eo ke’ng ha bo bapisoa le ba sechaba? Na ha se ho etsesa Molimo mosebetsi ka ho mo tlosa? Ho molemo hore motho a le mong a shoe ho e-na le hore sechaba kaofela se fele.

Leano leo Kaiafa a neng a le khotlaetsa le ne le ipapisitse ka molao o alinngoeng ho bahedene. Kelello e fokolang ea hore motho e mong o ne a lokela ho shoela sechaba, ea etsa hore ho etsoe lihlabelo ka batho. Joale Kaifa a hlahisa hore ka sehlabelo sa Jesu, sechaba se ka pholosa, eseng bobeng, ba mpa ba ntse ba le ka har’a tlōlo ea molao, moo ba tle ba ‘ne ba tsoele pele ho etsa sebe.

Lekhotleng lena lira tsa Krete li ne li lumela ka ‘nete hore li molato. Moea o Halalelang O ne O amme likelello tsa bona. Empa Satane a ba hlokomelisa ka matla, hore ba fetile mathateng a mangata ka lebaka la Krete. Ha A ka A tlōtlisa ho loka ha bona. Ha A tsotelle meetlo le mekete ea bona, ‘me O ile A khotlaetsa baetsalibe ho toba ho Molimo e leng Ntate ea tletseng mohau, ‘me ba bolela lithoko tsa bona. O hanne ho ananela lithuto tsa bolumeli ba likolong tsa boruti, ‘me ka ho pepesa liketso tse mpe tsa baprista, O ile A nonyetsa tšusumetso ea bona hampe.

Ntle le ba seng bakae ba neng ba tšaba ho ka bua se maikutlong a bona, lekhotla le ile la amohela mantsoe a Kaiafa e le mantsoe a Molimo. Tharollo ea hlala ka le- khotleng; ‘me khang ea fela. Ba [363] etsa qeto ea ho bolaea Jesu, ha monyetla oa pele o hlaha. Baprista le babusi ba ne ba le tlas’a taolo ea Satane ka botlalo, ‘me ba ne ba thetsehile haholo hoo ba neng ba thabetse boemo bona. Ba ikuka e le ba ratang naha ea bona le hona ho batlela sechaba topollo.

Ka ho tšaba hore batho ba ka halefa, lekhotla la lieha ho phethahatsa kahlolo eo le neng le e rerile, esere tlhōkōfatso eo ba neng ba e reretse Jesu ea oela holim’a bona. Mopholosi O ne A tseba hore baufi morero oa bona o tla phetheha, empa e ne e se taba ea Hae hore A potlakise bothata boo, eaba O tloha sebakeng seo, A tsamaea le barutuoa ba Hae.

Jesu ha joale O ne A se A sebelelitse sechaba ka lilemo tse tharo, lefatšeng. Boitelo ba Hae, le ho thusa ba bang, le ho hloeka, le boinehelo ba Hae, li ne li tsejoa ke bohle. Empa ka nako e khutsoanyane ena, lefatše le ne le se le feletsoe ke ho mamella boteng ba Mopholosi oa lona. Eena, Eo kamehla A neng A anngoa ke masoabi a batho, Eena ea folisitseng ba kulang, A fepa ba lapileng, ‘me A khothatsa ba sieameng, O ile A tlosoa har’a batho bao A ba sebelelitseng ho ba tlišetsa pholoho. Eena ea felisitseng boroko ba lefu ‘me A hohela ba liketekete ka lentsoe la Hae la bohale, O ile A hlōloa ho fihlela lipelo tsa ba neng ba fofalitse ke lehloeo le nyatso, ‘me bao ka manganga a bona ba latotseng leseli.

## **KHAOLO EA 60—KE SEFE SETULO SE PHAHAMENG HO FETA TSOHLE?**

[364]

*[E itšetlehile ka Matheu 20:20-28; Mareka 10:32-45; Luka 18:31-34.]*

Mokete oa Paseka o ne o atametse, ‘me Jesu A boela A leba nqa ea Jerusalema. Ka pelong ea Hae ho ne ho na le khotso ea bonngoe bo phethahetseng le thato ea Ntate, ‘me ka cheseho e kholo A hatela pele ho ea sebakeng sa sehlabelo. Barutuo ba fihleloa ke maikutlo a ho hlolloa, ho belaela le ho tšaba. Mopholosi “o n’ a tsamaea kapele ho bona, ‘me ba ne ba hloletsoe; athe ha e le ba latetseng ba ne ba tsohile.”

Kreste A boela A koahollela ba leshome le metso e ‘meli litaba tsa ho èkoa ha Hae, le mahlomola a Hae, A re: “Bonang, re nyolohela Jerusalema, ‘me tsohle tse ngotsoeng ke baporofeta ka Mor’a Motho, li tla phethahala, hobane O tla neeloa balichaba, a sonngoe, a etsoe hampe, a tšoeloe ka mathe; hoba ba mo shape, ba tla ‘molaea, ‘me ka letsatsi la bararo o tla tsoha. Empa ha baa ka ba utloisisa letho la litaba tsena; polelo ena e ne e ba siretse, ba sa utloisise se boleloang.’”

Na ha se haufi ha ba ne ba phatlalatsa hohle, ba re, “‘muso oa Maholimo o atametse?’” Na ha se Kreste ka bo-Eena ea ileng A fana ka tšepiso e khethehileng ho ba leshome le metso e ‘meli, ea ho fumana litulo tse phahameng, tse tlōtlisehang ‘musong oa Hae? Na baporofeta ha ba bolela khale ka khanya ea puso ea Mesia? Ka lebaka la mehopollo ena, litaba tsa Hae, tse bolelang ka ho èkoa ha Hae, le litlhoriso, le lefu la Hae, tsa utloahala li fokola, e le lerootho. Ba ne ba lumela hore ‘muso o tla theoa haufinyane, ho sa tsotellehe hore na ke mathata afe a ka hlahang.

Johanne le ngoan’abo Jakobo, ba ne ba le sehlopheng sa pele, sa bao ba siileng lehae le metsoalle ho ba le Jesu. Lipelo tsa bona li ne li shebahala e ka li khorametse ho ea Hae, ‘me ka lebaka la cheseho ea bona ea lerato, ba laba-labela ho ba haufi-ufi le Jesu ‘musong

[365]

oa Hae. Johanne o ne a e-ba haufi le Mopholosi nako le nako ha monyetla o e-ba teng, ‘me le Jakobo o ne a laba-labela tlōtla ena ea ho ba haufi le Jesu.

‘M’a bona o ne a kile a sebeletsa Krete ka bōlōkōlohi ka lintho tsa hae. Ka lerato la motsoali le cheseho bakeng sa bara ba hae, o ne a ba lakaletsa litulo tse phahameng ‘musong o mocha. ‘Mè le bara ba ea ho Jesu hammoho.

“Le rata ha ke le etsetsa’ng?” Ho botsa Jesu. ‘M’a bona a araba a re, “Laela hore ‘Musong oa hao bara bana ba ka ba babeli ba tle ba lule, e mong ka letsohong la hao le letona, e mong ka ho le letšehali.”

Jesu O ne A balile lipelo tsa bona. O ne A tseba botebo ba likamano tsa bona le Eena. Lerato la bona, leha le ne le silafalitsoe ke botho lefatšeng, e ne e le phororo e tsoang mohloling oa lerato la Hae le pholosang.

“Na le ka noa senoelo seo ke se noang, kapa le ho kolobetsoa ka kolobetso eo ‘na ke kolobetsang ka eona?” Ba hopola mantsoe a Hae ao ba sa a utloisiseng hantle, a supang liteko le mahlomola, leha hole joalo ba araba ka sebete ba re, “Re ka tseba.”

A re ho bona, “Senoelo seo ke se noang le tla se noa, ‘me kolobetso eo ke tla kolobetsoa ka eona, le tla kolobetsoa ka eona.” Johanne le Jakobo ba ne ba tla arolelana le Morena oa bona mahlomola a Hae, e mong, oa pele ho bara bana o ne a tla bolaoa ka sabole, e mong a nke nako e telele ka ho fetisisa a mameletse mathata le hlōkōfatso.

“Ha e le ho lula ka letsohong la ka le letona, kapa ka ho le letšehali, hase ‘na ke fanang ka hona, ke ha ba ho lōkiselitsoeng.” ‘Musong oa Molimo, litulo ha li fumanoe ka ho ratoa ho feta ba bang, kapa ka mokhoa oa molao. Ke tholoana ea semelo sa motho. Moqhaka le terone ke lipontšo tsa boemo boo motho a bo fihletseng ka Morena oa rōna Jesu Krete. Ea tla ema haufi-ufi le Krete e tla ba motho eo, lefatšeng lena, a ileng a noa ka botebo bo boholo moea oa Hae oa lerato le hlokang boikhabo, lerato le susumetsang morutuo ho fana ka tsohle, ho phela le ho sebetsa le ho iketsa sehlabelo esita le ho isa lefung, hona a ho etsa molemong oa pholoho ea ba bang.

[366]

Ba leshome ba ne ba sa thaba ho hang. E mong le e mong oa bona, o ne a laba-labela ho iphumanela setulo se phahameng ka ho fetisisa musong; ‘me ba ne ba hlabehile, ka hobane ba ne ba

hlokomela eka barutuo ba ba babeli ba se ba fumane monyetla oo.

Jesu A bua le barutuo ba hlabehileng, A re, “Lea tseba hore ba talingoang e le babusi ba lichaba ba li busa ka thata, ‘me baholo ba bona ba li tsoara ka thata. Empa ha ho na ho ba joalo ho lona.”

Mebusong ea lefatše, ho fumana litulo tse phahameng ho bolela ho iphumanela tlotla. Batho ba ne ba sebelisoa molemong oa babusi. Borui le thuto li ne li sebelisoa ho tsamaisa le ho laola ba bang. Barui e ne e le bona ba ka etsang meralo, ba etsa liqeto, ‘me ba busa; ba ka tras’ a bona, ha bona e le ho ba hlonepha le ho ba sebeletsa. Bolumeli, joaleka lintho tsohle, bo ne bo tsamaisoa ka thato ea babusi.

### **Muso Oa Tsamaiso E Fapaneng**

Kreste O ne A theha ‘muso o itšetlchileng ka tsamaiso e fapaneng. O ne A bitsa batho ho tla sebeletsa ba bang e seng ho ba busa; A bitsa ba matla ho jara mathata a ba fokolang. Matla, litulo, talenta, thuto, li ne li tlama ea nang le tsona hore a sebeletse ba bang.

“Mor’a Motho, ha aa ka a tlela ho sebeletsoa, empa ho tla sebeletsa le ho neelana ka bophelo ba hae hore e be topollo ea ba bangata.” Molao oo Kreste A neng A sebetsa ka oona, o lokela ho susumetsa litho tsa kereke, e leng ‘mele oa Hae. ‘Musong oa Hae ba phahameng ke ba latelang mohlala oa Hae.

Mantsoe a Paulosi a bontša boitlhompho ba ‘nete le tlotla ea bophelo ba Bokreste: “Ke motho ea lokolohileng, ea seng taolong ea mang kapa mang, empa ke ikentse lekhoba la bohle.” “Joalokaha le ‘na ke leka ho thabisa bohle, linthong tsohle. Ha ke ipatlele se molelmo ke le mong, ke se batlela le ba bangata, hore ba tle ba pholosoe.” 1 Bakorinthe 9:19; 10:33.

Tabeng ea letsoalo la motho, ha ho motho ea lokelang ho laola kelcillo ea e mong kapa ho mo khethela tsoanelo ea hae. Molimo O file motho e mong le e mong bōlōkōlohi ba ho nahana, ‘me a latele seo a se lumelang. Linthong tseo molao o leng teng ho tsona, “e mong le e mong a kholisehe ka ho tlala hore o nepile.” Baroma 14:5. Mangeloi a leholimo ha a tle lefatšeng ho tla busa le ho qobella ho hlonephuoa, empa a tlele ho tla sebetsa ‘moho le batho, ho tsosolosa ba bang.

Melao le mantsoe a thuto ea Mopholosi, a ile a lula ka kelellong ea morutuo ea ratoang, ho fihlela botsafaling ba hae. Boima ba bopaki ba Johanne e ne e le hore, “Molaetsa oo le o utloileng ho tloha tšimolohong o re re rataneng.” “Re tseba seo lerato le leng sona ka sena: Kreste o re teletse bophelo ba hae, le rona re tšoanetse ho tella bana babo rona bophelo ba rōna.” 1 Johanne 3:11,16.

Moea ona o ne o tletse kerekeng ea pele. Kamora’ ho tšolleloa ha Moea o Halalelang, “Bongata ba ba lumetseng ba e-ba pelonngoe le moeamong.” “Baapostola ba ne ba paka tsōho ea Morena Jesu Kreste ka matla a mahlolo.” Liketso 4:32,33.

## KHAOLO EA 61—MOTHOANA EA FETOHILENG MOTHOHALI

[368]

*[Khaolo ena e itšetlehile ka Luka 19:1-10.]*

Motse oa Jeriko, o ne o lutse kahar'a lithota tse nam meng, tse talana, tse khabileng ka limela. O ne o e-na le liliba tse phelang, o phatsima joaloka mahakoe a benyang holim'a mafika, le likhohloaneng tse khutsitseng. Motse-moholo ona e ne e le sebaka sa sephethe-phethe se sehlo, 'me matona a Maroma le masole, le baeti ba tsoang libakeng tse fapaneng ba ne ba fumanoa moo, 'me mosebetsi oa pokello ea lekhetho, oa etsa hore balekhetho ba bangata ba lule hona teng.

“Molekhetho oa sehlooho,” Sakiea, e ne e le Mojuda, 'me a khesoa ke sechaba sa habo. Boemo le borui ba hae e ne e le moputso oa mosebetsi oo ba neng ba o sheba e le o hlokang tōka, o ba jang lichelete ka bolotsana. Empa molekhetho enoa oa morui, e ne e se motho ea bileng a thatafetseng joalekaha a ne a shebahala. Sakiea o ile a utloela ka Jesu. Tlaleho ea mosa le bonolo ba Hae ho batho ba maemo a eisehang, li ne li tsejoa hohle. Johanne Mokolobetsi o ne a ile a ruta mane Jorodane, 'me Sakiea o ne a kile a utloa pitso ea pako. Joale, eitse ha a utloa mantsoe ao ho thoeng a tsoa ho Moreri e moholo, a ikutloa e le moetsalibe mahlong a Molimo. Leha ho le joalo, seo a se utloileng ka Jesu sa hotetsa tšepo ka pelong ea hae. Pako, e leng phetoho ea bophelo, e ne e ka etsahala, esita le ho eena. Na e mong oa barutuo a ba tšepahalang haholo, ba Mosuoe eo e mocha, e ne e se molekhetho? Hang hang Sakiea a etsa qeto ea ho latela kholiseho e ka ho eena, 'me a qeta ka hore a buseletse bao a ba foselitseng.

[369]

Ha litaba li utloahala ka Jeriko hore Jesu O kena motseng, Sakiea a ikemisetsa ho 'Mona. Molekhetho a labalabela ho bona sefahleho sa Jesu, Eena eo mantsoe a Hae a tlisitseng tšepo pelong ea hae.

Mebila e ne e tletse batho, 'me Sakiea, ea neng a le mokhutšoanyane seemong, o ne a sa bone ka baka la batho ba

neng ba mo tširile. Eaba o mathela pele, a hloella sefateng sa feiee, a lula makaleng a sona. Ha mokoloko oo o feta tlas'a sefate, Sakiea a tona mahlo, hore a tle a bone motho enoa eo a hlileng a batlang ho 'mona.

Hang hang, hona tlas'a sefate seo, sehlopha seo sa ema tlekelele! 'Me E mong A sheba holimo, Eo mahlo a Hae a bonahalang eka a bala maikutlo a motho. Monna ea holim'a sefate a batla a belaela hore ha a utloa hantle, ha a utloa mantsoe a reng, "Sakiea, phakisa u theohe, hobane eka khona ke hlole tlung ea hao kajeno."

Sakiea a phakisa a theohe, a tsamaea joalokaha eka oa lora, a Mo etella pele ho leba lapeng ha hae. Empa bo-rabbi, ka lifahleho tse sosobaneng, ba korotla, ba re, "O fapohetse ha monna oa moet-salibe."

Sakiea o ne a hloletsoe ke boikokobetso ba Krete, ba hore A kokobelle tlase ho eena, ea khesehang. Joale lerato la hae ho Morena oa hae e mocha la bula molomo oa hae. A rata ho phatlalatsa pako ea hae. Pontšeng ea matšoeletšoele, "Sakiea a ema, a re ho Morena: Bona, Morena, maruo a ka ke a arolela mafutsana ka lehare, 'me eo ke mo amohileng ho hang ka mano ke 'museletsa hona hane. Eaba Jesu o re: Kajeno lelapa lena le fumane pholoho, kaha le eena e le mora oa Aborahama."

Joale barutuo ba lemoha pontšo ea bonnete ba mantsoe a Krete, a reng, "Tse sitang batho ha li site Molimo." Luka 18:27. Ba bona kadoo, ka mohau oa Molimo, morui a ka kenang 'Musong oa maholimo.

[370] Pele Sakiea a ka sheba sefahleho sa Krete o ne a se a ile a ipolela libe. O ne a se a ile a qalella ho ntšetsa pele thuto e ngoletsoeng Iseraele oa khale, esita le rōna, e reng, "Ha ngoan'eno a futsaneha, 'me a sitoa ho iphelisa, u mo thuse joalokaha u ka thusa molichaba kapa mojaki, 'me a phele le uena. U se ke ua 'matla tsoala kapa phaello, u mpe u tšabe Molimo oa hao, ngoan'eno a tie a phele le uena." "Le se ke la qhekanyetsana, le mpe le tšabe Molimo oa lōna, hobane ke 'na Morena Molimo oa lōna." Meetlo 25:35,36,17. Ntho ea pele eo Sakiea a ileng a e etsa mabapi le lerato la Krete ea eba ho ba le mohau ho mafumanehi le ho ba hlokofoang.

Balekhetso ba ne ba ikentse khokanyana-phiri, hore ba tsebe ho tlatlapa sechaba, 'me ba phelisane ka mekhoa ea bolotsana. Empa



eitse hoba Sakiea a inehela ho Moea o Halalelang, a lahla mekhoha eohle e hlohang botšepahi.

Pako ha se ea sebele haeba e sa tlise phetoho bophelong. Ho loka ha Krete ha se seaparo sa ho apesa sebe se sa soabeloang hape se sa furalloang. Empa ke molao oa bophelo o fetolang semelo ‘me o laole boitšoarō. Ho halalela ke phetheho ho Molimo, ke boinehelo bo feletseng ba pelo le bophelo, hore tsamaiso ea leholimo e ikahele ka teng.

Mokreste bophelong ba hae ba khoebo, o tšoanetse ho bontša lefatše mokhoa oo Morena oa rōna a neng a ka tsamaisa khoebo ka oona. Tsebetsong eohle o tšoanetse ho bontša hore Molimo ke Eena mosuo oa hae. Mantsoe ana, “Khalalelo e isoe ho Morena” a tšoanetse ho ngoloa libukeng, liketsong, lirasiting le lipampiring tsa melato. Motho e mong le e mong ea sōkōlōhang o tla bontša hore Krete O kene ka pelong ea hae ka ho lahla liketso tsohle tse sa lokang. Joaloka Sakiea, o tla bontša ho tiea ha hae ka ho busetsa tse nkiloeng ka thetso. “O khutlisa se neng se beiloe paneng, o khutlisa le seo a neng a se utsoitse, o boloka litaelo tse phelisang, ha a sa hlola a etsa bokhopo, ruri o tla phela, a ke ke a shoa.” Ezekiele 33:15.

Haeba re utloisitse ba bang bohloko, ra ba hanyapetsa khoebong, kapa ra jalletsa motho e mong, le ha e-ba e ntse e le tsebetsong ea molao, re tšoanetse ho bolela melato ea rōna, ‘me re busetse tsohle tseo re ka khonang ho li khutlisa. Ke tōka ho khutlisa tsohle tseo re neng re li nkile, hammoho le phaello eo li ka beng li e entse, hoja li ile tsa sebelisoa hantle, nakong eo li neng li le ho rōna.

Mopholosi O ile A re ho Sakiea, “Kajeno lelapa lena le fumane pholoho.” Krete O ile lapeng la Sakiea ho mo fa lithuto tsa ‘nete, le ho laea ba ntlo ea hae mabapi le lintho tsa ‘Musō oa maholimo. Ba ne ba sa kene masinagogeng ka lebaka la ho nyatsuo ke baruti le barapeli, ‘me joale ba bokana lapeng la bona haufi le Mosuo ea Halalelang, ‘me ba utloa mantsoe a bophelo ho Eena.

Ha Krete A amohela e le Mopholosi oa motho, pōlōko e kena pelong. Sakiea o ne a ile a amohela Jesu, e seng joaleka moeti ea fetang ka tsela, empa e le ea tlang ho lula tempeleng ea pelo. Bangoli ba molao le Bafarisi ba ne ba mo ahlola ka hore ke moetsalibe, empa Morena A ‘mona e le Mor’a Aborahama. Sheba Bagalata 3:7,29.

**KHAOLO EA 62—MARIA O TLOTSJA JESU**

*[Khaolo ena e itšetlehile ka Matheu 26:6-13, Mareka 14:3-11, Luka 7:36-50, Johanne 11:55-57; 12:1-11.]*

Simone oa Bethania e ne e le e mong oa Bafarisi ba seng ba kae ba ileng ba latela Jesu ka ho otloloha. O ne a tšepile hore mohlomong Jesu ke Mesia empa o ne a sa Mo amohela e le Mopholosi. Semelo sa hae se ne se sa fetoha, melao eo a ipapisitseng ka eona bophelong ba hae e ne e sa fetoha.

Simone o ne a ile a phekoloa lepera, ‘me a laba-labela ho bontšha teboho ea hae. Ha Krete A ne a etetse motseng oa Bethania lekhetlo la ho qetela, Simone a etsa mokete bakeng sa Hae le barutuo ba Hae. Mokete oo oa kopanya Bajuda ba bangata ba neng ba ntse ba shebile metsamao ea Jesu, ebile ba bang e le ba hlokang setsoalle.

Joalokaha e ne e le tloaelo ea Hae, Mopholosi O ile A phomola lapeng la Lasaro. Batho ba bangata ba ea Bethania, ba bang ba tlisoa ke ho hauhela Jesu, ha ba bang ba tlile ho tla bona ea tsositsoeng bafung. Lasaro o ne a paka ka kholiseho le matla, hore Jesu ke Mora oa Molimo.

Batho ba ne ba chesehela ho bona hore na Lasaro o tla felehetsa Jesu ho ea Jerusalema le hore na moporofeta enoa o tla roesoa moqhaka oa borena moketeng oa Paseka. Baprista le babusi ba ne ba sitoa ho mamella halelele, hore ba fumane monyetla oa ho tlosa Jesu tseleng ea bona ba Mo tlosetse ruri. Ba hopola hore O ile A nyopisa merero ea bona ea polao ka makhetlo, ‘me ba tšoha hore mohlomong O tla ba sieo moketeng. Ba botsana ba re, “Le hopola joang? Ebe a ke ke a tla moketeng na?”

Lekhotla la bokana. Ho tloha mohla tsoho ea Lasaro batho ba ne ba utloisisa Krete hoo ha ba ne ba ka leka ho Mo koetela pepeneneng ba neng ba ka ba kotsing. Joale ba boholong ba rera ho Mo nka ka lekunutu ‘me ba Mo qose ka lenyele. Ba tšepile hore hang ha tsuo ea Hae e phatlalla, sechaba, ka maikutlo a sona a sa tsitsang, se tla ba ka lehlakoreng la bona.

Empa ha feela Lasaro a ntse a phela, baprista le baruti ba tseba hoba litaba li ke ke tsa lōka. Boteng ba motho ea bileng lebitleng matsatsi a mane, ‘me a tsosoa ke lentsoe la Jesu, ho ka baka pherekano. Batho ba ka iphetetsa ho baetapele ba bona ha ba ka felisa bophelo ba Ea tsebang ho etsa mohlolo o joalo. Lekhotla la puso la Bajuda, la etsa qeto ea hore e ka khona Lasaro le eena a bolaoe.

Ha morero ona o ntse o tsoela pele mane Jerusalema, Jesu le metsoalle ea Hae ba ne ba menngoe moketeng ha Simone. Ha ba le tafoleng, Simone a lula ka lehlakoreng le leng ho Mopholosi ‘me Lasaro a ba ka ho le leng. Maretha a lōkisa lijo, haele Maria, o ne a mametse ka hlōkō mantsoe ‘ohle a tsoang molomong oa Jesu. Jesu, ka mohau oa Hae, O ne A ile A mo tšoarella libe tsa hae ‘me A tsosa khaitsetli ea hae Lasaro lebitleng, ‘me pelo ea Maria e ne e tletse teboho. O ne a ile a utloa ha Jesu A bolela ka tsa lefu la hae, ‘me o ne a laba-labela ho mo bontša hlomphele pele ho nako eo.

Ka boitelo bo boholo, Maria o ne a ile a reka pitsana ea “setlolo sa nareta ea sebele se theko e phahameng,” seo a neng a tla tlotsa ‘mele oa Jesu ka sona. Empa ha joale ba bangata ba ne ba bolela hore haufi Jesu O tla beoa botlotlehing. Masoabi a hae a fetoha thabo, ‘me a laba-labela ho ba oa pele ho tlotlisa Morena oa hae. A bolaea pitsa ea alebastera, a tšela setlolo hloohong le maotong a Jesu; ‘me a khumama maotong a Hae a ntse a lla, a qala ho Mo kolobisa maoto ka meokho ea hae, a ntoo a hlakola ka moriri oa hlooho ea hae o molelele. Mohlomong liketso tsena tsa hae li ka be li sa hlokomeleha, empa monko o monate oa setlolo o ile oa tlala ntlo, ‘me hoo ha phatlalatsa ketso eo ea hae ho bohle ba neng ba le teng.

### Ke Hobaneng Ha Judase A Ile A Teneha

Judase o ile a khentšoa ke ketso ena haholo. A hoesheletsa lipelaelo tsa hae ho ba lutseng le eena, a nyatsa Krete ka ho lumella tšenyō e kaalo. Judase, e ne e le eena ramatlotlo oa barutuo, ‘me o ne a nka chelete ka lenyele, a itšebelisetse eona, ka hoo a qephisa mokotla oo o fokolang haholo. O ne a lakatsa hore tsohle tseo a neng a ka li fumana, a li kenye mokotleng oo. Ha ho e-na le ntho e rekiloeng eo a nahanang hore ha e na molemo o ne a re, ke hobaneng

ha chelete ea thepa ee e sa ka ea kenngoa ka mokotleng oo ke o tšoereng bakeng sa mafutsana?

Ketso ea Maria e ile ea hanana haholo le boikhabo ba Judase, ‘me hoo ho ile ha mo soabisa. Ke ha a leka ho batla lebaka le utloahalang la ho nyatsa mpho eo, ka hore, “Ke hobane’ng ha setlolo see se sa ka sa rekisoa lidenare tse makholo a mararo, tsa neoa mafutsana? O ile a rialo e seng hobane a ne a tsotella mafutsana, empa hobane e ne e le lesholu.” Hoja setlolo seo sa rekisoa, ‘me chelete ea sona ea oela ka mokotleng oa Judase, bafumanehi ba ka be ba sa fumana letho.

Joalokaha e le setsebi polokong ea chelete Judase o ne a ikutloa e le ea phahameng ho feta barutuoa ba bang, ‘me o ne a e-na le tšutšumetso e kholo holim’a bona. Ba bang ba thetsahala ke boipolelo ba hae, ba hore o hlokomela mafutsana. Ba luma-luma ho pota tafole, ba re, “Tsenyo ee ea setlolo e etsetsoa’ng? Setlolo sena se ka be se rekisitsoe lidenare tse fetang makholo a mararo, ‘me tsa abeloa mafutsana.”

Maria a utloa ho nyatsuo a hona ‘me a tlala tšabo ka pelong ea hae; a tšohile le hore ngoan’abo o tloha a mo omanyetsa tsenyo ena. Le hore Morena le Eena, O tloha A ‘mona e le motho ea senyang. O ne a le haufi le ho baleha, ha a tla utloa lentsoe la Morena oa hae, le re, “Mo leseng! Le mo nyahamisetsa’ng pelo?” Morena O ne A tseba hore ketsong ena, Maria o bontšitse teboho ea hae bakeng sa tšoarelo ea libe tsa hae. A phahamisa lentsoe la Hae, A re ho bona, “O nketselitse ketso e molemo. Mafutsana le na le ‘ona kamehla, me le ka a etsetsa molemo neng le neng ha le rata; athe ‘na le ke ke la ba le ‘na kamehla. O entse sohle seo a neng a ka se etsa: o se a tlotsetlitse ‘mele oa ka kepele.”

Mpho e monko o monate eo Maria a neng a nahanne ho e sebelisa ho tlotsa setōpō sa Mopholosi, o ile a e sebelisa ho tlotsa ‘mele oa Hae o phelang. Lepatong, monko oo o monate o ka be o ile oa aparela lebitla; empa ha joale a thabisa pelo ea Mopholosi. Ka ho tšollela lerato la hae ho Mopholosi A ntse A phela, ‘me A bona boitelo ba hae, o ne a Mo tlotsetsa ho èpèloa. Eana eare ha a kena lefifing la teko ea Hae e kholo, A be A ntse A nahana ka ketso eo ea Maria, le lerato le leholo la ‘nete leo e tlang hoba la Hae, le tsoa ho batho ba Hae ba pholositsoeng ka ho sa feleng.

[375]

## Maria O Ile A Mamela Tšusumetso Ea Moea O Halalelang

Maria o ne a sa tsebe bohlokoa ba ketso ea hae ea lerato hantle. O ne a ke ke a hlalosa hore na ke hobaneng ha a khethile ho tlotsa Jesu moketeng oo. Moea o Halalelang o ile oa hlophisa tsohle bakeng sa hae, ‘me eena o ile a mamela tšusumetso ea Oona. Tsusumetso ha e emele ho fana ka mabaka. Ke boteng bo sa bonoeng bo sisinyang pelo hore e kene tsebetsong. Ke tōka ka boeona.

Kreste O ile A bolella Maria moelelo oa ketso ea hae, A re, “Ka ho tšèla setlolo sena holim’a ‘mele oa ka, o lokiselitse ho èpèloa ha ka.” Joalekaha pitsana ea alebastera e ile ea shoa, ‘me monko oa setlolo sa eona oa tlala ka tlung, ka mokhoa o joalo, le ‘mele oa Kreste o ne o tla rojoa empa o ne o tla tsoha lebitleng, ‘me monko o monate oa bophelo ba Hae O tlale lefaše lohle. “Joalekaha le Kreste a le ratile, ‘me a tela bophelo ba hae ka baka la lona, hore e be nyehelo le sehlabelo se monko o monate ho Molimo.” Baefese 5:2.

“Ruri kea le bolella, hohle lefatšeng, moo molaetsa ona o molemo o tla phatlalatsa teng, seo a se entseng se tla boleloa, e be seo a hopoloang ka sona,” ha rialo Kreste. Mopholosi O ne A bolela ka ho tiea, malebana le litaba tse molemo tse tlang ho boleloa ka Eena ka lefatše lohle. Hohle moo Evangeli e tla fihla teng, mpho ea Maria e tla fihla e le monko o monate, ‘me lipelo li tla hlohonolofatsoa ka baka la ketso ea hae e se nang boithati. Mebuso e ne e tla ba teng e be e fele, mabitso a bahale a lebaloe, empa haele ketso ea mosali enoa, e ne e ke ke ea hlakoloa libukeng tsa histori e halalelang. Ho fihlela bofelong pitsa ea alebastera e shoeleng, e tla bolela pale ea lerato le leholo la Molimo ho sechaba sa Hae se oeleng.

Kreste A ka be ile A fa Judase thuto e hlabang hakaakang! Eena ea tsebang ho bala sephiri sa pelo e ‘ngoe le e ‘ngoe, O ne A ka senolela ba neng ba phuthehile moketeng liphiri tsa lefifi tse maiphihlelong a Judase. Ho fapana le ho hauhela bafumanehi, Judase o ne a utsoa chelete e neng e reretsoe ho ba thusa. Empa hoja Kreste A phatlalatsa boikaketsi ba Judase, hona ho ka be ho nkiloe e le lona lebaka leo a Mo ekileng ka lona. Judase a ka be a fumane kutloelo-bohlōkō esita le har’a barutuo ba Jesu. Mopholosi A qoba ho mo fa monyetla oa ho tšireletsa bokoenehi ba hae.

## **Judase O Tloha Mocketeng Ho Ea Hlopha Tsa Ho Eka Jesu**

Mokhoa oo Jesu A ileng A sheba Judase ka oona, o ile oa mo kholisa hore Mopholosi O tseba boikaketsi ba hae hantle, ‘me o balile semelo sa hae se khopo. Eitse ha a nyatsa ketso ea Maria, Kreste A mo khalemela. Khalemelo eo ea mo hlaba ka pelong, ‘me a tsoa a ea tlung ea borena ea moprista e moholo, ‘me a tlaleha hore a ka èka Jesu, A ba neha Eena.

Baetapele ba Iseraele ba ne ba filoe monyetla oa ho amohela Kreste e le Mopholosi oa bona, ntle le chelete kapa theko ea letho. Empa ba hana mpho eo ea bohlokoa ‘me ba reka Morena oa bona ka lichelete tsa silefera tse mashome a mararo.

Judase a tletlebisoa ke mpho ea setlolo se theko e boima, eo Maria a e fileng Jesu. Pelo ea hae ea tuka ke mōna, oa hore ebe Mopholosi ke Eena ea amohetseng mpho eo e tšoanelang Marena a maholo lefatšeng. A èka Morena oa hae ka theko e tlase haholo ho theko ea setlolo seo.

Barutuo ba ne ba sa tšoane le Judase. Ba ne ba rata Mopholosi leha ba ne ba sa utloisise tsela tsa Hae hantle. Empa banna ba bohlale ba Bochabela, ba neng ba tseba hanyenyane haholo ka Jesu, ba ne ba ile ba bontša thahasello ea ‘nete le hlompho e Mo lokelang.

Kreste O ne A nka liketso tse molemo, tse tsoang botebong ba pelo, e le tsa bohlokoa. O ne A sa hane palesanyana eo A e kheletsoeng ke ngoana, ‘me a Mo fa eona ka lerato. O ne A amohela linyehelo tsa bana, ‘me A hlohonolofatsa bafani bao. Mangolong a halalelang, ketso ea Maria ea ho tlotsa Jesu ka setlolo, e boleloa e le eona e mo hlalohanyang ho bo-Maria ba bang. Liketso tsa lerato le hlompho ho Jesu, li bontša ho lumela ho Eena hore ke Mora oa Molimo.

[377] Kreste O ile A amohela leruo la Maria la lerato le hloekileng, leo barutuo ba sa kang ba le utloisisa, le hona leo ba ke keng ba le utloisisa. O ne a tlanngoe ke lerato la Kreste. Setlolo seo e ne e le pontšo ea pelo ea mofani, e le pontšo e bonahalang ea lerato le fepeloang ke melatsoana ea leholimo, ho fihlela le tšoloha.

Barutuo ha baa ka ba lemoha bolutu boo Kreste, ha A ne A phela bophelo ba botho, A neng A le ho bona; athe ba ne ba tšoanetse ho lemoha. Hangata O ne A utloa bohlōkō. ‘Me O ne A tseba hore haeba barutuo ba Hae ba ne ba le tlas’a tšusumetso ea mangeloi a

leholimo a tsamaeang le Eena, le bona ba ne ba tla lumela hore ha ho nyehelo e theko e lekaneng ho bontša lerato le ka pelong.

### Jesu O Ne A Hlile A Sa Amoheleha

Eana eare ha Jesu A se A le sieo har'a barutuoa, ba ikutloa e ka ke linku tse hlokanang molisa, ba qala ho bona kamoo ba neng ba ka be ba tlišitse thabo pelong ea Hae. Ba lesa ho beha molato ho Maria 'me ba o beha holim'a bona. Oho hoja ba kile ba tlohella khethollo ea bona ea ho hlahisa bafumanehi ba lokeloa ke mpho eo ho feta Krete! Ba ikutloela bohloko haholo ha ba theola 'mele o tetekiloeng oa Morena oa bona sefapanong.

Kajeno, ke batho ba fokolang ba thabelang sohle seo Krete A leng sona ho bona. Haeba ba hlile ba amohetse, ba ka be ba bontša ka lerato le leholo, le tšoanang le la Maria. Ha ho letho leo ho ka thoeng le theko e boima haholo hoo ba ke keng ba le fa Jesu, ha ho boitelo leha e le ho iketsa sehlabelo, tseo ho ka thoeng li kholo haholo hoo ba ke keng ba li etsetsa Jesu.

Mantsoe a buuoeng ka khalefo, a reng, "Tšenyō ee e etsetsoa'ng?" a ile a hlakisa hantle kapele ho Krete, ka se-hlabelo se sehlohali ho tse kileng tsa etsoa — e leng ha A fana ka bophelo ba Hae, hore lefatše le lahlehileng le tle le fumane tšoarelō. Chalimong ea motho, leano la Topollo ke tšenyō ea mehauhelo le maruo. Libōpuoa tsa leholimo li ka shebella ka ho makala ha lelōko la botho le hana ho matlafatsoa ka lerato le sa feleng le bontšoang ke Krete. Ba ka 'na ba khotsa ba re, "Tšenyō e kaale e etsetsoa'ng?"

Empa topollo ea lefatše le lahlehileng e ne e tšoanetse ho tlala, e phethahale, e felle. Mpho ea Krete e ne e ke ke ea lekanyetsoa hore e se ke ea feta lenane la batho ba tla e amohela. Leano la topollo ha se tšenyehelo kahobane le sa atleha hohle moo le mametsoeng teng. Ho tsoanetse ho be le ho lekaneng le ho salang.

Simone mong'a ntlo, o ne a makaletse mokhoa oa Jesu 'me a re, ka pelo, "Enoa hojane ke moprofeta, a ka be a tsebile hore na mosali eo ea mo amang ke mang, ke ea joang, hobane ke moetsalibe."

Kahobane Krete O ile A lumella mosali enoa ho mo ama, kahobane ha A ka A mo leleka hampe ka hore libe tsa hae li ngata hoo li ke keng tsa tšoarelō, kahobane ha A ka A bontša hore O elelletsoe hore mosali eo o oele, Simone o ile a fihleloa ke maikutlo

a hore Kreste hase Moporofeta. Empa ke ka hobane Simone a ne a sa tsebe Molimo le Kreste, a ileng a fihleloa ke ho nahana joalo.

### **Kamoo Molimo O Sebetsang Ka Teng**

Ha a ka a elelloa hore Mora oa Molimo O tsoanetse ho sebetsa joaleka Molimo e leng ka qenehelo, bonolo le mohau. Maikutlo a Simone e ne e le hore ho se natsoe ketso eo ea Maria ea pako. Ketso eo ea Maria ea ho aka maoto a Kreste le ho a tlotsa ka setlolo, e ile ea utloisa Simone bohlokō haholo pelong ea hae e thatafetseng. O ne a nahana hore Kreste O tla elelloa baetsalibe, ‘me a ba khalemele.

Mopholosi A araba mohopolo oo o sa buuoang, A re, “Simone, ke na le seo ke ratang ho u bolella sona. Moalimani e mong o ne a e-na le ba babeli ba alimileng ho eena; e mong o ne a le molato oa lidenare tse makholo a mahlano, e mong eena tse mashome a mahlano. Kaha ba ne ba se na seo ba ka ‘museletsang ka sona a ba leballa molato bobeli. Ke ofe ho bona ea tla mo rata ho feta? Simone a araba, a re, ‘Ke hopola hore e tla ba eo a mo lebaletseng ho feta’. Jesu a re ho eena: U ahlotse ka nepo.”

Joalokaha Nathane a kile a etsa ho Davida (2 Samuele 12:1-7), Kreste A rolela ho Simone boikarabelo ba hore a ikahlole e le eena. Simone e ne e le eena ea lihetseng mosali enoa sebeng, joale o se a mo nyefola. Mosali eo o ne a foselitsoe haholo ke eena Simone. Setšoantšong sena sa batho ba babeli ba neng ba kolota morui chelete, ho ne ho tšoantšoa Simone le mosali eo. Sepheo sa Jesu e ne e se ho ruta hore melato eo ea fapana ho latela ho fetana ha eona, hoba ka bobeli ba bona, e mong le e mong o ne a kolota ho fana ka teboho e neng e ke ke ea lefelloa. Empa Jesu O ne A lakatsa ho bontša Simone hore sebe sa hae se seholo ho feta sa mosali eo, joalokaha sekoloto sa lidenare tse makholo a mahlano se feta sa lidenare tse mashome a mahlano.

[379]

Joale Simone a qala ho itemoha bocha. A bona hore na Maria o shejoa joang ke Eo ea phahameng ho feta moporofeta feela. Lihlong tsa mo aparela, ‘me a elelloa hore o pel’ a Ea moholo ho mo feta.

Kreste A tsoela pele A re, “Ke kene ka tlung ha hao, ha ua mpha metsi a ho hlatsoa maoto,” empa Maria o hlatsoitse maoto a ka, ka meokho ea pako, ‘me a a hlakola ka moriri oa hlooho ea hae. “Ha ua ka ua nkaka, empa mosali enoa,” eo o mo nyelisang “haesale



ke kena, ha a ka a phetsa ho aka maoto a ka.” Kreste O ne A balla Simone makhetlo ao a bileng le ‘ona, hore a ka bontša teboho ea hae ka tseo Morena oa hae a mo etselitseng tsona.

Ea Balang Liphiri, o ile a bala sepheo se entseng hore Maria a etse ketso eo a e entseng; hape A bona le moea o susumelitseng Simone hore a buoe mantsoe ao a a buileng. “Mosali enoa ua ‘mona?” Ho rialo Jesu ho Simone. “Kea u bolella: O tšoaretsoe libe tsa hae leha li le ngata, ka hona o bontšitse lerato le leholo; athe ea tšoaretsoeng ho ho honyenyane o rata hanyenyane.”

Simone o ne a nahanne hore o hlomphile Jesu ka ho mo memela tlung ea hae. Empa joale a ipona seo a leng sona. A bona hore tumelo ea hae e ne e le seaparo sa Bofarisi. O nyelisitse mohau oa Jesu. Ha a ka Mo eelloa e le moemeli oa Molimo. Maria e ne e le moetsalibe ea tšoaretsoeng, eena e le moetsalibe ea sa tšoareloang.

### **Kamoo Boiphahamiso Ba Simone Bo Ileng Ba Kokobetsoa**

Simone o ile a angoa ke mosa oa Jesu, haholo ha A sa ka A mo khalemela phatlalatsa ka pel’a baeti ba hae. Ha a ka a tšoaroa kamoo a neng a lakalitse hore Maria a tšoaroe ka teng. A bona hore Jesu O mo sebeletitse ka mohau le kutloelobohlōkō hore a nolofatse pelo ea hae. Khalemelo e thata e ne e tla etsa hore a thatafale ‘me a se bake, empa keletso e nang le mamello e ile ea ‘montša phoso ea hae. A eelloa bohloko ba sekoloto seo a se kolotang Morena oa hae. A baka, [380] ‘me Mofarisi ea ikhohomosang a fetoha morutuoa ea ikokobelitseng, ea inehetseng.

Krester O ne A tseba maemo a entseng Maria seo a leng sona. O ne A ka ‘na A tima tlhase ea tšepo moeeng oa Maria, empa ha ka A etsa joalo. O ne A mo qaollotse ho nyahameng le tšenyehong. Ka makhetlo a supileng, Maria o kile a utloa ha Morena A khalemela bademonana ba neng ba laola pelo le kelello ea hae. O ne a ‘nile a utloa ha Jesu A kōpa ho Ntate, ka lentsoe le phefa molemong oa hae. O ne a tseba hore na sebe se nyatseha joang bophelong bo hloekileng ba Jesu ‘me, ka matla a Jesu, Maria o ne a hlotse.

Ha mahlong a batho, Maria a ne a bonahala e le motho ea se nang thuso, Krester Eena O ile A bona makhabane ho eena. Leano la topollo le entse matsete a ka hlahisang ntho tse khahlehang ho motho. ‘Me likhahliso tsena li ne li tla bonahala ka Maria. Ka

mohau oa Jesu, Maria a ba le kabelo sebopelong sa leholimo. Eena ea neng a oele, eo kelello ea hae e neng e le letsaba la bademona, o ile a tlisoa haufi le Mopholosi ka botsoalle le tšebeletso. Maria a lula maotong a Jesu 'me a ithuta ho Eena; Maria a tlotsa hlooho ea Hae ka oli 'me a hlatsoa maoto a Hae ka meokho ea hae; Maria a ema pel'a sefapano 'me a Mo latela ho ea lebitleng; Maria e ile ea e-ba oa pele ho fihla lebitleng la Jesu kamora' tsoho ea Hae; Maria ea e-ba eena oa pele oa ho phatlalatsa tsoho ea Mopholosi.

Jesu O tseba maemo a pelo e 'ngoe le e 'ngoe. U ka re, ke moetsalibe, ke libe li ngata haholo. Mohlomong ho joalo, empa hona ha eka u mobe haholo, ke hona ha u hloka Jesu haholo. A ke ke a leleka ea Mo lilelang ka pelo e robhileng. O tšoarela ka bōlōkōlohi bohle ba tlang ho Eena ho kōpa tšoarelo le nchafatso.

Kreste O ikopanya le meea e tlang ho Eena ho kōpa tšireletso, ka semelo sa Hae sa bomolimo le botho. Ha ho motho kapa lengeloi le litšila le ka ba qosang. Ba ema pel'a Mojara-libe e moholo, khanyeng e tsoang teroneng ea Molimo.

“Ke mang ea tla qosa bakhethoa ba Molimo, athe Molimo oa ba lokofatsa? Ke mang ea ka ba ahlolang, athe Kreste Jesu o ile a shoa, a ba a tsoha bafung, eena ea leng ka letsohong le letona la Molimo, ea bileng a re rapellang?” Baroma 8:33,34.

## **KHAOLO EA 63—JESU O ETSETSOA LITLATSE SEKA MORENA OA ISERAELE**

[381]

*Khaolo ena e itšetlehile ka Matheu 21:1-11; Mareka 11:1-10; Luka 19:29-44; Johanne 12:12-19.*

Lilemo tse makholo a mahlano pele ho tsoalo ea Jesu, moporo-feta Sakariea o ile a porofeta ka ho tla ha Morena oa Iseraele, a re, “Uena Morali oa Sione nyakalla haholo! Uena Morali oa Jerusalema etsa litlatse! Bona! Khosi ea hao e tla ho uena; e lokile, e tlisa topollo, e ikokobelitse, e palame tonki, e palame petsana ea tonki.” Sakariea 9:9. Eena eo ka nako e telele A hanneng tlōtla ea borena, joale O tlile Jerusalema e le mojalefa ea tšepisitsoeng oa terone ea Davida.

Ka letsatsi la pele bekeng, Krete A kena Jerusalema ka tlōtla. Matšoele-tšoele a neng a bokane Bethania ho ea ‘mona, a Mo felehetsa ho ea Jerusalema. Ba bangata ba neng ba le tseleng ea ho ea moketeng oa Paseka ba ba sala morao. Tlholeho eohle ea bonahala e nyakaletse. Lifate li ne li apere botala, ‘me lithunthung tsa tsona li ntšha monko o monate. Tsepo ea hore ho tla theoa ‘muso o mocha, ea boela ea tsoha.

Jesu O ne A ile A rōmela barutuo ba babeli ho mo tlišetsa esele le petsana ea eona. Leha “libatana tsohle tsa meru” (Pesaleme 50:10) e le tsa Hae, O ile A itšetleha holim’a mohau oa molichaba ho Mo alima phoofolo ea hae, eo A tla kena Jerusalema ka eona, e le Morena. Empa hape bo-Molimo ba Hae bo ile ba bonahala, esita le litaelong tse fokolang tseo A neng A fana ka tsona. Joalokaha A ile A bolela pele kōpo e reng, “Morena oa e hloka” e ile ea

[382]

ea tlala hole le haufi, ea phahamisetsa mehopolo ea batho holimo haholo.

Kreste O ne A latetse moetlo oa Bajuda oa ho fihla ha morena. Boporofeta bo ne bo boletse hore Mesia o tšoanetse ho tla tla nka ‘muso. Hang hoba A kalle esele, matšoele a hooa, a Mo phafa hore ke Mesia, Morena oa bona. Barutuo le matšoele hammoho, ka likelellong tsa bona, ba bona hore mabotho a Roma a tla lelekoa Jerusalema ‘me Iseraele e boele e be sechaba se ipusang hape. Kaofela ba leka ho hlolisana ha ba Mo isetsa hlompho. Ba hlōloa ho tliša limpho tsa theko e holimo, ba mpa ba ala liaparo tsa bona ka tseleng ba etsa phate, ‘me ba ala le makala a lifate tsa mehloare le tsa lipalema tseleng moo. Ka ha ho ne ho se lifolakha tseo ba ka li tsokang, ba ile ba rema makala a lipalema, e leng lona letšoa la tlhohleho la tlhohlo, ba a tsoka sebakeng.

Ba neng ba shebeletse ba kena har’a mokhopi, ba botsa ba re, Ke mang enoa? Moferefere oo o bolelang? Ba ne ba tsebile hore Jesu O nyatsitse mekhoha eohle ea ho Mo beha teroneng, ‘me ba makala ha ba utloa hore ke Eena eo. Ba makala hore na ebe phetoho e tsoetsoe ke’ng ho Enoa ea neng A bolela hore ‘Muso oa Hae hase oa fatše lena.

Ho matšoele-tšoele a neng a tlile Pasekeng, likete-kete li ile tsa Mo lumelisa ka ho phahamisa makala a lipalema le ka mehōo ea lifcla. Baprista ka tempeleng ba letsa torompeta bakeng sa tšebeletso ea mantsiboea empa ha tla batho ba seng bakae, ‘me babusi ba buisana ka ho tsieleha, ba re, “lefatše lohle le mo setse morao.”

### **Ke Hobaneng Ha Jesu A Ile A Lumella Pontšo Ee**

Jesu O ne A e-s’o lumelle pontšo ea mofuta oona le ka mohla. O ne A bone hantle hore na qetello e tla ba efe. E ne e tla Mo isa scfapanong. Empa O ile A lakatsa ho bonahatsa sehlabelo seo e neng e tla ba sehlohlole sa borōmuoa ba Hae lefatšeng le oeleng. Eena, konyana ea sebele, O ile A etsa ketso ea boithaopo, A ikhethela ho ba sehlabelo. Ka mengoaha eohle e hlahlamang moo, kereke ea Hae e tšoanetse ho ithuta le ho nahana ka lefu la Hae ka maikutlo a tebileng. Ntlha e ‘ngoe le e ‘ngoe e amanang le lona e loketse hore e hlalose ka ‘nete eohle, ho sa sale khoao ea letho. Liketsahalo tse etellang pele sehlabelo se seholo sa Hae, li tšoanetse ho se hlakisetsa

*ISERAELE* ccclxix

~~hantle. Kamora' pontšo e tšoanang le eo e entsoeng ha A kena~~  
 Jerusalema, mahlo 'ohle a tla Mo latela ho fihlela mothating oa ho  
 qetela. Ho palama hona ho tlōtlisehang ho ne ho tla qoqoa ke batho  
 bohle 'me Krete O ne A tla nahanoa ke batho kaofela. Kamor'a  
 hore A thakhisoe, ba bangata ba ne ba tla hopola liketsahalo tsena  
 'me ba chesehele ho batlisisa boporofeta. Ba ne ba tla kholiseha  
 hore Jesu E ne e le Mesia.

Letsatsi lena, leo ho barutuo a le neng le bonahala e le la  
 bohlokoa-hlokoa maphelong a bona, le ka be le ntšofalitsoe ke  
 maru hoja ba tseba hore ke lona selelekela sa lefu la Morena oa  
 bona. O ne A ile A ba bolella ka sehlabelo sa Hae ka makhetlo a  
 mangata, empa ka lebaka la thabo ea tlhōlo, ba ile ba lebala mantsoe  
 a Hae a mahlomola.

Ntle le ba seng bakae, bohle ba neng ba kene mokolokong oo,  
 ba ne ba tletse thabo ea motsotso oo. Litlatse li ne li utloahala li sa  
 khaotse, li re, “Hosanna ho Mora oa Davida! Ho bokoe ea tlang ka  
 lebitso la Morena! Hosanna maholimong a holimo-limo!”

### **Ho Ne Ho Se Mokoloko Oa Ba Llang Tlhōlong Ena**

Lefatše le ne le e-s'ō bone mokoloko o joalo oa tlhōlo.  
 Mopholosi O ne A bokanetsoe ke litholoana tse khanyang tsa mese-  
 betsi ea Hae ea lerato eo A e etselitseng motho oa moetsalibe.  
 Litholoana tseo e ne e le batšoaruoa ba lopolotseng matleng a  
 Satane. Lifofu tseo A li tutubolotseng tsa Mo etella pele. Limumu  
 tseo A li rarolotseng maleme tsa hoeletsa ho feta bohle. Liritsa tseo  
 A li folisitseng li ne li tlolela holimo ke thabo. Balepera bao A ba  
 folisitseng bona ba ala liaparo tse bona tse hloekileng tseleng ea  
 Hae. Lasaro, ea tsositsoeng borokong ba lefu, o ne a hula esele  
 eo Mopholosi A neng A e kaletse. Bafarisi ba bangata ba neng ba  
 tletse mōna, ba ile ba leka ho khutsisa sechaba, empa boipiletso  
 le litšoso tsa bona tsa etsa hore sechaba se hōoe le ho feta pele.  
 Qetellong ba toba Mopholosi ka mantsoe a khalemelo le litšoso, ba  
 re, “Moruti, khalemela barutuo a hao.” Ba bolela hore ho etsa  
 lipontšo tse lerata joalo ke tlolo ea molao. Empa ba ile ba khutsisoa  
 ke mantsoe a Jesu ha A re, “Kea le bolella, haeba barutuo a bana ba  
 ka khutsa, majoe a tla hōoa. Pono eo ea tlhōlo e ne e ile ea boleloa  
 khale ke moporofeta. Hoja batho ba hloloa ho phethahatsa morero

oo, Molimo A ka be A file majoe a sa pheleng mantsoe, ‘me a ne a tla phafa Mora oa Hae ka thoriso. Eitse ha Bafarisi ba khutsitseng ba emella thōko, mantsoe a Sakariea a amoheloa ke ba makholokholo, a reng, “Uena Morali oa Sione nyakalla haholo! Uena Morali oa Jerusalema etsa litlatse! Bona! Khosi ea hao e tla ho uena; e lokile, e tliša topollo, e ikokobelitse, e palame tonki, e palame petsana ea tonki.”

Eitse ha mokoloko o fihla mosikong oa thaba, Jesu ‘moho le letšoele lohle ba ema. Ka pele ho bona e ne e le motse oa Jerusalema ka khanya ea oona, o hloekisitsoe ke khanya ea letsatsi ha le likela. Tempele e khabileng ka botle bo boholo, e ne e okametse lintho tsohle ka ho phahama, e bile tlōtla le khanya ea sechaba sa Bajuda ha nako e telele. Maroma le ‘ona a ne a ithorisa ka botle ba tempele eo. Matla a eona le borui li ne li entse hore e be e ‘ngoe ea mehlolo ea lefatše.

Ha letsatsi le ntse le sekamela boiphirimela, khanya ea lona e kholo ea khantša mahakoe a masoeu a hloekileng a hahileng marako a tempele, ‘me ea benya holim’a litšiea tsa khauta. Ha ho shejoa ho tloha thabeng moo Jesu A neng A eme teng ho ne ho shebahala eka ke sebōpeho se seholohali sa lehloa, se emisitsoeng ka litšiea tsa khauta, se benyang ka khanya e alimiloeng leholimong.

### **Jesu Oa Lla**

Jesu A boha pono ena, ‘me matšoele a khutsa, ba hohetsoe ke pono e ntle eo. Mahlo ‘ohle a sheba ho Mopholosi. Ba ile ba makala le hona ho soaba ha ba bona mahlo a Mopholosi a tletse meokho ‘me ‘mele oa Hae o tsukutleha joaloka sefate har’a sefelo. [385] Sello se bohlōkō, se tsoang pelong e utloileng bohlōkō haholo, sa tsoa molomong oa Hae o thothomelang. Mangeloi a bona pono e makatsang! A pono e tšosang ho letšoele le neng le thabile, le Mo felehetsa ho Mo isa motseng o khanyang, moo ba neng ba tšepile hore O il’o busa! Masoabi ana a fihlileng ka potlako, a ne a tšoana le sello se phahameng ka har’a pina e kholo ea thabo. Morena oa Iseraele O ne A lla meokho, e seng meokho ea thabo, e khutsitseng, empa e le ea bohlōkō bo ke keng ba thijoa. Letšoele la sulafalloa hang-hang. Ba bangata ba lla ba hlomohile lipelo, ka lebaka la bohlōkō boo ba neng ba sitoa ho bo utloisisa.

—Ka pejana ho Jesu mane e ne e le Gethesemane, moo matsoalo a lefifi le letšo a neng a tla Mo aparela haufinyane. Monyako oa linku le ona o ne o bonahala, moo ka lilemo-lemo liphoofole tsa lihlabelo li neng li khanneloa teng. Haufinyane monyako oo o ne o tla buleloa Eena, e leng Motšoants'ioa e moholo eo linyehelo tsohle li neng li ntse li supa sehlabelo sa Hae. Gologotha e ne e le haufi, moo A neng A tla bonoa A le mahlomoleng. Leha hole joalo, masoabi a hae a ne a hloka boikhabo. Ho nahana ka mahlomola a Hae, ha hoa tšabisa moea oa Hae o khabane ho iketsa sehlabelo. Pelo ea Jesu e ne e hlabiloe ke ho bona Jerusalema -Jerusalema ea lahlileng Mora oa Molimo, a nyelisa lerato la Hae, 'me joale a le lekhateng la ho felisa bophelo ba Hae. A bona seo Jerusalema a neng a ka ba sona hoja a Mo amohela, Eena a 'notsši ea neng A ka folisa maqeba a hae. O ne a ka lahla Jerusalema joang?

Iseraele e ne e le sechaba se ratoang haholo; Molimo O ne A entse tempele ea bona lehae la Hae, e ne e “khahleha ka bophahamo ba eona, e thabisa lefatše lohle”. Pesaleme 48:3. Jehova O ne A bonahalitse khanya ea Hae ka hare ho eona, baprista ba ne ba etsa litšebeletso, 'me ka lilemo tse ngata ho ne ho ntšetsoa pele litšebeletso le mekete. Empa tsena tsohle tsa tšoanela ho fihla pheletsong. Jesu A phahamisetsa letsoho la Hae nq'a Jerusalema, motse o ahloletsoeng timelo 'me A bua A le bohlokō, A re, “Hojane le uena u tsebile ka letsatsi lena tse hlahisang khotso!” Mopholosi ha A ka A buoa ka seo Jerusalema a neng a kaba sona, hoja o ile a amohela thuso eo Molimo A neng A lakalitse ho mo fa eona -e leng Mora oa Hae. Jerusalema a ka be a eme a ikhantšitse ka borui, e le mofumahali oa mebuso, a lokolohile ka matla ao a a filoeng ke Molimo, hose lifolokha tsa Maroma tse ntseng li fokaela marakong a hae. Mora oa Molimo a bona hore Jerusalema a ka be a lokolotsoe bokhobeng 'me a tiisitsoe e le motse-moholo o matlamatla lefatšeng ka bophara. Leeba la khotso le ne le tla fofa ho leba lichabeng tsohle le tloha marakong a hae. Jerusalema e ne e tla ba moqhaka oa khanya lefatšeng.

[386]

Empa Mopholosi a eelloa hore joale Jerusalema o tlas'a joko ea Maroma, e tla felisoa ka kahlolo ea Molimo ea phetsetso. “Empa joale li siretse mahlo a hao. U tla fihleloa ke matsatsi, ao ka 'ona lira tsa hao li tla u etsetsa thibella, li u teele hare, li u patise kahlohle, li u ripitle, uena le bana ba hao ba ho uena, 'me li ke ke tsa siea lejoe

holim’ a lejoe le leng, hobane u sa ka ua tseba nako eo Molimo a u etetseng ka eona ho u pholosa.”

Jesu A bona motse ona o timelang o pota-potiloe ke lebotho la sesole, baahi ba oona ba hapuo, ba qetoa ke tlala le lefu, bo’ mè ba ja litopo tsa bana ba bona, ‘me batsoali le bana ba amohana lijonyana tsa ho qetela — lerato la tlhaho le felisitsoe ke litsenene tse bohale tsa tlala. A bona hore manganga a Bajuda a tla etsa hore ba hane ho inehela ho mabotho a ba hlasetseng. A bona Golgotha e tletse lifapano tse ririellaneng joaloka moru. A bona matlo a marena a matlehali a senngoa, le tempele e senyehile, ‘me marako a eona a maholo a senyehile hoo ho neng ho se lejoe le setseng le eme holim’ a le leng, athe motse oona o ne o lenngoe joaleka tšimo.

Jesu A llela motse o ratoang, joalokaha ntate a llela mora oa hae ea lahlehileng. Nka u lahla joang? Na nka u lebella joang ha u inehela tšenyehong? Ha letsatsi le likelella bophirimela, ho tla be ho fetile letsatsi la hore Jerusalema a ka fumantšoa mohau. Ha mokoloko o ntse o emisitse holim’ a thaba ea Mehloare, nako e ne e sale teng bakeng sa hore Jerusalema a sokolohe. Ha mahlaseli a ho qetela a letsatsi a sa le teng holim’ a tlhōro ea tempele, na ebe lengeloi le molemo le ke ke la atametsa Jerusalema haufi le lerato la Mopholosi? Motse o motle, feela o hlokang khalalelo, o tlepelitseng baporofeta ka majoe, oa ba oa lahla Mora oa Molimo — letsatsi la oona la mohau le felile!

[387] Athe Moea oa Molimo o ne o tla buoa le Jerusalema hape. Pele letsatsi le likela ho ne ho tla boela ho etsoa bopaki bo bong ka Krete. Haeba Jerusalema a ne a ka amohela Mopholosi ea kenang menyakong ea hae, o ne a tla pholosa!

Empa babusi ba Jerusalema ha ba ka ba amohela Mora oa Molimo. Eare ha mokoloko o le haufi le ho theoha thabeng ea Mehloaare, ba o thiba, ba botsa hore na lebaka ke lefe le bakileng pherekano eo. Eare ha ba ntse ba botsa, ba re, “Enoa ke mang?” eaba barutuo, ba tletse moea oa tšutšmetso, ba pheta boporofeta bo bolelang ka Krete, ba re:

Adama o tla le bolella, a re: Ke peo ea mosali, e tla khoba hlooho ea noha. Sheba Tsimoloho 3:15.

Aborahama o tla le bolella, a re: Ke Melekisedeke, morena oa Salema, morena oa khotso. Sheba Tsimoloho 14:18.



—Esaea o tla le bolella, a re: <sup>ISERAELE</sup> “Emanuele,” <sup>ccclxxxiii</sup> “Ralimakatso le Moelctsi, Molimo ea matla, Rabosafeleng, Khosana ea Khotso.” Esaea 7:14; 9:6.

Jeremia o tla le bolella, a re: Lehlomela la Davida, “Morena ke eena ho lōka ha rōna.” Jeremia 23:6

Daniele o tla le bolella, a re: Ke Mesia (“Motlotsuo oa Molimo”) Sheba Daniele 9:24-27.

Johanne Mokolobetsi o tla le bolella, a re, ke “Konyana ea Molimo e tlosang sebe sa lefatše.” Johanne 1:29.

Jehova ea phahameng O phatlalalitse, A re: “Enoa ke Mora oa ka eo ke mo ratang.” Matheu 3:17.

Rōna, barutuo ba Hae, rea bolela, re re: Enoa ke Jesu, Mesia, Khosi ea bophelo le Mopholosi oa lefatše.

Le morena oa matla a lefifi oa amohela o re: “Kea tseba hore na u mang: U Ea Halalelang oa Molimo.” Mareka 1:24.

## KHAOLO EA 64—SECHABA SE EANG TIMELONG

*[Khaolo ena e itšetlehile ka Matheu 21:17-19; Mareka 11:1114,  
20,21]*

Boipiletso ba ho qetela ho Jerusalema bo ile ba hloka molemo. Baprista le babusi ba ne ba ile ba utloa lentsoe la boporofeta le tleroloa ke sechaba ha se araba potso e reng, “Enoa ke mang?” Empa ha ba ka ba le amohela e le lentsoe la Tsutšumetso. Ka khalefo ba leka ho tholisa batho. Lira tsa Jesu, li ile tsa Mo phepheletsa ho baetapele ba Maroma, ba leng har’a mokhopi, ka hore ke moetapele oa bofetoheli. Ba bolela hore O haufi le ho hapa tempele, ‘me A buse e le morena oa Jerusalema.

Empa Jesu A boela A hlalosa ka lentsoe le bonolo hore ha A tla ho tla theha ‘muso oa nakoana; haufi O tla nyolohela ho Ntate, ‘me baqosi ba Hae ba ke ke ba ‘mona ho fihlela A khutla hape ka khanya. ‘Me ka nako eo ba tla Mo tseba empa ho se ho se thuso.

Jesu A buoa mantsoe ana ka ho sareloa le ka matla. Baokameli ba Maroma ba khutsa ‘me ba thetheloa. Lipelo tsa bona tsa ameha le ho feta kamoo ho kileng ha etsahala pele. Sefahlehong se hlomohileng sa Jesu, ba ithuta lerato le boitlhompo bo phethahetseng. Ba sisinngoa ke mohau oo ba neng ba hloloa ho o utloisisa, ‘me ba utloa ba tlameha ho Mo bontša hlompho. Ba retelohela ka ho baprista le babusi, ‘me ba ba qosa ka hore ke bona ba bakileng pherekano.

[389] Ho sa le joalo, Jesu A fetela ka tempeleng ho se ea Mo elelloang. A fumana ho khutsitse tu! hobane batho ba ne mathetse thabeng ea Mehloare, ho ea boha se neng se etsahala teng. Jesu a ema metsotso e seng mekae, A shebile tempele ka mohau A nt’o khutlela Bethania. Nakong eo batho ba Mo batlang, e le hore ba tle ba Mo behe teroneng ea borena, ba sitoa ho Mo fumana kae kapa kae.

Jesu A qeta bosiu kaofela thapelong, ‘me hoseng A khutlela tempeleng hape. Ha A le tseleng A ikutloa A lapile, “A sa le hole, a bona sefate sa feiee se nang le mahlaku, ‘me a ea sheba hore na

a ke ke a fumana ho hong ho sona. Empa ha a fihla ho sona, a se ke a fumana letho ha e se mahlaku feela, hobane e ne e se nako ea lifeiee.”

Lithabeng tse potileng Jerusalema, ruri ho ne ho ka thoe, “E ne e se nako ea lifeiee.” Empa serapeng seo Jesu A ileng A tla ho sona, se seng sa lifate sa bontša e ka se pele ho tse ling. Se ne se se se metse mahlaku ‘me se tšepisa e ka litholoana li teng ho sona. Empa chebahalo ea sona e ne e thetsa. Jesu A se ke A fumana “letho haese mahlaku feela.” E ne e le mahlaku a thetsang feela e seng ho hong.

Kreste A se rohaka. A re, “Ho se hlole ho e-ba le ea ka jang tholoana tsa hao le ka mohla!” Ka le hlahlamang, ha Mopholosi le barutuo ba Hae ba le tseleng ba boela motseng, ba hoheloa ke makala a ponneng le mahlaku a bajooeng. Eitse Petrose ha a elelloa a re ho Jesu, “Moruti, bona sefate sa feiee seo u se rohakileng, se omeletse.”

Ketso ena ea Kreste ea ho rohaka sefate, e bonahetse ho barutuo ba Hae, e sa Mo tšoanele. Ba hopola mantsoe a Hae, a reng, “Mor’a motho o tllile, e seng ho timetsa meea ea batho, empa e le ho e pholosa.” Luka 9:56. Mesebetsi eo A e entseng e ne e le ea ho pholosa e seng ho timetsa. Ketso ena ea khetholoha e ‘notši. Ba botsa ba re, Lebaka la eona ke lefe?

“Kea hlapanya, ho rialo Morena Molimo, ha ke thabele lefu la ea khopo.” Esekiele 33:11. Ho Kreste, mosebetsi oa ho timetsa le ho phatlalatsa kahlōlo ke “o hlollang haholo.” Esaea 28:21. Empa ka mohau le lerato O tlosa lesira le patileng bokamoso ‘me O bontša litholoana tse ka tllisoang ke sebe.

Sefate sa feiee se feela, se ikhantšitseng mahlong a Kreste, ka mahlaku a sona a thetsang ka botalana, e ne e le letšoao la sechaba sa Bajuda. Mopholosi O ne A lakatsa ho tōtōbatsa lebaka le neng le tla baka le ho phethahatsa ho timela ha Iseraele. Ka sepheo sena A etsa hore sefate e be pontšo e hlakisang ‘nete ea Molimo. Bajuda [390] ba ne ba inkile e le ba lōkileng ho feta batho ba bang. Empa ba ne ba sentsoe ke lerato la lefatše le meharo ea maruo. Ba hasanya mahlaku a bona a thetso hohle, a bonahalang a le matle ‘me a khahla mahlo, empa ba sa beha letho “haese mahlaku feela”. Bolumeli ba Bajuda, le tempele ea bona e tsotegang ka botle, le litšebeletso tse hohelang, ruri bo ne bo shebahala hantle kantle, empa bo ne bo hloka boikokobetso le lerato le molemo.

### Hobaneng Sefate Sena Se Ile Sa Rohakoa

Lifate tse se nang mahlaku li ne li sa bontše tšepiso ea letho, ‘me li sa bake ho nyahama. Tsena li emetse Balichaba, ba neng ba fumanehile joaloka Bajuda ho hlokeng borapeli, empa ba sa ikhantše ka bohloeki ba boikaketsi. Ho bona e ne e se “nako ea feiee.” Ba ne ba ntse ba emetse leseli le tšepo. Bajuda, bona ba amohetseng mahlohonolo a mangata ho Molimo, ba ne ba tlameha ho ikarabella mabapi le ho senya limpho tsena. Menyetla eo ba neng ba ikhantša ka eona e ekelitse melato ea bona.

Jesu O tšile ho Iseraele A lapetse ho fumana litholoana tsa ho lōka ho bona. Ba ne ba filoe menyetla eohle, ‘me ho bona, Krete O ne A lakatsa ho bona boitelo, mosa le cheseho e kholo ea hore batho ba bang ba fumane topollo. Empa boikhohomoso le boikhabo li ne li koahetse ho rata Molimo le batho. Matlotlo a ‘nete ao Molimo O ba fileng ‘ona, ha ba ka ba a abela lefatše. Ka sefate se hlokanang litholoana ba ne ba ka ithuta sebe sa bona, le kotlo e tlišoang ke sona. Sefate seo sa feiee se ne se shoele, se omeletse ho tloha metsong, ‘me se ne se bontša seo sechaba sa Bajuda se tla ba sona, ha mohau oa Molimo o tlosoa ho bona. Ba ne ba ke ke ba fumana lehlohonolo hape ka hobane ba hanne ho le abela ba bang. Morena, O re, “Oho Iseraele u itimelitse!” Hosea 13:9. (Phetolelo ea King James ea Bible)

[391] Ketso ea Krete ea ho rohaka sefate se hlōliloeng ka matla a Hae, e ema e le keletso ho likereke tsohle le ho BaKreste bohle. Hona le ba bangata ba sa pheleng bophelo boo e leng mohlala o tsoang ho Krete, e leng bophelo ba khauhelo le ho hloka boikhabo. Nako ea bohlokoa ho bona ke feela ha ba ipokeletsa ka lintho tsohle. Ke sona feela sepheo sa bona litabeng tsohle tsa bophelo. Molimo O ba reretse hore ba thuse ba bang ka hohle kamoo ho ka lumellehang. Empa bo-’na bo phahame haholo hoo ba sitoang ho bona letho le leng. Ba phelelang bo-bona ba tšoana le sefate sa feiee. Ba khathatseha ke hore na thapelo li tsamaisoa joang empa ha ba na pako esita le eona tumelo. Ba ipolela hore ba bōlōka molao oa Molimo, empa ha ba na hlomphe. Kahlolong e filoeng sefate sa feiee, Krete O hlalosa hore molato oa moetsalibe ea tōtōbetseng o bobebe ho feta oa motho ea ipolelang hore o sebeletsa Molimo, empa a sa behe litholoana tse tlōtlisang Molimo.

Setšoantšo sa sefate sa feiee, se boletsoeng le pele Krete A etela Jerusalema, se ne se tšoana hantle le thuto eo A ileng A e ruta ha A ne A rohaka sefate se sa beheng litholoana. Molemong oa sefate sena se sa beheng litholoana, molemi o ile a se kopela mohau ho mong'a scrapa, a re, “Monghali, ak'u se lese le ka selemo sena, seo ka sona ke tla se lemela, ke se tšelle le moiteli; mohlomong se tla beha litholoana nakong e tlang, empa ha ho se joalo, u tla se rema.” Luka 13:8,9. Se ne se tla fuoa menyetla eohle. Setšoantšong sena ha re ea bolelloa pheletso ea mosebetsi oa molemi: ho ile ha sallana le batho bao ba neng ba bolelloa mantsoe ao a Krete, ba neng ba tšoantšoa le sefate se sa beheng. Ho ne ho sallane le bona hore ba ikhethete qetello ea bona. Ba ne ba filoe menyetla eohle, empa ha ho molemo oo ba o fumaneng ka mahlohonolo ao a bona a mangata. Ka ketso ea Krete ea ho rohaka sefate se sa beheng, qetello ea taba ena e ile ea bonahala. Ba ne ba ikhethetse timelo.

Ka lilemo tse fetang sekete, sechaba sa Bajuda se ne se ile sa hana litlhokomeliso tsa Molimo 'me sa bolaea baporofeta ba Hae. Batho ba mehleng ea Krete ba itjarisitse molato oa libe tseo, ka ho latela liketso tse tšoanang le tsa bao. Batho ba mehleng ea Krete ba ile ba itlamella ka mahlahahlela ao lichaba li neng li ntse li a loha ka lilemo-lemo tse makholo.

Ho na le nako eo mohau o etsang boipiletso ba ho qetela ho motho. Joale lentsoe le monate, le hapang, la Moea, ebe le khaotsa ho qeka moetsalibe.

Jerusalema o ne a fihletsoe ke letsatsi le joalo. Jesu O ile A lla ha bohlokō, A llela motse o timelang, empa O ne A sitoa ho o pholosa. O ne A lekile mekhoa eohle. Ka ho hana litlhokomeliso tsa Moea oa Molimo, Iseraele o ne a lahlile tsela eo e leng eona feela eo ka eona a neng a ka fumana thuso. [392]

Sechaba sa Bajuda se ne se tšoantša batho ba mengoaha eohle ba nyefolang liqeko tsa lerato la Molimo le se nang moeli. Jesu ha A ne A llela Jerusalema, meokho ea Hae e ne e tšolohela libe tsa mengoaha eohle.

Mehleng ena ba bangata ba tsamaea tseleng e tšoanang le ea Bajuda ba sa lumeleng. Moea o Halalelang O buile le lipelo tsa bona empa ha ba rate ho inyatsetsa liphoso tsa bona. Ba hana molaetsa oa Molimo, ba hana le morōmuoa oa Hae.

Kajeno ‘nete ea Bibeale, e leng tumelo ea Krete, e loantšana le sefelo se matla sa boitšoaro bo litšila. Kajeno boikhantšo bo matla ho feta mehlang ea Krete. ‘Nete ea lentsoe la Molimo ha e lumellane le litsekamelo tsa batho tsa tlhaho, ‘me likete-kete li lahla khanya ea Iona ‘me li khetha ho iketsetsa liqeto tsa tsona. Empa ka ho etsa joalo li timetsa meea ea tsona.

Bao ba neng ba saoha ka lipolelo tsa Krete, ba ‘nile ba tsoela pele ka ho saoha ho fihlela ba furalla ‘Nete le Bophelo. Molimo ha A ikemisetsa ho suthisa tšitiso e ‘ngoe le e ‘ngoe eo motho a e behang ka pele ho ‘nete ea Hae. Ho bao ba hanang leseli le neng le tla ba khantšetsa lefifing, liphiri tsa Lentsoe la Molimo li tla sala e le liphiri ka ho sa feleng. ‘Nete e tla ipatela bona.

Mantsoe a Krete a sebetsa ho motho e mong le e mong ea eisang liqeko tsa mohau oa Molimo. Krete O tšolla meokho ka pelo e bohlōkō, ka baka la hao, uena, u se nang meokho ea ho itelela. ‘Me lehlaseli le leng le le leng la leholimo, e leng bopaki ba mohau oa Molimo, le qhibilihisa le ho thapisa pelo, hoseng joalo lea e thatafatsa, le etse hore e hloke tšoabo ho hang.

Krete O ile A bona e sale khale hore Jerusalema e tla lula e sa baka; athe molato oohle o bakiloe ke eona (Jerusalema). Ho tlabo joalo ho motho e mong le e mong ea latelang mohlala o tšoanang le oo. Morena O oa bolela, O re, ‘Oho, Iseraele, u itimelitse!’ ‘“Uena lefatšše mamela! Chaba sena ke se tlišetsa koluo, e leng tholoana ea merero ea sona, hoba ha sea ka sa mamela mantsoe a ka, le molao oa ka se o lahlile.” Hosea 13:9 (Phetolelo ea King James ea Bibeale); Jeremia 6:19.

## **KHAOLO EA 65—TEMPELE E HLOEKISOA HAPE**

[394]

*[Khaolo ena e itšetlehile ka Matheu 21:12-16, 23-46; Mareka 11:15-19, 27-33; 12:1-12; Luka 19:45-48; 20:1-19.]*

Qalehong ea tsebetso ea Hae, Kreste O ne A ile A leleka batho ba neng ba etsa mesebetsi e sa halaleleng ka tempeleng. Chebahalo ea Hae e seriti, e senang bosaoana, e apereng bo-Molimo ea na ea tšosa batho bao ba neng ba bapatsa.

Qetellong ea tšebetso ea Hae, O ile A tla hape tempeleng ‘me A fumana e ntse e silafatsoa joaloka pele, ka lerata la liphoofole, chelete, esita le khang e makatsang. Le bahlomphehi ba tempele ka bo bona, ba ne ba bapatsa ebile ba reka. Ba ne ba hapehile ke meharo ea leruo, hoo mahlong a Molimo ba neng ba sa fapana le masholu ka letho.

Ka Paseka e ‘ngoe le e ‘ngoe le Mocketeng oa metlotloane, ho ne ho hlajoa likete-kete tsa liphoofole, baprista ba ne ba khakeletsa mali a tsona, ‘me ba a tšela holim’a aletare. Bajuda ba ne ba se ba sa elelloe hore ke sebe se bakileng tšollo ena ea mali. Ba ne ba sa lemohe hore e bontša mali a Mora oa Molimo ea ratoang, a tla tšolloa hore lefatše le tle le fumane bophelo.

Jesu A bona kamoo Bajuda ba fetotseng liphutheho tse kholo tsena sebaka seo ho sona ho bonoang tšollo ea mali le bokhopo. Ba ne ba atisitse palo ea liphoofole tse hlajoang joalokaha eka Molimo O thabisoa ke tšebetso eo e hloakang kutloelobohlōkō. Baprista le babusi ba ne ba fetotse lipontšo tsena tse tšoantšitseng Konyana ea Molimo, mekhoha ea ho ithuisa. Ka mokhoa o joalo, khalaleho ea tšebeletso ea mahlabelo, e ne e senyehile haholo. Jesu A tseba hore mali a Hae, ao haufi a neng a tla tšolloa bakeng sa libe tsa lefatše, baprista le babusi ba ne ba tla a thabela hanyenyane joalekaha ba entse a liphoofole!

[395]

Jesu Kreste O ne A ile A bua ka baporofeta A hanyetsana le liketso tsena. Esaea o ne a ile a bona ho kheloha ha Bajuda ka pono,

‘me a bua le bona, a re, “Molemo oa mahlabelo a lona ho ‘na ke ofe, mahlabelo a lona a mangata-ngata? Ke tennoe ke nyehelo tsa lōna tsa secheso, ke tennoe ke mafura a lipheleu le a liphoofolo tse nontšitsoeng; ha ke thabele mali a lipohoana, le a likonyana le a liphooko.” “Itlhatsoeng, le itloekise, tlosang ketso tsa lona tse khopo mahlong a ka.” Esaea 1:11,16.

Eena eo ka sebele A faneng ka boporofeta bona joale O pheta tlhokomeliso lekhetlo la ho qetela. E le ho phethahatsa boporofeta, batho ba phatlalatsa hore Jesu ke Morena oa Iseraele. O ne A ile A amohela hlomphe ea bona, ‘me A amohela litulo tsa borena. O ne A tlameha hore A sebetse ka sebōpeho seo. A tseba hore boikhatatso ba Hae ba ho nchafatsa baprista ba senyehileng, bo ke ke ba thusa letho, le ha ho le joalo, O ne A tšoanela ho fana ka bopaki ba thomo ea Hae e halalelang, ho batho ba sa lumelang.

Jesu A boela A thalatsa lebala la tempele le silafalitsoeng ka mahlo a nchocho. Bohle ba ne ba Mo talimile. Bo-Molimo ba phatsima ka har’a botho, ‘me ba tlatsa Krete ka hlomphe le khanya tseo A neng A e-s’o li bonahatse haesale. Ba neng ba le haufi le Eena, ba tlameha ho chechella morao ka hohle kamoo ba neng ba ka khona. Mopholosi A sala A eme A le mong, le barutuoa ba Hae ba seng bakae. Khutso e kholo e ke keng ea mamelloa ea eba teng. Eaba Krete O bua ka lentsoe le matla hoo le ileng la tsitsinya batho joaloka sefefe se matla, A re, “Ho ngotsoe, ho thoe: ‘Ntlo ea ka e tla bitsoa ntlo ea thapelo’, empa lona, le e entse lehaha la linokoane.” Lentsoe la Hae la luma joaloka terompeta ka har’a tempele. A re, “Tlosang lintho tsena mona.” Johanne 2:16.

[396] Lilemong tse tharo tse fetileng, babusi ba tempele ba ne ba ile ba soabisoa ke ha Jesu A ba phahla tempeleng. Ba ne ba sa lumele hore tlontlollo e joalo e ka etsahala hape. Empa joale lekhetlong lena, ba ne ba tšohile le ho feta pele, ‘me ba potlaka ho mamela taelo ea Hae. Baprista le babapatsi ba baleha, ba khanna likhomo tsa bona.

Ha ba le tseleng ba tloha tempeleng, ba teana le sehlopha sa batho ba neng ba tsamaea le bakuli ba bona, ba batla Ngaka e kholo. Tlaleho e fanoeng ke bao ba neng ba baleha, ea nyahamisa ba bang ba sehlopha seo, ‘me ba khutlela morao, empa ba bangata ba bona ba fohla mokhopi ba laba-labela ho ea fihla ho Jesu. Joale lebala la tempele la boela la tlala bakuli le ba makhatheng a lefu ‘me Jesu A boela A ba sebeletsa.



Kamora' nako e itseng baprista le babusi ba khutlela tempeleng. Ba ne ba lebeletse hore Jesu O tla nka borena ba Davida. Ha ba kena tempeleng, ba ema tlekelele ke ho makala! Ba bona bakuli ba fola, lifofu li bona, lithōlō li utloa, 'me liritisa li tlola-tlola ka thabo. Bana ba ne ba thabile le ho feta. Jesu O ne A phekotse maloetse a bona, O ne A ile A ba sika ka liatla tsa Hae. Bana ba hōoa litlatse ka mantsoe a tletseng thabo ba Mo rorisa. Ba pheta lihosanna tsa maobane 'me ba fōka makala a lipalema pel'a Mopholosi, ka nyakallo ea tlhōlo.

Litlatse tsa batho ba thabileng ba lōkōlōhileng, li ile tsa hlaha e le khopiso ho babusi ba tempele. Ba bolella sechaba hore ntlo ea Molimo e silafalitsoe ke maoto a bana le mehoo ea bona ea thabo. Babusi ba ipiletsa ho Krete, ba re, "Na u nts'u utloa seo bao ba se bolelang? Jesu A re ho bona: E, kea utloa. Na ha le e-s'o bale moo ho thoeng: U itokiselitse thoko ka melomo ea bana le ea masea?" Boporofeta bo ne bo boletse hore Krete O tšoanetse ho phatlalatsa e le Morena, 'me Molimo A sebelisa bana hore e be lipaki tsa Hae. Hoja bana ba khutsa, lits'iea tsa meaho ea tempele li ka be li ile tsa hōoa lithōko tsa Mopholosi.

Bafarisi ba ne ba utloile bōhlōko haholo. Jesu O ne A qala ho bontša matla a makaalo a borena. O ne A entse mesebetsi e babatsehang, empa lekhetlong lena A etsa ka mokhoa o mahlonoko haholo, o hapang maikutlo. Baprista le babusi ba sitoa ho etsa letho letsatsing leo, le hoja ba ne ba halefile ebile ba ferekane. Ka letsatsi le hlahlamang, banna ba lekhotla la puso la Bajuda ba teana hape, ho shebisana hore na ebe ba ka etsa joang ka Jesu. Ba bile le bopaki ba hore ke Mesia ka lilemo tse tharo. Joale ba rera hore ba se hlōle [397] ba batla bopaki ba matla a Hae, ba mpe ba fumane lipolelo kapa litaba tseo ba ka Mo tsoang ka tsona.

Ha ba le ka tempeleng, ba tsoela pele ho Mo botsa lipotso, ba re, "Ke ka matla afe u etsang tsee? Matla aa u a neiloe ke mang?" Jesu A ba araba ka ho ba botsa potso, e neng e utloahala eka e qala litaba lisele, 'me karabo ea Hae A e bapisa le karabo ea bona potsong ea Hae, A re, "Kolobetso ea Johanne e ne e e-tsoa kae: Leholimong kapa bathong?"

Baprista ba bona hore ba bothateng boo ho seng mano a ka ba tšoasolang ho bona. Ha ba ka re kolobetso ea Johanne e tsoa leholimong, Krete O ne A tlare, "Ke ka baka la'ng le sa mo lumelang?" Johanne o ne a paka ka Krete, ha a re, "Bonang Konyana ea

Molimo e tlosang sebe sa lefatše!” Johanne 1:29. Haeba baprista ba lumela bopaki ba Johanne, ba ne ba ka latola hore Krete ke Mesia joang?

Le teng haeba ba bolela seo ehlileng eleng sona seo ba se lumelang eleng hore tšebetso ea Johanne e tsoa ho batho, ba ne ba tla ipakela khalefo ea sechaba kaha batho ba ne ba lumela hore Johanne ke moporofeta. Batho ba ne ba tseba hoba baprista ba kile ba ipolela e le ba amohetseng Johanne, ‘me ba ne ba lebeletse hore ba lumele Johanne e le ea rometsoeng ke Molimo. Empa baprista kamora’ hore ba ipuoie ka lekunutu, ba etsa qeto ea hore ba se ke ba itlama. Ba bua boikaketsi ba hore ha ba tsebe letho, ‘me ba araba, ba re, “Ha re tsebe.” Eaba Jesu O re ho bona, “Le ‘na ha ke le bolelle hore na ke ka matla afe ke etsang tsena.”

### **Baprista Le Babusi Ba Ea Khutsisoa**

Bangoli, baprista le babusi, kaofela ba ema ba inamisitse lifahleho, ba maketse, ebile ba nyahame, ba se ba tšaba ho khathatsa Krete ka lipotso tse ling. Batho ba ne ba eme haufi, ba qabohile ha ba bona banna bana ba ikhohomosang, ba itsebang ba lokile, ba hloloa ke litaba.

[398] Lipolelo le liketsahalo tsena tsa Krete e ne e le tsa bohlokoa kaofela ‘me tšusumetso ea tsona e ne e tla utloahala ka matla a maholo kamora’ hore A thakhisoie, A be A nyolohela leholimong. Qetellong, ba bangata e ne e tla ba barutuo ba Hae, e le hobane ba ne ba hapuoie ke mantsoe a Hae a letsatsi leo. Phapang pakeng tsa Jesu le Moprista e moholo e ne e bonahala, ha ba ntse ba buisana. Mohlomphehi ea ikhantšitseng oa tempele o ne a apere liaparo tse theko e boima. Hloohong o ne a roetse moqhaka o benyang, a bontša botlottlehi ba hae, ‘me moriri oa hae le litelu li le putsoa ke botsafali. Ka pele ho mohlomphehi enoa ho ne ho eme Motlottlehi oa Leholimo, A sena moqhaka kapa moikhabiso, liaparo tsa Hae li silafetse ke tsela, sefahleho sa Hae se pulufetse, ‘me se bontša masoabi a nang le mamello. Leha ho le joalo, ho sona ho ne ho ngoliloe hlompheho le mosa. Ba bangata ba ileng ba e-ba lipaki tsa mantsoe a Jesu le liketso tsa Hae ha A ne A le tempeleng, ba ne ba Mo amohele ka lipelong tsa bona e le moporofeta oa Molimo, ho

tloha ka nako eona eo. Empa eare ha maikutlo ana a tlala hohle, lehloeo la baprista ho Jesu Iona la tota.

E ne e se maikemisetso a Krete ho tlontlolla bahanyetsi ba Hae. O ne A e-na le thuto ea bohlokoa eo A neng A batla ho ba ruta eona. Taba ea hore lira tsa Hae le ile tsa bolela hore ha li tsebe moo kolobetso ea Johanne e tsoang teng, e ile ea Mo fa monyetla oa ho buoa, A ba bolella sebōpeho sa bona sa ‘nete, ‘me A eketsa ka ho ba fa temoso e ‘ngoe holim’ a tseo ba neng ba se ba li filoe.

A re ho bona, “Le re’ng na? Monna e mong o ne a e-na le bara ba babeli. A ea ho oa pele, a re: Mor’ a ka, tsamaea u e’o sebetsa tšimong ea morara, kajeno! A araba, a re: Kea hana! Empa hamorao a ikoahlaea, a ea. A ea ho oa bobeli, a bua joaloka ho oa pele. Eena a araba, a re: E, ntate, ke tla ea, empa a se ke a ea. Ke ofe ho bao ba babeli ea entseng thato ea ntat’ae?”

Potso ena ea hlaha bamameli ba Hae lesumatha ba sa itlhophela eona. Ba araba ka potlako, ba re, “Ke oa pele.” Jesu A tsepamisa mahlo ho bona, ‘me A bua ka lentsoe le matla, A re, “Ruri, kea le bolella: Balekhetho le liotsoa ba tla kena ‘Musong oa Molimo pele ho Iona. Johanne o tlile ho Iona ka tsela ea ho lōka, ‘me ha lea ka la mo lumela, empa balekhetho le liotsoa ba ile ba mo lumela. Feela leha le bone, ha lea ka la ikoahlaea hamorao, la mo lumela.”

Ho ne ho se seo baprista le babusi ba ka se etsang ha e-se feela [399] ho fa Jesu karabo e nepahetseng, ‘me kahoo A fumana maikutlo a bona a lumellana le mora oa pele, ea neng a emetse balekhetho. Ha Johanne a tlile, a ruta ka pako le kolobetso, balekhetho ba ile ba amohela molaetsa oa hae ‘me ba kolobetsoa.

Mora oa bobeli o emetse banna ba eteletseng sechaba sa Bajuda pele ‘me bona ha ba ka ba amohela Johanne e le ea tsoang ho Molimo. Empa “ba ile ba fetola morero oa Molimo lefeela, ka ho se kolobetsoe ke eena.” Luka 7:30. Joaloka mora oa bobeli, baprista le babusi ba ipoletse ba ena le hlompho, empa ketso tsa bona li ne li hloka hlompho.

Baprista le babusi ba khutsa. Empa Krete A re, “Mamelang setšoantšo se seng hape: Ho ne ho e-na le mong’ a tšimo ea ileng a lema tšimo ea morara, a e teela hare ka lerako, a cheka setlhōtlelo har’ a eona, aba a haha le kalana ea molebeli. A e nea balemi ho e lema seahlōlo, eaba oa eta. Eare ha nako ea kotulo e atametse, a rōmela bahlanka ba hae ho balemi ho ea bokella seabo sa hae sa

kotulo. Balemi ba tšoara bahlanka ba hae; ba khakhatha e mong, ba bolaea e mong, ‘me ba tlepetsa e mong ka majoe. A boela a rōmela bahlanka ba bang, ba bangata ho feta ba pele, ‘me le bona ba ‘na ba etsoa joalo. Qetellong a rōmela mor’a hae, a re: Ba tla hlompha mora oa ka. Empa ha balemi ba bona mora, ba buisana, ba re: Enoa ke mojalefa; a re ‘molaeeng, re tie re je lefa la hae! Ba mo tšoara, ba mo kharametsa kantle ho tšimo, ‘me ba ‘molaea. Joale ekaba mohla mong’a tšimo a tlang, balemi bao o tla ba etsa joang?’”

Baprista le babusi ba araba, ba re, “Batho bao ba khopo o tla ba timetsa hampe, tšimo a e nee balemi ba bang ho e lema seahlōlo, ba tla mo nea seabo sa kotulo ka nako ea sona.” Libui tsa bona joale hore li ntse li phatlatsa tsuo ea tsona. Joalokaha balemi ba ne ba tšoanetse ho khutlisetsa ho mong’a tšimo karolo e itseng ea litholoana tseo ba li fumaneng tšimong ea merara, le batho ba Molimo ba ne ba lebeletsoe ho Mo hlompha ka maphelo a lumellanang le menyetla ea bona e khethehileng. Empa joalokaha balemi ba bolaile bahlanka bao morena a neng a ba rōmile ho ea batla litholoana, le Bajuda ba ile ba bolaea baporofeta bao Molimo O ba rōmileng ho ea ba bitsetsa pakong.

[400]

Ho fihlela mona, tlhaloso ea setšoantšo seo e ne e hlakile ho sa belaetseng, ‘me le se latetseng se ne se hlakile joalo feela. Ka mora ea ratoang eo mong’a tšimo a ileng a mo rōmela qetellong, ho ea ho bahlanka ba sa tšepahaleng, ‘me eo ba ileng ba mo tšoara ba ‘molaea, baprista le babusi ba ile ba bona setšoantšo se hlakileng sa Jesu le qetello ea Hae e bohlōkō. Phetetsong e neiloeng balemi ba sa tšepahaleng, ho bontšoa timelo ea bao ba tlang ho bolaea Krete.

### **Lejoe La Mohlolo Le Emetseng Krete**

Mopholosi A ba sheba ka mohau, ‘me A tsoela pele, A re, “Na ha le e-s’o bale Mangolong a halalelang, moo ho thoeng: Lejoe le lahliloeng ke lihahi le fetohile lejoe la mantlha; ke Morena ea entseng hona, ‘me mahlong a rōna ke mohlolo? Ka baka leo, kea le bolella, ke re, le tla amohuoa ‘Muso oa Molimo, ‘me o tla neoa sechaba se behang litholoana tsa oona. Mang kapa mang ea oelang holim’a lejoe lena o tla tamukana, ‘me le tla silakanya eo le mo oelang holimo.”

Boporofeta bona bo ne bo phetilo e hangata ke Bajuda masinagogeng, bo supa ho Mesia ea tlang. Krete E ne E le lejoe la sekhutlo sa tsoelo pele ea Bajuda, esita le morero oohle oa pholoho. Lihahi tsa Bajuda joale li ne li lahla lejoe lena la motheo. Mopholosi O ile A leka ka mekhoha eohle, ho ba hlakisetsa sebōpeho sa ketso eo ba neng ba le haufi le ho e etsa. Ha litemoso tsa Hae li sitoa ho ba tsosolosa hore ba bake, li ne li tla tiisa timelo ea bona, ‘me Mopholosi O ile A leka ho ba bontša tōka ea Molimo ka ho ba amoha litokelo tsa bona tsa bochaba, tse neng li tla qetella ka hore ho heletsoe tempele, ho senngoe motse, ‘me le sechaba se qhalakane.

Ba mametseng ba elelloa temoso, empa kahobane ba ne ba sitoa ho mamella kahlolo eo ba iphileng eona ka bo bona, baprista le babusi ba ile ba lokela ho phethahatsa setšoantšo sena ka ho re, “Enoa ke mojalefa; a re ‘molaeng.” “Ba ne ba batla ho mo tšoara, ba mpa ba tšaba matšoele,” kahobane maikutlo a sechaba a ne a le ho Krete.

Ka ho qotsa boporofeta ba lejoe le lahliloeng, Krete O ne A bua ka se ileng sa etsahala ha ho ne ho ahua tempele ea pele. Taba ena e ne e na le thuto e khethehileng nakong ea ha Krete A ne A le lefatšeng lekhetlo la pele, empa hape e na le thuto bakeng sa rona. Ha ho ne ho ahua tempele ea Solomone, ho ne ho betloa majoe a maholo koaring. Kamora’ hore a tliso e moo ho ahelong teng, hoa basebetsi e ne e se e le feela ho a beha libakeng tse lōkelang. Bakeng sa motheo, lejoe le leng le neng le tlisitsoe, e ne e le le boholo bo makatsang le sebōpeho se sa tloaelehang, empa lihahi tsa sitoa ho fumana sebaka se le lōkelang. La fetoha khopiso ha le lutse le sa sebelisoa, le koetse tsela. Ka nako e telele la lula e le lejoe le lahliloeng.

Eitse ha lihahi li lōkela ho theha sekhutlo, ba qeta nako e telele ba ntse ba batla lejoe la boholo bo nepahetseng, le sebōpeho se lōkelang, ebile le le matla, le tle le tsebe ho jara boima bo boholo bo neng bo tla emisoa holim’a lona. Ha ba ne ba ka khetha lejoe le sa nepahalang, moaho oohle o ne o ka ‘na oa senyeha. Ho ne ho ile ha khethoe majoe a mangatanyana, empa e re ha a hatelloa ka boima bo boholo, e be a pshatleha likotoana.

Empa qetellong ba elelloa lejoe lane leo ba neng ba le lahlile. Lejoe leo e sale le chesoa ke letsatsi, le otloa ke lifefo empa le sa bontše ho peperana kae kapa kae. Le ne le hlotse litoko tsohle, haese

teko e le 'ngoe, ea ho hatelloa haholo. Teko eo e ile ea etsoa. Lejoe la amohelaha, la isoa sebakeng se hlokehang, 'me la fumanoa e le le nepahetseng le lekaneng hantle. Lejoe lena le ne le tšoantša Krete. Esaea o re:

“Ke eena eo e tla ba sehalalelo, empa ho matlo a mabeli a Iseraele, ke eena lejoe le tla ba khōpa, ke eena lefika le tla ba thula,...Ba bangata ba bona ba tla khothametseha, ba oe, ba robehe, ba bangata ba bona ba oele lerabeng, ba tšoasoe.” Krete O ne A tla feta tlas'a liteko le mahlomola, e leng tsona tse tšoantšitsoeng ka lejoe la mothèo la sekhutlo sa tempele ea Solomone. “Ke bea lejoe la mothèo Sione, lejoe le lekiloeng, la bohlokoa, la mantlha; ka lejoe la 'nete, la mothèo: Ea lumelang hona o tla ba le mamello.” Esaea 8:14,15; 28:16.

[402] Molimo O khethile lejoe la motheo 'me A le rea A re, ke, “Motheo o tiileng.” Lefatše lohle le ka beha mathata le mahlomola a lona holim'a lejoe leo. Ba ka haha ho lona, 'me ba bolokeha kahohle. Ha A ke be A soabise ba Mo tšepang. O ile A mamella liteko tsohle. O jarile mathata 'ohle a tlišoang holim'a Hae ke moetsalibe e mong le e mong ea bakang. Bohle ba itšepetseng Eena ba phomola tšireletsong e phethahetseng.

Krete ke “Motheo o tiileng” ebile, ke “lejoe le khopang.” “Ka baka leo, ho lona ba lumelang ke la bohlokoa, empa ho ba ba sa lumelang, ho thoe: Lejoe le lahliloeng ke lihahi, le fetohileng lejoe la mantlha, ke lejoe le tla ba khōpa, le lefika le tla ba thula. Ba sa lumelang lentsoe la Molimo baa khoptjoa: hona ke kabelo ea bona.” I Petrose 2:7,8.

### **Kamoo Re Ka Hahuoang Ka Hore Re Tamukane**

Ho bao ba lumelang, Krete ke motheo O tiileng. Ba oela holim'a lejoe 'me ba “tamukana.” Ho oela holim'a lejoe 'me re tumukana ke ho tlohela ho ipeha ba lokileng, 'me re ee ho Krete ka boikokobetso bo tšoanang le ba ngoana, re baketse libe tsa rōna, 'me re lumela leratong la Hae le tšoareleng. Hape ka tumelo le hlomphe re haha holim'a Krete e le motheo oa rōna.

Bajuda le balichaba ka ho tšoana, ba ka haha holim'a lejoe lena le phelang. Le bophara bo lekaneng ho amohela bohle, 'me le matla a lekaneng ho jara boima le mathata a lefatše lohle. Ka ho ikopanya

le Krete, bohle ba hahang holim’ a motheo ona eba majoe a phelang. Sheba I Petrose 2:5.

“Ba sa lumeleng lentsoe la Molimo, baa khoptjoa: hona ke kabela ea bona.” Krete ke lejoe le ba khopang. Joaloka lejoe le lahliloeng, Krete O ile A furalloa ‘me A sotloa. O “ile a nyelisoa, a furalloa ke batho, ea e-ba motho oa mahlomola, ea tsebang mahlōkō...o ile a nyelisoa, ra se ke ra mo natsa.” Esaea 53:3. Empa ka ho tsoha bafung, O ne a tla phatlalatsa e le “Mora ea matla oa Molimo.” Baroma 1:4. Ha A etla la bobeli, O ne A tla bonahatsoa e le Morena oa Leholimo le lefatše. Lejoe le lahliloeng le ne le tla fetoha hlooho ea sekhutlo, ka pele ho maholimo le lefatše.

‘Me “le tla silakanya eo le eo le mo oelang holimo.” Batho ba ileng ba furalla Krete, ba ne ba le haufi le ho bona motse oa bona le sechaba, o timela, ‘me tlotla ea bona e hasana joaloka lerole ha le nkoa ke sefefe. ‘Me ke’ng eo e timelitseng Bajuda? Ke Lefika leo [403] hoja ba haha holim’ a lona, le ka beng le ba fetohetse qhobosheane. Lefika lena e ne e le molemo oa Molimo o nyelisitsoeng, e le mohau oa Hae o nketsoeng tlase. Batho ba ile ba ipeha khahlanong le Molimo, ‘me tsohle tseo e neng e kaba topollo ea bona tsa fetoha timelo ho bona.

Bajuda ka ho thakhisa Krete, ba ile ba baka timelo ea Jerusalema. Boima ba mali a tšolohileng Sefapanong ba ba tetebeletsa timelong.

Ho tla ba joalo ka letsatsi le leholo la ho qetela, ha kahlolo e beoa ho ba ileng ba furalla mohau oa Molimo. Krete ka nako eo O tla hlaha joaloka thaba e iphetetsang. Khanya ea sefahleho sa Hae, eo e leng bophelo ho ba lōkileng, ho ba khopo e tlabo mollo o timetsang. Ka lebaka la ho latola lerato, le ho nyelisa mohau, moetsalibe o tla timetsoa. Maiphihlelong a moetsalibe e mong le e mong, ho hlaha libōpeho tsena tse fapakaneng: tempele e silafalitsoeng, mora ea sa hlonepheng, balemi ba sa tšepahaleng, le lihahi tse nyatsitseng lejoe. Ha moetsalibe a sa bake, timelo e tšoantšitsoeng maiphehelong a batho bana e tla mo oela holimo.

## KHAOLO EA 66—KRESTE O TSIETSA LIRA TSA HAE

*[Khaolo ena e ipapisitse ka Matheu 22:15-46; Mareka 12:13-40;  
Luka 20:20-47.]*

Baprista le babusi ba ile ba hloloa ho latola liqoso tsa Krete. Empa ba ikemisetsa le ho feta pele ho Mo behela maraba ao ba ka Mo tšoasang ka 'ona. Ba rōma lihloela, “tse iketsang e ka ke batho ba lokileng, hore li tle li mo tšoare ka lipuo, li mo neele ‘musisi.’” Bahlanka bana ba chesehang, ba sehlahlo, ba ne ba felehelitsoe ke balateli ba Heroda ba neng ba il’o mamela lipolelo tsa Krete, e le hore ba tle ba mo tšoase ka tsona mohla nyeoe ea hae.

Bafarisi ba ne ba hlola ba tletlebisoa ke taba ea ho ntšetsa Baroma lekhetho, ba re ke ketso e sa lumellaneng le molao oa Molimo. Joale lihloela tsa tla ho Jesu joalokaha eka ba nyoretsoe ho tseba seo ba tšoanelang ho se etsa. Ba re, “Moruti, rea tseba hore u motho oa ‘nete, ‘me u ruta tsela ea Molimo kannete, ha u natse motho, hobane ha u ee ka tšobosi. Re bolelle he: U re’ng? Na hoa lumelleha hore ho ntšetsoe Sesare lekhetho kapa che?”

Bao ba neng ba botsa Jesu potso ba ne ba nahana hore ba patile sepheo sa bona, empa Jesu O ile A bala se ka pelong tsa bona joalokaha A bala buka. A re ho bona, “Le ntekela’ng?” A bontša hore O balile morero le sepheo sa bona. Eare ba sa ntse ba ferekane A eketsa, A re, “Mpontšeng chelete ea lekhetho.” Ba e tlisa, ‘me A ba botsa A re, “Setšoantšo see, le mongolo oo, ke tsa mang?” Ba araba, ba re, “Ke tsa Sesare.” Jesu A supa denare, ‘me A re, “Ka baka leo, neang Sesare seng sa Sesare, le Molimo seng sa Molimo.”

Lihloela tsa ikutloa li phoqehile ‘me li hlotsoe. Mokhoa o potlakileng oo potso ea bona e ileng ea arajoa ka oona, oa ba hlokisa seo ba ka tsoelang pele ho se bua. Karabo ea Krete e ne e se ho baleha potso empa e ne e le ‘nete feela e tobileng potso ea bona. A ntse a tšoere denare eo, Krete a phatlalatsa hore kaha ba ne ba phela tlas’a tšireletso ea ‘muso oa Maroma, ba tsoanetse ho tšeetsa ‘muso



oo. Empa ha ba ntse ba ikokobeletsa melao ea naha, ba tsoanetse hore ka linako tsohle botsepehi ba bona ba pele bo be ho Molimo.

Hoja Bajuda ba ne ba ile ba phethahatsa litšoanelo tsa bona ho Molimo ka botsepehi, ba ka be ba sa oela tlas'a puso ea balichaba. Ho ka be ho sa ka ha e-ba le folakha ea Maroma e fokaelang holim'a Jerusalema, ho ka be ho sa ka ha eba le 'musisi oa Roma ea busang ka har'a marako a Jerusalema.

Bafarisi ba hlolloa ke karabo eo ea Krete. Ha A ka A khalema feela boikaketsi ba bona, empa A ba bontša molao o moholo o bontšang moo boikarabelo ba tšoanelo ea motho bo fellang teng, ha ho tluoa tšebeletsong ea 'muso oa naha le tšebeletsong ea Molimo. Leha e le moo ba bangata ba ile ba tsamaea ba sa khotsofala, empa ba ile ba eelloa hore molao o malebana le potso eo ea bona o hlalositsoe hantle, 'me ba hlolloa ke kamoo Krete A boneng sephiri sa bona ka teng.

Eitse hoba Bafarisi ba khutsisoe, ha tla Basaduke ka lipotso tsa bona tse masene. E ne e le sehlopha se tletseng botlokotsebenyana. Leha ho le joalo har'a bona ho ne ho na le batho ba nang le bolumeli ba sebele, ba ileng ba amohela lithuto tsa Krete. Basaduke ba ne ba ipolela hore ba lumela karolo e kholo ea Mangolo a Halalelang, empa bophelo ba bona e ne e le ba batho ba hanyetsang bolumeli, ba ratang leruo.

### **Tsoho Ea Bafu, Thuto E Bakileng Khang**

Thuto ea tsoho ea bafu e ne e baka khang lipakeng tsa Bafarisi le Basaduke. Bafarisi ba ne ba lumela ka ho tiea hore tsoho ea bafu e teng, empa maikutlo a bona a ne a ferekana malebana le boemo ba bokamoso. Lefu ea eba mohlolo o ke keng oa hlaloso. Lipuisano pakeng tsa lihlopha tsena tse peli, li ne li atisa ho qetella ka khang e bakang khalefelano.

Basaduke ba ne ba se na tloaelano e kaalo le batho ba maemo a tase, empa bongata ba ne ba ena le tšusumetso e tlišoang ke borui! Hangata ho ne ho khethoa moprista e moholo har'a bona. Taba ena ea hobane ba ne ba na le monyetla oa ho khetheloa setulo se joalo ea neha liphoso tsa bona sebaka sechabeng.

Basaduke ba ne ba hana lithuto tsa Jesu hobane thuto ea Hae mabapi le bophelo bo tlang e ne e hanana le lithuto tsa bona. Ba ne

ba lumela hore, kamora' hore Molimo A bope motho, O ile A mo tlohella ho itaola, ho se matla a phahameng a mo laolang. Ba ne ba bolela hore motho o na le bōlōkōlohi ba ho itsamisetsa bophelo ba hae, 'me a laole liketsahalo tsa lefatše kamoo a ratang kateng; 'me bofello ba hae bo matsohong a hae.

### **Maikutlo A Motho Ka Molimo A Bopa Semelo Sa Motho Ea Joalo**

Maikutlo a bona ka Molimo a ile a bopa limelo tsa bona. Ka ho ea ka bona, Molimo ha A na thahasello ho motho, kahoo ba ne ba sa tsotellane ka bo bona. Ka hobane ba hanne ho amohela tšusumetso ea Moea o Halalelang, ba ne ba haelloa ke matla a Hae maphelong a bona. Ba ne ba ikhantša ka litokelo tsa bona tsa tlhaho, e le bana ba Aborahama, empa ba ne ba hloka tumelo le kutloelo-bohlōkō, ba sa tšoane le Aborahama. Lipelo tsa bona li ne li sa angoe ke bohloki le mahlomola a ba bang. Ba ne ba iphelela bo-bona.

Ka lipolelo le mesebetsi ea Hae, Krete A paka matla a halalelang a sebetsang mehlolo e meholo, le bophelo bo tlang, le hore Molimo ke Ntate oa bana ba batho, eo ka linako tsohle A ntseng A falimehetse tse molemo ho bona tsa 'nete. A ruta hore Molimo o sebetsa pelong ea motho ka Moea o Halalelang. A bontša phoso e bakoang ke ho tšepa matla a batho hore a ka fetola semelo athe oo ke mosebetsi o ka etsoang ke Moea oa Molimo feela.

[407] Basaduke ba ne ba lumela hore ba ka senyetsa Jesu botumo mohlomong A be A qosoe, ha ba ka Mo phehisa khang. Ba khetha ho 'Motsa ka tsōho ea bafu. Haeba A ka lumellana le bona, (hore tsōho ea bafu ha e-eo) O ne A tla be A sitetsoe Bafarisi. Haeba A ka fapana le bona ka maikutlo, ba ikemisetsa ho nyefola thuto ea Hae. Basaduke ba supa hore, haeba 'mele o sa shoeng o tla be o entsoe ka lintho tse tšoanang le tsa 'mele o shoang, o tla tšoanela ho ba le nama le mali, 'me ha o kena lefatšeng le sa feleng, o tla lōkela ho tsoela pele ka bophelo ba lefatše lena, bo ileng ba khaoletsoa. Monna le mosali ba tla boela ba kopanngoa, manyalo a phethahale, 'me lintho tsohle li etsahale joale ka pele lefu le e-ba teng.

jesu A araba potso ea bona ka ho tlosa lesira le neng le koahetse bophelo ba ka moso. A re, "Tsōhong ea bafu batho ha ba nyalane, empa ba joaloka mangeloi leholimong." Basaduke ba ne ba fositse.

Jesu a eketsa, a re, “Le lahleha ke ho se tsebe Mangolo a halalelang, leha e le matla a Molimo.” Ha A ka A ba qosa ka boikaketsi, A mpa A ba qosa ka phoso ea ho se lumele.

Jesu A hlalosa hore sesosa sa pherekano ea bona tumelong, le lefifi le likelellong tsa bona, li bakoa ke ho se tsebe Mangolo a halalelang le matla a Molimo. Krete A ipiletsa ho bona hore ba bulele likelello tsa bona linnete tse halalelang, tse tla atlehisa kutloisiso ea bona. Liketekete li fetoha ba sa lumeleng ho Molimo, kahobane ba sa utloisise liphiri tsa Molimo. Senotlolo se le seng feela se ka re bulelang liphiri tse re potapotileng, ke hore re lumele hore Molimo O teng ka har’a tsona, le matla a Hae. Batho ba tšoanetse ho tseba hore Molimo ke ‘Mopi oa tsohle tse teng. Ke Eena ea laelang le ho phethahatsa lintho tsohle.

Kreste O ile A bolella bamameli ba Hae hore hoja ha ho tsōho ea bafu, Mangolo a halalelang, ao ba ipolelang hore ba lumela ho ‘ona, ekaba ha a na thuso. A re, “Tabeng ea tsōho ea bafu, na ha le e-s’o bale seo Molimo a neng a le bolelle sona, a re: Ke ‘na Molimo ea Aborahama, Molimo oa Isaka, le Molimo oa Jakobo? Molimo hase Molimo oa bafu, empa ke Molimo oa ba phelang.” Molimo o bona phetheho ea mosebetsi oa Hae joalokaha eka o se o qetilo. Bafu ba khabane ba tla utloa lentsoe la Mora oa Molimo ‘me ba tsoe mabitleng, ba kene bophelong bo sa feleng. Ho tla ba le likamano tse mofuthu pakeng tsa Molimo le bahalaleli ba tsohileng bafung. Maemo ana O a bona joalokaha eka a se a ntse a etsahala. Leha ba shoele ba se ntse ba reretsoe hore ba tla phela.

Basaduke ba khutsa tui Ho ne ho se polelo ho tseo A li buileng, e neng e ka ba neha leha e le monyetla o fokolang, hore ba qose Krete. [408]

Leha ho le joalo Bafarisi ha ba ka ba lahla tšepo. Eaba ba phehella e mong oa bangoli ba molao, ea rutehileng haholo, hore a botse Jesu potso ea hore na melaong e leshome, oo e leng oa bohlokoa ho feta e meng ke ofe. Ba ne ba phamisitse melao e mene ea pele, eona e bontšang boikarabelo ba motho ka mong ho ‘Mopi oa hae, ba e nkile e le eona ea bohlokoa-hali ho feta e tšeletseng e latelang, e leng e bontšang boikarabelo ba motho ho motho e mong. Jesu O ne A qosoa ka hore O phahamisitse melao ea ho qetela e tšeletseng e le eona e bohlokoa ho feta ea pele e mene.

Mongoli a atamela ‘me a botsa Jesu potso e tobileng, a re, “Taelo ea pele ho tsohle ke efe?” Le karabo ea Krete ea e-ba e tobileng, A araba, A re, “Ea pele ke e reng:...U rate Morena Molimo oa hao ka pelo ea hao eohle, le ka moea oa hao oohle, le ka maikutlo a hao ‘ohle, le ka matla a hao ‘ohle.” ‘Me oa bobeli o tšoana le oa pele, hobane o tsoa ho oona, ke o reng, “Rata mohaeno joalokaha u ithata. Ha ho taelo e ‘ngoe e kholo ho feta tsena.” “Molao oohle le Baporofeta ba itšetlehile ka litaelo tse peli tsena.”

Melao ena ka bobeli ke tlhaloso ea mothèo oa lerato. Oa pele o ke ke oa bolokoa eaba oa bobeli oa rojoa, kapa oa bobeli oa bolokoa ‘me oa pele o rojoe. Ke ha feela re rata Molimo e le ka ‘nete, re ka tsebang ho rata ba habo rōna ka ho tlala.

Kreste o ile a ruta bamameli ba Hae hore molao oa Molimo ke ntho e phethahetseng, e halalelang, ha se molao o likotoana-kotoana, tseo tse ling e leng tse bohlokoa haholo, tse ling e le tse bohlokoa hanyenyane. Lerato ho Molimo le tla bontšoa ka ho mamela litaelo tsohle tsa Hae.

Mongoli ea neng a botsitse Jesu lipotso o ile a hlolloa ke likarabo tsa Hae. O ile a bolela ka sebete, kapele ho baprista le babusi ba neng ba phutsehile moo, hore Krete O fane ka tlhaloso e nepahetseng ea molao.

[409] Mongoli enoa o ne a utloisisa hore mekete ea mahlabelo e etsoang feela, le ho tšolla mali bakeng sa tšoarelo ea libe, empa ho se tumelo ha li thuse letho. A bona ntho ea bohlokoa ho feta meetlo ena kaofela, e le lerato le ho hlonepha Molimo, le ho tsotella batho ba bang. Karabo ea hae e potlakileng, e nang le qeto, ea bontša batho hore maikutlo a hae a fapane ho hang le a baprista le babusi. Pelo ea Jesu ea qenehela mongoli eo ea tšepahalang, ea bileng sebete ho bua ‘nete e ka pelong ea hae. “Jesu ha a bona hore o arabile ka bohlale, a re ho eena; Ha u hole le ‘Muso oa Molimo.”

Bafarisi ba ne ba bokane haufi le Jesu ha A ntse A araba mongoli. Joale Jesu A lebisa potso ka ho bona. A re, “Le re’ng ka Krete? Ke mora oa mang?” Potso ena e ne e botsoa ka sepheo sa ho bona hore na ba nka Jesu e le motho feela na kapa e le Mora oa Molimo. Ba hōoa ba re, “Oa Davida.” Ha Jesu A bontša bo-Molimo ba Hae ka mehlolo ea Hae e makatsang, A folisa ba kulang ‘me A tsosa bafu, batho ba ne ba botsana, ba re, “Na enoa hase mor’a Davida na?” Empa ba bangata ba neng ba bitsa Jesu mor’a Davida ba ne ba sa

elelloe bo-Molimo ba Hae. Mor'a Davida e ne ebile e le Mora oa Molimo.

Jesu ha A ba araba, A re, “Ke ka baka la'ng ha Davida, ka tataiso ea Moea [Moea oa Tšusumetso o tsoang ho Molimo] a ‘mitsa Morena,

‘Morena o itse ho Morena oa ka:  
Lula ka letsohong la ka le letona,  
ho fihlela ke bea lira tsa hao  
katlas'a maoto a hao?’

Haeba he Davida a ‘mitsa Morena, ke mora oa hae joang? Ha ho ea ileng a tseba ho mo araba, ‘me ho tloha tsatsing bo ha ho ea kileng a ba sebete ho ‘motsa hape.’”

[410] **KHAOLO EA 67—JESU O ETELA TEMPELENG  
LEKHETLO LA HO QETELA**

*[E itšetlehile ka Matheu 23; Mareka 12:41-44; Luka 20:45-47;  
21:1-4.]*

Ene e le letsatsi la ho qetela la Krete la ho ruta ka tempeleng. A ema mohlankana oa mo-Galelea, a hloka tlōtla ea lefatše kapa lona letšoao la borena. O ne A potiloe ke baprista ba apereng liaparo tsa theko e boima, le babusi ka liaparo le meqhaka ea bona, le bangoli ba tšoereng lipampiri matsohong a bona, ‘me ba ntse ba li phetla khafetsa. Jesu A ema ka bonolo, joaloka ea apesitsoeng matla a leholimo. A sheba lira tsa Hae tse laletseng ho timetsa bophelo ba Hae, A sa tšabe letho. Merero ea bona ea ho Mo tšoasa ka leraba e ne e fetohile lefeela. O ne a ile A araba qholotso kamora’ qholotso ka hoo A beha ‘nete e hloekileng, e khanyang, khahlanong le lefifi le liphoso tsa baprista le Bafarisi. Temoso e ne e fanoe ka botšepahi. Empa Krete O ne A sa saletsoe ke mosebetsi o mong, oo A neng A lokela ho o etsa.

Batho ba ne ba hohetsoe ke lithuto tsa Jesu, empa ba ne ba nyahame haholo. Ba ne ba hlompha baprista le baruti empa joale ba bona banna bana ba leka ho hanyetsana le Jesu, eo boleng le tsebo ea Hae li neng li phatsima ka khanya e kholo ka hohlehohle. Ba makala ho fumana hore babusi ha ba lumele ho Jesu, leha lithuto tsa Hae li ne li le bobebe ‘me li utloahala. Bona ka bo-bona ba sitoa ho hlalohanya tsela eo ba lōkelang ho e latela.

[411] Sepheo sa Krete ha A ruta ka litšoantšo, e ne e le ho lemosa babusi le ho laea sechaba. Empa ho ne ho ntse ho hlokeha hore A buoe ka ho tōtōbala. Batho ba ne ba kene bokhobeng ka lebaka la tumelo ea bona e fofetseng ho baprista ba senyehileng. Krete O ile A tlameha ho khaola mahlahlela ana. A re, “Litsebi tsa Molao le Bafarisi ba lutse setulong sa Moshe. Ka baka leo, phethang, le hlokomele tsohle tseo ba le bolellang tsona, empa le se ke la ba etsisa, hobane ba bua feela, empa ba sa etse.”

Bangoli le Bafarisi ba ne ba ipolela ba nkile sebaka sa Moshe e le bahlalosi ba molao, empa ba ne ba hlōloa ho phela seo ba se rutang. ‘Me tse ngata tseo ba li rutileng, li ne li sa lumellane le Mangolo a Halalelang: “Ba tlama mejaro e boima, ba e bee holim’ a mahetla a batho, empa bona, ka bobona, ha ba utloisise ho e thetsa le ka monoana.” Likarolo tse ling tsa molao, ba ne ba li hlalosa ka mokhoa o imetsang batho ka lintho tseo bona ba sa li natseng lekunutung kapa tseo ba hlileng ba reng bona ha li ba tlame.

“Liketso tsa bona tsohle ba li etsa hore ba bonoe ke batho. Ba habōlla mekotlana ea Mangolo a halalelang eo ba e roetseng, ba lele-fatsa litjellane tsa likobo tsa bona, ba rata litulo tse kapele meketeng, le litulo tse hlomphehang matlung a thapelo, le ho lumelisoa ma-baleng a metse, le ho bitsoa ‘Moruti’ ke batho. Empa lōna le se ke la bitsoa ‘Moruti’, hobane le na le Moruti a le mong, ‘me bohle le bana ba motho. Mona lefatšeng le se ke la bitsoa motho ‘Ntat’ a lōna’, hoba le na le Ntate a le mong, leholimong. Le se ke la bitsoa ‘Batsamaisi’, hobane le na le Motsamai a le mong, e leng Kreste.”

Ka mantsoe a utloahalang, Mopholosi A senola cheseho ea Bafarisi ea ho fihlela litulo le matla, ka ho bontša boikokobetso ba bohata, empa lipelo tsa bona li tletse takatso ea leruo le mōna. Ka linako tsohle Bafarisi ba ne ba sebeletsa ho fumana melemo e khethehileng le ho sebeletsoa pele. Jesu O ne A khalemela mokhoa oo.

A boela A ba khalemella taba ea lefeela ea ho khalla ho bitsoa Moruti kapa morena. Baprista, bangoli le babusi e ne e le baena, e le bana ba Ntate a le mong. Batho ba ne ba sa lōkela ho fa motho e mong lebitso la tlhomphehang e supang hore o na le matla a ho laola likelello tsa bona, kapa eona tumelo ea bona.

Hoja Kreste A ne A le lefatšeng kajeno, A potiloe ke ba bitsoang ka lebitso la “Ea tsabehang” kapa “Mohalaleli”, na O ne A ke ke A pheta mantsoe A reng, “Le se ke la bitsoa ‘Batsamaisi’, hobane le na le Mo-tsamaisi a le mong, e leng Kreste?” Mangolo ha a bolela ka Molimo, a re, “Lebitso la hae lea halalela, ‘me lea tšabeha.” Pesalema 111:9. Ke ba bangata hakaakang, ba nkileng lebitso lena le hlonephehang, empa ba tlōntlolla lebitso le semelo sa Morena. Ke hangata hakaakang litakatso tsa lefatše, le libe tse nyonyehang li patiloeng ka har’a liaparo tse khabisitsoeng tsa maemo a phahameng, a halalelang!

Mopholosi A tsoela-pele, A re, “Empa e moholo ho lōna e tla ba mosebeletsi oa lōna. Ea iphahamisang, o tla kokobetsoa, ‘me ea ikokobetsang o tla phahamisoa.” Khafetsa-khafetsa Krete O ‘nile A ruta ka hore tlhompheho ea ‘nete e bonoa ka boitšoaro bo botle. Ka litekanyo tsa leholimo bokhethehi ba semelo bo bontšoa ka ho phelela ho thusa batho ba bang. Krete Morena oa khanya E ne E le mohlanka oa batho ba oeleng.

“Le koalla batho ‘Muso oa maholimo, empa Iona ka bolōna le sa kene, ‘me ha le lumelle le ba kenang ho kena.” Ka ho sokamisa Mangolo a Halalelang, baprista le bo-ramolao ba fofalitse likelello tsa batho ba ka beng ba amohetse ho tseba ‘muso oa Krete.

“Le hapa matlo a bahlolohali, le etsa lithapelo tse telele ka boikaketsi; ka baka lena le tla ahlōloa.” Bafarisi ba ne ba hapa maikutlo a bahlolohali ba inehetseng bolumeling, e be ba ba ruta hore tšoanelo ea bona ke hore ba nehelane ka thepa ea bona tše-beletsong ea tsa bolumeli. Kamora’ hore ba fumane taolo holim’a chelete ea bona, balotsana bana ebe ba itšebelisetse eona molemong oa bona. Ba ne ba etsa lithapelo tse telele mapatlelong, e le ho pata hose tšepahale ha bona, ‘me ba itlhahisa e le ba ratang Molimo ka ho fetisisa. Khalemelo e tšoanang e tlisoa ho ba bangata ba rōna kajeno. Maphelo a bona a silafalitsoe ke boikhabo le meharo, empa ba koahetse tseo tsohle ka kobo ea boikaketsi, ba etsa eka ba rata Molimo, empa hose joalo.

### **Kabelo Ea Mosali Oa Mohlolohali E Theko E Thata**

Krete O ne A khalemela tšenyō, empa le teng O ne A le seli hore A se nyelise tšoanelo ea batho. Ha motho a sebelisa mpho e fanoeng ke motho e mong hampe, ha a thibele hlohonolofatso ea Molimo holim’a mofani oa mpho eo.

[413]

Jesu O na A lutse malebana le polokelo ea letlotlo, ‘me A talimile batho ba tlisang limpho tsa bona. Barui ba bangata ba ne ba isa lichelete tse ngata ebile ba itlhahisa hore ba bonoe. Jesu A ba sheba ka ho soaba, empa A se ke A bua letho ka limpho tsa bona tse khaphatsehang. Hang-hang, ha bonahala sefahleho sa Hae se ela, ha A bona mosali oa mohlolohali a atamela ka lesisitheho, eka o tšaba ho bonoa. O ile a sheba mpho e letsohong la hae. E ne e le nyenyane haholo ha e bapisoa le mpho tsa ba mo potileng, le ha ho



le joalo seo e ne e le sohle seo a neng a e-na le sona. A potlaka a lahlela cheletana tseo tse peli ka polokelong ea letlotlo, ‘me a khutlela litulong tsa hae. Eitse ha a etsa joalo, mahlo a hae a teana le Jesu, A mo shebile.

Mopholosi a lemosa barutuo a ba Hae hore ba e le hlōkō bofumanehi ba mohlolohali enoa. ‘Me mantsoe a Hae a khothatsang a oela litsebeng tsa mohlolohali eo. Mantsoe ao a ne a re, “Kannete kea le bolella, mosali eo oa mohlolohali, ea futsanehileng, o noketse ho feta bohle ba nokelang letlōleng.” Ha a fumana hore ketso eo ea hae e-ea thabeloa, mahlo a hae a ile a tlala meokho ea thabo. Ba bangata ba ka be ba ‘moleletse hore a ipolokele cheletana eo, a tle a itšebelisetse ka eona, haholo hobane e ne e ke ke ea lemohua ka har’a lichelete tse ngata tsa ba bang. Empa o ne a lumela hore tšebeletso ea tempele ke ea Molimo, ‘me o ne a lakatsa ho e tšehetsa kahohle kamoo a neng a ka khona. O ile a etsa ketso ea boitelo, ‘me ketso eo e ne e tla ba seemehale seo a hopoloang ka sona ka mehla eohle, me e tla ba thabo ea hae bophelong bo sa feleng.

O “noketse ho feta bohle.” Limpho tse kholo tse ntšitsoeng ke barui e ne e se tsa boitelo, ‘me matla a tsona a ne a ke ke a bapisoa le a sente ea mohlolohali eo ka bohlokoa.

Se re susumetsang ho etsa seo re se etsang se fa liketso tsa rona tšobotsi, se li hatisa ka khatiso e tlōntlōllang kapa e tlotlisehang. Melemo e fokolang e entsoeng ka thabo, le limpho tse nyenyane tse sa pepesoeng, hangata li hlahella haholo mahlong a Molimo. Mohlolohali eo oa mofumanehi o ile a itlhokisa lijo, ha a fana ka cheletana eo, a e tella mosebetsi oo a o ratang. ‘Me a etsa seo ka tumelo, a lumela hore Ntate ea maholimong O ne A ke ke

A iphpanyetsa bohloki ba Hae. Moea oona o hlohang boikhabo le tumelo eo e kang ea ngoana, li ile tsa mo hapela thoriso ho Mopholosi.

[414]

Ba bangata har’a bafumanehi ba laba-labelang ho bontša teboho ea bona ho Molimo bakeng sa mohau le ‘nete ea Hae. Ha ba ke ba ipolokele lisente tsa bona bankeng ea leholimo. Haeba limpho li fanoa ka pelo tse tletseng lerato ho Molimo, leha li ka bonahala li fokola, li fetoha limpho tsa theko e kholohali, tseo Molimo A bososelang ha A li bona ‘me A li hlohonolofatse.

Ha Jesu A ne A bua ka mohlolohali, A re, O “noketse ho feta bohle,” mantsoe A Hae e ne e le a ‘nete, e seng feela ka lebaka la

maikutlo ao a faneng tlas' a tšusumetso ea ona, empa le ka lebaka la litholoana tsa mpho eo ea hae. “Cheletana tse peli, tse ka lekanang le sente,” li tliselitse letlotlo la Molimo chelete e ngata ho feta linyehelo tsa Bajuda ba barui. Mpho eo e nyenyane, e fetohile nokana e ntseng e pharalla ebile e teba ka mengoaha eohle. Mpho eo e bile le tlatsetso ka mekhoha e mengata, mosebetsing oa ho thusa bafumanehi le ho hasa molaetsa o molemo. Mohlala oa hae oa ho iketsa sehlabelo o sebelitse lipelong tse likete-kete, oa ba ‘na oa ipheta-pheta, linaheng tsohle ka mengoaha eohle. Hlohonolofatso ea Molimo holim’ a cheletana ea mohlolohali eo e e fetotse mohloli oa litholoana tse kholo. Ho joalo le ka mpho e ‘ngoe le e ‘ngoe e fanoang ka maikemisetso a tiileng, a ho tlotlisa Molimo. E ba le litholoana tse molemo ho feta kamoo motho a ka lekanyang.

“Le malimabe lona Litsebi tsa Molao le Bafarisi, baikaketsi ting! Le ntša karolo ea leshome ea koena, tenane le sepaile, feela le tlohetse lintho tsa bohlokoa tsa Molao: Toka, mohau le botsepehi. Le ne le tšoanelo ho etsa tsena, feela le sa lebale tseo.” Haele tšoanelo ka boeona Krete ha ka A e qhelela ka thoko. Ho ntša karolo ea leshome ke ntho e hlohonolofalitsoeng ke Molimo, ‘me ea lateloa ho tloha khale. Aborahama o ne a ntša karolo ea leshome ho tsohle tseo a neng a e-na le tsona. Mokhoa oa ho ntša karolo ea leshome o ne o lōkile ebile o utloahala, ho ea kamoo Molimo A o faneng kateng, empa baprista le baruti ba ne ba o entse moroalo o boima.

[415]

Bafarisi ba ne ba le hlokolosi haholo ka ho ntša boshome ba meroho e tsoang lirapeng, e kang sepaile le tse ling; e ne e le lintho tse theko e nyenyane, ‘me li ba fa lebitso le letle ka hore ba tšepahala, ebile ba halalela. Leha ho le joalo, ba ne ba sa tsotelle lintho tsa bohlokoahali tse kang molao, toka, mohau le ‘nete. Krete O re, “Le ne le tšoanela ho etsa tsena, feela le sa lebale tseo.”

Melao e meng e ne e ‘nile ea senngoa ke Litsebi tsa molao ka mokhoa o tšoanang. Litaelong tse fanoeng ka Moshe, batho ba ne ba thibetsoe ho sebelisa nama ea kolobe, le ea liphoofolo tse ling tse itseng, kahobane li ka silafatsa mali ‘me bophelo (ba motho) ba khutsufala. Empa Bafarisi ba ne ba fetelelitse litaba hampe haholo. Ba ne ba re batho ba tšoanetse ho tlhotla kapa ho sefa metsi ao ba a sebelisang, e se be a na le likokonyana tse ka bapisoang le liphoofolo tse sa hloekang. Jesu ha A sheba ho se tsebisahale ha lithibelo tseo ba li etsang, a li bapisa le boholo ba libe tseo ba li etsang, A re ho

Bafarisi, “Batsamisi ting ba lifofu, ba okolang monoang, empa ba metselisa kamele!

“Le joaloka mabitla a koetlisitsoeng, a talimehang a khahleha kantle, empa kahare a tletse masapo a bafu le libolu tsohle.” Lebitla le khabisitsoeng hantle la ba la soeufatsoa, kahare le patile ho bola. Ka mokhoa o joalo, bohalaleli bo neng bo bonahala kantle, ba baprista le babusi, bo ne bo patile bokhopo.

Jesu A tsoela pele A re, “Le hahela baporofeta mabitla; le khabisa liemahale tsa mabitla a ba lokileng, ‘me le re: ‘Hoja ebe re phetse mehlehng ea bontat’ a rōna, re ka be re sa ka ra ba le kabelo le bona polaong ea baporofeta.’ Ka baka leo, lea ipaka hore le bara ba babolai ba baporofeta.”

Ho ne ho na le tlhomphe ea lefeela malebana le liqalo tsa bafu, ‘me ho ne ho sebelisoa chelete e ngata, ho khabisa mabitla. Ketso ena mahlong a Molimo e ne e tšoana le ho rapela melimo. E ne e bontša hore batho ha ba rate Molimo ka lipelo tsa bona tsohle, ebile ha ba rate bahaisani ba bona joalokaha ba ithata. Kajeno ba bangata ha ba tsotelle bahlolohali le likhutsana, le bakuli le mafumanehi, e le hore ba tle ba tsebe ho etsisa bafu liemahale tse theko e phahameng. Ba tlohetse ho phetha litšoanelo tsa bona ho ba phelang, e leng litšoanelo tseo Krete A li laetseng ka kotloloho. [416]

Bafarisi ba buisana e le bona, ba re, Hoja re ne re phela mehlang ea bo ntat’ a roma, re ne re ke ke ra kenya letsoho tšollong ea mali a bahlanka ba Molimo. Empa e le hore, ka nako eona eo, ba ne ba ntse ba rera ho bolaea Mor’ a Molimo. Hona ho tšoanetse ho bula mahlo a rōna, hore re bone kamoo matla a Satane a sebetsang ka teng, ho thetsa likelello tsa rōna ha li sa shebe leseli la ‘nete. Ba bangata ba makalla bofofu ba Bajuda ba ho latola Krete. Ba re, Hoja re phetse mehlang ea Krete, re ka be re sa ka ra ba ra kenya letsoho morerong oa bao ba latotseng Mopholosi. Empa ha ho hlomphe Molimo ho batla boitelo le boikokobetso, bona batho bao, ba hana ho Mo hlonepha. ‘Me ba bontša moea o tšoanang le oa Bafarisi.

Bajuda ha ba ka ba elelloa boikarabello bo tšabehang ba ho latola Krete. Ka mengoaha eohle, baporofeta ba ile ba phahamisa mantsoe, ba nyatsa libe tsa marena, babusi le sechaba, ba phetha thato ea Molimo, ‘me ba beha maphelo a bona tlokotsing. Kotlo e tšabehang e ne e ntse e bokelleloa ba latotseng leseli le ‘nete. Ka ho latola Mopholosi, baprista le babusi ba ne ba itjarisa boikarabelo ba

mali a bohle ba lokileng ba bolailoeng, ho tloha ka Abele ho isa ho Kreste. Ba ne ba le lekhateng la hore senoelo sa bona sa bokhopo se tlale, se tšolohe. ‘Me haufinyane se ne se tla qhalloa holim’ a lihlooho tsa bona, ka phetsetso ea tōka. Ntlheng ena, Jesu O ile A ba hlokomelisa, A re:

“Mali ‘ohle a ba lokileng a tšolletsoeng lefatšeng a tle a bokane ho lōna, ho qala ka mali a Abele ea lokileng, ho ea fihla ho a Sakariea, mor’ a Barakiase, eo le neng le ‘molaele pakeng tsa sehalelelo le aletare. Ruri kea le bolella hore tsena tsohle li tla botsoa ho molōko ona.”

Bangoli le Barafisi ba ne ba tseba kamoo moporofeta Sakariea a neng a bolaoe ka teng. Eana eare ha a ntse a bua, a ba bolella likhalemelo tse tsoang ho Molimo, morena ea khelohileng tumelo a tlala khalefo ea Satane, ‘me a laela hore moporofeta a bolaoe. Sheba 2 Liketsahalo 24:18-22. Mali a hae a rothela ‘me a khomarela holim’ a majoe a lebala la tempele hantle, ‘me a sala e le bopaki bo qosang Iseraele ea koenehileng. Ha feela tempele eo e sa ntse e le [417] teng, letheba leo la mali a lokileng le ne le tla lula joalo, le ntse le hoeletsa ho Molimo hore A etse phetsetso. Eare ha Jesu a bua ka libe tse tšosang tsena, matšoele a apareloa ke tšabo.

Jesu ha A shebela litaba pele, A bolela hore ho hloka pako hoa Bajuda, ho tla ‘ne ho tšoane le mehleng e tlang, joaloka ha ho bile mehleng e fetileng: “Ka baka leo, ke le romela baporofeta, bahlalefi le Litsebi tsa Molao. Ba bang ba bona le tla ba bolaea, le ba thakhise, ‘me ba bang ba bona le tla ba shapela matlung a lōna a thapelo, le ba phalalise le metse eohle.” Kreste A bua joaloka moahloli, A khalemela ebile A ahlōla, A phahamiselitse letsoho la Hae leholimong, ‘me khanya e halalelang e apesitse botho ba Hae. Ba Mo mametseng ba thothomela ka tšabo. Matla a mantsoe a Hae, le tšobotsi ea sefahleho sa Hae li ne li ke ke tsa ba tsa le baleha le khale.

Khalefong ea Hae Kreste O ne A halefetse libe tse tšabehang, tseo batho ba neng ba bolaea meea ea bona ka tsona, ba thetsa le batho ba bang, ebile ba hlompholla Molimo. Feela A se ke A bua mantsoe a boiphetsetso. A seke A bontša khalefo e belang. Ha bonahala mohau o nang le khalalelo sefahlehong sa Mora oa Molimo, ha A sheba tempele ‘moho le ba Mo mametseng, ka leihlo le tletseng qenehelo. A bua ka lentsoe le utloileng bohloko, A khanngoe ke

meokho, A hōoa, A re, “Jerusalema! Jerusalema! Uena ea bolaeang baporofeta, ea tlepetsang ka majoe ba rōmetsoeng ho uena, ke hakae ke lakalitseng ho phutha bana ba hao, joalokaha khōhō e alama litsuonyana tsa eona, empa ua hana!” Lillong tsena tsa Krete, ho ne ho tšoloha pelo ea Molimo ka sebele. E ne e le tumeliso ea mohlolo, ea salang hantle, ha lerato la Molimo le tletseng mamello le tsamaea, le siea batho.

Bafarisi le Basaduke le bona ba khutsa tu. Jesu A bitsa barutuo ba Hae, ‘me A itokisetsa ho siea tempele, e seng joaloka ea hlotsoeng, empa e le ea phethileng mosebetsi oa hae. A tloha tlholisanong e le mohloli.

Tsatsing leo le khethehileng, ha hlaha maikutlo a macha lipelong tsa ba bangata, ‘me pale ea bophelo ea qaleha bocha. Kamora’ thakhiso le tsoho ea Jesu, batho bana ba hlahella pontšeng, ba tletse bohlae le cheseho. Ba tšoere molaetsa o ammeng lipelo tsa bona. Lithuto le mahlale a batho, tsa fetoha lipale tsa lefecla, ha li bapisoa le bopaki ba bona.

Empa Iseraele e le sechaba, o ne a hlalile Molimo. Eaba Jesu O sheba tempele kahare la ho qetela, A ntoo bua ka lentsoe le bohlōko haholo, A re, “Bonang, ntlo ea Iona e tla sala e le lithako. Kea u bolella hore ho tloha joale ha le sa tla mpona ho fihlela le re: ‘Ho bokoe ea tlang ka lebitso le Morena.’” Eare ha Mora oa Molimo A tsoa ka har’a marako ao, eaba boteng ba Molimo bo tsoela ruri tempeleng eo e ahetsong khanya ea Oona. Mekete e etsetsoang ho eona e ne e tla hloka moelelo, ‘me litšebeletso tsona e be sesomo.

[419]

## **KHAOLO EA 68—BAGERIKE BA BATLA HO BONA JESU**

*[E itšetlehile ka Johanne 12:20-43.]*

Ho ne ho e-na le Bagerike ba bang har'a ba nyolohang ho ea khumamela Molimo moketeng. Ba tla ho Filipi...ba kōpa, ba re: Monghali, re rata ho bona Jesu. Andrease le Filipe ba ea bolella Jesu.”

Ka nako ena, ho ne ho bonahala eka mosebetsi oa Krete o hlolehile hampe haholo. O ne A ile A hlōla toantšanong e neng e le lipakeng tsa Hae le baprista le Bafarisi, empa ho ne ho totobetse hore ba ke ke ba Mo amohela e le Mesia. Karohano ea ho qetela e ne e fihlile. Ho ne ho bonahala eka ha ho sa na thuso. Empa ketsahalo e kholo, e neng e ama lefatše kaofela, e ne e le haufi le ho phethahala. Eare ha Jesu A utloa kōpo e reng, “Re rata ho bona Jesu,” e hoeletsa tlala e tšoereng lefatše, sefahleho sa Hae sa ela, ‘me A re, “Nako e fihlile ea hore Mor’a motho a tlotlisoe.”

Banna bana ba ne ba tsoa Bophirima ‘me ba fumana Mopholosi matsatsing a ho qetela a bophelo ba Hae lefatšeng. Qalehong ea mosebetsi oa Hae banna ba bohlale bane ba ile ba hlaha Bochabela. Bagerike bana ba ne ba emetse mehlobo, merabe le lichaba tse lefatšeng. Batho ba linaha tsohle le ba mengoaha eohle, ba ne ba tla huloa ke sefapano sa Mopholosi.

Bagerike ba ne ba lakalitse ho tseba ‘nete ka mosebetsi oa Krete. Ha ba re, “Re rata ho bona Jesu,” O ne A le ka karolong ea tempele eo ho neng ho sa lumelloe batho ho kena, haese Bajuda feela, empa O ile A tsoa A teana le Bagerike bao ka karolong e ka ntle ea tempele, ‘me A ba le lipuisano le bona.

[420]

Lipotso tsa Bagerike li ile tsa bontša Krete hore, sehlabelo seo A neng A le haufi le ho iketsa sona, se tla tiisa bara le barali ba bangata ho Molimo. O ne a tseba hore haufi Bagerike ba tla ‘mona a le boemong boo ba neng ba sa bo nahane ho hang. Ba ne ba tla ‘mona a beiloe pel’a Barabase, oa lesholu le ‘molai. Potsong ena,

e reng, “Joale ke etse joang ka Jesu?” Karabo e tlabā, e reng, “A thakhisoe.” Matheu 27:22. Ka ho iketsa sehlabelo sa sebe, Krete O ne A tseba hoba ‘Musō oa Hae o tla phethahala ‘me o anele ka lefatše lohle. O ne A tla sebetsa e be ‘Museletsi, ‘me Moea oa Hae o ne o tla hlōla.

Ka nakoana e seng kae, A utloa mantsoe ka nq’a tsohle tsa lefatše a hōang a re, “Bonang Konyana ea Molimo e tlosang sebe sa lefatše.” Johanne 1:29. Ho balichaba bana Krete A bona tšepiso e tiileng ea kotulo e kholo. Tebellong ea taba ena e le ho phethahala ha tšepo ea Hae, ha utloahatsoa mantsoeng a reng, “Nako e fihlile ea hore Mor’a Motho a tlotlisoe.” Empa mokhoa oo tlotliso ena e neng e tla phethahala ka oona, o ne o sa hlakohe maikutlong a Krete ka nako tsohle. Ke ka lefu la Hae feela lefatše le neng le tla pholosoā. Joaloka tlhaku ea koro, Mor’a motho One A tlameha ho liheloā fatše, ‘me A shoe, A patoe, A se ke a bonoa, A ntoo phela hape.

“Kannete-nete, kea le bolella, ha tlhaku ea koro e oelang mobung, e sa shoe, e sala e le inotši, empa ha e e-shoa, e beha litholoana tse ngata.” Ha tlhaku ea koro e oela mobung ‘me e e-shoa, e tla mela hape ‘me e hlahise litholoana. Lefu la Krete le ne le tla hlahisetsa ‘Musō oa Molimo litholoana ka mokhoa o joalo. Ho latela molao oa ‘musō oa limela, bophelo ke tholoana ea lefu la Hae.

Selemo le selemo motho o ipolokela lijo ka hoo ekang ke ho lahla peo e khethehileng. Ka nakoana e se kae, e lula e ipatile ka mobong, e hlokometsoe ke Morena. E be e hlahisa lekhaba e etse tsebe, e qetelle ka ho beha liqoapi.

Peō e kentsoeng mobung e beha litholoana, ‘me litholoana tseo li boele li jaloe hape. Ka hoo kotulo e ngatafale. Ka mokhoa o tšoanang, lefu la Krete sefapanong le tla beha litholoana tse isang bophelong bo sa feleng. Ho nahana ka sehlabelo sena, e tlabā tlōtla ho bao, ba tla phela ka ho sa feleng e le ka lebaka la sona.

Krete O ne A ka ipholosa lefung, haeba A ne A ka ikhethela joalo. Empa hoja A etsa joalo, O ne A tla “sala A inotši”. Ke feela ka ho oela fatše, A e-shoa, A neng A ka fetoha peo ea kotulo e kholohali, e leng matšoele-tšoele A pholoselitsoeng ho Molimo.

Thuto ena ea ho iketsa sehlabelo bohle ba tšoanetse ho ithuta eona, “Ea ratang bophelo ba hae, bo tla mo lahlehela, ‘me ea hloeang bophelo ba hae lefatseng lena, o tla bo bōlōkela bophelo bo sa feleng.” Bophelo bo tšoanetse ho epeloa ka har’a bohloki ba lefatše.

Haele boithati le boipaballo li lokela ho fela ka ha molao oa ho iketsa sehlabelo ke molao oa ho ipoloka. Ho fana ke ho phela. Bophelo bo tla bōlokeha ke bophelo bo iteletseng ho sebeletsa Molimo le motho ka bōlōkōlohi.

Bophelo ba ho iphelela bo tšoana le peo e jeloeng. Ha bo na keketseho. Motho a ka ipokella ka tsohle ho ea kamoo a ka khonang, a ka iphelela, a nahana, a ba a rera ka bo-eena empa bophelo ba hae bo ea feta, ‘me a sale a se na letho. Molao oa ho iphelela ke molao oa ho ipolaea.

Jesu O re, “Ha motho a ntšebeletsa, a ntatele, ‘me moo ke leng teng, le mosebeletsi oa ka o tla ba hona teng; ha motho a ntšebeletsa, Ntate o tla mo hlompha.” Bohle ba jereng sefapano sa sehlabelo hammoho le Jesu ba tla arolelana tlōtla le Eena. Ke basebetsi-’moho le Krete ‘me Ntate O tla ba tlōtlisa joalokaha a tlōtlisa Mor’a Hae.

Molaetsa oa Bagerike o ile oa tlisa khopolo kelellong ea Jesu, ea ho tloha nakong eo ho neng ho buuo a ka leano la Topollo mane leholimong, ho fihlela nakong eo eleng moo lefu la Hae le neng le se le atametse haholo. Ha bonahala eka Mora oa Molimo O koahetsoe ke leru la mohlolo. O ne A nkehile ke menahano. Qetellong a hōoa ka lentsoe le bohōkō, A re, “Joale moea oa ka o ferekane. Ke tla re’ng? Na ke tla re: Ntate, u mpholose nakong ena?” Botho ba Krete bo ne bo honyela bo tšaba nako ea ha A tla be A furalletsoe, ‘me bohle ba ‘mona A shapuo a, A o tla ke Molimo, ‘me A hlōkōfatsoa. A tšaba ha A nahana ha A tla be A tšoaroa joaloka setlokotsebe se sebe ho feta tsohle A bile A shoa lefu la lihlong le tlontlollang. Ho nahana ka boima bo tšabehang ba litlolo tsa batho, le khalefo ea Molimo ka lebaka la sebe, tsa etsa hore moea oa Jesu o tetebele, ‘me serame sa lefu sa aparela sefahleho sa Hae.

[422]

### **Lentsoe La Molimo Lea Utloahala**

Eaba O fihleloa ke boinehelo bo halalelang hore A phethe thato ea Ntat’ae. ‘Me Jesu A re, “Empa ke ka lebaka lena ke fihletsoeng ke nako ena. Ntate, tlotlisa lebitso la hao.” Ke ka lefu la Krete feela ‘muso oa Satane o neng o ka felisoa, e be motho oa lopolloa, ‘me Molimo A tlotlisoe. Jesu O ile A amohela ho etsoa sehlabelo, ‘me A lumela hore A utloisoe bohōkō e le Mojari oa libe tsa lefatše. Lentsoe la arabela le le ka har’a leru le neng le ōkametse holim’a



hlooho ea Hae, la re: “Ke le tlotlisitse, ‘me ke sa tla le tlotlisa hape.” Tekong e neng e e-tla, mahlomola a neng a tlela Krete sebopehong sa Hae sa motho-molimo, ruri a ne a tla tlotlisa lebitso la Ntat’ae.

Eitse ha lentsoe le utloahala, khanya ea aparela Krete, eaka hoja O kōpiloe ke matsoho a Ea-matla-’ohle, a Mo potile joaleka lerako la mollo. Ha ho ea ileng a iteta sefuba ho bua. Bohle ba ema ba tsepamisitse mahlo ho Jesu. Eitse hobane bopaki ba Ntate bo phethahale, leru la apoha, ‘me la qhalakana sebakeng sa leholimo.

Bagerike ba neng ba batla ho bona Jesu, ba ile ba bona leru ka mahlo a bona, ba utloa lentsoe, ba ba ba utloisisa molaetsa oa lona, ‘me ba tseba Krete e le ka ‘nete, ha ba ha senoha ho bona hore ruri ke Ea rōmetsoeng ke Molimo. Lentsoe la Molimo le ne le utloahale nakong eo Jesu a neng a kolobetsoa, ‘me la boela la utloahala hape Ponahalong e khanyang ea Jesu thabeng. Kajeno e ne e le khetlo la boraro le utluoa ‘me lekhetlong lena la utluoa ke palo e kholo ea batho ho feta pele. Jesu O ne A sa tsoa etsa boipiletso ba Hae ba ho qetela, ‘me a bolela le ka timelo e tla oela Bajuda. Molimo A boela A tlotlisa Eo Iseraele a Mo lahlileng. Jesu A ntoo re, “Lentsoe lena ha lea bua ka baka la ka, empa ke ka baka la lona.” Hoo e ne e le pontšo e tsoang ho Ntate hore Jesu O buile ‘nete, e bile ke Mora oa Molimo.

Jesu A tsoela pele A re, “Joale ke kahlōlo ea lefatše lena; joale ‘musi oa lefatše lena o tla lahleloa kantle, ‘me ‘na, ha ke se ke phahamisitsoe, ke tlohile lefatšeng, ke tla hulela batho bohle ho ‘Na. A rialo ho supa hore na o tla shoa lefu le joang.” Ha ke ikentse pheko bakeng sa libe tsa lōna, lefatše le tla bonesoa. Matla a Satane holim’a batho a tla khaoha. Setšoantšo sa Molimo se neng se sentsoe tšobotsi; se tla boela se hlahisoa hantle bathong, ‘me lelapa la balumeli le tla ja lefa la lehae la leholimo qetellong. Mopholosi joale A bona sefapano se benya ke khanya, sona sefapano sane se khopo, se tlontlollang, se potiloeng ke botšabeho.

[423]

Topollo ea motho ha se oona feela mosebetsi o phethahalitsoeng ke sefapano. Lerato la Molimo le bonahalitsoe maholimong le lefatšeng. Sekhobo seo Satane a se entseng leholimong, se hlakotsoe ka ho sa feleng. ‘Me mangeloi le batho ba atameletsoa ho Molopolli. Joalokaha Jesu A boletse, mantsoeng ana, “‘Me ‘na ha ke se ke phahamisitsoe, ke tlohile lefatšeng, ke tla hulela batho bohle ho ‘na.’”

Batho ba bangata ba ne ba potapotile Krete ha A ntse A bua mantsoe ana. “Le hoja a entse mehlolo e mengata hakaalo pel’a bona, ha baa ka ba lumela ho eena.” Ba ne ba filoe lipontšo tse ngata haholo, empa ba ile ba tutubatsa mahlo a bona, ‘me ba thatafatsa lipelo tsa bona. Eare le ha Ntate A se A buile ka BoEena, ‘me ba se ba sitoa ho kōpa pontšo e ‘ngoe, ba ‘na ba hana ho lumela.

“Leha ho le joalo, esita le ba bangata ba baokameli ba ile ba lumela ho eena, empa ka baka la Bafarisi, ha baa ka ba bolela, esere ba tebeloa tlung ea thapelo.” Ha ba leka ho ipholosa tlontlollong le lihlonng, ba ile ba latola Krete, ‘me ba lahla mpho ea bophelo ba sa feleng.

Ho malimabe bao ba sa kang ba tseba nako eo ba tla eteloa ka eona! Krete O ile A furallela mabala a tempele ruri, A tloha A khathetse matla, A bile A soabile.

## KHAOLO EA 69—LIPONTŠO TSA HO TLA LA BOBELI HA KRESTE

[424]

*[E itšetlehile ka Matheu 24; Mareka 13; Luka 21:5-38.]*

Mantsoe a Krete ho baprista le babusi, ha A re, “Bonang, ntlo ea lona e tla sala e le lithako,” (Matheu 23:38) a ile a ba tšosa haholo. Ba ile ba ipotsa hangata, hore na e be mantsoe ao a bolela’ng. Na ebe ho boleloa hore tempele eo e ntlehali, eona tlōtla ea sechaba, haufi e tla heleha, e senyehe?

Barutuo a le bona ba tšoha ke tebello ea tšenyeho e tla ba teng. Eitse ha ba feta le Eena ba tsoa ka tempeleng, ba Mo hlokomelisa botle le ho tiea ha tempele. E ne e ahiloe ka mahakoe a hloekileng haholo, a tekanyo e tsotehang. ‘Me karolo e ‘ngoe ea lerako la tempele, e ne e sale e ntse e eme hantle kamora’ hore mabotho a Nebukadnesare a e hlasele. Majoe a eona a ne a betliloe hantle hoo ho neng ho bonahala eka ke lejoe le le leng le leholo.

Cebahalo ea eona ruri e ne e le ntle mahlong a Krete, empa A bua ka masoabi, A re, Ke ea li bona tseo tsohle. Le supa marako ana a bonahalang eka a ke ke a senyeha; empa mamelang: Ho tla tla letsatsi leo “ho ke keng ha siuoa lejoe holim’a lejoe le leng le sa heletsoa.”

Eitse ha A setse A ‘notši, Petrose, Johanne, Jakobo le Andreama ba tla ho Eena. Ba re, “Ak’u re bolelle: Lintho tsee li tla etsahala neng? Pontšo e tla ba efe ea hotla ha hao le ea ho fela ha mehla ea kajeno?” Matheu 24:3 Jesu A se ke A arola likarabo tsa lipotso tseo tse peli, tsa tšenyeho ea Jerusalema le ho khutla ha Hae la bobeli. A kopanya tlhaloso ea liketsahalo tseo tse peli. Hoja A koahollela barutuo ba Hae lintho tse neng li lōkela ho etsahala joaleka ha li ne li le joalo, ba ne ba tla sitoa ho mamella pono e joalo. Ka mohau oa Hae, A kopanya tlhaloso ea litlokotsi tseo tse peli, ‘me ha sallana le hore barutuo ba ithute ka bo-bona, ba tie ba utloisise. Ha Krete A ne A bua ka tšenyho ea Jerusalema, mantsoe a Hae a boporofeta a ne a supa taba e kapele ho ketsahalo eo; e leng ea hore Morena

[425]

O tla hlaha setulong sa Hae ho ahlola batho ba lefatše, ka baka la makhopo a bona. Taba ena kaofela, e ne e sa fanoe ho barutuoa feela, empa le ho bohle ba tla phela matsatsing a ho qetela a pale ea lefatše lena.

Kreste O ile A re, “Hlokomelang, le se ke la tšoha le kheloso a ke motho ofe kapa ofe! Ba bangata ba tla tla ka lebitso la ka, ba re: Ke ‘na Kreste, ‘me ba tla khelosa ba bangata.” Bo-Mesia ba bangata ba bohata ba tla hlaha, ‘me ba bolela hore nako ea ho lopolla sechaba sa Bajuda e fihlile. Ba tla khelosa ba bangata. Mantsoe a Kreste a ile a phethahala. Nakong e lipakeng tsa lefu la Hae le ho haptjoa ha Jerusalema, ho ile ha hlaha bo-Mesia ba bangata ba bohata. Lithetso tse tšoanang le tsena li tla boela li etsoa hape.

Kreste A ntoo re, “Le tla utloa mekhosi ea lintoa le malume a lintoa. Hlokomelang, le se ke la tšoha. Hona eka khona ho etsahale, empa ha e e-s’o be bofelo (ba sechaba sa Bajuda). Lichaba li tla tsohelana matla le mebuso e futuhelane; ho tla ba le litlala tsa sekoboto le litšisinyeho tsa lefatše libakeng tse ngata. Lintho tsena tsohle ke qaleho ea litlokotsi.” Baruti ba molao ba tla bolela hore lipontšo tseo ke letšoao la ho khutla ha Mesia. Empa lōna le se ke la thetseha; hobane lipontšo tseo ba bolelang hore li bontša ho tla ha tōkōlōho ea bona bokhobeng, e tla be e le pontšo tsa timelo ea bona.

“Mohlang oo ba tla neelana ka lōna hore le hlōkōfatsoe, ‘me ba tla le bolaea. Lichaba tsohle li tla le hloea ka baka la lebitso la ka. Joale ba bangata ba tla oa, ba ekane, ba hloeane.” Bakreste ba ile ba feta har’a tlhōkōfatso tsena tsohle. Batsoali ba ile ba eka bana ba bona, le bana ba eka batsoali ba bona. Metsoalle ea nehelana ka metsoalle ea eona ho ba-lekhotla. Bahlorisi ba ile ba bolaea Setefane, le Jakobo, esita le bakreste ba bang.

[426] Molimo A fa sechaba sa Bajuda monyetla oa ho qetela oa ho baka, ka bahlanka ba Hae. A iponahatsa ha ba tšoeroe le ha ba qositsoe, empa baahloli ba bona, ba ba ahlolela lefu. Ka ho bolaea bahlanka bao, Bajuda ba ne ba thakhisa Mora oa Molimo bocha. ‘Me ho tla boela ho ba joalo hape. Babusi ba tla etsa melao e thibelang bolokolohi tumelong. Ba tla nahana hore ba ka qobella matsoalo a batho, a lōkelang ho tsamaisoa ke Molimo A ‘notši. Ba tla ntšetsa mosebetsi oona pele, ho fihlela moeling oa ho qetela, oo ba ke keng ba o tšela. Hobane Molimo O tla namolela sechaba sa Oona se tšepahalang, se bolokang melao ea Hae.

Ha litlhoriso li fihla, ba bangata ba tla khopjoa, ba oe, ‘me ba lahle tumelo eo ba kileng ba e buella. Bao ba tla furalla tumelo ha ba le nyeoeng ba tla leka ho iphumanela tokollo ka ho fana ka bopaki ba leshano, le ho eka bana ba bo bona. Krete O se A re hlokomelisitse taba ena, e le hore, re tie re se ke ra makatsoa ke boitšoaro bo sa tloaelehang, bo khopo, ba batho bao ba latotseng leseli.

Krete O ile A lemosa barutuo ba Hae kamoo ba ka phemang tšenyeho e neng e tlela Jerusalema, ka lipolelo tsena: “Etlare ha le bona Jerusalema e teelo hare ke mabōtho, le tsebe hore ho ripitloa ha eona ho atametse. Mohlang oo ba leng Judea ba balahela lithabeng, ba har’a motse ba tsoe, ‘me ba naheng ba se ke ba kena ho oona.” Temoso ena e ne e tla lokela ho eloa hloko lilemong tse mashome a mane tse tlang, ha motse oa Jerusalema o ripitloa. Bakrete ba ile ba phethisa keletso ena, ‘me ha ho le a mong ea ileng a timela, ha motse oo o senyeha.

Krete O ile A re, “Rapelang hore paleho ea lona e se be ka nako ea mariha kapa ka tsatsi la Sabatha.” Eena Ea hlolileng letsatsi la Sabatha, ha A ka A le felisa. Letsatsi la Sabatha ha lea etsoa lefeela kapa hona ho senngoa ke lefu la Hae. Le lilemong tse mashome a mane kamorao ho thakhiso ea Hae, letsatsi la Sabatha le ne le ntse le lokela ho hlomphua le halalela.

### **Lilemo Tse Lefifi Tsa Litlhoriso**

Ho tloha paleng ea tšenyeho ea Jerusalema, Krete O ile A fetela pele ka potlako, ho ea qetellong ea pale ea lefatše — e leng ea ho tla ha Mora oa Molimo ka borena le khanya. Lipakeng tsa liketsahalo tse peli tsena, Krete A bona nako e telele ea mengoaha ea lefifi, mengoaha eo ka eona kereke ea Hae e tlabe e aparetsoe ke tšollo ea mali, likeleli le mahlomola. Jesu A akaretsa liketsahalo tsena ka bokhutšoanyane, A re, “Hobane mohlang oo ho tla ba le litlokotsi tse kholo, tse e-song ho be teng ho tloha tšimolohong ea lefatše ho fihlela joale, ‘me ha li sa tla ba teng hape. Hojane nako eo ha e tl’o khutsufatsoa ho ne ho se motho le ea mong ea neng a tla pholoha, empa nako eo e tla khutsufatsoa ka baka la bakhethoa.”

[427]

Ka lilemo tse fetang sekete, balateli ba Krete ba ne ba tla feta har’a litlhoriso tse tšabehang, tseo lefatše le neng le e-s’o li bone.

Lipaki tsa Hae tse tšepahalang, tse baloang ka limilone li ne li tla bolaoa. Hoja Molimo A se ke A otlolla letsoho la Hae ho sireletsa batho ba Hae, ba ka be ba shoele bohle.

Joale, Morena oa rōna A bua ka ho khutla ha Hae lekhetlo la babeli, ka puo e utloahalang, A re, “Mohlang oo haeba motho a ka re ho lona: ‘Bona, Kreste ke enoa!’ kapa: ‘Bona, ke eo!’ le se ke la ba la lumela, hobane bo-Kreste ba bohata le baporofeta ba bohata ba tla hlaha, ‘me ba tla etsa lipontšo le limakatso hore, haeba ho ka etsahala, ba tie ba khelose le bona bakhethoa....Ka baka leo, haeba ba re ho lōna: ‘Bonang, o teng feelleng!’ le se ke la ea teng; kapa, ‘Bonang, o phaposing!’ le se ke la ba la lumela, hobane joalokaha lehalima le tsekema ho tloha bochabela le be le e’o fihla bophirimela, le ho tla ha Mor’a Motho ho tla ba joalo.” Liphuthehong tse liketeketete, moo batho ba ipolelang ka hore ba buisana le meea ea ba shoeleng, na ebe ha se moo ho utluoang mohoo o reng, “Bonang, o phaposing”? Hona ke polelo e sebelisoang ke meea e litšila. Empa Kreste O reng? O re, “le se ke la lumela.”

### Lipontšo Maholimong

Mopholosi O fana ka lipontšo tsa ho khutla ha Hae, ebile O fana le ka nako eo pontšo ea pele e tlang ho bonahala ke eona, ka mantsoe a na: “Hang-hang kamora’ litlokotsi tsa matsatsi ao, letsatsi le tla fifala, khoeli ha e na ho bonesa; linaleli li tla oa leholimong, mabōtho a maholimo a tla tsukutleha. Joale pontšo ea Mor’a Motho e tla hlaha leholimong, merabe eohle ea lefatše e tla ikotla lifuba [428] ka lillo, ‘me e tla bona Mor’a Motho a e-tla a le holim’a maru a leholimo, ka matla le ka tlōtla e kholo. O tla roma mangeloi a hae ka terompeta e molumo o moholo, ‘me e tla phutha bakhethoa ba hae ba e-tsoa liqoleng tse ‘ne tsa lefatše, ba e-tsoa pheletsong e ka nq’ena ea maholimo ho isa ho e ka nq’ane.”

Kreste O ile A bolela hore, qetellong ea litlhoriso tse kholo tsa bopapa, letsatsi le tla fifala, le khoeli e tla hloka khanya. Kamorao ho tseo linaleli li tla oa leholimong. Eaba O re, “Le lona ha le bona lintho tsena tsohle, tsebang hore o haufi, o monyako.” Matheu 24:33. Ho bao ba bonang lipontšo tsena, Kreste O re, “Molōkō ona o ke ke oa fela, tseo tsohle li e-s’o etsahale.” Lipontšo tsena li se li hlahile.

‘Me joale re tseba ka ‘nete hore ho khutla ha Morena ho se ho le haufi.

Kreste O tla ka khanya e kholo. O tla felehetsoa ke matšoele-tšoele a mangeloi a khanyang. O tla tla ho tsosa bafu le ho fetola bahalaleli ba phelang; le ho tldtlisa ba Mo ratileng ‘me ba bōlōka le melao ea Hae, ‘me O tla ba nkela ho Eena. Ha re sheba bafu ba rōna, re ka nahana ka letsatsi leo ha “bafu ba tla tsoha ba se ke ba boela ba bola, ‘me rōna re tla fetoha.” I Bakorinthe 15:52. Morena O tla hlakola meokho eohle mahlong a rōna, ‘me O tla re hlahisa “kapel’ a tlōtla ea hae re se na sekoli, re nyakaletse.” Juda 24. “E tle e re ha tsena li qala ho etsahala le pashalle, le phahamise lihlooho, hobane topollo ea lōna e atametse.”

Empa Kreste O ile A bolela ka kotloloho hore Eena A ke ke A tsebisa letsatsi kapa hora eo A tlang ho khutla ka Eona. Nako e nepahetseng ea ho tla ha Hae la bobeli ke lekunutu la Molimo A ‘notši.

### **Bokhopo Bo Boholo Ba Matsatsi A Ho Qetela**

Kreste A tsoela pele ka hore, “Joaloka mehleng ea Nōoe, ho tla ba joalo ha Mor’a Motho a e-tla. Mehleng eo, e bileng pele ho moroallo oa metsi, batho ba ne ba e-ja, ba e-noa, ba nyala, ba nyalisa, ho fihlela letsatsing leo Nōoe a neng a kene arekeng ka lona. Ha baa ka ba tseba ho fihlela moroallo oa metsi o fihla, o ba hōhōla kaofela. Ho tla ha Mor’a Motho le hona ho tla ba joalo.”

Ho ne ho le joang matsatsing a Nōoe? “Joale Morena a bona hore bokhopo ba batho lefatšeng bo boholo haholo, le hore mehopollo ea lipelo tsa bona e tletse bobo kamehla.” Tsimoloho 6:5. Batho ba phetseng lefatšeng pele ho moroallo oa metsi, ba ne phela ka litakatso le menahano ea bona e fosahetseng. ‘Me ka lebaka la bokhopo ba bona ba ile ba timetsoa. Le kajeno lefatše le latela mekhoha e tšoanang le ea mehleng eo. Ba tlolang molao oa Molimo ba tlatsa lefatše ka bokhopo. Mehara ea bona, ho hloka boitšoaro le mekhoha e litšila e sa thapeng li ata ka potlako, li tlatsa tšenyeho lefatšeng lohle.

Kreste A boela A re, “‘Me ka baka la ho ata ha bokhopo lerato la ba bangata le tla qepha. Empa ea tla tiisetša ho fihlela qetellong, eena o tla pholoso. Molaetsa ona o molemo oa ‘Muso o tla phatlalatsoa

lefatšeng lohle, e le bopaki ho lichaba tsohle, ‘me ebe joale ho tla bofelo.’ Paulosi o ile a bua ka molaetsa o molemo, o “phatlalletsoang libōpuoa tsohle tse tlas’ a letsatsi,” pele ho tšenyeho ea Jerusalema. Bakolose 1:23. Le hona joale, molaetsa o molemo, o sa feleng, o tšoanetse ho bolelloa “baahi ba lefatše, ba mefuta eohle, le ba melōko eohle, le ba lipuo tsohle, le ba lichaba tsohle.” Tsenolo 14:6. Mona, Krete ha A bolele hore lefatše lohle le tla sokoloha, empa O bolela hore “Molaetsa ona o molemo oa ‘Muso o tla phatlalatsoa lefatšeng lohle, e le bopaki ho lichaba tsohle, ‘me ebe joale ho tla bofelo.’” Ka ho bolela Molaetsa ona o molemo lefatšeng lohle, re kenya letsoho ho potlakisa ho khutla ha Morena. Ha rea lokela ho lebella feela, empa re lokela ho potlakisa ho tla ha letsatsi la Molimo. Sheba II Petrose 3:12. Hoja kereke ea phethisa thomo eo Morena A e fileng eona, lefatše lohle le ka be le ile la fumana temoso ena e sale ka nako, ‘me Jesu A kabe A se A khutlile.

### **Ntho E Ka Pheleloang**

Erekaha re sa tsebe nako ea ho khutla ha Morena, re lemosoa hore re falimehe. Sheba Luka 12:37. Bao ba falimehetseng ho tla ha Morena ha ba a lebella ho lula feela ba sa etse letho. Ba hloekisa meea ea bona ka ho mamela ‘nete. Ba kopanya phalimeho ena e chatsi le mosebetsi oa ‘nete. Cheseho ea bona e thahasella ho [430] ikopanya le mahlale a leholimo ho sebeletsa ho pholosa meea. Ba phatlalatsa ‘nete e amanang le nako ena ka mokhoa o khethehileng. Joalokaha Henoke, Nōoe, Aborahama le Moshe, e mong le e mong oa bona a ile a bolela ‘nete e lokelang nako ea hae, le bahlanka ba Krete ba mehleng ena ba tla fana ka temoso e khethehileng, e lokelang moloko oa bona.

Empa Krete A boela A hlahisoa sehlopha se seng hape, A re, “Empa haeba e le mohlanka ea khopo, o tla re ka pelong: ‘Mong’ a ka o lieha ho tl,’ ebe o qala ho otlala balekane ba hae ba bohanka, ‘me a je, a noe le matahoa. Mong’ a mohlanka eo o tla tla ka letsatsi leo mohlanka a sa le lebellang, le ka nako eo a se e tsebeng.

Mohlanka ea khopo ha a latole hore Krete O tla tla. Empa ka liketso tsa Hae le mantsoe a Hae, o bolela hore ho khutla ha Morena ho liehile. O hlakola kholiseho e likelellong tsa ba bang, ea hore Morena O tla kapele. Tsusumetso ea hae e tiiseletsa batho tahlehong



ea bona le borokong. Likelello tsa bona li tlala litakatso tsa lefatše le mehopollo e bolileng. Mohlanka ea khopo o qala ho otlala balekane ba hae ba bohanka, a qosa, a bile a tsoa bao ba tšepahalang ho Moren'a bona. O ikamahanya le lefatše, 'me lefatše le mo tšoasa ka leraba. "Mong'a mohlanka eo o tla tla ka letsatsi leo mohlanka a sa le lebellang, le ka nako eo a sa e tsebeng, 'me O tla mo khabelaka, a 'mee har'a baikaketsi."

Ho tla la bobeli ha Krete ho tla makatsa baruti ba bohata. Ho bohle ba entseng lefatše lena lehae la bona, letsatsi la Morena le tla ba tšoasa, joaloka lesholu le khukhunang. Lefatše le tletse lintoa, le tletse boithabiso bo hlokang boMolimo 'me le robetse le itširelelitse ka matla a nama. Batho ba tšeha litemoso. Ba re, "La hosasane le tla 'ne le ke la kajeno, mohlomong le tla ba letle ho feta lena!" Esaea 56:12. "Re tla teba haholo boithabisong ba lefeela." Empa Krete, O re, "Ke tla joaloka lesholu." Tsenolo 16:15. Ha mosomi a ntse a ikhantša, ha litloaelo tsa ho bokella chelete li ntse li tsoela pele ho sa natsoe molao, ha moithuti a chesehelle ho batla tsebo linthong tsohle, empa a sa tsotelle Bibe, eba joale Krete O tla joaloka lesholu.

Lipontšo tsa linako li bolela ho hong ho tlang. Liketsahalo tse tlang li etelelsa liriti tsa tsona pele. Moea oa Molimo O ntse O tloha lefatšeng, 'me tlokotsi e latela tlokotsi e 'ngoe. Tsireletso e kae? Ha ho polokeho ho letho leo e leng la batho kapa la lefatše.

[431]

Hona le batho ba lebeletseng, ba falimehileng, 'me ba sebeletsa ho tla ha Moren'a rōna. Athe sehlopha se seng se eme ka lithoko tlas'a bolaoli ba mokoenehi e moholo oa pele. Kotsi ena e ntse e re nanarela butle-butle. Letsatsi lea chaba leholimong, 'me le tsamaea ka tsela ea lona ea kamehla. Batho ba ntse ba eja, ba e-noa, ba lema 'me ba aha. Bahoebi ba ntse ba reka, ba rekisa. Batho ba ntse ba loanela litulo tse phahameng. Barati ba menate ba ntse ba khobokana matlung a menyakoe, ba becha lipere, ba bapala le lipapali tsa ho hlōlisana le fafi. Menyaka e ntse e eketseha, empa nako ea ho koaloha ha mohau eona e ntse e khutsufala ka potlako, 'me mosebetsi o mong le o mong o tla isoa kahlong ea ho qetela. Satane o akhetse mahlahana a hae kaofela tšebetsong, hore a thetse batho, a ba phathahanye, ba bang a ba tšoase ka leraba, ho fihlela monyako oa mohau o koaloha ruri.

“Falimehang ke hona, le rapele ka linako tsohle, hore le tle le be le matla a ho phonyoha tsena tsohle, tse seng li tla etsahala, le a ho ema pel’a Mor’a Motho.”

## **KHAOLO EA 70—KRESTE O IKAMAHANYA LE MAFUTSANA LE BA MATSOENYEHONG**

[432]

*[E itšetlehile ka Matheu 25:31-46.]*

Mohla Mor'a Motho a tlang,...o tla lula teroneng ea hae ea botlotlehi. Lichaba tsohle li tla phuthehela pel'a hae, 'me o tla khetha ba bang ho ba bang.' Krete O ile A tšoantšisetsa liketsahalo tsa letsatsi le leholo le kahlōlo joalo. Lichaba ha li bokane kapele ho Eena, e tla be e le lihlopha tse peli feela, 'me qetello ea tsona ea bo sa feleng e tla laoloa ke mesebetsi eo ba e entseng kapa ba hlotsoeng ho e etsetsa Morena, ha ba sebetsana le bafumanehi le ba mahlomoleng.

Ka tsatsi leo, Krete ha A na ho hlahisetsa batho mosebetsi o moholo oo A O entseng, oa ho fana ka bophelo ba Hae; empa O tla ba hlahisetsa mosebetsi oa botšepahi oo ba Mo etselitseng oona. O tla re, "Tloong, lona ba hlohonolofalitsoeng ke Ntate, le rue 'Muso oo le o lokiselitsoeng haesale lefatše le theoa, hobane ke ne ke lapile, la mpha lijo; ke nyoriloe, la mpha ka noa; ke le moeti, la nkamohela; ke hlobotse, la nkapesa; ke kula, la ntlhoela; ke le chankaneng, la nchakela." Empa bao ba Krete a ba babatsang, ha ba tsebe hore ba kile ba Mo sebeletsa. Ha ba Mo botsa ba maketse, Krete O araba ka hore, "Seo le se etselitseng e mong oa bao ba banyenyane ho bana beso, le se etselitse 'na.'"

Jesu O re, "Ha le bona batho bohle ba hlorisoang ka lebaka la lebitso la Ka le bona 'Na.' Le ba sebuletse joalokaha le ne le tla sebeletsa 'Na. Bohle ba tsoaletsoeng lelapeng la leholimo, ke bana babo Morena oa rōna ka mokhoa o khethehileng. Lerato la Krete le tlamahanya litho tsa lelapa la Hae hammoho. "Mang le mang ea nang le lerato o tsoetsoe ke Molimo, 'me o tseba Molimo." 1 Johanne 4:7.

[433]

Bao Krete A ba buellang kahlōlong, ke bao mohlomong ba sa kang ba tseba thutoMolimo empa ba ile ba thabela melao ea Hae. Esita le har'a bahedene ho ntse ho e-na le ba bang ba nang le lipelo

tse molemo. Le pele mantsoe a bophelo a fihla litsebeng tsa bona, ba ile ba etsa setsoalle le baruti, ba itella bona esita le ka maphelo a bona. Bao ba rapelang Molimo ka ho se utloisise, ba sa kang ba isetsoa leseli ke batho ba bang, ba ke ke ba timela. Le hoja ba sa ka ba tseba molao o ngoliloeng oa Molimo, ba entse se batloang ke molao. Mesebetsi ea bona e supa hore Moea o Halalelang o amme lipelo tsa bona kahoo ba amoheloa e le bana ba Molimo.

Batho ba lichaba ba maemong a tlase ba tla makala hakaakang, ha ba utloa mantsoe a tsoang molomong oa Mopholosi, ha A re, “Seo le se etselitseng e mong oa bao ba banyenyane ho bana beso, le se etselitse ‘na.”

Empa lerato la Krete ha le khethe, le anetse bohle. Ke Mor’a Motho kahoo Ke ngoan’abo mora le morali e mong le e mong oa Adama. Balateli ba Hae ha ba lōkela ho ikutloa e le ba khethohileng ho batho ba lefatše lena le timelang. Le bona ke karolo ea batho ka kakaretso, ke bana babo baetsalibe, joalokaha e le bana babo bahalaleli. Lerato la Krete le akarctsa baetsalibe kaofela, ‘me molemo o mong le o mong o ka etsetsoang ho phahamisa moetsalibe, o amoheloa joalokaha eka o entsoe ho Krete.

Mangeloi a leholimo a romeloa ho tla sebeletsa bao e tlang ho ba majalefa a topollo. Ha ho e-s’o tsebahale hore na ke bo mang ba tla arolelana lefa la leholimo le balalaleli khanyeng, empa mangeloi a potoloha kahohle lefatseng, ho thoba lipelo tsa ba hlomohileng le ho sireletsa ba hlorisoang, esita le ho hapela batho ho Krete. Ha ho motho eo mangeloi a mo fetang feela. Hobane Molimo ha A ee ka tšobotsi ea batho.

Ha u bula menyako ea hau, ho amohela batho ba Krete ba hlokang le ba mahlomoleng, u amohela mangeloi u sa bone. A tlisa moea oa khalalelo, le thabo le khotso. Ketso e ‘ngoe le e ‘ngoe ea mohau e fana ka ‘mino leholimong. Ntate ea teroneng ea Hae, O balella basebetsi ba hlokang boikhabo har’a matlotlo a Hae a bohlokoa bo bohlohali.

[434]

Ba ka lehlakoreng le letšehali la Krete, e leng ba Mo lahlileng ka ho se tsotelle batho ba hlokang le ba mahlomoleng, ba ne ba sa hlokomele molato oa bona. Ba ile ba icheba bo-bona, ‘me ba se ke ba tsotella bohloki ba batho ba bang.

Molimo O file barui maruo e le hore ba tle ba thuse bana ba Hae ba hlokang, empa hangata haholo ba iphapanyetse litlhoko tsa ba

bang. Ha ba utloisise liteko le mathata a oelang mafutsana, 'me mohau oa nyamela lipelong tsa bona. Maruo ao Molimo A ba fileng 'ona hore ba thuse ba hlokang ka 'ona, ba a sebelisa ka bonyollo ba boikhothomoso le boikhabo. Bafutsana ba tinngoa menyetla ea thuto eo ba loketseng hoba le eona ka ha mehauhelo ea Molimo; hobane O fane ka litsela tse ngata tsa hore ba tšelisoe 'me ba tlatsetsoe ka tse hlokahalang tsa bophelo. Ba utloa bofutsana bo notlang maphelo a bona, 'me hangata ba oela molekong oa ho ba mōna, le ho tlala lipelaelo tse khopo.

### Mokhoa Oa Ho Se Tsotelle Krete

Empa Krete O bona tsohle, 'me O re, E ne e le 'Na ea na beng A lapile, 'me A nyoriloe. E ne e le 'Na moeti. Ha lōna le ithabisa, tafole ea lona e tletse lijo, 'Na ke ne ke bolaoa ke tlala ka leqhofeng la ka. Ha Iona le phomotse ha monate matlung a lona a matle, 'Na ho ne ho se moo nka samelang hlooho ea Ka teng. Ha le ntse le inyakalatsa, Ke ne Ke sotleha teronkong. Ha le ne le qhetsolela mafutsana a lapileng makumane a bohobe, 'me le ba apolela liaparo tse thocholehileng hore ba sireletse 'mele ea bona serameng se bohale, na le ne le hopola hore tseo tsohle le li etsetsa Morena oa khanya? Ka matsatsi 'ohle a ho phela ha lōna, ke ne ke le pel'a lona, ke le sabopehong sa bana ba hlophehileng, empa ha lea ka la ea ho Ntata. Le ile la sitoa ho etsa setsoalle le 'Na. Ha ke le tsebe.

Ba bangata ba etela libaka tseo Krete A ileng A phela ho tsona ha A le lefatšeng, ho sheba leoatle leo A neng A rata ho ruta A le lebopong la lona, le ho boha maralla le lithota tseo A neng A rata ho li boha. Empa ha ho hlokahale hore re be re etele Nazaretha kapa Bethani e le hore re tsamae mehlaleng ea Krete. Re ka fumana maputulo a maoto a Hae pel'a mealo ea bakuli, le ka maqhofeng a bofutsana, le libakeng tsohle moo ho nang le batho bao lipelo tsa bona li hlokang matšelisiso.

E mong le e mong ho na le seo a ka se etsang. Batho ba baloang ka likete tsa likete ba bofiloe ke ho hloka tsebo le sebe, ha ba e-s'o ka ba utloa ka lerato leo Krete A ba ratang ka lona. Molao oa Krete oa bophelo, oo ka oona motho e mong le e mong a tlang ho ema

kapa a oele kahlolong, o re, “Ha ho le joalo, tsohle tseo le ratang hore batho ba le etse tsona, le lona le ba etse tsona.” Matheu 7:12.

Mopholosi O fane ka bophelo ba Hae, e le ho theha Kereke e tla tseba ho hlokomela meea e lekoang lefatšeng lena. Balumeli leha e ka ba mafutsana, ba sa ruteha, ba sa tsebahale, empa ka Krete ba ka phetha mosebetsi ho bahaisani ba bona, esita le “linaheng tse hole-hole”, ‘me litholoana tsa oona li tla hlōla ka ho sa feleng. Ka baka la ho se tsotelle mesebetsi ena, bongata ba barutuo a bacha ha ba na tsoelo-pele maiphihlelong a bona a boKreste. Matla a bona a mangata, ao hangata a fetohang sesosa sa likotsi, a ne a ka sebelisoa ho ba melatsoana ea mahlohonolo. Ha ba sebetsa ka ho itella ho etsetsa ba bang molemo, bo-’na ba ka fela. Ba ikabetseng ho sebeletsa ba bang, ba ke ke ba hlorela menate le boithabiso, kapa se fetolang tsela eo ba phelang ka eona. Taba e kholo eo ba e thahasellang e tla ba mokhoa oa ho pholosa meea e e eang timelong.

E le hore re kopane re be bana ba lelapa le le leng, Morena oa khanya O ile A iketsa ea tšoanang le rōna. “Le ratane joalokaha ke le ratile.” Johanne 15:12. Ha re rata batho ba lefatše joalokaha A ba ratile, re tla be re phethile thomo ea Hae ho rōna bohle. Re tla be re lokeloa ke ‘Muso oa leholimo kaha ‘Muso oa leholimo o tla be o le ka lipelong tsa rōna. Mohla letsatsi la kahlōlo, batho ba sa sebeletsang Krete, ba ileng ba hōhōleha feela, ba nahana bo-bona feela, Moahloli oa lefatše lohle o tla ba bea hammoho le ba sebelitseng bokhopo.

Motho e mong le e mong ho na le seo a se tšepetsoeng. E mong le e mong o tla botsoa ke Molisa e moholo, A re, “O kae mohlape oo u neng u o lisa, mohlape oa hao o neng o khahleha?” Jeremia 13:20.

## KHAOLO EA 71—MOHLANKA OA BAHLANKA [436]

*[E itšetlehile ka Luka 22:7-18, 24; Johanne 13:1-17.]*

Kreste O ne A phuthehile le barutuo ba Hae ho ketekela Paseka. Mopholosi O ne A tseba hore nako ea Hae e fihlile; Eena ka sebele e ne e le konyana ea Paseka ruri, ‘me ka letsatsi leo ho jeoang Paseka Eena O ne A tla etsoa sehlabelo. Lihoranyana li se kae li ne li sa Mo saletse hore A li sebelise molemong oa barutuo ba Hae.

Bophelo ba Kreste e bile ba tsebeletso e hlokang boikhabo. Polelo e reng, “ha a ea tlela ho sebeletsoa, empa ho tla sebeletsa,” (Matheu 20:28) e bile thuto ea liketso tsa Hae tsohle. Empa barutuo ba ne ba e-s’o ithute thuto ena. Ka Paseka ea ho qetela Jesu O ne A khathatsehile. Moriti o ne o aparetse sefahleho sa Hae. Barutuo ba hlokomela hore ntho e teng e Mo lutseng haboima kelellong.

Eitse ha ba bokane tafoleng, A re, “Ke lakalitse haholo ho ja Paseka ena le lona, ke e-s’o hlōkōfatsoe, hobane kea le bolella hore ha nka ke ka e ja ho fihlela e phethahatsoa ‘Musong oa Molimo.’ A nka senoelo, a leboha, a re: ‘Se nkeng, ‘me le se sielane, hobane kea le bolella, ho tloha joale ha nka ke ka hlola ke e-noa se tsoang tholoaneng ea morara ho fihlela ‘Muso oa Molimo o e-tla.’”

Kreste joale O ne A atametse sefapano, ‘me bohlōkō bo ne bo harasoanya pelo ea Hae. O ne A tsèba hore O tla furalloa; A tseba hore O tla bolaoa ka tsela e nyelisehang haholo e neng e ahlōla lisenyi. A tseba ho hloka teboho le bokhopo ba bao A tiileng ho ba pholosa. A tseba hore ho ba bangata sehlabelo sa Hae e tla ba lefeela. Ka ho tseba tsohle tse ka pele ho Eena, O ne A ka ‘na A imeloa ke monahano oa nyeliso le mahlomola a Hae. Empa ha A ka A inahana bo-Eena. Ho hlokomela barutuo ba Hae e ne e le eona taba ea sehlooho kelellong ea Hae.

Mantsiboeng ao a ho qetela, Jesu O ne A na le tse ngata tseo A ka ba bolellang tsona. Empa A hlokomela hore ba ka sitoa ho utloisisa seo A se bolelang. Ha A ntse A ba talimile mahlong, mantsoe a ne a hanetse molomong oa Hae. Nako ea feta ho khutsitse.

Barutuo a ba tsieleha. Ha ba talimana mahlo a bona a ne a tletse mona le lipelaellano.

“Khang ea e-ba teng har’a bona, ea hore na ke ofe ho bona ea ka nkoang e le e moholo.” Pelaelo ena ea soabisa le ho hlaba Jesu. E mong le e mong o ne a laba-labela setulo se holimo-limo ‘musong. Ka hobane Jakobo le Johanne ba lekile ho kōpa litulo tse holimo-limo, ba leshome ba batla ba arohana. Judase o ne a le thata haholo-holo ho Jakobo le Johanne.

Ha barutuo a ba kena ka kamoreng a kaholimo, Judase a ikhohla pel’a Krete ka letsohong le letšehali; Johanne o ne a le ka ho le letona. Judase o ne a ikemiselitse hore, haeba ho na le setulo se phahameng ka ho fetisisa, o tla se fumana.

Ha hlaha taba e ‘ngoe e bakang qabang. E ne e le tloaelo hore mohlanka a hlatsoe maoto a baeti. Ka lekhetlo lena ho ne ho lōkisitsoe nkho, sekotlolo le thaole, empa ho ne ho se mohlanka, ‘me barutuo a ba ne ba tšoanela ho phetha karolo eo. Empa e mong le e mong o ne a sa ikemisetse ho phetha karolo ea bohanka. Kaofela ba bontša boiphapanyo bo phahameng. Ka ho khutsa ba hana ho ikokobetsa.

Ekaba Krete O ne A ka bōlōka joang meea ena e haulanang, moo Satane a ke keng a e hlōla? O ne A ka bontša joang hore ho ipolela feela hore ke barutuo a ha se hona ho ba etsang hore e be barutuo a? O ne A ka hotetsa lerato ka lipelong tsa bona joang, ho ba thusa hore ba utloisise seo A neng A labalabela ho ba bolella sona?

[438] Jesu A lebella nako e telele ho bona hore na ba tla etsa joang. Qetellong, Eena, Mosuo e oa leholimo, A phahama. A hlōbōla kōbo e kaholimo, ka ha e ne e ka Mo sitisa, A nka lesela. Barutuo a ba lebella ba khutsitse ho bona hore na ho tla etsahalang. “A nt’o kha metsi, ‘me a qala ho hlatsoa maoto a barutuo a le ho a hlakola ka thaole eo a neng a itlamile ka eona.” Ketso ena ea tutubolla mahlo a barutuo a. Lipelo tsa bona tsa tlala lihlong tse kholo, ‘me ba itemoha bocha.

Kreste A ba fa mohlala oo ba neng ba ke ke ba o lebala. Lerato la Hae ho bona le ne le ke ke la sisinngoa habonolo. O ne A hlokometse ka botlalo bo-Molimo ba Hae; empa O ne A beheletse korone ea Borena ka thōko, ‘me a nkile sebopeho sa bohanka. E ‘ngoe ea liketso tsa ho qetela bophelong ba Hae lefatšeng, e bile ho itlama joaleka mohlanka, ‘me a phetha tšebetso ea bohanka.



Pele ho Paseka Judase o ne a qetile boitlamo ba ho nehela Jesu matsohong a baprista le bangoli. Barutuo a ba ne ba sa tsebe letho ka morero oa Judase. Ke Jesu feela ea neng A ka bala sephiri sa hae, empa A se ke A mo senola. A mo utloela bohlokō bo boholo, joalekaha A ne A utloela Jerusalema motse o ahlōtsoeng.

Matla a hohelang a lerato leo a ile a utloahala ho Judase. Ha matsoho a Mopholosi a hlatsoa maoto a hae a litšila, ‘me a hlakola ka lesela, pelo ea Judase ea kenoa ke cheseho ea ho bolela sebe sa hae. Empa a sitoa ho ikokobetsa. A thatafatsa pelo ea hae ntlheng ea pako, ‘me a boela a laoloa ke litšusumetso tsa khale. Judase joale a khopisoa ke ketso ea Jesu ea ho hlatsoa maoto a barutuo a Hae. A nahana hore, haeba Jesu O ikokobetsa joalo, A ke ke ea ba morena oa Iseraele. Kamora’ hoba a ‘mone A itheotse, joalekaha a ne a lekanya, a tiea morerong oa hae oa ho Mo lahla, ‘me a itjoetsa hore o ne a thetsehile. A tšoaroa ke modemona, ‘me a ikemesetsa ho phetha mosebetsi oo a neng a o lumetse, oa ho eka Morena oa hae.

### Mohlolo O Moholo Oa Lipelo Tse Fetohileng

Judase, ha a khetha sebaka sa hae tafoleng, o ne a lekile ho ipeha pele. Johanne a salla qetellong. Empa Johanne hona ha a ka a ho nka e le khalemelo kapa nyeliso. Ha ho fihla nako ea Petrose, o ile a khotsa ka ho makala, a re, “Morena, na ke uena u ka ntlhatsoang maoto?” Boikokobetso ba Krete ba mo roba pelo. A tlaloa ke

tšoabo ha a hopola hore e mong oa barutuo a o ne a sa phethe tšebeletso eo. Krete A re: “Seo ke se etsang ha u se tsebe hajoale, empa u tla se utloisisa hamorao.” Petrose a sitoa ho mamella ho bona Morena oa hae, Mora oa Molimo, A etsa tšebetso ea mohlanka. Moea oa hae oohle oa sisimoloha khahlanong le boikokobetso bona. A bua a tiisa ka matla a re, “Ha u ka ke ua ntlhatsoa maoto le khale!”

Krete A re, “Ha ke sa u hlatsoe, ha u na kabelo ho ‘na.” Krete O ne A tlike ho hlatsoa pelo matheba a sebe. Petrose o ne a hana tlohekiso e phahameng e neng e kopantsoe le e lasana. Hantle o ne a hana Morena oa hae. Ha se ntho e eisehang ho Morena, ho Mo lumella ho sebeletsa tlohekiso ea rōna.

Petrose a inehela. Ho arohana le Krete e ne e ka ba lefu ho eena. A re, “Morena, e se be maoto a ka feela, empa le ‘ona matsoho le

[439]

hlooho!’ Jesu A re ho eena: ‘Ea totseng o hloekile kahohle, ‘me ha a sa hloka ho hlatsuoa haese maoto feela. Lona le hloekile.’”

Mantsoe ana a bolela ho fetang tlhoekiso ea ‘mele. Kreste O bua ka tlhoekiso e phahameng ‘me e tšoantšitsoe ka e tlase. Ea itlhatsoitseng o hloekile empa ka nakoana e seng kae maoto a se a hloka ho hlatsuoa hape. Joale Petrose le bana babo ba ne ba hlatsoitsoe selibeng se seholo se buletsoeng sebe le ho se hloeke. Empa meleko e ne e ba khannetse bobeng ‘me ba ne ba se ba boetse ba hloka mohau oa Kreste o hloekisang.

Kreste O ne A lakatsa ho hlatsoa bora, mona, le boikhōhōmōso lipelong tsa bona. Hona e ne e le hona ha bohlokoa haholo ho feta ho hlatsoa maoto a bona a lerole. Ka moea oo ba neng ba na le oona, ho ne ho se le ea mong ea neng a lōketse selallo le Kreste. Ho fihlela ba fihletse boemo ba boikokobetso le lerato, ba ne ba sa lōkela ho ba le kabelo tšebeletsong ea sehopotso, eo Kreste A neng A le lekatheng la ho e theha. Boikhōhōmōso le boipatlo li tsoala liphapang, empa tsena tsohle Jesu O ile A li hlatsoa ha a ba hlatsoa maoto. Phetoho ea maikutlo ea e-ba teng. Jesu O ne A ka re, “Le hloekile.” Joale ho ne ho na le kopano ea lipelo, le lerato e mong ho e mong. Kantle ho Judase, e mong le e mong o ne a itokiselitse ho suthela ba bang sebaka se ka holimo-limo. Joale ba ne ba ka amohela mantsoe a Kreste. Le rona re hlatsoitsoe maling a Kreste, empa hangata bohloeki ba pelo boa silafatsoa. Re lokela ho tla ho Kreste mohaung o hloekisang. Ke hangata hakaakang re tlisang lipelo tsa rōna tsa sebe le ho bola kopanong le pelo ea Kreste? Bohale ba rōna bo bohlokō joang ho Eena le mafeela a rōna, le boikhōhōmōso ba rōna! Empa bofokoli bohle ba rōna le litšila, re lōkela ho li tlisa ho Eena. Ke Eena feela ea ka re hlatsoang, ra hloeka.

[440]

### **Ke Hobaneng Kreste A Ileng A Qala Tsebeletso Ena Ea Borapeli**

Kreste hoba A qete ho hlatsoa maoto a bona a re, “Na le utloisisa seo ke se entseng ho Iona? Le mpitsa ‘Moruti’ le ‘Morena’, ‘me le bolela hantle, hobane ke eena. Joale he, ha ke le hlatsoitse maoto, ‘na ke le Morena le Moruti, le lōna le tšoanetse ho hlatsoana maoto. Ke le beetse mohlala, hore le lōna le tle le etse joalokaha ke le entse.

Kannete-nete, kea le bolella, mohlanka ha a moholo ho mong'a hae, le morōmuoa ha a moholo ho ea mo rōmileng.”

Hore batho ba Hae ba tle ba se lahlehe ke boikhōhōmōso bo teng pelong ea nama, Krete ka sebele O fane ka mohlala oa boikokobetso. Eena ka sebele, A lekana le Molimo, A iketsa mohlanka ho barutuo ba Hae. Eena eo mangole 'ohle a Mo khumamelang, A khumama fatše ho hlatsoa maoto a bao ba 'mitsang Morena. A hlatsoa maoto a moeki oa Hae.

Molimo ha A iphelele. Ka linako tsohle O ntse A sebeletsa ba bang. Jesu O filoe ho ema ka sehloohong sa botho, hore ka mohau oa Hae, A tle A rute hore na ho boleloang ka ho sebeletsa. O etselitse bohle, a sebeletsa bohle. Kahoo O phetse molao oa Molimo, 'me ka mohlala oa Hae, O bontšitse hore na re lokela ho o hlonepha joang.

Ha A qetile ho hlatsoa maoto a barutuo, Jesu A re, “Ke le beetse mohlala...hore le lōna le tšoanetse ho hlatsoana maoto.” Ka mantsoe ana, Krete O ne A hloma tsebeletso ea borapeli. Ka ketso ea Morena oa rōna, moketjana oo oa boikokobetso o ile oa etsoa tšoanelo e halalelang. E ile ea lōkela ho hlokomeloa ke barutuo, hore kamehla ba tle 'ne ba hopole lithuto tsa Hae tsa boikokobetso le bohlanaka.

Tsebeletso ena ke boitokokisetso bo khethiloeng ke Krete bakeng sa tsebeletso ea selallo. Ha boikhōhōmōso, liphapang le liqhoebeshano tsa boholo li sa le teng, ha re e-s' o lōkele ho amohela selallo sa 'mele oa Hae le mali a Hae. Ke ka hona Jesu A khethileng hore sehopotso sa boikokobetso ba Hae se phethoe pele.

[441]

Ka ho motho ho na le tšekamelo ea ho inahana a le holimo ho ngoan'abo, ho sebeletsa bo-'na, ho ipatlela litulo tse ka holimolimo; 'me hangata hona ho tsoala lipelaelo tse khopo le lehloeo. Tsebeletso e etellang pele selallo sa Morena ke ea ho ntša motho boikhōhōmōsong ba hae, a theohe boiphahamisona ba hae, a theohele boikokobetsong ba pelo bo tla mo khannela hore a sebeletse ngoan'abo. Molebelli ea Halalelang, ea tsoang leholimong, O teng, ho etsa hore nako ena e be ea ho itlhatlhōba meea, ho kholiseha ke sebe, le tiiso ea hore libe li tšoarctsoe. Krete O teng ho fetola tsela ea maikutlo a neng a tsamaea ka tsela ea boikhōhōmōso.

Ha re ntse re nahana ka boikokobetso ba Mopholosi ho rōna, ho nyoloha letoto la mehopollo, mohopollo ea ho lōka ha Molimo, le molemo le thuso tsa metsoalle lefatšeng. Mahlohonolo ao re a

lebetseng, melemo e lebetsocng, tsohle li khutlela kelellong. Bofokoli ba semelo, litšoanelo tse sa phethoang, le ho hloka teboho, le ho sa tsotelle, tsohle lia hopoloa. Kelello ea matlafatsoa hore e robe litšitiso tsena tsohle tse bakileng bora. Ho ipoleloa libe, ‘me lia tšoarelola. Mohau oa Krete o kokobetsang o kopanya lipelo ‘moho. Ho tuke takatso ea bophelo ba moea bo phahameng. Moea o tla phahamisoa. Re ka ja selallo re tletse khanya ea ho lōka ha Krete ka tempeleng ea moea.

Ho bao ba amohetseng moea oa tšebeletso ena, e ke ke ea e-ba mokcte oa lefeela. Ha feela tsebeletso ena e phchiloe ka nepo bana ba Molimo ba etsa selekane, hore bophelo ba bona bo tla neheloa tšebeletsong e hlokang boikhōhōmōso, e mong ho e mong. Lefatše le tletse batho ba hlokang tsebeletso ea rōna. Bao ba buisaneng le Krete kamoreng e kaholimo, ba tla tsoa ho ea sebeletsa joalekaha A entse.

“Ha le tseba tsena, le lehlohonolo ha le ka li etsa.”

## KHAOLO EA 72—SELALLO SA MORENA SEA THŌOA

[442]

*[E itšetlehile ka Matheu 26:20-29; Mareka 14:17-25; Luka 22:14-23; Johanne 13:18-30.]*

Na ke amohetsoe ho Morena seo ke le neileng sona, e leng hore, ka bosiu boo Morena Jesu a ileng a èkoa ka bona, o ile a nka bohobe, a leboha, a bo ngoatha, a re: ‘Hona ke ‘mele oa ka, o fanoang ka baka la lona. Etsang hona ho nkhōpōla.’ Ka mokhoa o joalo, ha ho se ho laletsoe, a nka senoelo, a re: ‘Senoelo sena ke selekane se secha se tiisoang ka mali a ka. Kamehla ha le e-ja bohobe bona, ‘me le noela senoelong sena, le phatlalatsa lefu la Morena ho fihlela a khutla.’ 1 Bakorinthe 11:23-26.

Kreste, Konyana ea Molimo, O ne A le lekatheng la ho felisa litloaelo tsa meetlo le mekete, tseo ka lilemo tse 4000 li neng li ntse li supa lefu la Hae. Paseka, mokete oa bochaba oa Majuda e ne e tla feta, e fetele ruri. Tsebeletso eo Kreste a neng a e qalile, e ne e tla lateloa ke balateli ba Hae linaheng tsohle le mengoaheng eohle.

Paseka e ne e hlongoe e le sehopotso sa tokoloho ea Israele ha a e-tsoa Egepete bokhobeng. Selallo sa Morena sa fanoa e le ho hopotsa ka tokoloho e kholo, e hlahisitsoeng ka lefu la Kreste. Tsebeletso ena, ke mokhoa oo ka oona ho nchafatsoang likellong tsa rōna, mosebetsi o moholo oo A re etselitseng ona.

Mehleeng ea Kreste, batho ba ne ba ja Paseka ba sekame. Baeti ba ne ba robala holim’a litulo tse kholo ba pota tafole, ‘me ba sebelisa letsoho le letona ho ja. Ka mokhoa oona moeti o ne a ka beha hlooho ea hae sefubeng sa ea lutseng ka hloohong ho eena. E be maoto a hlahella kathoko ho setulo, a tle a hlatsuo ke ea ntseng a potoloha kathoko ho lesakana.

Kreste O ne A le teng tafoleng moo ho neng ho tekiloe lijo tsa Paseka. Mahobe a se nang litomoso a ne a le teng. Veine ea Paseka, e se lomosoang, e ne e le tafoleng. Kreste A seblisa lipontšuo tsena ho emela sehlabelo sa Hae se se nang sekoli. Sheba 1 Petrose 1:19.

[443]

“Eare ha ba ntse ba e-ja, Jesu a nka bohobe, ‘me hoba a boke, a bo ngoatha, a ba nea bona, a re: ‘Nkang: hona ke ‘mele oa ka.’ A nka senoelo, a leboha, a nt’o ba nea sona, ‘me bohle ba noela ho sona. A re ho bona: ‘Hona ke mali a ka a selekane, a tla tšolleloa ba bangata. Kannete kea le bolella, ha nka ke ka hlola ke e-noa se tsoang tholoaneng ea morara, ho fihlela letsatsing leo ke tla se noa se le secha ‘Musong oa Molimo.’”

Judase, moeki, a amohela ho Jesu lipontšuo tsa ‘mele oa Hae o robiloeng le mali a tšolotsoeng. Ha a ntse a lutse le Konyana ea Molimo, moeki o ne a ntse a thuhisa merero ea hae ea lefifi, ‘me a nontša mehopolo ea hae ea boiphetetso.

Ha A ba hlatsoa maoto, Krete O ne A fane ka tiiso e kholisang hore O utloisisa semelo sa Judase. “Ha lea hloeka bohle,” A rialo. Johanne 13:11. Joale Krete A bua phatlalatsa: “Ha ke bue ka lona bohle; ke tseba bao ke ba khethileng. Empa mangolo a reng: ‘Eo ke ntšanang se inong le eena, o nthahile ka serethe,’ a tšoanetse ho phethahala.”

Ho fihlela joale barutuo ba ne ba sa belaelle Judase. Empa leri le letšo la ba aparela, e le tlhokomeliso ea tlokotsi e kholo. Ha ba ntse ba e-ja, ba khutsitse, Jesu A re, “Kannetenete, kea le bolella hore e mong oa Iona o tla nkèka.” Tsieleho e kholo ea ba tšoara. E mong oa bona a ka sebetsa Mosuoe oa leholimo hampe hakaalo joang? A mo èke? Ho mang? Ruri e ke ke ea e-ba e mong oa ba ratoang ba leshome le metso e ‘meli.

Ha ba hopola hore lipolelo tsa Hae kamehla ke tsa ‘nete, tšabo le ho ipelaella tsa ba tšoara. Ka lipelo tse bohloko ba botsa ka bo ‘ngoe, “Morena, a ke ‘na na?” Empa Judase a khutsa. Qetellong Johanne a botsa, “Morena, motho eo ke mang?” ‘Me Jesu A araba A re, “Ke eo ke tla qopetsa sengoathoana, ke mo nee sona.” Ho khutsa ha Judase ha hulela mahlo ohle ho eena. Har’a moferefere oa lipotso le ho makala, Judase ha ka a utloa mantsoe a Jesu ha A araba Johanne. [444] ‘Me joale, ka ho leka ho qoba hore barutuo ba se ke ba hlokomela, le eena a botsa joale ka ba bang, “Na ke ‘na, Moruti?” Jesu A araba A tiile a re, “U boletse teng!”

Ka ho makala le ho ferekana ha morero oa hae o se o senotsoe, Judase a raoha ho tsoa ka potlako. Joale Jesu A re, “Seo u se etsang, se etse kapele....Ha a se a amohetse sengoathoana, a tsoa hang-hang.

E ne e le bosiu.” E ne e le bosiu ha moeki a furalla Kreste, a ea lefifing kantle.

Ho fihlela mothating oona, Judase o ne a e-s’o fetoe ke monyetla oa ho baka. Eitse ha a furalla Morena oa hae le barutuo ba habo, a tlōla moeli. Ho ne ho se letho le ka etsoang ho pholosa Judase le neng le sa etsoa. Kamorao hore a itlame ka makhetlo a mabeli ho eka Morena oa hae, Jesu O ‘nile A mo fa monyetla oa hore a bake. Ka ho bala sephiri sa pelo ea moeki, Kreste O file Judase monyetla oa hore a bake, a mo fa kholiso ea ho qetela ea bo-Molimo ba Hae. E ne e le pitso ea qetelo ea pako. Judase a tloha lijong tsa selallo, a tsoela kantle ho ea qetelisa mosebetsi oa boeki.

Ha A phatlalatsa bomalimabe ba Judase, Kreste O ne A boetse A na le morero oa mohau ho barutuo ba Hae. “Ke le bolella e sa le joale,” A rialo, “hore le tle le lumele ha ho etsahala, hore ‘na e ntse e le ‘na.” Ha Jesu A ne A ka thōla, barutuo ba ne ba tla hopola hore Morena oa bona O hloka chebelo-pele ea boMolimo, ‘me O ne A hlahuo lesumatha. Selemo pele ho moo, Jesu O ile A bolella barutuo hore O khethile ba leshome le metso e ‘meli, athe e mong ke diabolosi. Joale mantsoe a Hae ho Judase, a ne a tla matlafatsa tumelo ea balateli ba ‘nete ba Kreste, mohla A tlontlolloang. Ha Judase a fihla qetellong ea Hae e mpe, ba ne ba tla hopola bomalimabe boo Jesu A kileng A bo phatlalatsa ka moeki eo.

Mopholosi O ne A sa na le morero o mong. Barutuo ba ne ba na le seo ba lokelang ho se lemoha ka mamello le mohau oa Molimo, ho ea sitiloeng ka ho fetisisa. Moeki o ile a fumana tōkelo ea ho kopana le Kreste selallong. Hona ke mohlala ho rōna. Ha re lekanya hore e mong o na le liphoso le sebe, ha rea lokela ho ikhaohanya le eena, re mo siee e le phofu ea moleko, kapa ho mo khannela mabaleng a nto a Satane. Ke ka hobane barutuo ba ne ba na le litlōlo le liphoso, ha Kreste a tla ba hlatsoa maoto, ‘me bohle, haese a le mong feela, ba ile ba fumana pako.

### **Mohlala Oa Kreste O Hanela Khethollo**

[445]

Ke ‘nete hore sebe se pepeneneng se khaola motho selallong. Sheba 1 Bakorinthe 5:11. Empa kantle ho moo, ha ho ea lokelang ho ahlōla. Ke mang ea ka balang pelo, kapa a khetholla mofoka ho

koro? “Motho ka mong a ke a itekole pele, e be hona a jang bohobe boo, ‘me a noelang senoelong seo.” “Ka baka leo, mang kapa mang ea jang bohobe ba Morena, kapa ea noelang senoelong sa Morena ka mokhoa o sa lokelang, o tla be a siteloa ‘mele le mali a Morena.” “Ea jang le ea noang a sa khetholle hore ke ‘mele oa Morena, o ipitsetsa kahlōlo.”

Ha balumeli ba kopane ho keteka tebeletso ena, ho ka ‘na ha ba le Judase ka har’a bona; ‘me haeba ho le joalo, barōmuoa ba tsoang ho Morena oa lefifi ba teng, hobane ba tsamaea le bohle ba hanang ho tsamaisoa ke Moea o Halalelang. Mangeloi a leholimo le ‘ona a teng. Ho ka ba teng har’a bona, batho bao e seng bahlanka ba ‘nete le khalalelo, empa ba lakatsang ho kena tšebeletsong. Ba se ke ba haneloa. Ho na le lipaki tse teng, tse neng li le teng ha Jesu A hlatsoa maoto a barutuo.

Kreste ka Moea o Halalelang O teng ho ahlōla le ho nolofatsa pelo. Ha ho mohopolo le o mong oa ho soabela sebe oo A sa o hlokomeleng. O emetse ea bakang, ea puo e robhileng. Eena ea neng a hlatsoe maoto a Judase, O laba-labela ho hlatsoa pelo e ‘ngoe le e ‘ngoe ho tlosa matheba a sebe.

Ho se be motho ea itimang selallo hobane ho le teng batho ba sa lokelang. Hona mona, ka litlhophiso tsa Hae, Kreste O kopana le batho ba Hae, ‘me A ba matlafatse ka boteng ba Hae. Lipelo le matsoho tse hlokang tōkelo li ka ba ‘na tsa fana ka tsebeletso, empa bohle ba tlang ba tiisitse tumelo ea bona ho Kreste ba tla hlohonolofatsoa haholo. Bohle ba iphapanyetsang nako ena ba lahlehelo haholo. Ho fana ka selallo e ne e le ho hlokomelisa barutuo ka sehlabelo se sa feleng, se etselitsoeng e mong le e mong oa bona bao e leng karolo ea botho bohle bo oeleng.

### **Mabaka A Ho Keteka Selallo Sa Morena**

[446] Tsebeletso ea Selallo ha se nako ea ho hlomoha. Ha barutuo ba Morena ba bokana tafoleng ea Hae, ha ba lokela ho tla llela liphoso tsa bona. Ba se ke ba hopola liphapang tse bileng teng pakeng tsa bona le bana ba bo bona. Nako ea boitōkisetso e akarelitse hona hohle. Nakong ena ba tliil’o kopana le Kreste. Ha ba lokela ho ema moriting oa sefapano, empa ba eme leseling la sona le pholosang. Ba lōkela ho bula meea ho amohela mahlaseli a khanyang a Lestsatsi



la ho Lōka. Ba lōkela ho utloa mantsoe a Hae, a reng, “Ke le siela khotso, ke le fa khotso ea ka; ha ke le fe kamoo lefatše le fanang kateng.” Johanne 14:27.

Morena oa rōna O re, Ha u tlatlapuoa ebile u hlorisoa ka lebaka la ka le la Lentsoe, hopola lerato la ka le leholo hoo Ke ileng ka tela bophelo ba ka ka lebaka la hao. Ha mesebetsi ea hao e bonahala e le thata, meroalo ea hao e le boima haholo, hopola hore ka lebaka la hao ke ile ka jara sefapano, Ke sa natse nyeliso. Molopolli oa hao Oa phela, ho u buella.

Tsebeletso ea Selallo e supa ho khutla la bobeli ha Krete. E etselitsoe ho boloka tšepo ena e phela ka kelellong. “Kamehla ha le e-ja bohobe bona, ‘me le noela senoelong sena, le phatlalatsa lefu la Morena ho fihlela a khutla.” IBakorinthe 11:26.

Kreste O theile tsebeletso ena hore e tle e bue le likelello tsa rōna ka lerato la Molimo. Ho ke ke ha ba le kopano ea letho pakeng tsa meea ea rōna le Molimo, haese ka Krete. ‘Me ha ho letho le leng haese lefu la Krete, le neng le ka etsa hore lerato la Hae le re hohele. Ke feela ka lebaka la lefu la Hae re ka lebellang ka thabo ho khutla ha Hae la bobeli. Likelello tsa rōna li hloka ho sisinngoa li tle li amohele mohlolo oa bo-Molimo, ho utloisisa ho feta kamoo ho leng ka teng mahlomola a Krete ha A ne A shoela batho.

Morena oa rōna O itse, “ha le sa je nama ea Mor’a Motho, le sa noe mali a hae, ha le na bophelo ka ho lona Nama ea ka ke sejo sa ‘nete, le mali a ka ke seno sa ‘nete.” Johanne 6:5355. Lefung la Krete re kolota esita le bophelo ba lefatše lena. Bohobe boo re bo jang bo rekiloe ka ‘mele oa Hae o robiloeng; metsi ao re a noang a rekiloe ka mali a Hae a tšolotsoeng. Ha ho le a mong, mohalaleli kapa moetsalibe, ea jang lijo tsa hae tsa letsatsi le letsatsi, a sa matlafatsoe ke ‘mele le mali a Krete. Sefapano sa Gologotha se hatisitsoe holim’a sengoathoana se seng le se seng; ‘me se bonahala ka har’a seliba se seng le se seng sa metsi. Khanya e hlahang [447] tšebeletsong ea Selallo e halaletsa tseo re li fumanang bophelong ba letsatsi le letsatsi. Tafole ea lelapa a tšoantša tafole ea Morena, ‘me lijo tsohle ke selallo.

Ka bophelo ba rōna ba moea Jesu O re; “Ea jang nama ea ka, a e-noa mali a ka, o na le bophelo bo sa feleng.” Ka ho amohela lentsoe la Hae, le ho etsa lintho tseo a li laetseng, re ba bang le Eena. O re, “Ea jang nama ea ka, a e-noa mali a ka, o lula ka ho ‘na, le ‘na

ka ho eena. Joalokaha Ntate ea phelang a nthōmile, ‘me ke phela ka Ntate, le ea ntjang o tla phela ka ‘na.’ Johanne 6:56,57. ha tumelo e e nahana ka sehlabelo se sehlo sa Morena, moea o amohela bophelo ba semoea ba Krete. Tsebeletso e ‘ngoe le e ‘ngoe ea selallo e theha lehokela le phelang le tlamahanyang molumeli le Krete, hammoho le Ntate.

Ha re amohela bohobe le veine tse tšoantšang ‘mele oa Krete o robiloeng le mali a tšolotsoeng, re paka ka likelellong tsa rōna, bothata boo poelano ea rōna le Molimo a fumanoeng ka bona. Krete O beoa ka har’a rōna A thakhisitsoe. Ho hopola Gologotha ho tsosa menahano e phelang, e halalelang ka lipelong tsa rōna. Boikhōhōmōso le boithati, li ke ke tsa atleha ka moeeng o bōlōkang lietsahala tsa Gologotha li nchafetse ka kelellong. Ea tšoereng lerato la Mopholosi le sa lekangoeng, o tla fetoloa sebōpehong. O tla tsamaea e le leseli la lefatše, ho bontšahatsa lerato lena le mohlolo.

## KHAOLO EA 73—“LIPELO TSA LŌNA LI SE FEREKANE”

[448]

*[E itšetlehile ka Johanne 13:31-38; 14; 15; 16; 17.]*

Judase o ne a tsoile kamoreng e kaholimo, joale Kreste O ne A setse le ba leshome le motso o mong. O ne A le haufi le ho bua ka karohano ea Hae le bona, e neng e atametse, empa pele ho moo A bontša sehlooho sa thōmo ea Hae. A bōlōka kamehla thabo ea Hae, ea hore mahlomola a Hae le nyeliso, li tla tlotlisa lebitso la Ntate. Sena ke sona seo A lebisitseng mehopolō ea barutuoā ho sona pele.

Mong’a bona le Morena, Mosuoē oa bona ea ratoang ebile e le Motsoalle, O ne A rateha ho feta bophelo ho bona. Joale O ne A le lekhateng la ho ba siea. Lipelo tsa bona tsa tlala mehopolō e lefifi.

Empa mantsoe a Mopholosi a ne a tletse tšepo. A tseba hore mano a Satane, a atleha haholo bathong ba tetebelitsoeng ke mathata. Ka lebaka lena, A shebisa mehopolō ea bona lehaeeng la leholimo. “Pelo tsa Iona li se ferekane....Ka tlung ea Ntate ho na le meaho e mengata; hoja ha ho joalo, nkabe ke le boleletse, hobane ke ea ho le lōkisetša bolulo. Ha ke se ke ile, ke le lōkiselitse bolulo, ke tla boela ke tle ke le nkele ho ‘na, hore moo ‘na ke leng teng, le lona le be hona teng.” Ha Ke se Ke ile, Ke tla ‘ne ke le sebeletse ka thata. Ke ea ho Ntate, ho ikopanya le Eena lebitsong la lona.

Ho tsamaea ha Kreste, ho ne ho fapane le kamoo barutuoā ba neng ba hopotse, ba tšohile -e ne e se karohano ea ho qetela. O ne A il’o ba lōkisetša bolulo, A tle A tsebe ho ba amohella ho Eena. Ha A ntse A ba ahela meaho, bona ba ne ba lōkela ho aha limelo, hore li tšoanele leholimo.

[449]

Thomase a khathatsoa ke pelaelo, a re, “Morena, ha re tsebe moo u eang teng; tsela re ka e tseba joang na?” Jesu A re ho eena: “Ke ‘na tsela, le ‘nete, le bophelo; ha ho ea ka tlang ho Ntate haese ka ‘na. Ha le ntseba, le Ntate lea mo tseba. Ho tloha joale lea mo tseba, le bile le ‘mone.”

Litsela tse eang leholimong ha li ngata. Motho a ke ke a ikhethela ea hae. Krete ke Eena tsela, eo bapatareareka le baporofeta ba pholositsoeng ka eona. Ke Eena tsela, eo ka eona feela re ka atamelang ho Molimo.

Empa barutuo ba ne ba e-so utloisise. “Morena, re bontše Ntate, ebe ho re lekane,” ho rialo Filipi. Krete A botsa ka ho makala ho bohlokō, “Ke bile le lona nako e kaakaale, empa ha ua ka ua ntseba, Filipi?” Na e be ho etsahala hore e be ha le bone Ntate mesebetsing eo A e phcthang ka ‘Na? “U bolela joang ha u re: ‘Re bontše Ntate?’” “Ea mponeng o bone Ntate.” Krete ha ka A khaotsa ho ba Molimo ha A fetoha motho; bo-Molimo e ne ntse e le ba Hae. Mosebetsi oa Krete o ne o paka bo-Molimo ba Hae. Ntate O ne A senotsoe ka Eena.

Ha barutuo ba ne ba lumela kopano ena ea bohlokoa pakeng tsa Ntate le Mora, tumelo ea bona e ne e ke ke ea ba lahlchela ha ba bona mahlomola a Krete le lefu la Hae. Mopholosi oa rōna O lekile ka mamello e kaakang, ho lōkisetsa barutuo ba Hae sefefa sa meleko, se neng se le haufi le ho ba tsukutla. Bohle ba neng ba le teng ba kenoa ke tšabo e halalelang, ha ba mametse mantsoe a Hae ka hlōkō e kholo. Eare ha lipelo tsa bona li huleloa ho Krete ke lerato le leholo, ba atamelana ‘moho. Ba utloa hore leholimo le haufi haholo.

Mopholosi O ne A chesehela hore barutuo ba utloisise hore na ke hobaneng ha bo-Molimo ba Hae bo kopantsoe le bōtho. O tlike lefatšeng ho tla bonahatsa khanya ea Molimo, hore motho a tle a huleloe matleng a eona a bōlōkang. Jesu ha A Ka A bontša makhabane kapa ho sebelisa matla ao batho ba ka sitoang ho ba le ‘ona ha ba thulana le meleko ‘me ba bitsa ho Eena ka tumelo. Botho ba Hae bo phethahetseng, ke boo balateli ba Hae ba ka bang le bona, ha ba ka ipeha ho Molimo joaloka Eena.

[450]

“O tla etsa mesebetsi eo ke e etsang, a etse le e fetang ena, hobane ke ea ho Ntate.” Mona Krete O bolela hore mesebetsi oa barutuo o ne o tla pharalla tlas’a tšebetso ea Moea o Halalelang. Kamor’a hoba Morena A nyolohe, barutuo ba bona phethahalo ea tšepiso ena. Ba tseba hoba Mosuo oa leholimo O fela A le joalokaha A ipoletse. Eitse ha ba phahamisa lerato la Jesu, lipelo tsa batho tsa kokobetsoa, ‘me matšoele a lumela ho Jesu.

## Tokelo E Makatsang Ea Thapelo

Mopholosi A hlalosa hore lekunutu la katleho ea bona, e tla ba ho kōpa matla le mohau ka lebitso la Hae. O beha thapelo ea motho ea ikokobelitseng ho Ntate e le takatso ea Hae, lebitsong la motho eo. Thapelo e mahlonoko e ka ‘na ea hloka bokheleke, empa e tla nyolohela sehalalelong moo Jesu A sebeletsang teng. Eena O tla e hlalosa ho Ntate e hloka botlaila, e nkha hamonate ke monko oa ho lōka ha Hae.

Tsela ea ho tiea le botsepehi ha e hloke likhopiso, empa bothateng bo bong le bo bong, re lōkela ho bona monyetla oa thapelo. “Eng le eng eo le e kōpang ka lebitso la ka, ke tla e etsa, hore Ntate a tlotlisoe ka Mora. Ha le kōpa eng kapa eng ka lebitso laka, ke tla e etsa,” ho rialo Jesu.

Balateli ba Krete ba ema ka lebitso la Hae ka pele ho Molimo. Ka ho loka ha Krete ba baloa e le ba bohlokoa. Morena ha A bone litšila tsa moetsalibe ho bona. Ho bona O bona setšoantšo sa Mora oa Hae, eo ba lumelang ho Eena.

Morena oa soaba ha batho ba Hae ba ikhella tlase. Molimo O ne A ba batla ha ho se joalo A ka be A sa rōmela Mora oa Hae thomong e litšenyehelo li kaalo ho ba lopolla. O thaba haholo ha ba kōpa lintho tse phahameng ho Eena, hore ba tle ba Mo tlotlise. Ba ka lebella lintho tse kholo, ha ba tšepa litšepiso tsa Hae.

‘Me ho rapela ka lebitso la Krete, ho bolela ho amohela semelo sa Hae, ho bonahatsa Moea oa Hae, le ho sebetsa mesebetsi ea Hae. Mopholosi ha A pholose batho ba ntse ba le ka har’a sebe, empa O ba ntša sebeng, ‘me ba Mo ratang ba bontša lerato la bona ka ho hlonepa.

Hlonepho ea ‘nete kaofela e tsoa pelong. E ne e le mosebetsi oa pelo ka Krete. ‘Me ha re lumela, O tla lōkisa lipelo tsa rōna le likelello tsa rōna ho lumellana le thato ea Hae, e tle re ha re Mo hlonepa, ebe e le hore re phethahatsa cheseho ea rōna. Thato e fihlela thabo e phahameng haholo, ha e phetha mesebetsi oa Hae. Bophelo ba rōna, e tla ba ba hlonepho e sa khaotseng. Sebe se tla nyonyeha ho rōna.

Joalekaha Krete A phetse molao oa botho, le rōna re ka phethisa, ha re ka tšoara letsoho le Ea-matla ho fumana matla. Re ke ke ra tšepa botho ho re eletsa. Morena O tla re ruta tšoanelo ea rōna ka

bolokolohi bo tšoanang ho mang le mang. Ha re tla ho Eena ka tumelo, O tla bolela mehlolo ea Hae ho rōna ka sebele. Lipelo tsa rōna li tla chesa ka ho rōna, ha A atamela haufi ho bua le rōna, joalekaha A entse ho Enoke. Ba ikhethelang ho se etse letho le ka khopisang Molimo, ba tla tseba, ha ba se ba behile litaba tsa bona ho Eena, hore na ba lokela ho tsamaea joang. ‘Me ba tla fuoa matla a hlonepho le a tšebeletso, joalekaha Krete A tšepisitse.

### **Moea O Halalelang O Phethahatsa Mosebetsi Oa Krete Ho Rōna**

Pele A inehela ho ba phofu ea sehlabelo, Krete O ile A batla mpho ea bohlokoa bo fetisisang, eo A ka e fang balateli ba Hae. “Ke tla kōpa Ntate, ‘me o tla le nea Mothusi e mong, hore a be le lōna ka ho sa feleng, e leng Moea oa ‘nete, oo lefatše le ke keng la o amohela, hobane ha le o bone leha e le ho o tseba; lona lea o tseba hobane o lula le lona, ‘me o ka ho lona. Ha ke na ho le siea le le likhutsana, ke tla tla ho lona.” Johanne 14:16-18. Ha Krete A ne A le lefatšeng, barutuo ba ne ba sa lakatse mothusi e mong. Ha A se A le sieo har’a bona, ke hona ba neng ba utloa bohloki ba Moea, ‘me eaba Oa tla.

Moea o Halalelang ke moemeli oa Krete, empa Ea sa aparang sebōpeho sa botho, ‘me O lōkōlōhile. Krete O ne A sitoa ho ba libakeng tsohle ka boena, A thibelo ke bōtho. E ne e le molemong oa bona hore A tsamaee, ‘me A rōmela Moea ho ba mohlahlami oa Hae lefatšeng. Ha ho ea neng a ka fumana molemo, ka lebaka la bolulo ba Hae. Ka Moea, Mopholosi O ne A tla ba haufi le bohle.

[452]

Jesu A bala bokamoso ba barutuo ba Hae. A bona e mong a fanyehoa sefapanong, e mong a lahleloa mafikeng a bolutu a leoatle, ba bang ba hlorisoa ba bolaoa. Empa litekong tsohle O ne A tla ba le bona. Haeba ka lebaka la ‘nete, molumeli a emisoa lekhotleng la ba hloka toka, Krete O ema lehlakoreng la hae. Litsomo tse mo oelang, li oela ho Krete. Ha e mong a koaletsoe ka marakong a teronko, Krete O tlatsa pelo ea hae ka lerato la Hae.

Ka linako tsohle le libakeng tsohle, ha re ikutloa re hloka thuso re lahlehile, Motšelisi O tla romelo ho araba thapelo ea tumelo. Maemo a ka re arohanya le metsoalle eohle ea lefatše, empa ha ho

boemo bo ka re arohanyang le Motšelisi oa leholimo. O letsohong la rona le letona kamehla, ho re tiisa le ho khothatsa.

Barutuo ba ne ba sitoa ho utloisisa mantsoe a Kreste, ‘me A hlalosa hape: O tla itlhahisa ho bona ka Moea o Halalelang. “Empa Mothusi, Moea o Halalelang oo Ntate a tla o rōmela lebitsong la ka, eena o tla le ruta tsohle.” Ha ho sa tla ba ea reng, ha ke utloisise.

Kreste O ne A lōkela ho bua le batho bohle ba lefatšeng ka barutuo. Empa ka lefu la Kreste, ba ne ba tla tšoaroa ke masoabi a maholo. Hore kamora’ maiphihlelo ao, lentsoe la bona le tle le tsepame, Jesu A ba tšepisa hore Moemeli “A le hopotse tsohle tseo ke le boleletseng tsona.” “Athe ha eo, Moea oa ‘nete, a e-tla, o tla le tsamaisa ‘neteng eohle, hobane a ke ke a bua tsa hae, empa o tla bua tseo a li utloang, ‘me o tla le tsebisa tse tlang. Eena o tla ntlotlisa, hobane o tla nka tsa ka, a le tsebise tsona.”

Barutuo ba Jesu ba ne ba rutiloe ho amohela lithuto tsa baruti e le lentsoe la Molimo, ‘me taba ena e ne e ntse e le matla likelellong tsa bona. Maikutlo a lefatše a ne a ntse a na le sebaka se scholo likelellong tsa bona. Ba ne ba sa utloisise sebōpeho sa moea sa ‘muso oa Kreste. Lithuto tsa Hae tse ngata, li bonahetse li lahleha feela ho bona. Jesu A ba tšepisa hore Moea o Halalelang O tla busetsa lipolelo tsena likelellong tsa bona.

Moemeli O bitsoa “Moea oa ‘nete.” Mosebetsi oa Hae ke ho hlalosa le ho tiisa ‘nete. O qala ka ho lula ka pelong e le Moea oa ‘nete, ‘me joale A fetohle Moemeli. ‘Nete e na le khotso, empa ha ho khotso ea sebele thetsong. Satane o fumana matla a hae holim’a likelello ka thetso. Mekhoa ea thetso e senya sebōpeho Moea o Halalelang O senola phoso, ‘me O e leleke moeeng. Ka Moea [453] oa ‘nete, O sebetsang ka lentsoe la Molimo, Kreste O kokobeletsa bakhethoa ba Hae ho Eena.

### Sepheo Se Seholo Sa Moea

Kreste O ne A batla ho tlatsa barutuo ka thabo le tšepo tse tlatsitseng pelo ea Hae. O ne A thabisoa ke hore Moea o Halalelang, e ne e le mpho e kholo ho feta tsohle, eo A neng A ka ba kōpela eona ho Ntate. Moea O ne O tla fanoa e le mpho e nchafatsang, ho seng joalo sehlabelo sa Kreste se ne se tla hloka thuso. Matla a sebe a ne a ntse a matlafala ka lilemo, ‘me batho ba ne ba inehela khapong

ea Satane ka mokhoa o makatsang. Sebe se ne se ka loantšoa le ho hloloa, ka matla a Motho oa Boraro oa leholimo, ea ka tlang a tletse matla a leholimo. Moea O phethahatsa se sebelitsoeng ke Mopholosi oa lefatše. Ka Moea, pelo ea hloekisoa. Krete O fane ka Moea oa Hae ho hlōla litloaelo tsohle tsa sebe, tse futsitsoeng le tse iketselitsoeng, ‘me A hlahise semelo sa Hae kerekeng ea Hae. Setšoantšo sa Molimo sa ‘nete se lokela ho hlahisoa bōthong. Hlompho ea Molimo, hlompho ea Krete, ea sebelisoa ho phethahatsa semelo sa batho ba Hae.

“Ha eo a e-tla [Moea oa ‘nete], o tla kholisa lefatše ka tsa sebe, le ka tsa tōka, le ka tsa kahlōlo.” Ho ruta Lentsoe kantle ho boteng ba Moea o Halalelang, ho hloka thuso. Ke feela ha ‘nete e felehetsoa ke Moea ho ea pelong, e ka sisinyang letsoalo kapa ea fetola bophelo. Kantle le hore Moea o Halalelang O finyeletse ‘nete ka pelong, ha ho meea e ka oelang holim’a lefika ‘me ea robaha. Ha ho menyetla, leha e ka ba meholo joang, e ka fetolang motho ho ba mocha oa leseli.

[454] Krete O tšepisitse mpho ea Moea o Halalelang kerekeng ea Hae, ‘me tšepiso eo ke ea rōna, joalekaha e ne e le ea barutuo ba pele. Empa, joaloka tšepiso e ‘ngoe le e ‘ngoe, e fano e tlas’a maemo. Ba bangata ba ipolelang ba na le litšepiso tsa Molimo, ba bua ka Krete le ka Moea o Halalelang, empa ha ba fumane molemo oa letho. Ha ba nehele moea hore o tsamaisoe ke basebeletsi ba leholimo. Re ke ke ra sebelisa Moea o Halalelang. Moea O lokela ho re sebelisa. Empa ba bangata ba rata ho itšōkōlela. Bao feela, ba lebellang Molimo ka boikokobetso, ke bona ba fuoang Moea. Lehlohonolo lena le tšepisitsoeng, le fumanoa ka tumelo, le tlisa mahlohonolo a mang a le latela. Krete O emetse ho neha moea o mong le o mong ho latela matla a oona a ho amohela.

Pele A tsoa ka kamoreng e kaholimo, Mopholosi A etella barutuo pele, ka pina ea thoriso. Lentsoe la Hae la utloahala, eseng ka pina ea mahlomola, empa ka ‘mino o monate oa lifela tsa Paseka:

Rorisang Morena, lona lichaba tsohle,  
 mo tlotliseng, lona merabe eohle;  
 hoba mohau oa hae ho rōna o moholo,



botšephehi ba Morena bo hlola kamehla eohle.  
Haleluja!

### Pesalema 117.

Ka morao ho sefela, ba tsoa ka likhoro tsa motse o halalelang, ba leba Thabeng ea Mehloare. Ba tsoelapele butle, e mong le e mong a phathahane ka kelellong ea hae. Ha ba qala ho theohela thabeng, Jesu A re, “Ka bosiu bona lona bohle le tla nkoenehela, hobane ho ngotsoe, ho thoe: ‘Ke tla otlala molisa, ‘me linku tsa mohlape li tla qhalana.’” Matheu 26:31. Ha ba le kamoreng e kaholimo, Jesu O ile A re e mong oa ba leshome le metso e ‘meli o tla Mo eka, ha Petrose eena a tla Mo latola. Empa joale mantsoe a Hae a ba akaretse bohle.

### Sebe Sa Petrose Se Epetsoeng

Joale lentsoe ka Petrose la utloahala, le hanyetsa, “Leha bohle ba ka koeneha, ‘na nke ke!!’” Jesu O ne A ile A mo hlokomelisa hore hona bosiu boo, o tla latola Mopholosi oa hae. Joale O ne A pheta tlhokomeliso: “Kannete kea u bolella hore kajeno, bosiu bona, etlare mokōkō o e-s’o lle habeli, u tla be u ntatōtse hararo.” Petrose “a mpa a bua ka matla, a re: ‘Leha eba ke tlameha ho shoa le uena, ha nka ke ka u latōla.’ Bohle le bona ba bua joalo.” Mareka 14:29-31.

Ha Petrose a ne a re, o tla latela Morena oa hae ho isa teronkong esita le lefung, o ne a tiile, empa o ne a sa itsebe. Ka pelong ea hae, ho ne ho ipatile litholoana tsa bokhopo tse neng li tla hlahella bophelong. Ntle le hore a hlokomeliso kotsi ea hae, hona, e ne e tla ba tšenyeho ka ho sa feleng ho eena. Mopholosi A bona ho eena, boithati bo neng bo tla hlolisa le lerato la hae ho Krete. Petrose o ne a lōkela ho se tšepe boena, ‘me a be le tumelo e tiileng ho Krete. Mohla a leng holim’a leoatle la Galelea, a batla a teba, a hoeletsa a re, “Morena mpholose.” Hoja o ile a re, Ntokolle ho bo-’na, a ka be a lokolotsoe. Empa Petrose a nahana eka ke sehlooho ho se mo tšepe ‘me a tsitlella ho itšepa.

[455]

Jesu O ne A ke ke A qobisa barutuo ba Hae teko, empa ha A ka A ba siea ba hloka matšelisano. Pele ho tatolo, ba ile ba fumana tiiso ea ho tšoareloa. Kamorao ho lefu la Hae le tsoho, ba tsebile hore ba tšoaretswe ebile ke ba bohlokoa pelong ea Krete.

Jesu le barutoa ba ne ba le tseleng e eang Gethesemane, maotong a thaba ea Mehloare. Ngoeli e ne e chabile hantle, ‘me e Mo bontša serapa se setle sa merara. A se hlokomelisa barutuo ba Hae A re, “Ke ‘na sefate sa ‘nete sa morara.” Morara ka makalana a ona a itšoareletsang, o tšoantša Eena. Sefate sa palema, le sa leoka li ikemisa ka botsona, ha li hloke ho tšehetsoa. Empa morara o ithatela ka lifate tse tiileng o tsebe ho nyoloha ho ea holimo. Ka mokhoa o joalo, Krete bōthong ba Hae, O ne A tšepile matla a leholimo. “Nke ke ka etsa letho ka bonna.” Johanne 5:30.

“Ke ‘na sefate sa ‘nete sa morara, ‘me Ntate ke molemi” Ntat’a rōna ea maholimong O ne A leme Morara o na o motle holim’a maralla a Palestina. Ba bangata ba ile ba khahloa ke botle ba Morara, ‘me ba paka hore o tsoa leholimong. Empa baetapele ba Iseraele, ba hatakela sejalo seo ka maoto a bona a litšila. Ha batho ba hopola hore ba o bolaile, Molemi oa leholimo A o nka, A o lema bocha, ka nq’ane ho lerako. Kutu ea morara e ne e se e sa bonahale. E ne e patetsoe litlhoriso tse khopo tsa batho. Empa makala a Morara a lepella holim’a lerako, ‘me ka ‘ona mahlomela a tseba ho kopana le Morara (kutu).

[456] Jesu O re, kamano ea lekala le kutu ea morara e tšoantša kamano eo balateli ba Hae ba lōkelang ho e bōlōka ho Eena. Lekalana le tlamelloa kutung e phelang ea morara, ‘me methaponyana ea lona e melelle kutung moo. Ho joalo ka moea o fumana bophelo ka ho kopana le Krete. Moetsalibe o kopanya bofokoli ba hae le matla a Krete, le bofutsana ba hae o bo kopanya le khaphatseho ea Krete. ‘Me joale a be le kelello ea Krete. Botho ba Krete bo amme bōtho ba rōna, ‘me bōtho ba rona bo amme bo-Molimo.

Kopano ena e lokela ho baballeha. Krete O re, “Lulang ka ho ‘na, le ‘na ka ho lona. Joalokaha lekala le ke ke la beha litholoana ka bolona ha le se sefateng sa morara, ho joalo le ho lōna ha le sa lule ka ho ‘na.” Kopano ena ha se ea nakoana, e ka tsamaea e phomoleloa. Lekala le fetoha karolo ea sefate se phelang. Jesu O re, bophelo boo le bo fumaneng ho ‘Na, bo ka bōlōkeha feela ka kamano e tsoelang pele. Kantle ho ‘Na le ke ke la hlōla sebe kapa la hanela moleko. Re lōkela ho khoramela Jesu ‘me re amohele ho Eena ka tumelo, phethahalo ea semelo sa Hae.

Metso e rōmela lijo ka lekala, ho fihlela lehlakung la ho qetela. “Ea lulang ka ho ‘na,” ho bolela Jesu, “le ‘na ka ho eena, o beha

litholoana tse ngata, hobane ntle ho ‘na le ke ke la etsa letho.’ Ha re phela ka tumelo ho Mora oa Molimo, litholoana tsa Moea li tla bonoa maphelong a rōna, ha ho le e ‘ngoe e tla haella.

“Ntate ke molemi. Lekala le leng le le leng le ho ‘na le sa beheng litholoana, oa le pōma.” Ho ka bonahala ho na le kamano le Krete, empa e se kopano ea tumelo. Ho ipolela borapeli, ho kenya batho ka kerekeng, empa semelo ke sona se bontšang haeba ba fela ba na le kamano le Krete. Ha ba sa behe litholoana ke makala a fosahetseng. “Ha motho a sa lule ka ho ‘na, o lahleloa kantle joaloka lekala, ‘me a omelle. Makala aa bōkeloa, a lahleloe mollong, a che.”

“Me le leng le le leng le behang litholoana, oa le faola, hore le tle le behe litholoana tse ngata ho feta.” Ho ba leshome le metso e ‘meli ba neng ba latela Jesu, a le mong e leng lekala le omcletsang o ne a le lekatheng le ho tlosoa; ba bang ba ne ba tla ba litekong tse babang, tsa thipa e kutang lifate ho li hlaolela. Ho kuta hona ho li utloisa bohlōkō, empa ke Ntate ea tšoereng thipa. Ha A sebetse ka letsoho le khopo. Makhasi a mangata, a jellang litholoana bophelo ba tsona, a lokela ho tlosoa. Mahlomela a lōkela ho khaoloa, hore mahlaseli a Letsatsi la Ho loka, a folisang a fumane sebaka. Molemi o khaola mahlomela a kotsi, hore litholoana li tle li be ngata ka ho fetisa. [457]

“Ntate o tlotlisoa ka hona: ha le beha litholoana tse ngata,” ho bolela Jesu. Molimo O lakatsa ho bonahatsa ka rōna semelo sa Hae sa molemo le mohau. Empa Mopholosi ha A khannele barutuo hore ba sebetse ho beha litholoana. O ba bolella hore ba lule ho Eena. Krete O lula har’a balateli ba Hae ka Lentsoe. Bophelo ba Krete ka ho uena, bo hlahisa litholoana tse tšoanang le tse ho Eena. Ho phela ho Krete, ho khoramela Krete, re tšhelitsoe ke Krete, re hula phepo ho Krete, re beha litholoana tse tšoanang le tsa Krete.

Khothatso ea pele ea Jesu, ha A na le barutuo ba Hae kamoreng e ka holimo e bile, “Ke le fa molao o mocha, ke hoba le ratane, joalo ka ha ke le ratile, ratanang joalo le lona.” Ho barutuo molao o na o ne o le mocha, hobane ba ne ba sa ratane joale ka ha Krete A ba ratile. Empa ka bophelo ba Hae le lefu, ba ne ba amohela maikutlo a macha ka lerato. Molao oa ho ratana o ne o na le moelelo o mocha ka baka la sehlabelo sa Hae.

Ha batho ba kopantsoe hammoho, e seng ka qobello kapa boikhabo, empa e le ka lerato, ba bonahatsa tšebetso ea tšusumetso e

kaholimo ho matla ‘ohle a botho. Lerato le joalo, ha le bonahala ka kerekeng, le ka fuluo ba bohale ba Satane. Morena O re, “Ha lefatše le le hloea, tsebang hore le ile la ntlhōea pele ho lona. Ha le ne le le ba lefatše, lefatše le ka be le ratile seo e leng sa lona, empa kahobane le se ba lefatše, ke mpa ke le khethile ho ba lefatšeng, lefatše le le hloile ke hona. Hopolang polelo eo ke le boleletseng eona: ‘Mohlanka ha a moholo ho mong’ a hae.’ Ha ba ntlhorisitse, le lona ba tla le hlorisa; ha ba bōlōkile lentsoe la ka, le la lona ba tla le bōlōka. Empa ba tla le etsa tsena tsohle ka baka la lebitso la ka, hobane ba sa tsebe ea nthōmileng.” Evangelii e lōkela ho ntšetsoa pele le har’ a khanyetso, kotsi, tahlehelo le mahlomola.

[458] Joaloka Molopolli oa lefatse, Krete O ne A thulana le ho hloka katlcho hangata. O ne A bonahala A phetha karolo e nyane ea mosebetsi oo A neng A lakalitse ho o etsa. Ka linako tsohle, tšusumetso ea Satane e ne e sebeletsa ho thiba tsela ea Hae. Empa ha A ka A nyahamisoa ke letho. Ka Esaea o re, “Ke sebelitse lelea, ka fufulelloa ntat’ a selala. Empa se ntšoanelang se ka atlang sa Morena, moputso oa ka o ho Molimo oa ka.” Esaea 49:4.

Jesu A phomola holim’ a lentsoe lena, ‘me a hlokisa Satane monyetla. Ha masoabi a tebileng haholo, a aparela moea oa Hae, A re ho barutuo ba Hae, “Musi oa lefatše oa tla. Ha a na matla holim’ a ka.” “Musi oa lefatše lena o se a ahlōtsoe.” ‘Musi oa lefatše lena o tla lahleloa kante.” Johanne 14:30; 16:11; 12:31.

Krete A tseba hore, etlare ha A hōoa A re, “Ho phethehile,” leholimo lohle le tla hlōla. Tsebe ea Hae ea utloela hole, lipina le litlatse tsa tlhōlo mabaleng a leholimo. A tseba hore lebitso la Krete le tla binoa mafatšeng ‘ohle ka kakaretso. A tseba hore ‘nete e hlometse ka Moea o Halalelang, e tla hlōla liteko tsohle tsa bokhopo. A tseba hore bophelo ba barutuo ba Hae ba Mo tšepang, bo tla tšoana le ba Hae, e be mokoloko oa lithōlo tse hlokang tšitiso, tse sa bonahaleng e ka li teng hona joale, empa li tla hlokomeloa hantle nakong e khōlo e tlang.

Krete ha A ka A hlōloa, leha e le ho nyahama, ‘me balateli ba Hae ba lōkela ho bonahatsa tumelo e joalo, e mamellang. Ba lokela ho phela joalokaha A phetse, ‘me ba sebetse joalokaha A sebelitse. Ba se ke ba tsietsoa ke mathata, empa ba a hlōle, ba se ke ba nyahamisoa ke letho.

Kreste O supa hore tsamaiso ea leholimo, le kutloano e halalelang li lokela ho bonahatsoa ka kerekeng ea Hae le lefatšeng. E le hore, ka batho ba Hae, A tle A fumane pokello e ngata ea khanya. Kereke e apesitsoe ka ho lōka ha Kreste, ke eona polokelo ea Hae, moo menono ea mohau oa Hae le lerato li lōkelang ho bonahatsoa ka botlalo. Kreste O sheba batho ba Hae, ho hloeka ha bona le ho phetheha e le moputso oa boikokobetso ba Hae, le tlatsetso ea khanya ea Hae.

Ka mantsoe a matla, a tletseng tšepo, Mopholosi A qetella thorno ea Hae. O ne A phethile mosebetsi oo A neng A o filoe hore A o etse. O ne A tsebahalitse lebitso la Ntate, ‘me A khethile bao ba tla sala ba ntšetsa mosebetsi pele har’a batho.

Joaloka moprista e moholo ea inehetseng, Kreste O buella batho ba Hae: O re, “Ntate ea Halalelang, u ba bōlōke ka lebitso la hao [459] leo u ‘neileng lona, hore ba be ntho e le ‘ngoe joaloka rōna.” “Ha ke rapelle bona feela, empa ke rapella le ba lumelang ho ‘na ka lentsoe la bona...lefatše le tie le tsebe hore u nthōmile le hore u ba ratile joalokaha u nthatile.”

Kreste A nehela kereke ea Hae e khethehileng matsohong a Ntate. Eena O ne A emetsoe ke ntoa ea ho qetela le Satane, ‘me A tsoela pele ho ea khahlana le eona.

## KHAOLO EA 74—NTOA E TŠOSANG GETHESEMANE

*[E itšetlehile ka Matheu 26:36-56; Mareka 14:32-50; Luka 22:39-53; johanne 18:1-12]*

Mopholosi hammoho le barutuo ba Hae, A kena tseleng ho ea serapeng sa Gethesemane. Khoeli ea Paseka e ne e chabile ho se maru leholimong. Ha A atamela Gethesemane, O ile A khutsa ka mokhoa o hlōllang. Bophelong ba Hae bohle ha A le lefatšeng, O ne A tsamaea leseling la boteng ba Molimo. Empa joale O ne A se A baloa har'a batloli. O tlameha ho jara molato oa botho bo oeleng. O ne o le boima haholo, hoo A batlileng A tšaba hore o tla Mo koalla kantle ho lerato la Ntate ka ho sa feleng. A bua A re, “Moea oa ka o masoabing a maholo, hoo nka shoang.”

Haesale, barutuo ba ne ba e-s' o bone Morena oa bona A saretsoe hakaalo. ‘Mele oa Hae o ne o kapea, eka O tla tloha A oela. Ha ba fihla serapeng, barutuo ba qamaka sebaka sa Hae sa mchla, hore Morena oa bona A ke A phomole. Ka makhetlo a mabeli metsoalle ea Hae ea tlameha ho Mo tšehetsa, ho seng joalo, A ka be A ile A oela.

Jesu A siea barutuo bohle, kantle ho ba bararo, pel'a monyako, A re ba ithapelle le Eena ba Mo rapelle. A kenella hare moo ho khutsitseng, le Petrose, Jakobo le Johanne. Tsielehong ea Hae e kholo, Krete O ne A hloka hore ba be haufi le Eena. Hangata, ba qetile bosiu le Eena boikhutsong. Kamorao ho nako e khethelileng ea thapelo, e be ba ithoballa hamonate, ho fihlela A ba tsosa hoseng, hore ba kene tšebetsong bocha. Khetlong lena, O lakatsa ba qete bosiu le Eena, ba ntse ba rapela, empa A sitoa le ho mamella hore bona ba bone mahlomola a Hae.

Jesu A re, “Salang mona, le falimehe le ‘na.’ A fetela pelenyana -e seng hole haholo, ba ne ba ka Mo bona, le ho Mo utloa — eaba O oela fatše ka sefahleho. A ikutloa hore ka sebe, O arohanngoa le Ntate. Khohlo e ne e le sephara, e le ntšo, e tebile, hoo moea oa

Hae o ileng oa tsitsipana. Bohlōkō bona ha A tšoanela ho sebelisa matla a Hae a bo-Molimo ho bo qoba. E le motho, O lōkela ho jara litholoana tsa sebe sa motho. E le motho, O lōkela ho mamella bohale ba Molimo khahlanong le litšito.

### Moleko O Tšabehang

Kreste joale O ne A eme boemong bo fapaneng le boo A kileng A ema ho bona pele. A eme sebakeng sa motho, Kreste O ne A hlora tlas'a kahlōlo ea leholimo. Ho fihlela mona, E ne e le 'muelli oa ba bang, empa ha joale O ne A lakatsa ho fumana ea ka Mo buellang.

Ha Kreste A utloa hore bonngoe ba Hae le Ntate bo robehile, A tšaba hore bolenng ba Hae ba botho, A ka sitoa ho mamella ntoa. Moleki o ne a tlile ntoeng ea ho qetela a tšosang; ha a ka hlōloa mona, 'muso oa lefatše o ka qetella e le oa Kreste, 'me eena ka boena a be a ketotsoe. Empa ha Kreste A ka hlōloa, lefatše e ka ba 'muso oa Satane, 'me lelōko la botho le ka ba matleng a hae ka ho sa feleng.

Satane a bolella Kreste hore ha A ka fetoha tefelo ea lefatše la sebe, O tla tšoaeloa 'muso oa Satane, ebe ha A hlōle A ba ntho e le 'ngoe le Molimo. 'Me joale sehlabelo sa Hae se tla be se entse molemo ofe? Satane a hatella taba holim'a Mopholosi: Batho ba ipolelang ba le kaholim'a bohle tabeng tsa moea ba ntse ba batla ho U timetsa. E mong oa barutuo ba Hau o tla U eka. E mong oa balateli ba Hau ba sehlahlo o tla U latola. Kaofela ba tla U lahla. Taba ea hore bao A ba ratang hakaalo ba ikopanye le maraba a Satane, ea hlaba moea oa Kreste. Teko ena e ne e tšabeha. Libe tsa batho li ne li hatile Kreste haboima, 'me khopolo ea khalefo ea Molimo khahlanong le sebe, ea thuhakanya bophelo ba Hae.

Mahlomoleng a Hae A imamarela ka lefatše le batang, e ka hoja O ithibela hore A se huleloe hole le Molimo. Molomong oa Hae o sehlefetseng ha tsoa selo se bohlōkō, "Ntate, haeba ho ka etsahala, senelo sena a se ke se mphete, empa ho be kamoo ho ratang uena kateng, e seng 'na."

## **Jesu O Ne A Lapatse Kutloelo Bohlōkō Ea Botho**

Pelo ea motho ha e le mahlomoleng, e laba-labela kutloelo bohlōkō. Takatso ena, Krete A e utloa ka botebo bo boholo bothong ba Hae. A tla ho barutuo ba Hae, A nyoretsoe ho utloa mantsoe a khotatso. A lakatsa ho tseba hore ba Mo rapella, le bona ba ithapella. Botebo ba sebe bo ne bo bonahala bo le lefifi hakaakang! A ba tekong a tšabehang ea hore, A tlohelle moloko oa botho o itjarele molato oa oona, ebe Eena O ema A hloka molato pel'a Molimo. Ha feela A ne A ka tseba hore barutuo ba Hae ba thabela seo A tlil'o se etsetsa lefatše O ne A tla matlafala.

Empa, A “fumana ba robetse.” Hoja O ba fumane ba ntse ba batla setšabelo ho Molimo, hore matla a Satane a se ke a ba hlōla, A ka be A tšelisehile. Empa ha ba ka ba ela hlōkō tlhokomeliso e reng, “Falimehang, ‘me le rapele.” Ba ne ba sa ikemisetsa ho lahla Morena oa bona, empa ba bonahala ba hatiloe ke boroko boo ba ka beng ba bo hlaphotse hoja ba tsoela-pele ho kōpa ho Molimo. Ha Mopholosi A ne A hloka lithapelo tsa bona haholoholo, ba ne ba robetse.

Barutuo ba tsoha ha ba utloa lentsoe la Jesu, empa ba sitoa ho Mo tseba, sefahleho sa Hae se ne se fetohile haholo ke mahlomola. A bua le Petrose A re, “Simone, u robetse? Na u sitiloe ho falimeha hora e le ‘ngoe? Falimehang, le rapele, hore le se kene molekong; moea o mafōlōfōlō, empa ‘mele oa fokola.” Jesu A tšoha hore ba tla sitoa ho mamella teko ea ho ekoa ha Hae le lefu.

[463] Mor'a Molimo A boela A tšoaroa ke bohlōkō bo kaholimo ho botho, ‘me A tetcabela, A khathetse, A hulana ho boela sebakeng sa pele sa tsieleho ea Hae. Matsoalo a Hae a ne a le maholo ho feta pele. “Mofufutso oa hae oa e-ba joaloka marotholi a mali a rothelang fatšše.” Lifate tsa Kiporese le palema e ne e le lipaki tse khutsi- tseng tsa bohlōkō ba Hae. Makaleng a tsona a nang le makhasi, ha rotha phoka e boima, e oela ‘meleng oa Hae o sohlokehileng, e ka hoja tlhaho e llela Mohloli ha A loantšana le matla a lefifi A ‘notši.

Nakoana e se kae pele, Jesu O ne A eme joaleka sefate se matla, A hlōla sefefe sa khanyetso se neng se Mo halefela. Empa joale O ne A tšoana le lehlaka le otloang le ho kojoa ke sefefe se bohale. Joaleka Ea seng a apesitsoe khanya, O ne A ile A ipolela bonngoe le Molimo. Joale lentsoe la Hae la utloahala mantsiboea ho khutsitse,



le tletse bohlōkō ba botho. “Ntate, haeba ho ka etsahala, senoelo sena a se ke se mphete, empa ho be kamoo ho ratang uena kateng, e seng ‘na.’”

Jesu A boela A hlorela mantsoe a barutuoā, a neng a tla roba matla a botšo bo neng bo le haufi haholo le ho Mo aparela. Empa mahlo a bona a ne a le boima, “ba ne ba sa tsebe hore na ba ka mo araba joang.” Ba bona sefahleho sa Hae se na le likhororo tsa mali tsa bohlōkō, empa bohlōkō ba keello ea Hae ba sitoa ho bo utloisisa. “Tsobotsi ea hae e n’e senyehile ho feta ea bohle, sebōpeho sa hae se sa tšoane le sa batho.” Esaea 52:14.

### Ha Boemo Ba Lefatše Bo Tetema Sekaleng

Jesu A retelaha ho boela selaong sa Hae, ‘me A oela ka sefahleho. Botho ba Mor’a Molimo bo ne bo thothomela nakong eo ea teko. Motsotso o mahlonoko oa ho etsa qeto ka bokamoso ba lefatše, O ne o fihlile. Bokamoso ba botho, bo ne bo reketla sebakeng. Kreste ka motsotso oona ona, O ne A ka hana ho noa senoelo se abetsoeng motho ea molato, O ne A ka itlhakola likhororo tsa mali phatleng ea Hae, ‘me A tlohella motho a shoele melatong ea hae. O ne A ka ‘na A re, Motloli ke eena ea tla amohela kotlo ea sebe sa hae, ‘Na ke khutlela ho Ntate. Na ea se nang molato a ka jarisoa litholoana tsa thohako ea sebe, ho pholosa ea molato? “Ntate, haeba senoelo sena se sitoa ho mpheta ke sa se noe, a ho etsoe thato ea hao!”

Ka makhetlo a mararo O ne A ile A khoecha ha A lokela ho phetha sehlabelo sa ho qetela, se phethelang. Empa joale A bona hore lelōko la botho le hloka thuso. A bona matla a sebe. Mahlomola a lefatše le timelang a feta ka pele ho Eena. A bona kotlo e tjametseng lefatše , ‘me A etsa qeto. O tla pholosa motho A sa iqenehele ka letho. O tlohile mabaleng a leholimo, ho tla pholosa lefatše le le leng le oetseng tlong. ‘Me A ke ke A koenehela thomo ea Hae.

[464]

Hoba A etse qeto ena, A oela fatše eka Oa shoa. Ba ne ba le kae barutuoā, hore ba tšehetse hlooho ea Morena oa bona ha A akheha? Mopholosi O tsamaile serapeng A le mong, ‘me haele batho, ho ne ho se le ea mong pel’a Hae. Sheba Esaea 65:3.

Empa Molimo A utloa bohlōkō le Mora ea Hae. Mangeloi a bona bohlōkō ba Mopholosi. Ho ne ho khutsitse leholimong. Harepa

li sa letsoe. Letšoele la mangeloi la lebella le khutsitse, le hlomohile, ha Ntate A arohanya mahlaseli a leseli, a lerato le khanya, A li tlosa ho Mora ea Ratoang.

Satane le mahlahana a hae a bokhopo, ba lebelletse ka cheseho. Ebe karabo e-tla ba efe, thapelong eo Krete A e phetileng ka makhetlo a mararo? Nakong ena e mahlonoko haholo, ha senoelo sa mohlolo se thothomela letsohong la ea utloang bohlōkō, lengeloi le matla le emang pel'a Molimo la tla lehlakoreng la Krete. Lengeloi le ne le sa tlela ho tla nka senoelo letsohong la Krete, empa e le ho Mo matlafatsa ka tiisetso ea lerato la Ntate. La Mo tiisetse hore lefu la Hae le tla tlisa tlhōlo e tletseng holim'a Satane, 'me 'muso oa lefatše lena o tla fuoa bahalaleli ba Mookameli ea Phahameng. La Molella hore O tla bona matsoele a lelōko la botho a bōlōkeha, a bōlōkeha ka ho sa feleng.

### **Kamoo Thapelo Ea Krete E Arabiloeng**

Mahlomola a Krete ha a ka a khaotsa, empa ho tetebela le ho nyahama tsa Mo tlohela. Sefefo ha sea ka sa kokobela, empa O ne A matlafalitsoe hore A thulane le bohale ba sona. Khotso ea leholimo ea lula holim'a sefahleho sa Hae se mali. O ne A jere seo ho seng motho ea ka se jarang; hoba O ne A latsoitse mahlomola a lefu sebakeng sa motho e mong le e mong.

[465] Barutuo ba robctse, ba phaphama ka potlako, ba bona lengeloi. Ba utloa lentsoe le buang lipolelo tsa khothatso le tšepo ho Mopholosi. Eaba joale ha ba sa hlōla ba tšoha bakeng sa Morena oa bona; O ne A le tlas'a tlhokomelo ea Molimo. Barutuo ba boela ba inehela ho hloloa ke boroko bo makatsang, 'me Jesu A boela A fumana ba robetse.

Jesu A ba sheba ka masoabi A re, "Na le sa ntse le robetse, le phomotse? Bonang, nako e atametse, 'me Mor'a Motho o neeloa matsohong a baetsalibe." Eare A sa bua, A utloa maoto a sehlopha se tli'l'o 'Matla, eaba O re, "Tsohang, a re eeng; ea nkèkang ke enoa, o se a atametse."

Ha Jesu A atamella pele ho kopana le moeki oa Hae, ho ne ho sa bonahale mohlala oa mahlomola a Hae a tsoa feta. "Le batla mang?" Ba Mo araba ba re, "Jesu oa Nasaretha." Jesu A araba A re, "Ke 'na enoa." Ha ho buuo mantsoe ana, lengeloi le neng le sebeletsa

Jesu la tsamaea lipakeng tsa Hae le sehlopha. Leseli la leholimo la khantša sefahleho sa Mopholosi. Kahar’a khanya ena e halalelang, sehlopha sa babolai sa sutha ka santhao, sa oela fatše. Esita le Judase a oela fatše.

Lengeloi la sutha, ‘me khanya ea fela. Jesu O ne A na le monyetla oa ho phonyoha, empa A sala kahar’a sehlopha seo se thatafetseng, joale se rapaletse se hloka thuso maotong a Hae.

Empa kapele pono ea fetoha. Masole a Roma, baprista le Judase ba ne ba bokanetse Krete, ba tšohile hore A ka tšoana A phonyoha. Ba ne ba na le bopaki ba hore ea emeng ka pele ho bona ke Mora oa Molimo, empa ha ba ka ba kholiseha. Ha ba botsoa, “Le batla mang?” Ba boela ba araba ba re, “Jesu oa Nasaretha.” Mopholosi joale A re, “ke le boleletse hore ke ‘na; haeba le batla ‘na he, lesang batho bana ba ikcle;” — a supa barutuo. O ne A itokiselitse ho ba sehlabelo sa bona.

Judase, moeki, ha a ka a lebala karolo eo a neng a lokela ho e phetha. O ne a fane ka pontšo ho ba batlang Jesu, a re, “Eo ke tla mo aka, ke eena; le mo tšoare.” Eitse ha a atamela ho Jesu, a Mo tšoara ka letsoho joaleka motsoalle eo a mo tlactscng. A re, “E, Moruti!” ‘me a Mo aka ka makhetlo, a bile a bonahala a lla, eka o Mo hlomohetse tsietsing ea Hae.

Jesu A re, “Motsoalle, u tletse’ng moo?” Lentsoe la Hae le ne le thothomela ke tšabo, A eketsa A re, “Judase, na u ka èka Mor’a motho ka kako na?” Boipiletso bona, bo ne bo lokela ho tsosa letsoalo la moeki, empa tlhompho le bonolo ba botho li ne li mo furalletse. O ne a inehetse ho Satane, ‘me a hloka matla a ho itokolla. Jesu ha A ka A hana kako ea moeki.

[466]

Sehlopha sa tšoara Jesu, ‘me ba Mo fasa matsoho ao a neng a lemaletse ho etsa mesebetsi e metle.

Barutuo ba halefa ha ba bona ho ntšuo mehala ho fasa matsoho A Eo ba Mo ratang. Petrose ka khalefo, a ntša sabole ea hae, ‘me a khaola tsebe ea mohlanka oa moprista e moholo. Ha Jesu A bona se etsahetseng, A lōkōlla matsoho a Hae, leha a ne a tšoeroe ka thata ke masole a Roma, ‘me A re, “Tlohelang, ho lekane!” A ama tsebe e khaotsoeng, ea fola hang.

Eaba O re ho Petrose, “Busetsa sabole ea hao selateng sa eona, hobane bohle ba tšoereng sabole ba tla bolaoa ka sabole. Kapa u lekanya hore ke sitoa ho rapela Ntate, a nthōmelle hona joale

mabōtho a mangeloi a fetang leshome le metso e ‘meli?’ - legione bakeng sa morutuo a e mong le e mong. Barutuo a ba nahana ba re ekaba ke hobaneng, ha A sa ipholose, A re pholosa le rōna? Ho araba mehopolo ea bona, eo ba sa e buang, A eketsa A re, “Empa Mangolo a ka phethahala joang a reng, eka khona hobe joalo?” “Na ha nka ke ka noa senoelo seo Ntate a ‘neileng sona na?”

Baprista le baholo, ka masene, ba kopana le balebeli ba tempele le sehlopha, ba latela Judase ho ea Gethesemane. Bahlompheli ba ikopanya le sehlopha se makatsang - mphi e hlometseng ka libetsa tsa mefuta-futa, eka hoja ba tsoma sebatana!

Ha A retelehela ho baprista le baholo, Krete A bua mantsoe ao ba ke keng ba a lebala: “Le tla ho ‘Na le nkile lisabole le melamu joaleka ha eka le batla lesholu. Ka letsatsi le letsatsi Ke ne ke lula tempeleng, Ke ruta. Le ne le na le monyetla oa ho ntšoara, empa ha lea etsa letho. Bosiu ke eona nako e lokelang mesebetsi ea lona. Empa nako ena ke ea lona le ea Matla a Lefifi.”

Barutuo a ba tšoha hampe ha ba bona Jesu A lumela ho nkoa A tlangoa. Ba khopisoa ke hore A jare nyeliso ea Hae le bona. Ba sitoa ho utloisisa sebōpeho sa Hae, ‘me ba Mo nyatsetsa ho inehela. Khalefong le letsoalong la bona, Petrose a ba eletsa hore ba ipholose bo bona. Ba latela keletso ena. “bohle ba mo siea, ba baleha.”

## KHAOLO EA 75—JESU O QOSOA HO SA IPAPISOA LE MOLAO

[467]

*[E itšetlehile ka Matheu 26:57-75; Mareka 14:53-72; 15:1; Luka 22:54-71; Johanne 18:13-27]*

Ba potlakisa Jesu mapatlelong a khutsitseng ha ho robetsoe. Ho ne ho se ho fetile khitla ea bosiu. Mopholosi A tsamaea habohlōkō ho ea tlung ea borena ea Hannase, eo e kileng ea ba moprista e moholo A fasitsoe. Hannase e ne e le hlooho ea lelapa la boruti le tšebetsong; ‘me batho ba ne ba ntse ba mo nkile e le moprista e moholo leha a ne a se a holile hakaalo. Litaba tsa hae li ne li nkuoa e le Lentsoe la Molimo. O ne a lokela ho ba teng ha ho hlahlojoa motšoaruoa, e le ho tšaba hore Kaiafa ea maiphihlelo a fokolang, a ka tšoana a sitoa ho tiisa sepheo seo ba se sebeletsang. Masene a hae le maqiti li lokela ho sebelisoa, hore kahlōlo ea Krete e tle e phethahale.

Kreste O ne A lokela ho qosoa lekhotteng le leholo ka tloaelo (Sanhedrin), empa selelekela sa qosoa sa qala ho Hannase. Ka molao oa Roma, lekhottla le leholo (Sanhedrin), le ne le lokela feela ho hlahloba motšoaruoa le ho fana ka kahlōlo, ‘me e ne e tla tiisoa ke baokameli ba Roma. Ka lebaka lena, ho ne ho hloka hore liqoso tse etsetsoang Krete, e be tse tla amoheleha e le tlōlo ea molao ho Baroma esita le ho Bajuda. Ha se baprista le babusi ba bangata ba ileng ba fumana ho na le molato lithutong tsa Jesu. Josefa ea Arimathea le Nikodema ba ne ba ke ke ba bitsoa nakong ena, ‘me ba bang ba tšaba ho bua ho emela tōka. Qoso e ne e lōkela ho kopanya lekhottla le leholo ho loantšša Krete. Baprista ba lakatsa ho tiisa liqoso tse peli. Ha bopaki bo ka tiisa hore Jesu ke monyefoli, O ne A ka tsuoa ke Bajuda. Ha ho ka kholiseha hore phetohelo e teng, ho ne ho tla tiisa hore Baroma ba Mo tsoe.

[468]

Hannase a leka ho theha qosoa ea bobeli pele. A botsa Jesu lipotso, ka khopolo ea hore motšoaruoa O tla bua ho hong, ho ka pakang hore O ne A leka ho etsa mokhatlo oa lekunutu, ka sepheo

sa ho theha ‘muso o mocha. Joale baprista ba ne ba tla Mo hlahisa ho Baroma e le mothehi oa pherekano.

Eaka hoja A bala maikutlo a kahare-hare a mochochisi. Kreste A latola hore O phutheha le balateli ba Hae ka lekunutu ebile e le bosiu, hore ba pate mekhoha ea Hae. A araba A re, “Ke buile le lefatše phatlalatsa; ke rutile ka matlung a thapelo le ka Tempeleng kamehla, moo Bajuda bohle ba phuthehelang tehg, ‘me ha kea ka ka bua letho lekunutung.”

Mopholosi A bontša phapang pakeng tsa mokhoa oa Hae oa tšebetso, le mekhoha ea baqosi ba Hae. Ba ile ba Mo tsoma, hore ba Mo ise lekhotleng la motse ka lenyele, moo ba neng ba tla fumana ka tiiso ea leshano, seo ba neng ba ke ke ba se fumana haele ka litsela tse otlolohileng. Taba ea hore sehlopha se Mo tšoare bosiu, ba Mo some, ba Mo etse hampe le pele A ka ahlōloa, e ne e le mokhoa oa bona oa tšebetso, eseng oa Hae. Ketso eo ea bona e ne e le tlōlo ea molao. Melao ea bona, e ne e bolela hore motho e mong le e mong a ncoe a hloka molato ho fihlela ho pakehile hore o molato.

Ha A retelehela ho mochochisi oa Hae, Jesu A re, “U mpotsetsa’ng?” Na lihloela li ne li se teng liphuthehong tsohle le sechaba, ‘me ba isetsa baprista litaba tsohle tseo A li buileng le tseo A li entseng? “Botsa ba utloileng seo ke se buileng ho bona; ke bona ba tsebang seo ke se buileng.”

Hannase a thola. E mong oa bahlanka a tlala khalefo, a otlala Jesu sefahlelong a re, “Na u hle u arabe Moprista e Moholo joalo?” Jesu A araba ka bonolo, “Haeba ke buile hampe, bolela bobee boo, empa haeba ke buile hantle, u nkotlela’ng na?” Karabo ea hae e bonolo e ne e tsoa pelong e hlokang sebe, e mamellang, e bonolo, e ke keng ea khopisoa.

[469] Matsohong a batho bao A ba etsetsang sehlabelo se sa feleng, Kreste A amohela tlontlollo. ‘Me A utloisoa bohloko ka lebaka la bohaleli ba Hae le ho hloea sebe. Ho hlahisoa lekhotleng ke banna ba neng ba sebelisoa ke modemona, ho Eena e bile sehlabelo se sehlohali. Hore A potoe ke batho ba tsamaisoang ke matla a Satane ebile bohloko bo bohlo. ‘Me O ne A tseba hore ha A ka phatsimisa matla a Hae a bo-Molimo, A ka lihela bahlorisi ba Hae ba khopoleroleng la lefatše. Hona ha etsa hore teko ea Hae e be boima le ho feta.

Bajuda ba ne ba lebeletse Mesia, eo ka ho panya ha ntši, ka matla a hlōllang, A tlang ho fetola tsela ea likelello tsa batho, ‘me A ba qobelle ho amohela boholo ba Hae. Ho tjee, Kreste A hlōkōfatsoa ka tello, A tleloa ke moleko o matla oa hore A hlahise semelo sa Hae sa bo-Molimo, A qobelle bahlorisi ba Hae hore ba pake hore Ke Morena ea kaholimo ho marena le babusi, baprista le tempele. Ho ne ho le thata ho tiisetsa boemong boo A bo khethileng, ba ho tšoana le batho.

### **Mangeloi A Ka Be A Lopolotse Kreste Ka Thabo**

Mangeloi a leholimo a ne a laba-labela ho pholosa Kreste. Ha ba shebile pono eo e lihlong, ho ne ho ka ba bobebe ho bona ho felisa bahlorisi ba Molimo. Empa ba laeloa hore ba se etse joalo. E ne e le karolo ea borōmuoa ba Hae ho mamella, ka botho ba Hae, lithōkōfatso tsohle tseo batho ba tla Mo etsa tsona.

Kreste ha A ka A bua letho le neng le ka fa baqosi ba Hae monyetla, empa ba Mo fasa, ho bontša hore O tsuong. Leha ho le joalo, ho ne ho lokela hore ho be le mokhoanyana oa qoso ea molao. Taba ena baokameli ba ne ba ikemiselitse ho e potlakela. Ba ne ba tseba hore na Jesu O amohelela joang bathong, ‘me ba tšaba hore ba ka ‘na ba leka ho Mo pholosa. Hape, ha kahlōlo e ke ke ea etsoa hang, ho ne ho tla lokela hore nako e etsang veke e fete, ka lebaka la Paseka. Hona ho ne ho ka ‘na ha hlolisa merero ea bona. Ha nako ea veke e ne e ka feta, lipheto ho li ne li ka ‘na tsa hlaha. Karolo e kholo ea batho e ne e ka hlahisa bopaki bo Mo emelang, e totobatse mesebetsi e meholo eo A e entseng. Litaba tsa lekhotla la Sanhedrin li ne li tla lahloa, ‘me Jesu A lōkōlloe. Baprista le babusi ba ikemisetsa ho bona hore pele merero ea bona e tsebahala, Jesu A be A nehetsoe matsohong a Baroma.

Empa ho lokela ho fumanoe qoso pele. Ba ne ba e-s’o fumane letho. Hannase a laela hore Jesu A isoe ho Kaiafa. Leha a ne a hloka semelo se matla, Kaiafa o ne a hloka botho, a sa tsotelle joaloka Hannase hantle. E ne e se e le ka meso joale, ho sa le lefifi. Sehlopha se hlometseng ‘moho le motšoaruoa oa bona, sa tsoela pele, se khantšitse mabone, ho leba lapeng ha moprista e moholo. Ba lekhotla la Sanhedrin ba tla ba latela, Ha-nnase le Kaiafa ba boela ba botsa Jesu lipotso, empa ba hloka katleho.

[470]

Ka tlung ea kahlōlo, Kaiafa a lula setulong sa Hae sa bookameli. Baahloli ba le mahlakoreng a hae, le ba bang ba nang le thahasello nyeoeng ena. Masole a Roma a ne a le sethaleng tlasana ho setulo se phahameng. Maotong a setulo se phahameng ho ne ho eme Jesu. Pherekano e ne e le matla. Har'a sechaba sena sohle, ke Eena feela ea neng a khutsitse, a sa ferekana.

Kaiafa o na a nkile Jesu joaleka ea hlolisanang le eena. Cheseho ea sechaba ea ho tla mamela Mopholosi, e ile ea tlatsa moprista e moholo ka mōna o bohale. Empa Kaiafa ha a sheba motsoaruo, a ōtloa ke ho makala ke boitšoarō ba Hae ba borena bo hlomphehang. Kholiseho ea mo tlela ea hore motho enoa O amana le Molimo. Hang-hang a leleka khopolo eo, ka lentsoe le kharumang a batla hore Jesu A etse o mong oa mehlolo ea Hae e matla. Empa mantsoe a hae ha a fihla litsebeng tsa Mopholosi, eaka hoja a sa utloahale. Likelellong tsa sechaba se thatafetseng, ha hlaha potso, Na motho eo ea shebahalang joaleka Molimo ke eena ea tliš'ō ahlōloa e le sesinyi?

Lira tsa Jesu li ne li tlaletsoe. Ba ne ba sa tsebe hore na ba tla fihlela joang tsuo ea Hae. Kaiafa a lakatsa ho qoba ho tsosa pherekano. Ho ne ho na le lipaki tse ngata, tse ka pakang hore Krete O ile A bitsa baprista le bangoli baikaketsi le babolai, empa hona ho ne ho sa lekana hore ho ka hlahisoa. Bopaki bo joalo bo ne bo hloka matla ho Baroma. Ho ne ho na le bopaki bo bongata ba hore Jesu O ile A bua A hlompholla litšebeletso tse ngata tsa Bajuda. Bopaki bona le bona bo ne bo fokolloa ke matla ho Baroma. Lira tsa Krete tsa tšaba ho Mo qosa ka ho se bōlōke Sabatha, esere lipotso tsa hlahisetsa leseling mehlolo ea Hae ea pholiso.

[471] Lipaki tsa leshano li ne li rekiloe, hore ba qose Jesu ka hore O batla ho theha 'muso o sele. Empa bopaki ba bona ba hlaha bo fokola ebile bo loantšana. Ha ba botsoa lipotso, ba latola lipolelo tsa bona.

Pelenyana lithutong tsa Hae Krete O ne A re, "Qhaqhang temple ena, 'me ke tla e tsosa ka matsatsi a mararo." O ne A porofeta lefu la Hae le tsōho. "Feela eena o ne a bua ka tempele eo e leng 'mele oa hae." Johanne 2:19,21. Ho tsohle tseo Krete A li buileng, baprista ba hloka ho fumana seo ba ka Mo nyatsang ka sona haese hona hona. Baroma ba ne ba kene tšebetsong ea ho nchafatsa le ho ntlafatsa tempele, hona e ne e le tlotla e kholo ho bona, 'me nyeliso e neng e



ka hlaha malebana le tšebetso eo, e ne e phahamisa khalefo ea bona. Mona Baroma le Bajuda ba kopana; hobane kaofela ba ne ba nkile tempele ka tlhompho e kholo.

Paki e 'ngoe e neng e rekiloe ho qosa Jesu, ea re, “Motho enoa o itse: ‘Nka qhaqha Tempele ea Molimo, ‘me ka e tsosa ka matsatsi a mararo.’” Hoja mantsoe a Krete a ne a tlalehiloe hantle joalekaha A ne A a bua, a ka be a sa fana ka hore A nyatsuo lekhlotleng la Sanhedrin. Polelo tsa Hae li ne li ka mpa tsa tolokoa li bontša feela moea oa boithoriso, o sa utloahaleng empa e seng nyeliso. Esita le ha li se li hlahisitsoe hampe ke lipaki tsa bohata, lipolelo tsa Hae li ne li sena letho leo Baroma ba ka le nkang e le tšito e lōkelang lefu.

Qetellong baqosi ba Jesu ba ne ba itšoaselelitse, ba ferekane, ba hlakane lihlooho. Ho ne ho bonahala eka maqheka a bona a tla hlōloa. Kaiafa a tsieleha. Ha sala ntho e le 'ngoe: Krete A tlamelloe hore A itsoe ka boEena. Mopriska e moholo a qala a le setulong sa kahlōlo, sefahleho sa hae se sosobane ke khalefo, a 'motsa a re: “Na ha u arabe letho holim'a tseo ba u qosang ka tsona?”

Jesu A ikhutsetsa. “O il'a tlatlapuo, a ikokobetsa ha a hlōkōfatsoa, empa ha ho letho leo a il'a le bua; a qhōjoa sa konyana ha e isoa tlabong, 'me joalokaha nku e sa lle ha e kutoa, le eena ha ho letho leo a il'a le bua.” Esaea 53:7.

Qetellong Kaiafa a bua le Jesu ka mokhoa o kang oa kano e mahlonoko: “Ke re u hlapanye ka Molimo ea phelang, u re bolelle hore na u Krete, Mor'a Molimo.”

Boipiletsong bona Krete A sitoa ho khutsa. A tseba hore ho araba joale ho tla tiisa lefu la Hae. Empa boipiletso bo ne bo entsoe ke e moholo-holo sechabeng, a bo entse ka lebitso la Ea Holimolimo. A lokela hore A bolele phatlalatsa sepheo sa Hae le boqosa ba Hae. Jesu O ne A ile A re ho barutuo ba Hae, “Mang le mang ea mpakang pel'a batho, le 'na ke tla mo paka pel'a Ntate ea maholimong.” Matheu 10:32. Joale A phetha thuto eo ka mohlala oa Hae.

Mahlo 'ohle a ne a shebile sefahlehong sa Jesu ha A araba, “Uena u rialo.” Khanya ea leholimo ea bonahala e khantša sefahleho sa Hae se pulufetseng; ha A eketsa A re, “empa kea le bolella, ke re: Ho tloha joale le tla bona Mor'a Motho a lutse letsohong le letona la Ea Matla, 'me a e-tla a le holim'a maru a leholimo.” Ka nakoana e se kae Mopriska e Moholo a tšoaso ke mahlo a Mopholosi a

phunyeletsang. Bophelong bohle kamorao ho moo, a sitoa ho lebala mahlo a Mor'a Molimo mohla A hlōkōfatsoang.

### **Kaifa A Batla A Kholiseha**

Mohopolo ea hore bohle ba tla ema pel'a Molimo, ho fumana moputso ho latela mesebetsi ea bona, ea eba mohopolo o tšosang Kaiafa. Ka kelellong ea hae, ha feta litšoantšo tsa pono ea kahlōlo ea ho qetela. Ka nakoana a bona mabitla a ntša bafu ba ho 'ona, 'moho le makunutu ao a neng a tšepile hore a patetsoe ruri. A ikutloa eka hoja Moahloli ea kante o ntse a bala maikutlo a hae, 'me A tlisa pepeneng liphiri tseo a neng a lumela hore li patiloe le bafu.

Kaiafa o ne a latotse tsoho, kahlōlo le bophelo bo tlang. Joale, a hlantšoa ke khalefo ea Satane. A hahōla kobo ea hae, a batla hore motšoaruo a ahlōleloe nyefolo. A re, "O nyefotse, re sa hlokela'ng lipaki? Joale le ikutloetse nyefolo. Le re'ng?" 'Me kaofela ba Mo tsoa.

Kaiafa a ikhalefela haholo ka ho lumela mantsoe a Kreste, eare bakeng sa ho hahōla pelo ea hae, 'me a pake hore Jesu ke Mesia, a hahōla likobo tsa hae tsa boprista, a tletse bohanyetsi. Ketso ena ea ba le bohlokoa bo khethehileng. Ka ketso ea ho tiisa tsuo ea Kreste, moprista e moholo o ne a itsoile ka boena. Ka molao oa Molimo o ne a itlhakotse bopristeng. O ne a iphile kahlōlo ea lefu.

[473]

Moprista e moholo o ne a sa lokela ho hahōla liaparo tsa hae. Ka molao oa Boprista, moprista o ne a sa lōkela ho hahōla kobo ea hae tlas'a maemo a fe kapa a fe. Molao o hlakileng o ne o fanoe ke Kreste ho Moshe malebana le taba ena. Sheba Meetlo 10:6. Motho ea nama a ka hahōla pelo ea hae ka ho bontša moea o robهيلeng, o ikokobelitseng. Empa ho se hahōloe likobo tsa boprista, hobane hona ho ka silafatsa boemeli ba lintho tsa leholimo. Moprista ea phahameng ea neng a ka kena litšebeletsong tsa sehalelo ka kobo e hahōtsoeng, o ne a shejoa e le ea ikhaotseng ho Molimo. Ketso ena e entsoeng ke Kaiafa, ea bontša khalefo ea botho, ho se phethahale ha botho.

Ka ho hahōla liaparo tsa hae, Kaiafa a bontša molao oa Molimo o hloka matla, a latela meetlo ea batho. Molao o iketselitsong ke batho, o lumella hore tabeng ea nyefolo moprista a ka hahōla liaparo

tša hae ‘me a hloka molato, e le ha a tšositsoe ke sebe. Empa ka ketso ena, eena ka boena o ne a etsa nyefolo.

Ha Kaiafa a hahōla seaparo sa hae, ketso eo ea hae e ne e bontša boemo boo sechaba sa Bajuda se tlang ho bo nka pel’a Molimo kamorao ho moo. Batho ba Bajuda ba neba Mo latotse eo e neng e le sebele sa lilelekela tsohle tša bona, sebele sa liriti tsohle tša bona. Iseraele o ne a hlalile Molimo. Ha ho makatse ha moprista e moholo a hahōla likobo tša hae ke letsoalo bakeng sa hae le sechaba.

### Ho Hloka Tšeka Ha Qoso Ea Krete

Lekhotla la Sanhedrin le boletse Jesu a lōkeloa ke lefu, empa e ne e le khahlanong le molao ea Bajuda ho qosa motšoarua bosiu. Qosong ea molao, ho ne ho ke ke ha etsoa letho haese motšehare, ka pele ho moifo o felctseeng oa lekhotla. Ho sa natsoc hona, Mopholosi joale A tšoarua joaleka scsinyi se tsuocng, A etsoa hampe le ke ba tlase-tlase molōkong oa botho. A fctisoa mabaleng. Jesu A lebisoa moo A il’o koalloya, ‘me kahohle A teana le litšomo tša hore O ipita Mor’a Molimo. Mantsoe a Hae a reng, “a e-tla a le holim’a maru a leholimo” a ne a phetua ka ho soma le ho phoqa. Ha A ntse A koaletsoe moo A neng A emetse qoso ea molao, Jesu O ne A sa tšireletsoa, ‘me schlopha se hlokang tsebo sa ipha matla ho etsa mekhoa ea bona eohle ea bosatane. Mohau le tōka tša hatakeloa holimo. Ha ho sesinyi se kileng sa tšoarua hampe joaleka Mor’a Molimo.

[474]

Empa ho na le kotlo e bileng bohloko ho feta tsohle tse tsoileng letsohong la sera. Ha A ntse A hlahlojoa kapele ho Kaiafa, Krete O ne A latoloe ke e mong oa barutua ba Hae.

Petrose le Johanne ba ile ba ikhathatsa ho latela sechaba se neng se tšocre Jesu, feela ba tsamaela thōko. Baprista ba hlokomela Johanne ‘me ba mo amohella ka tlung, ka tšepo ea hore etlare ha a bona Moetapele oa hae A tlontlolloa o tla lahla maikutlo a hore motho ea joalo ekaba Mor’a Molimo. Johanne a buella Petrose, ‘me le eena a lumelloa ho kena.

Ka khotla ho ne ho besitsoe molloya, hoba ho ne ho bata, ka ha meso e ne e le haufi. Sehlopha sa atamela mollong, ‘me Petrose le eena a lula le bona. Ka ho itsoakanya le bona, o ne a lakatsa hore a nkoe e le e mong oa ba tlisitseeng Jesu khotla.

## Petrose Oa Hlōloa

Empa lekhabunyane le lebelang monyako la mo shebisisa. La hlokomela masoabi a sefahlehong sa hae, ‘me la nahana hore ke e mong oa barutuoa ba Jesu. La khalla ho tseba, ‘me la botsa, “Na uena ha u e mong oa barutuoa ba monna eo?” Petrose a tsieleha a ferekana; a iketsa ea sa utloisiseng se boleloang. Empa lekhabunyane la mo phehella. Petrose a tlameha ho araba, ‘me a re ka bohale, “Hela, mosali, ha ke mo tsebe!” Ena e ne e le tatōlo ea pele, ‘me hang mokōkō oa lla. Ka ho nka moea oa boiphapanyo, Petrose a fetoha phofu e bonolo ea moleko.

A atamelo a hape lekhetlo la bobeli, ‘me a hlalosa e le e mong oa balateli ba Jesu. Petrose joale a bolela a bile a hlapanya a re, “Motho eo ha ke mo tsebe.” Ha feta nako e ka etsang hora, e mong oa habo motho eo Petrose a ileng a mo khaola tsebe, a ‘motsa, “Na ha kea ka ka u bona u e-na le eena serapeng?” “Kannete u e mong oa bona, etsoe u Mogalelea.” Hona ha halefisa Petrose haholo. Petrose joale a latōla Morena oa hae ka mahlapa le ho ikana, e le ho leka ho tiisa thetso ea hae, ho tiisa sebōpeho sena ho ba ntseng ba ‘motsa lipotso. Mokōkō oa lla hape. Petrose a o utloa, ‘me a hopola mantsoe a Jesu, “Mokōkō ha o e-s’o lle habeli, u tla be u ntatōtse hararo.” Mareka 14:30.

Eare litlhapanyo tse latōloang li sa le ncha molomong oa Petrose, le lentsoe la mokōkō le ntse le lla ka litsebeng tsa hae, Mopholosi A reteleha, A sheba hantle ka ho morutuoa oa Hae. Ka nako eona eo, mahlo a Petrose a sheba ho Mopholosi. Sefahlehong seo se bonolo a bona kutloelo-bohlōkō e tebileng le masoabi, empa ho se khalefo.

Cebahalo ea sefahleho seo se mahlomoleng, le melomo e thothomelang, ea hlaba pelo ea hae joaloka lerumo. Petrose a hopola tšepiso ea hae ea nakoana e seng kae pele ho moo, ha Mopholosi A tla ‘molella hore o tla latōla Morena oa hae hararo ka bosiu bo le bong. Petrose joale a hlokomela hore Morena oa hae O ne A balile pelo ea hae hantle, ha eena a ne a sa tsebe bothetsi ba eona.

Leqhubu la mehopolō la mo tsukutla. Kutloelobohlōkō ea Mopholosi, le mamello ea Hae -kaofela a li hopola. A hopola thetso ea hae ka ho nyaroha, le likano tsa hae tsa leshano. Hang hape, a bona letsoho le nyefolang tse halalelang, ha le phahama

ho otlala Morena oa hae sefahlehong. A sitoa ho mamella pono ena halelele, a potlaka, ka pelo e bohlōkō, a tsoa ka tlung eo.

A tsamaea a le mong har'a lefifi, a sa tsebe, a bile a sa tsotella hore na o ea kae. Qetellong a iphumana a le Gethesemane. A hopola ka masoabi a bohlōkō hore Jesu O ile A hlomoha thapelong A inotši. A hopola keletso ea Hae e mahlonōkō, "Falimehang, 'me le rapele, hore le se kene molekong." Matheu 26:41. Hona ha thonkha pelo ea hae e lutlang mali, ha a hlokomela hore o ekelitse boima bo boholo holim'a mahlomola le tlontlollo ea Mopholosi. Petrose a oela fatše ka sefahleho, 'me a itakaletsa ho shoa.

Hoja nako ea ha ba serapeng, e bile ea ho falimeha le ho rapela, Petrose a ka be a sa sala a tšepile matla a hae a fokolang. A ka be a sa latōla Morena oa hae. Hoja barutuo ba ile ba lebela le Krete mahlomoleng a Hae, ba ka be ba ile ba lōkisetsoa ho boha mahlomola a Hae sefapanong. Kahar'a lefifi la nako ea teko e fetisisang, tšepo e ka be a khantšitse lefifi 'me ea matlafatsa tumelo ea bona.

[476]

### **Liteko Tse Matla Tsa Ho Tsoa Jesu**

Hang hoba letsatsi le chabe, lekhotla la Sanhedrin la boela la kopana, 'me Jesu A boela ka tlung ea lekhotla. O ile A ipolela hore ke Mor'a Molimo, empa ba ne ba keke ba Mo ahlōla ka taba eo, hobane ba bangata ba ne ba le sieo litabeng tsa bosiu, 'me ba sa utloa mantsoe a Hae. Ebile ba ne ba tseba hore lekhotla la Roma le tla sitoa ho fumana ho bona bopaki bo lekanang lefu. Empa ha ba ne ba ka ikutloela molomong oa Hae, ha A bolela hore ke Mesia, ba ne ba ka 'na ba nka polelo eo e le boitseko ba lipolotiki.

"Haeba u le Krete, re bolelle," ba rialo. Empa Krete A thōla. Ba tsoela pele ho Mo botsa lipotso. Qetellong A araba, "Ha nka le bolella, ha le ka ke la ntumela, 'me ha nka le botsa, ha le ka ke la nkaraba." Eaba O eketsa ka tlhokomeliso e mahlonoko, "Empa ho tloha joale, Mor'a Motho o tla lula ka letsohong le letona la Molimo ea matla 'ohle."

"Na u Mora oa Molimo?" ba botsa. A re ho bona, "Lea bolela, ke eena." Ba hoeletsa ba re, "Re sa hloka bopaki ba eng? Re ikutloetse molomong oa hae."

Joale Jesu O ne A lokela ho shoa. Ho neng ho hlokahala joale e ne e le hore Baroma ba tiise tsuo ena.

Joale ha tla pono ea boraro ea tšenyeho, e mpe ho feta e neng e hlaha ho sehlopha se sa tsebeng letho. Hona ha etsahala mahlong a baprista le babusi, ka tšusumetso ea bona. Hoba kahlōlo ea Jesu e phatlalatsoe ke baahloli, batho ba tšoaroa ke bohale ba bosatane. Ba khorohela Jesu. Hoja e se be ka masole a Roma, A ka be A sa phela ho fihlela A thakhisoa sefapanong sa Kalfari. A ka be A tamolotsoe litsekana. Babusi ba Roma ba khalemela, ‘me ba thibela bohlahla ba sechaba ka likhoka.

Banna ba bahedene ba halefisoa ke tlhōkōfatso ea Motho ea sa fumanoang a le molato. Baokameli ba Roma ba bolela hore ho khahlanong le molao oa Bajuda, ho ahlōlela motho lefu ka boipolelo ba Hae. Hona ha ka ha khutsisa mofere-fero ho se ho kae, empa baetapele ba Bajuda ba ne ba hloka mohau le lihlong.

[477] Baprista le babusi ba lebala maemo a bona a tšebetso, ‘me ba tlontlolla Mora oa Molimo ka lipolelo tse mpe. Ba Mo soma ka batsoali ba Hae. Ba bolela hore kahobane A ipolela e le Mesia, O lōkeloa ke lefu le lihlong ka ho fetisisa. A akhelo a seaparo se tsofetseng hloohong, ‘me bahlorisi ba Hae ba Mo otlala mahlong ba re, “Porofeta! Ke mang ea u otlileng?” E mong ea soto a Mo tšoela sefahlehong.

Mangeloi a ngola ka botšepahi, tsohle tse mpe tse entsoeng Moetapele oa bona ea ratoang, mahlapa le mahlo a rohakanang. Ka letsatsi le leng, batho bana ba rohakileng sefahleho sa Krete se khutsitseng, se pulufetseng, ba tla se bona se le khanyeng, se khanya ho feta letsatsi.

## **KHAOLO EA 76—KAMOO JUDASE A LAHLEHETSOENG KE MOEA OA HAE KATENG**

[478]

Pale ea Judase e hlahisa qetello e hlomolang, ea bophelo bo ka beng bo ile ba tlotlisoa ke Molimo. Ha e ne eba Judase o ile a shoa pele ho leeto la hae la ho qetela la ho ea Jerusalema, a ka be a nkiloe a lōkeloa ke sebaka har'a ba leshome le metso e 'meli, 'me o ne a tla hopoleha. Ho nyatsuo a ho mo setseng morao ka lilemo-lemo, ho ka be ho le sieo. Empa semelo sa hae, se ile sa senoleloa lefatše e le tlhokomeliso ho bohle ba èkang tse halalelang.

Ho tloha mohla mokete o neng o le ha Simone lapeng, Judase a na a ba le monyetla oa ho shebisisa ketso eo a neng a se a kene tumellanong ea ho e etsa, empa morero oa hae oa se ke oa fetoha. A rekisa Morena oa khanya ka theko e kaalo ka ea lekhoba.

Judase ke tlhaho o ne a rata chelete haholo, empa o ne a e-s' o senyehe ha hore a etse ketso e tšoanang le ena. O ile a bokotsa meharo ea leruo, ho fihlela e imetse lerato la hae ho Krete. Ka bokhopo bo bong a inehela ho Satane, hore a khanneloe hohle ke sebe.

Judase e bile e mong ea ikopantseng le barutuo a ha matšoele a ne a latela Krete. O ne a bona mesebetsi ea Mopholosi e matla ea ho folisa ba kulang, ho leleka bademona le ho tsosa ba shoeleng. A amohela thuto ea Jesu e le e phahameng ho feta tsohle tseo a kileng a li utloa. A ba le takatso ea hore a fetoloe semelo, 'me a tšepa hore hona ho ka etsahala ha a ka ikopanya le Jesu.

Mopholosi ha A ka A tebela Judase. A mo fa sebaka e le e mong oa ba leshome le metso e 'meli, 'me A mo neha matla a ho folisa ba kulang, le ho leleka bademona le ho tsosa bafu. Empa Judase o ne a sa inehela kahohle ho Krete. Ha a ka a tela takatso ea hae ea lefatše, kapa lerato la hae la chelete. Ha a ka a lumela ho boptjoa ke leholimo, empa a ipha sebōpeho sa ho nyatsa le ho ahlōla.

[479]

Judase o ne a na le tšusumetso e kholo holim'a barutuo. O ne a nketse litsebo tsa hae holimo, 'me ba bang a ba shebela tlase haholo. Judase a ithetsa hore kereke e ka be e thulane le lihlong hangata, hoja e se ka lebaka la hae hoba a tseba ho okamela hantle. Monahanong oa hae, e ne e le eena tlotla ka har'a tšebetso ena, ka lebaka lena a inkela holimo.

Kreste A 'mcha moo a neng a tla fumana monyetla oa ho bona, le ho lōkisa bofokoli ba semelo sa hae, empa Judase a khoramela mekhoha ea hae ea meharo. Lichelete tse fokolang tse 'nileng tsa fihla matsohong a hae, ea e-ba moleko oa kamehla. Ha a ile a etsetsa Kreste tšebetsonyana, a ipatala hona cheletseng eo e fokolang. Mahlong a hae e ne e le lebaka la amohelehang ho emela ketso ea hae, empa mahlong a Molimo e ne e le lesholu.

Judase o ne a ralile tsela eo a neng a lebeletse hore Kreste A sebetse ka eona. O ne a rerile hore Johanne Mokolobetsi o lokela ho ntšuo teronkong. Empa Johanne a tlohella, a ba a khaoloa hlooho. 'Me Jesu, bakeng sa ho phetetsa lefu la Johanne, A ea kathōko ho motse ho ea phomola. Judase o ne a batla ntoa e matla ea likhoka. A hopola hore ha Jesu A ke ke A thibela barutuo ho ntšetsa morero oa bona pele, mosebetsi o ka ba le katleho e kholo. A bona qholotso ea baetapele ba Bajuda e sa natsoe, ha ba ne ba batla hore Jesu Kreste A etse pontšo e tsoang leholimong. Pelo ea hae ea bulehela ho hloka tumelo, 'me sera sa mo fepela ka mehopolō ea bohanyetsi e kang ena: Ke hobaneng ha Jesu A ile A supela pele qoso le polao ea Hae le barutuo ba Hae? Na ebe tšepo ea hore o tla fumana litulo tse phahameng 'musong e senyehile?

### **Ho Sebetsa Khahlanong Le Kreste**

Judase o ne a ntse a ntšetsa pele mohopolo oa hore Kreste O tla busa Jerusalema e le morena. Mokateng oa katiso ea mahobe, ke eena ea neng a hateletse ka matla morerong oa hore Kreste A nkoe ka likhoka, A etsoe morena. Mehopolō ea hae e ne e phahame 'me masoabi a hae ea e-ba a babang.

[480]

Thuto ea Kreste ka bohobe ba bophelo ea liella litema. A bona Kreste A fana ka melemo ea moea ho fapana le ea lefatše. A bona hore ekare Jesu ha A na ho fumana tlōtla ea letho, 'me ha A na ho A abela barutuo ba Hae litulo tse phahameng. A ikemisetsa hore a se



ikopanye le Kreste haholo, a mpe a chechelle morao, a lebelle. <sup>KATENG</sup> <sup>cdlxi</sup> Me a fela a lebella.

Ho tloha ka nako eo, a hlahisa lipelaelo tse ileng tsa ferekanya barutuo. A hlahisa likhang le litemana tsa Mangolo tse neng li sa kopane le linnete tse neng li hlahisoa ke Kreste. Litemana tsena, tse arotsoeng ho tse ling, tsa tsietsa barutuo 'me ho nyahama ho ba imetseng ha eketseha. Judase a bonahala eka o hlokolosi. Joale a sebetsa ka mokhoa o bonahalang e le oa bolumeli, o bohlae, 'me a fa mantsoe a Jesu moelelo o fapaneng le oo Jesu A neng A o fana. Litlhaliso tsa hae ka linako tsohle, e ne e le tse etsang hore batho ba laba-labele ho phahamisoa litulong bophelong bona. Qabang ea hore na e moholo ke mang e ne e bakiloe ka Judase.

Ha Jesu A ne A hlalose tsa mohlankana oa morui lipallo tsa ho ba morutuo, Judase a utloa ho entsoe phoso. Batho ba tsoanang le morui eo, ke ba ka thusang ho tshetsa mosebetsi oa Kreste. Judase a nahana hore eena ka boeena, o ne a ka hlahisa merero e mengata molemong oa kereke e fokolang. Linthong tsena a inahana hore o bohlae ho feta Kreste.

### **Monyetla Oa Judase Oa Ho Qetela Oa Ho Baka**

Ho tsohle tseo Kreste A li boleletseng barutuo, ho ne ho na le seo Judase, ka pelong, a sa lumellaneng le sona. Ka tšusumetso ea hae, tomoso ea ho se khotsofale ea sebetsa. Jesu A bona hore Satane o butse mocha oo ka oona a susumetsang barutuo ba bang. Feela Judase ha a ka a bua pelaelo ea hae ho fihlela mohlantsoe ho phuthehiloeng lapeng ha Simone. Mohla Maria a neng a tlotsa maoto a Jesu, Judase a hlahisa meharo ea hae. Ha Jesu A mo khalemela, a utloa bohlokō, a lakatsa ho iphetetsa, a sa thijoe ke letho. Ana e tla ba maiphihlelo a e mong le e mong ea tsoelang pele ho qaputsa sebeng.

Empa Judase o ne a e-s' o thatafalle ruri. Esita le kamorao hore a itlame habeli hore o tla eka Mopholosi, monyetla oa pako o ne o sa le teng. Tafoleng ea Paseka, Jesu O ile A sebeletsa Judase ka lerato 'moho le barutuo ba bang. Boipiletso ba ho qetela ba lerato a se ke a bo natsa. Maoto ao Jesu A neng A a hlatsoitse a tsoa ho ea mosebetsing oa boeki.

Judase a itjoetsa hore haeba Jesu O tla thakhisoa, ketsahalo eo ke hore e phethahale. Ketso ea hae e ke ke ea fetola letho. Haeba Jesu ha A lōkela ho shoa, O tla tlameha ho itopolla. A utloa hore o fumane monyetla o motle ka ho eka Morena oa hae.

Judase leha ho le joalo, o ne a sa khloe hore Krete O tla lumela hore A tšoaro. Ha a Mo eka, sepheo sa hae e ne e le ho Mo ruta thuto. O ne a rerile ho hlokomelisa Mopholosi hore, ho tloha nakong eo, O lokela ho mo neha hlomphe e mo lokelang. Hangata ha bangoli le Bafarisi ba ne ba thonaka majoe ho Mo tlepetsa, O ne A ba nyamella. Erekaha A ile A phonyoha maraba a mangata, ruri A ke ke A itumella hore A tšoaro.

Judase a rera hore a ke a leke taba ena. Haeba Jesu ruri e le Mesia, batho ba tla Mo etsa morena teroneng ea Davida, ‘me hona ho ne ho tla mo fumantša maemo a pele, pel’ a Krete, ‘musong o mocha.

Serapeng, Judase o ile a re ho baetapele ba sehlopha, “Le mo tsoare.” Matheu 26:48. O ne a lumetse ka ho tiea hore Krete O tla phonyoha. ‘Me e ne e tla re ha ba mo tsekisa e be o re, Ha kca le joetsa hore le Mo tiise?

Ka ho makala, Judase a bona Mopholosi A itlohella hore A khannoe. Ka linako tsohle o ne a lebeletse ho bona A makatsa lira tsa Hae, ka ho hlaha e le Mora oa Molimo. Empa ha nako e ntse e tsamaea, moeki a tleloa ke tšabo e kholo ea hore o rekisitse Morena oa hae ho Mo isa lefung.

Ha qoso e ea qetellong, Judase a sitoa ho mamella letsoalo la hae le molato. Hang ha utloahala lentsoe le makherehloa le hoelehetsa kahar’ a ntlo, le re: “Ha A na molato, Mo tlohele hle Kaiafa!” Seemo sa Judase se phahameng sa bonahala se fohla har’ a letšoele le maketseng. Sefahleho sa hae se ne se pulufetse, ‘me mofufutso o thuntse phatleng. A mathela setulong sa kahlōlo, a lahlela lichelete tse neng li rekile keko ea Morena fatše, kapele ho Moprsta e Moholo. A tšoara Kaiafa ka kobo, a mo kōpa hore a lōkōlle Jesu. Kaiafa a mo sutumetsa ka bohale, a mpa a sa tsebe seo a ka se buang. Bomenemene ba baprsta ba senoleha. Ba ne ba rekile morutuo hore a eke Morena oa hae.

[482]

“Ke sitiloe ka ho èka mali a se nang molato.” Joale Moprsta e Moholo a boela a iphumana, a araba a re, “Hoo ho re ama ka’ng?”

Ke tabeng ea hao!” <sup>KATENG</sup> Matheu 27:4. Baprista ba ne ba khotsofaletse ho <sup>cdlxiii</sup> sebelisa Judase empa ba nyelisa bofokoli ba hae.

### **Mahlomola A Maholo A Pako Ea Judase**

Judase joale a itahlela maotong a Jesu, a Mo paka hore ke Mora oa Molimo, ebile a Mo kōpa hore A itōkōlle. Mopholosi A tseba hore Judase o ne a sa utloa bohlokō bo tebileng, bo robang pelo, ka hore ebe o òkile Mora oa Molimo Ea hlokang letheba. Leha ho le joalo, A se ke A bua letho le mo tsoang. A sheba Judase ka mohau, ‘me A re, “Ke tletse nako eona ena lefatseng”.

Phutheho eohle ea makatsoa ke mamello ea Krete ho moeki oa Hae. Monna enoa O kaholimo ho motho oa nama! Empa ke hobaneng ha A sa itōkōlle ‘me a hlōla baqosi ba hae?

Likōpo tsa hae ha li hlōtsoe, Judase a tsoa ka tlung a matha, a hoelehetsa a re, Ha ho sa na thuso! Ha ho sa na thuso! A ikutloa hore a ke ke a phelela ho bona Jesu A thakhisoa, ‘me ka ho tsieleha, a tsamaea a ea iphanyeha.

Hamorao tsatsing leo, sehlopha se isang Jesu sebakeng sa thakhiso, sa bona setōpō sa Judase tlas’a sefate se omeletseng. Boima ba hae bo ile ba khaola thapo eo a neng a iphanyehile ka eona. Lintja li ne li se ntse li itjella setōpō sa hae se tamukaneng. Kotlo e ne e bonahala e se e qalile ho ba nang le molato maling a Jesu.

[483] **KHAOLO EA 77—KRESTE O QOSOA KAPELE  
HO ‘MUSISI OA ROMA**

*[E ilšetlehile ka Matheu 27:2,11-31; Mareka 15:1-20; Luka 23:1-25; Johanne 18:28-40; 19:1-16.]*

Ke tlung ea lekhotla la Pilato, ‘musisi oa Roma, ho ne ho eme Krete, A fasuoe e le motšoaruo; A potiloe ke masole a Mo le-betseng. Batho ba tli’o lebella ba ne ba kena ka bongata. Kantle, ho ne ho eme baahloli ba lekhotla la Sanhedrin, baprista, babusi le sehlopha sa batho feela.

Kamor’a hore lekhotla la Sanhedrin le tsoe Jesu, ba ile ba tla ho Pilato hore kahlōlo eo e tiisoe, e be e phethahatsoe. Empa baokameli ba Bajuda ba ne ba ke ke ba kena ka lekhotleng la Roma. Ho latela molao oa bona oa mekete, ba ne ba tla itšilafatsa ‘me ba hlōloe ho kena moketeng oa Paseka. Ba ne ba sa bone hore lehloeo le bolaeang le tletse ka lipelong tsa bona. Ba ne ba sa bone hore haele moo ba lahlile Krete, e leng Konyana ea Paseka ka sebele, mokete oo o moholo o ne o lahlehetsoe ke bohlokoa ho bona.

Pilato a sheba Mopholosi ka mahlo a hlokang setsoalle. Ereka ha a ne a tsositsoe liphateng ka potlako, a rera ho phetha mosebetsi oa hae ka potlako e kholo. A tiisa ka mahlong haholo, a ntoo sheba hore na ke motho ea joang eo a lōkelang ho mo hlahloba.

[484] Mahlo a hae a tsepama holim’a Jesu ka ho batlisisa. O ne a sebetsana le lisenyi tsa mefuta-futa, empa o ne a e-s’o tliisetsoe motho ea lokileng, ea hlomphehang joaleka enoa. Sefahlehong sa Hae ho ne ho sa bonahale molato, ho se letsoalo, ho se boitiiso kapa tello. A bona motho eo sefahleho sa Hae se nang le letšoa la leholimo.

Pilato a fihleloa ke botho. Mofumahali oa hae o ne a kile a mo qoqela ho hong, ka liketso tsa mohlolo tse etsoang ke moporofeta oa Galelea, ea neng a folisa ba kulang ebile a tsosa bafu. A hopola litšebo tseo a neng a ile a li utloa bathong ba bangatanyana. A batla ho Bajuda hore ba mo fe qoso ea motšoaruo. “Motho eo ke mang,

‘me le Mo tlisitse ka life?’ Ba araba hore ke mothetsi ea bitsoang Jesu oa Nasaretha.

Pilato a boela a botsa, “Le qōsa monna eo ka eng?” Baprista ba se ke ba araba potso ea hae, empa ka ho teneha ba re, “Hojane monna enoa o ne a sa etsa bobbe, re ka be re sa mo tlisa ho uena.” Ha lekhotla la Sanhedrin le u tlišetsa motho eo le bonang a lōkeloa ke lefu, na ho hlokahala hore u ‘ne u batle qoso ea motho eo? Ba ne ba leka ho khannela Pilato hore a lumellane le kōpo ea bona, a sa ka a kena lihlahlobong tse ngata.

Pelenyana ho mona, Pilato o ne a ‘nile a ahlolela batho ba bang lefu, a potlakile leha ba ne ba sa lokeloa ke lefu. O ne a sa tsotelle kelellong ea hae, hore na motšoaruoa o molato kapa ha a na molato. Baprista ba ne ba tšepile hore joale Pilato o tla fana ka kahlōlo ea lefu ho Jesu, a sa mamela litaba tsa Hae.

Empa ntho e ‘ngoe e ho motšoaruoa enoa, ea tšoarella Pilato. A ke ke a etsa joalo. A hopola kamoo Jesu A ileng A tsosa Lasaro, motho ea neng a na le matsatsi a mane a shoele; ‘me a ikemisetsa ho tseba hore na O qosoa ka’ng, le hore na ho na le bopaki.

A re, Haeba kahlōlo ea lona e lekane, le tlišelitseng motšoaruoa ho ‘na? “Mo nkeng e le lōna, le mo ahlōle ka melao oa lōna.” Baprista ba bolela hore ba se ba Mo ahlōtse, empa ba lokela ho fumana kahlōlo ea Pilato, ho matlafatsa kahlōlo ea bona. Kahlōlo ea lona ke efe? Ho botsa Pilato. Ba araba ba re, Ke lefu. Ba kopa Pilato hore a tiise kahlōlo eo ea bona; bona ba tla jara boikarabelo ba qeto eo. Leha e ne e le mofokoli, Pilato a hana ho tsoa Jesu ho fihlela ho hlahisitsoe qoso ea Hae.

Baprista ba ba tsietsing. Ba ne ba sa batle hore ho hlhelle hore Krete O tšoeroe ka litaba tsa bolumeli, hoba taba eo e ne e tla hloka matla ho Pilato. Ba etsa hore ba hlahise hore Jesu ke moferekanyi oa lipolotiki. Baroma ba ne ba le seli kamehla ho qotsula sohle se ka bakang mofere-ferere.

[485]

Tsielehong ea bona baprista ba bitsa lipaki tsa leshano. “La qala ho mo qosa, la re: ‘Re fumane monna enoa a khelosa sechaba sa rōna, a thibela ha ho ntšetsoa Sesare lekhetho, ‘me a ipolela hore ke Krete, Khosi.’” Liqoso tse tharo, tse hlokang motheo kaofela. Baprista ba ne ba tseba taba ena, empa ba ne ba ikemiselitse ho hlapanyetsa leshano.

## **Pilato A Lemoha Leqheka**

Pilato a se ke a lumela hore motšoaruoa eo o ne a leka ho liha ‘muso. A lumela hore hona le leqheka le tebileng le etsetsoang ho bolaea motho eo ea hloakang molato. A retlehela ho Jesu, a re, “Na u khosi ea Bajuda?” Mopholosi A araba A re, “Uena u rialo.” Eitse ha A bua, sefahleho sa Hae sa khanya, eaka hoja lehlasele la letsatsi le se chabetse.

Ha ba utloa karabo ea Hae, Kaiafa a hlokomelisa Pilato hore le eena (Pilato) ke paki le hore Jesu O lumetse molato oo A qositsoeng ka oona. Pilato a re, “‘Na ha u arabe letho? Bona, kamoo ba u qōsang ka tse ngata kateng.’ Empa Jesu a se ke a hlola a araba letho.”

Kreste O ne A eme kamor’a Pilato, pontšeng ea bohle ba ka khotla. A utloa nyeliso; ‘me liqosong tsohle tsa leshano, A se ke A araba letho. A ema A sa sisinngoe ke maqhubu a bohale a neng a Mo tsukutla. Eaka hoja maqhubu a boima a khalefo, a nyolohang joaleka maqhubu a leoatle, a qhalanetse pel’a Hae, empa a se ke a Mo thetsa. Ho khutsa ha Hae, ha tšoana le leseli le khanyang le tsoa kahare le ea ho motho ea kantle.

Pilato a makala. Na motho eo ha A tsotelle ho pholosa bophelo ba Hae? Ha a sheba Jesu, a bona hore e ke ke eaba O hloka ho lōka joaleka baprista ba entseng lerata. E le ho qoba mofere-fere oa sechaba, Pilato a nkela Jesu thokoana, ‘me a boela a Mo botsa, a re, “Na u khosi ea Bajuda?”

[486] Jesu ha ka A araba ka kotloloho. Moea o Halalelang O ne O loantšoana le Pilato, ‘me A mo fa sebaka sa hore a lumele hore o kholisehile. A ‘motsa A re, “Na u bolela hoo ka bouena, kapa ba bang ba u boleletse ka ‘na?’” Pilato a utloisisa seo Jesu A se bolelang, empa a hana ho lumela kholiseho e neng e mo fihletse. “Na ke Mojuda? Sechaba sa heno le baprista ba baholo ba u tlisitse ho ‘na; u entseng?”

## **Jesu O Leka Ho Pholosa Pilato**

Jesu ha A ka A siea Pilato a hloka tlhakisetsa e eketsehileng. A mo neha hore a utloisise hore ha A batle borena ba lefatše lena.

A re, “Muso oa ka hase oa lefatše lena; ha ‘Muso oa ka e ne e le oa lefatše lena, balateli ba ka ba ka be ba loanne, hore ke se ke ka neeloa Bajuda, empa joale ‘Muso oa ka hase oa mona.’ Eaba Pilato o re ho eena: ‘Ha ho le joalo, na u fela u le khosi?’ Jesu a araba, a re: ‘Ke uena u reng ke khosi. Seo ke se tsoaletsoeng, le seo ke se tletseng lefatšeng, ke hore ke pake ‘nete. Mang le mang eo e leng oa ‘nete o utloa lentsoe la ka.’” Krete O ne A lakatsa hore Pilato a utloisise hore, ke feela ha a ka amohele ‘nete, ‘me a sebetsa ka eona, semelo sa hae se senyehileng se ka nchafatsoang.

Kelello ea Pilato ea ferekana. Pelo ea hae ea sisinngoa ke takatso e kholo ea ho tseba hore na hantle-ntle ‘nete ke’ng, ‘me a ka e fumana joang. A botsa a re, “‘Nete ke’ng?’” Empa a se ke a emela karabo. Baprista ba ne ba entse lerata ba batla qeto e potlakileng. A tsoela ho Bajuda, ‘me a phatlalatsa ka matla a re, “Ha ke fumane molato ho eena.”

Ha baprista le baholo ba utloa tsena ho Pilato, ho khena ha bona le khalefo tsa hloka moeli. Ha ba lemoha hore Jesu A ka ‘na A lōkōlloa, ba bonahala e ka ba ka Mo tamolla litsekana. Ba nyatsa Pilato ka lerata le leholo, ebile ba mo tšosa ka hore o tla lōkōlloa ‘musong oa Roma. Ba mo qosa ka hore o hana ho tsoa Jesu eo, ba tiisang hore, O iphahamisitse, o loantšana le Sesare. Ba bolella ka mantsoe a bohale hore tšusumetso e ferekanyang ea Jesu, e tsehahala hohle kahar’a naha. Ba re “O hlohleletsa sechaba ka ho ruta Judea eohle, ho tloha Galelea ho fihlela koano.”

Pilato ka nako ena, o ne a se na mohopolo oa ho tsoa Jesu. A tseba hore Bajuda ba Mo qositse ka lebaka la lehleo le litšekamelō. Ka tōka Jesu O ne A tlameha ho lōkōlloa. Empa ha a ka hana ho nehelana ka Jesu ma- tsohong a sechaba, mofere-fere o ka tsoha. Eitse ha a utloa hore Jesu O tsoa Galelea, a rera ho Mo rōmela ho Heroda, ‘musi oa sebaka seo, eo ka nako eo, a neng a le Jerusalema. Ka ketso ena, Pilato o ne a hopola ho rōlela boikarabelo ho Heroda. Hape, a hopola hore hona ke monyetla o motle oa ho felisa qabang ea khale lipakeng tsa hae le Heroda. ‘Me ha e-ba joalo, Bo-’maseterata bana ba babeli ba fetoha metsoalle qosong ea Mopholosi.

Kahar’a mahlapa a sehlopha seo, Jesu A potlakisetsoa ho Heroda. “Heroda a thaba haholo ha a bona Jesu...O ne a utloile tsa hae, ‘me a tsepile ho bona mohlolo a etsoang ke eena.” Heroda enoa ke eena eo matsoho a hae a khenathetseng mali a Johanne Mokolobetsi.

Heroda ha a qala ho utloa ka Jesu, o ile a otloa ke letsoalo, ‘me a re, “Ke Johanne...o tshile bafung.” Leha ho le joalo o ne a lakatsa ho bona Jesu. Joale ho ne ho na le monyetla oa ho pholosa bophelo ba moporofeta enoa, ‘me morena a tšepa hore a ka tlosetsa ruri kelellong ea hae, setšoantšo sa hlooho eane e mali eo a neng a e tlietsoe ka mokeke. Hape a lakatsa ho kholisa cheseho ea hae, ‘me a nahana hore ha Krete A ka fuoa tšepiso ea hore O tla lōkōlloa, A ka etsa eng kapa eng eo ha ka thoeng A e etse.

Hoba Mopholosi A kene, baprista le baholo ba hlahisa liqoso tsa bona ka potlako le mofere-ferere. Empa Heroda a laela hore ho khutsoe. A laela hore mahlaahela a Krete a lōkōlloe, ebile a se a ntse a qosa lira tsa Hae ka ho Mo hlōkōfatsa. Eena, joaleka Pilato, o ne a ikhotsofalitse hore Krete O ne A qosoa ka lehloeo le mona.

Heroda a botsa Krete lipotso ka mekhoha e mengata, empa Mopholosi A thola nyele. Ka taelo ea morena, ha tlišoa ba holofet-seng le lihlotso, ‘me Krete A laeloa hore A pake seo A ipolelang A le sona, ka ho etsa mohlolo. Jesu A se ke A arabela, ‘me Heroda a tsoela pele a re: Re etsetse pontšo ea hore O na le matla ana ao O boleloang ka ‘ona. Empa Mora oa Molimo o ne a nkile sebōpeho sa motho, ‘me A lokela hore A etse joaleka motho maamong a joalo a litaba. Ka lebaka lena, O ne A ke ke A phetha mohlolo ho ipholosa bohloko le nyelisong, tseo motho a lokelang ho li jara boamong bo joalo.

[488] Heroda a tšepisa Krete hore ha A ka etsa mohlolo, A ka lōkōlloa. Baqosi ba Krete ba tšoarua ke tšabo, hore e se be joale A ka etsa mohlolo. Ketsahalo e joalo e ka bolaea merero ea bona, ‘me mohlomong le bona ba ka lahlehela ke maphelo a bona. Ba phahamisa mantsoe, baprista le babusi ba re, ke lehlaba-phieo, ke monyefoli; O sebetsa mehlolo ea Hae ka matla a morena oa bade-mona.

Heroda joale o ne a se a shoa letsoalo, ho sa tšoane le ha a ne a thothomela ke letsoalo ha Herodiase a ne a kōpile hlooho ea Johanne Mokolobetsi. Kelello ea hae ea botho e ne e ntse e senyeha ho tsoela pele, ka lebaka la bophelo ba hae ba boitsoaro bo bobbe. O ne a bile a ithorisa ka kahlōlo eo a e etselitseng Johanne, ha a ne a leka ho mo khalemela. ‘Me joale o ne a tšosa Jesu, a Mo tsebisa hore o na le matla a ho Mo tsoa. Empa Jesu A se ke A fana ka pontšo ea hore O utloile letho.



Heroda a khopisoa ke ho thola hona. Ho ne ho bontša eka ke ho iphapanyetša matla a hae. A boela a etsa litšoso tse bohale ho Jesu, Eena A sala A sa sisinyehe, A khutsitse.

Thomo ea Krete e ne e se ho tla khotsofatsa licheseho tsa mafeela. Hoja lentsoe leo A neng A ka le bua, le ne le tla phekola meea e tšeroeng ke sebe, A ka be A sa thōla. Empa O ne A hloka mantsoe ho ba hatakelang 'nete ka maoto a bona a litšila. Heroda o ne a lahlile 'nete eo a neng a e boleletsoe ke moporofeta e moholo, 'me ho ne ho se molaetsa oo a ka hlōlang a o amohela. Morena oa leholimo O ne A hloka lentsoe bakeng sa Hae. Molomo oa Hae oa koalloya morena oa moikhōhōmōsi, ea neng a sa ikutloe a hloka Mopholosi.

Sefahleho sa Heroda sa ntšofala ka bohale. A bolela ka bohale hore Jesu ke mothetsi. 'Me ho Krete a re, Haeba ha U fane ka bopaki ba seo U ipolelang U le sona, ke tla U nehela matsohong a masole le sechaba. Haeba U mothetsi, lefu lea U lokela, haeba U Mora oa Molimo, ipholose ka ho etsa mohlolo.

Hang hoba mantsoe ana a buuoe, sehlopha sa fofela phofu ea sona, joaleka libatana tse hlaha. Jesu A hulanyetsoa koana le koana, Heroda le eena a kenella sehlopheng, ho leka ho nyelisa Mora oa Molimo. Hoja masole a Roma a se ke a namola, Mopholosi A ka be A tamollotsoe litsekana.

"Eare hoba Heroda le bahlabani ba hae ba mo nyelise, ba mo some, ba mo apesa seaparo se mahalihali." Masole a Roma a soma le 'ona. Sohle seo masole ao a senyehileng, 'moho le bahlomphehi ba Bajuda ba neng ba ka se hlohlelletsa, sa bokelloa holim'a Mopholosi. Empa mamello ea Hae ha ea ka ea fela.

[489]

### **Ba Bang Ba Thōthōmela Pel'a Jesu**

Empa ho na le ba bang ba neng ba thōthōmela pel'a Krete. Ba bang ba neng ba tlile ho tla soma, ba khutla ba tšaba ba khutsitse. Heroda o ne a ikutloa a le molato. Mahlaseli a ho qetela a khanya ea mohau a ne a chabetse pelong ea hae e thatafalitsoeng ke sebe. Bomolimo bo ne bo chabetse kahare ho botho. Heroda a utloa hore joale o shebile Molimo teroneng ea Hae. Leha a ne a thatafetse joalo, ha a ka leka ho tiisa tsuo ea Krete. A khutlisetsa Jesu lekhotleng la Roma.

Pilato a sareloa ha Bajuda ba khutla le motšoarua oa bona. A ba hopotsa hore o ne a se a ile a hlahloba Jesu, ‘me a fumana ho se molato ho Eena. Ba ile ba hlōloa ho tiisa qoso leha e le ‘ngoe. ‘Me Heroda, e le e mong oa habo bona, le eena ha a fumana letho ho Eena le lōkelang lefu. “Ka baka leo, ke tla mo shapa, ke nt’o mo lokolla.”

Mona Pilato a bontša bofokoli ba hae. Jesu O ne A se na molato, empa a ikutloa a lokela ho sokahanya tōka, e le ho khotsofatsa baqosi ba Hae. Hona ha mo beha tlokotsing. Sehlopha sa itšoarella ka ho hloka botsitso ha hae. Hoja qalong Pilato o ile a tiea, a hana ho tsoa motho eo a fumaneng a hloka molato, a ka be a khaotse mahlaahlela a bolaeang, a neng a tla mo tantela ka masoabi a bohlōkō bophelo ba hae bohle. Krete A ka be A bolailoe, empa molato o ka be o se holim’a Pilato. Empa Pilato o ile a tsoela pele ho hatakela letsoalo la hae, ‘me joale a iphumana a se a hloka thuso matsohong a baprista le babusi.

### **Monyetla Oa Ho Qetela Oa Pilato**

Esita le joale, Pilato o ne a sa tlohella hore a sebetse ka bofofu. Mosali oa hae o ile a eteloa ke lengeloi, ‘me a buisana le Mopholosi ka toro. Mosali oa Pilato e ne e se Mojuda, empa ha a shebile Jesu torong ea hae, a Mo tseba hore ke Khosana ea Molimo. A bona Pilato a nehelana ka Jesu hore A shapuo, hoba a qete hore, “Ha ke fumane molato ho motho eo.” A bona [Pilato] a fana ka Krete ho babolai. A bona sefapano se phahamisoa, lefatše le apareloa ke lefifi, ‘me a utloa mohōō oa mohlolo, o reng, “Ho phethehile.”

[490]

A boela a bona pono e ‘ngoe. A bona Krese A lutse holim’a leru le leholo le lesoeu, ‘me babolai ba Hae ba balehela khanya ea Hae. A phaphama ka seboko se tšohileng, ‘me hang a ngolla Pilato mantsoe a tlhokomeliso.

Morōmuoa a fohla har’a sechaba sa batho, ‘me a mo neha lengolo le tsoang ho mosali oa hae, le reng: “U se ke ua ba le taba le motho eo ea lokileng, hobane ke ile ka tšoenyeha habohlōkō kajeno ha ke lora.”

Sefahleho sa Pilato se pulufala. O ne a ferekantsoe ke maikutlo a hae a loantšanang. Ha a ntse a lieha ho etsa qeto, baprista le baholo ba ne ba ntse ba hlōhlelletsa likelello tsa sechaba. A ba a hopola

moetlo o neng o ka thusa hore Krete A lōkōlloe. E ne le tloaelo hore moketeng oona, ho lōkōlloe motšoaruoa e mong, eo batho ba ka mo khethang. Ho ne ho se seriti sa tōka ho hang moetlong oona, empa o ne o nketsoe holimo ke Bajuda. Babusi ba Roma hona nakong eo, ba ne ba tšoare monna ea bitsoang Barabase, ea neng a ahlōletsoe lefu. Monna enoa one a ipolela a na le matla a ho fetola tsamaiso ea lintho. Sohle seo a neng a ka se fumana ka ho utsoa le bosholu e ne e le sa hae. O ne a fumane batho ba mo latelang, 'me a susumelitse phetohelo ea 'muso oa Roma. O ne a le ka tlas' a lekōkō la bolumeli, empa e le sesinyi se thata, se sekametseng mofere-fereng le bokhopong.

Ka ho neha batho boikhethelo, pakeng tsa motho enoa le Mopholosi ea se nang molao, Pilato a hopola hore ba ka fihleloa ke kelello ea tōka.

“Le rata ha ke le lokollela ofe, Barabase kapa Jesu ea bitsoang Krete?” Karabo ea hlaha joaloka ho khonya ha liphoofolo tse hlaha, ea re, “U re lokollele Barabase.” Ka khopolo ea hore batho ha ba utloisisa potso ea hae, Pilato a botsa a re, “Na le rata ha ke le lokollela khosi ea Bajuda?” Empa ba boela ba hoeletsa ba re, “Bolaea enoa, u re lokolle Barabase.” “Joale ke etse joang ka Jesu ea bitsoang Krete?” Medemona e nkileng sebōpeho se botho e ne e le teng kahar' a sehlopha seo, 'me ho ne ho ka lebelloa eng, haese karabo e reng, “A thakhisoel!”

### Pilato O Ne A Sa Hlokomele Se Tla Etsahala

[491]

Pilato o ne a sa nahana hore ho ka qetella joalo. A tšaba ho nehela motho ea se nang molato, hore a bolaoe ka lefu le khopo ka ho fetisisa. “Empa o entse bobebefe?” Empa litaba li ne li se li senyehile haholo, ho ne ho se nako ea ho buisana.

Pilato a boela a leka ho pholosa Krete. “A re ho bona khetlo la boraro: 'Hobane'ng? O entse bobebefe?” Empa ho bua ka tokollo ea Hae feela, ho ne ho hlakanya batho lihlooho. Ba hōeletsa haholo ho feta ba re, “Mo thakise, mo thakhise!”

Jesu A shapuo, A khathetse, A tletse maqeba, “eaba bahlabani ba isa Jesu kahare, lebaleng la ntlo ea bobusisi, me ba bitsa lebōtho lohle. Ba mo apesa seaparo se sefubelu, ba lōha mofapahlooho oa meutloa, ba mo roesa oona. Ba qala ho mo lumelisa, ba re:

‘Ahe! Khosi ea Bajuda!’ Ba...mo tsoela ka mathe, ba kōqama ka mangoele sa mokana ba mo khumamela....ba mo somile.” Ka nako e ‘ngoe letsoho le khopo le otle mofapahlooho, e be meutloa e kenella litlhafunelong, ‘me mali a keketle sefahlehong.

Sehlopha se hlakaneng lihlooho sa bokanela Mopholosi oa lefatše. Ho kopantsoe ho soma le ho phoqa, le tlhapano tsa bonyefoli. Satane o ne a tsamaisa sehlopha seo. Morero oa hae e ne e le ho qholotsa Mopholosi hore A iphetetse, haeba ho ka etsahala, kapa a Mo khannele hore A etse mohlolo oa ho itōkōlla. Ka letheba le le leng holim’a bophelo ba Hae ba botho, Konyana ea Molimo e ne e tla ba nyehelo e sa phethahalang, ‘me topollo ea motho e hlolehe. Empa A inehela ka bonolo bo phethahetseng, mahlapeng le litlhōkōfatsong tse mpe ka ho fetisisa.

Lira tsa Krete li ne li batla mohlolo, e le bopaki ba bo-Molimo ba Hae. Ba ne ba na le bopaki bo boholo bo fetang boo ba bo batlileng. Bonolo ba Hae le mamello li ne li paka kamano ea Hae le Molimo. Marotholi a mali a neng a theoha litlhafunelong tsa Hae tse hlabiloeng, e ne e le tiiso ea hore O tlostitsoe ka “ole ea nyakallo” e le Moprasta e Moholo oa rōna. Sheba Baheberu 1:9. Khalefo ea Satane e ne e tlokoma, ha a bona hore Mopholosi ha a kheloha thato ea Ntate oa Hae ho hang.

[492]

### **Tumellano E Isang Tsenyehong**

Ha Pilato a ne a fana ka Jesu hore A shapuo, o ne a tšepile hore sehlopha se tla re kotlo eo e lekane. Empa Bajuda ba bona ka hlokolosi bofokoli ba hore ho ahlōloe motho ea phatlalalitsoeng a hloka molato. Ba ikemisetsa hore Jesu A ke ke A lōkōlloa.

Pilato joale a rōmella hore ho tlišoe Barabase ka khotla, batšoaruoa ba babeli bana, ba ema ba bapile. Ha a supa Mopholosi a re, “Motho oa lōna ke eo!” Mora oa Molimo O ne A eme moo, A hlobotse ho fihla thekeng, mokokotlong oa Hae ho bonahala meupo e melelele e keketlang mali. Sefahleho sa Hae se ne se na le mathaba, ebile se bontša ho opeloa, empa se bonahala se le setle le ho feta pele. Tsobotsi e ‘ngoe le e ‘ngoe e ne e bontša kutloelobohlōkō e kholohali ho lira tsa Hae tse khopo. Mekhoeng ea Hae, ho ne ho na le matla le boithlomphe tsa mamello e telele.

Phapang e kholo ea bonahala ho motšoaruoa ea pel'a Hae. Tsobotsi e 'ngoe le e 'ngoe ea Barabase, e ne e 'molela hore ke sesinyi se thata. Phapang ena e ne e itlhalosa ho e mong le e mong ea ba shebileng. Ba bang ha ba sheba ho Jesu ba lla, lipelo tsa bona tsa tlala ho hlomoha. Baprista le babusi ba kholoa hore O fela A le joalokaha A ne A ipolela.

Masole a Roma a neng a potapotile Kreste, a ne a sa thatafala 'ohle. Ba sheba Ea utloisoang bohlokō Oa leholimo, ka kutloelo-bohlokō, 'me boinehelo ba Hae bo khutsitseng ba hatisoa likelellong tsa bona. Pono eo e ne e ke ke ea hlakoha ho fihlela ba ka Mo amohela e le Kreste, kapa ba ikhethela tsela ea bona ka ho Mo latola.

Pilato o ne a sa belaele hore ponahalo ea Motho eo, ha A bapisoa le Barabase, e tla sisinya Bajuda hore ba be le mohau. Empa o ne a sa utloisise lehloeo le ferekaneng la baprista. Baprista, babusi le sechaba ba boela ba totisa haholo, ba re, "Mo thakhise, mo thakhise!" Qetellong, Pilato a lahlehela ke mamello eohle, ka ho nyahama a re, "Mo nkeng e le lona, le mo thakhise, hobane 'na ha ke fumane molato ho eena!"

'Musisi enoa oa Roma, leha a ne a tloetse lipono tse sehloho, o ile a kenoa ke mohau bakeng sa motšoaruoa eo ea mahlomoleng. Empa baprista ba re, "Re na le molao, 'me ho ea ka molao eka khona a shoe, kahobane o ikentse Mora oa Molimo."

[493]

### Mohau Oa Jesu Ho Pilato

Pilato a nyaroha. E ka 'na eaba ke sebōpuoa sa leholimo sena se emeng kapele ho Eena! A boela a re ho Jesu, "U tsoa kae?" Empa Jesu ha A ka A mo araba. Mopholosi O ne A ile A buisana ka bōlōkōlōhi le Pilato, A hlalosa boqosa ba Hae. Pilato o ile a iphanyetsa leseli leo. O ile a sebelisa matla a phahameng a kahlōlo hampe, ka ho inehela litakatsong tsa sechaba. Jesu O ne A se A mo hlokela leseli le leng. Pilato a halefisoa ke ho thola ha Hae, 'me a re ka boikhōhōmōso, "U hana ho bua le'na? Ha u tsebe hore ke na le matla a ho u lōkōlla, le matla a ho u thakhisa?"

Jesu A araba A re, "U ka be u se na matla a letho holim'a ka, ha u ne u sa a neoa a e-tsoa holimo; ka baka leo, ea u neileng 'na o na le sebe se fetang." Kreste O ne A bolela Kaiafa, ea neng a emetse

sechaba sa Bajuda. Ba ne ba na le leseli la boporofeta bo neng bo paka ka Kreste, le bopaki bo totobetseng ka bo-Molimo ba Eo ba Mo ahlōletseng lefu. Boikarabelo bo boima ho fetisisa, e ne e le ba ba emeng ka sehloohong ho sechaba. Pilato, Heroda le masole a Roma, ha ba bapisoa le bana, ba ne ba sa tsebe ka Jesu. Ba ne ba se na leseli leo sechaba sa Bajuda se le amohetseng ka khaphatseho. Hoja leseli le kile la fihla ho masole, ba ka be ba sa hlōkōfatsa Kreste joalekaha ba entse.

Pilato a boela a sisinya ho lōkōlla Mopholosi. “Empa Bajuda ba hōoa, ba re: ‘Ha u lōkōlla motho enoa, ha u motsoalle oa Sesare.’” Bajuda ba ne ba le ka sehloohong ho bohle ba nyatsang ‘muso oa Roma, empa hore feela ba tie ba atlehe ho timetsa Kreste, ba iketsa ba tšepahalang pusong eo ea balichaba, eo ba e hloileng.

“E mong le e mong ea iketsang khosi o hanyetsa Sesare,” ba tsoela pele joalo. Pilato o ne a ntse a belaelloa ke ‘muso oa Roma, ‘me a tseba hore tlaleho e joalo e ka mo senyeletsa. A tseba hore Bajuda ba ke ke ba siea letho, e le hore ba iphetetse.

[494] Pilato a boela a tlisa Jesu ho sechaba, a re, “Ke eo khosi ea lōna!” Ha boela ha utloahala lerata le tlerolang le re, “Molae! Molae! Mo thakhise!” Pilato a botsa ka lentsoe le utloahalang hohle, a re, “Ke thakhise khosi ea lōna?” Empa melomong e litšila, e nyefolang, ha hlaha mantsoe a reng, “Ha re na khosi haese Sesare.”

Ka ho khetha morena oa mohedene, sechaba sa Bajuda, se ne se lahlile Molimo e le morena oa bona. Ho tloha moo, ba ne ba se na morena, haese Sesare. Baprista le baruti ba ne ba khannetse sechaba moo. Tabeng ena, le litholoana tsa eona tse tšosang, boikarabelo e ne e le ba bona. Sebe sa sechaba, le tšenyeho ea sechaba li ne li hlahile ka lebaka la baetapele ba bolumeli.

“Eare ha Pilato a bona hore ha ho thuse letho, lerata le mpa le eketseha, a nka metsi, a hlapa matsoho pontšeng ea letšoele, a re: ‘Ha ke na molato maling a motho enoa; ke tabeng ea lona!’” Pilato a sheba Mopholosi, ‘me a re ka pelong ea hae, Ke Molimo. A retelehela ka ho bongata a re, Ha ke na molato maling a Hae. Mo thakhiseng, empa ‘na ke Mo bolela e le motho ea lokileng. Eka Eo A mo bolelang e le Ntata’e, A ka ahlōla lona e seng ‘na, sebakeng sa mosebetsi oa kajeno. ‘Me ho Jesu a re, U ntšoarele ka ketso ena, ke sitoa ho U pholosa. Eitse hobane a shape Jesu hape, a nehelana ke Eena hore A thakhisoe.

Pilato o ne a lakatsa ho pholosa Jesu, empa a bona hore a ke ke a etsa joalo, eaba o ntse a lōkeloa ke setulo sa hae. Ho fapana le ho lahlehelo a ke matla a lefatše, a khetha ho senya bophelo bo se nang molato. Ba bakae ba tloang molao ka mokhoa o joalo. Letsoalo le tšoanelo li supa tsela e itseng, ‘me boithati bo supe e sele. Moea o fokela hosele, ‘me ea lumcllanang le bokhopo o hoheloa lefifing le letšo la melato.

Pilato, lehoja a lekile ho itlhokomela, a tleloa ke ntho eo a neng a hlile a e tšohile. A theoloa setulong sa hae se phahameng, ‘me a hlajoa ke masoabi a bohloko le tlontlollo e kholo, hoo kamoraonyana ho thakhiso, a ileng a ipolaea.

Ha Pilato a ipolela a se na molato maling a Krete a lokileng, Kaiafa o ile a araba ke tello a re, “Mali a hae a botsoe rōna le bana ba rōna!” Mantsoe ao a bohloko a phetoa ke sechaba, ba tlerola ka mantsoe a phahameng. Bongata boo kaofela ba re, “Mali a hae a botsoe rōna le bana ba rōna!”

Sechaba sa Iseraele sa iketsetsa khetho — Barabase, lesholu le [495] ‘molai, moemeli oa Satane. Krete, moemeli oa Molimo A lahliloe. Ka ho etsa khetho ena, ba amohetse eo ho tloha qalong, e sa le e le raleshano le ‘molai. Satane e ne e le moetapele oa bona. Ba lokela ho mamella puso ea hae.

Bajuda ba hoeletsa ba re, “Mali a hae a botsoe rōna le bana ba rōna!” Thapelo eo e ile ea utluoa. Mali a Mora oa Molimo a ba holim’ a bona le bana ba bōna. Taba eo, ea hlahela habohloko ka tšenyeho ea Jerusalema, le boemo ba sechaba sa Bajuda ka lilemo tse batlang ho ba likete tse peli. Lekala le khethutsoeng sefateng sa morara, le shoele. Ho tloha naheng e ‘ngoe ho ea ho e ‘ngoe, le ho tloha mengoaheng ho isa mengoaheng, lekala leo le shoele melatong le libeng.

Thapelo eo e tla phethahala habohloko mohla letsatsi le leholo la kahlolo. Krete O tla tla ka khanya. Likete tsa likete tsa mangeloi, bara ba batle ba hlotseng, ba Molimo, ba tla Mo felehetsa tseleng ea Hae. Lichaba tsohle li tla bōkeloa kapele ho Eena. Sebakeng sa meutloa, O tla roala moqhaka oa khanya. Seaparong sa Hae, le serapeng sa Hae ho tla be ho ngoliloe lebitso le reng, “Khosi ea likhosi, le Morena oa marena.” Tsenolo 19:16.

Baprista le babusi ba tla boela ba bona pono ea ka tlung ea lekhotla. Boemo bo bong le bo bong, bo tla hlaha joalekaha eka bo

ngoliloe ka lithaku tsa mollo. Joale bao ba ileng ba rapela ba re, “Mali a hae a botsoe rōna le bana ba rōna,” ba tla amohela karabo ea thapelo ea bona. Ka tsieleho e kholo le matsoalo ba tla llela mafika le lithaba ba re, re oeleng holimo. Sheba Tsenolo 10:16,17.



## KHAOLO EA 78—JESU A SHOA SEFAPANONG

[496]

*[Khaolo ena e itšetlehile ka Matheu 27:31-53; Mareka 15:2038; Luka 23:26-46; Johanne 19:16-30.]*

Ha ba fihlile sebakeng se bitsoang Lehata, ba mo thakhisa teng le lisenyi tseo, se seng ka ho le letona, se seng ka ho le letšehali.”

Litaba tsa ho tsuoana ha Krete tsa phatlalla, ‘me batho ba mefuta le maemo ‘ohle ba bōkana ho ea sebakeng sa thakhiso. Baprista le babusi ba ne ba tlanngoe ke tšepiso ea hore ba ke ke ba hlekefetsa balateli ba Krete, haeba Eena ka sebele A ka neheloana ho bona, ‘me barutuoana le balumeli ba kena mokhuping.

Sefapano se neng se lōkisetsoe Barabase sa jarisoana Jesu, holim’a mahetla a tsoang mali. Metsoalle ea Barabase e ‘meli le eona e ne e il’o bolaoana ka nako eo, ‘me le bona ba jarisoana lifapano. Ho tloha ka selallo sa Paseka le barutuoana ba Hae, Jesu O ne A e-s’o je leha e le ho noa letho. O ne A isitsoe ho Hannase, ho Kaiafa, ho Pilato, ho Heroda, A ntano busetsoana ho Pilato. Bosiu boo bohle ho ne ho ile ha e-ba ketsahalo kamora’ ketsahalo, ho leka moeana oa motho ho ea sehlohlong. Krete ha A ka A hlōleha. A itšoara ka seriti. Empa eitse hoba A shapuoana la bobeli, A jarisoana sefapano, matla a botho a sitoa ho tiisetša. A oela fatše, A akheha ka tlas’a moroalo.

Sehlopha sa hloka mohau. Ba Mo hlōkōfatsa hobane A sitoa ho jara sefapano se boimana. A boela A jarisoana moroalo oo, ‘me A boela A oela. Bahlorisi ba Hae ba bona hore ho thata hore A ka jara moroalo oa hae ho ea pele. Ke mang ea neng a tla jara moroalo o tlohlollang oo? Bajuda ba ne ba ke ke, hobane boitšilafatso boo bo ne bo tla ba sitisa ho bōlōka Paseka.

[497]

Ka nako eona eo, motho oa motsamai, e leng Simone oa Sirene, a teana le sehlopha sena a tsoa masimong. A ema a makaletse pono ena, ‘me a bontša khauho. Ba mo tšoara, ba mo jarisa sefapano mahetleng.

Bara ba Simone e ne e le balumeli ba Mopholosi, empa eena ka sebele e ne e se molumeli. Ho jara sefapano ho ea Golgotha, ea e-ba

lehlohonolo ho Simone. Ha mo khannela hore a nke sefapano sa Krete ka boikhethelo, ‘me kamehla a jara moroalo oo ka thabo.

Basali ba seng ba kae ba ne ba le teng sehlopheng se latelang Ea lokileng ho ea lefung la Hae le khopo. Ba bang ke ba neng ba kile ba Mo isetsa bakuli ba bona le ba mahlomoleng. Ba bang e ne e le ba kileng ba folisoa ka bo bona. Ba ne ba hlōletsoe ke lehloeo la sehlopha seo ho Eena. Ba sitoa ho mamella mantsoe a baprista le babusi, eitse ha Jesu A oela le sefapano, basali bana ba bokolla. Hona ha fihla tlhokomelong ea Krete. A tseba hore ha ba Mo llele e le Morōmuoa oa Molimo, empa A se ke A nyelisa khauho ea bona. Hona ha tsosa ka ho Eena khauho e tebileng e eang ho bona. A re, “Barali ba Jerusalema, se nteleleng; iteleleng, le llele le bana ba lōna.” Krete O ne A shebetse pele, nakong eo ho tla senngoa Jerusalema, ha ba bangata ba Mo llelang joale ba tla shoa le bana ba bona.

### **Kahlōlo E Sepharanyana**

Ha a tloha tšenyehong ea Jerusalema, maikutlo a Jesu a fetela kahlōlong e kholoanyane. Tsenyehong ea motse oo o sa bakang, A bona setšoantšo sa tšenyeho ea ho qetela e tla tlela lefatše: “Ke moo ba tla qala ho re ho lithaba: ‘Re oeleng holimo!’ le ho maralla: ‘Re koaheleng!’ Ha e le moo ba etsa tsena sefateng se metsi, ho tla etsahala’ng ho se omeletseng?” Sefate se setala se emetse Eena, Mopholosi ea lokileng. Bohale ba Molimo, ka lebaka la tlōlo ea molao, ba oela holim’a Mora oa Hae ea ratoang. Ke bohlōkō bo joang, boo moetsalibe ea tsoelang pele ka sebe a tlang ho bo jara? Ea sa bakeng o tla tseba masoabi ao leleme le sitoang ho a hlalosa.

[498] Har’a bongata bo neng bo latela Mopholosi ho ea Gol gotha, ba bangata ke ba neng ba ile ba Mo amohela ka lihosanna le makala a lipalema, ha A ne A kena Jerusalema ka tlōtla, A kaletse (esele). Ba bang ba neng ba entse litlatse ho Mo rorisa, ka ho etsisa, joale ba se ba tlerola, ba re, “Mo thakhise!” Krete ha A ne A kena Jerusalema A kaletse, barutuoa ba ne ba tsamaela haufi le Eena, ba utloa hore ke tlotla e kholo ho amana le Eena. Joale ha A se A le nyelisong, ba Mo latela ba le thōko.

### Mahlomola A ‘Mè Oa Kreste

Ha ba le sebakeng sa polao, masholu a mabeli a ne a itamolla matsohong a ba ba thakhisang; empa Jesu ha A ka A etsa tšitiso ea letho. ‘M’ a Jesu, a tlatsitsoe ke Johanne, a latela mehatong ea Mora oa hae ho ea sefapanong. O ne a lakalitse ho tšehetsa hlooho ea Hae e mabele ka letsoho. Empa a se ke a lumelloa ka tōkelo ena e llisang. O ne a ntse a na le tšepo ea hore Jesu O tla itōkōlla lireng tsa Hae. Pelo ea hae ea boela ea nyahama, ha a hopola hore O ile A li bolela pele liketsahalo tsena tse neng li phethahala joale.

Ha masholu a tlamelloa sefapanong, o ne a shebile ka letsoalo le tetemang. Na Eo ea faneng ka bophelo ho ba shoeleng, O tla itlohella hore A thakhisoe? Na e be o lokela ho lahla tumelo ea hore ke Mesia? A bona matsoho a Hae a otlolotsoe sefapanong; ha tlišoa hamore le lipekere, ‘me eitse ha li kenngoa nameng ea Hae e bonolo, barutuo a ba tsoa ho balehela pono eo e khopo, ba kakasitse ‘M’ a Jesu a akhehile.

Mopholosi A se ke A hlahisa pelaelo ea letho, empa marotholi a maholo a mofufutso a ne a thuntse phatleng ea Hae. Ho ne ho se letsoho le mohau ho hlakola phoka ea lefu sefahlehong sa Hae, ho se mantsoe a kutloelobohlōkō le tšepo ho tiisa pelo ea Hae ea botho. Ha masole a ntse a phetha mosebetsi oa bona o tšosang, Jesu A rapela A re, “Ntate, ba tšoarele, hobane ha ba tsebe seo ba se etsang.” Kelello ea Hae ea tloha mahlomoleng a Hae, ea fetela phetetsong e kholo e tla ba tlela. Ha ho thohako e nehiloeng masole a neng a Mo hlekefetsa hampe hakaalo, ha ho boiphetetso bo entsoeng ho baprista le babusi. A mpa A etsa kōpō ea tšoarelo “ha ba tsebe seo ba se etsang.”

Empa ho se tsebe ha bona, ho ne ho sa hlakole molato oa bona, hobane ba ne ba na le monyetla oa ho tseba le ho amohela Mopholosi. Ba bang ba ne ba tla bona sebe sa bona, ba bake, ‘me ba sokolohe. Ba bang ka ho hloka pako, ba ne ba tla sitisa hore thapelo ea Kreste e arabeloe molemong oa bona. Leha ho le joalo, sepheo sa Molimo se ne se fihlela phethahalo ea sona. Jesu O ne A amohela tōkelo ea ho ba ‘muelli oa motho kapele ho Ntate.

Thapelo eo ea Kreste, bakeng sa lira tsa Hae, e akaretsa moetsalibe e mong le e mong ho tloha qalehong ea lefatše, ho isa qetellong

ea nako. Molato oa thakhiso ea Mora oa Molimo o lutse holim'a bohle. Tšoarelo e fanoe feela ho bohle.

Hang hoba Jesu A thakhisoe sefapanong, se ile sa phahamisoa ke banna ba matla, 'me ba se phamola ka matla, ho se kenya moo se lōkiselitsoeng teng. Hona ba baka bohlōkō bo tšabehang. Eaba Pilato o ngola lengolo ka seheberu, segerike le selatine, 'me a le beha sefapanong holim'a hlooho ea Jesu. Le ngoliloe tjena, "JESU OA NASARETHA, KHOSI EA BAJUDA." Hona ha khopisa Bajuda. Ba hoeletsa ba re, "Ha re na khosi haese Sesare." Empa Pilato o ne a ngotse seo ba neng ba se hlalositse. Ho ne ho sa boleloa tlolo ea molao, haese hore Jesu ke Morena oa Bajuda, e le phatlalatso e tiileng ea boikokobetso ba Bajuda tlas'a Roma. E ne e hlalosa hore mang kapa mang ea ka ipolelang e le Morena oa Iseraele, o tla ahlōloa ke bona a lōkela lefu. E le hore ba timetse Krete, baprista ba ne ba ikemiselitse ho lahlehela le ka bochaba ba bona.

Baprista ba kōpa Pilato hore a fetole lengolo leo. "Se ngole 'Khosi ea Bajuda', empa ngola hore: 'O itse ke 'na khosi ea Bajuda'." Empa Pilato o ne a ikhalefetse ka boena, 'me a araba hasesane a re, "Seo ke se ngotseng, ke se ngotse."

Ka tataiso ea Molimo, lengolo leo le ne le tla tsosa patlisiso ea Mangolo. Batho ba hlahang linaheng tsohle ba ne ba le Jerusalema nakong eo, 'me ne ba tla hlokomela lengolo leo le bolelang hore Jesu ke Mesia. Le ne le ngotsoe ke letsoho leo Molimo A le tataisitseng.

[500] Ka mahlomola a Krete sefapanong, boporofeta ba phethoa. "Sehlopha sa linokoane se ntikanetse, tsena li ntlepotse maoto le matsoho...Ba arolelana liparo tsa ka, ba laola aparō saka ka lōtho." Pesalema 22:17-19. Liaparo tsa Hae li ile tsa neoa masole. Kōbo ea Hae e ne e lohilo e se na moroko, 'me ba re, "A re se keng ra e tabola, empa a re e laoleng ka lōtho, re tle re tsebe hore na e tla ba ea mang."

Boporofeteng bo bong Mopholosi O itse, "Ke ne ke lebeletse kutloelo-bohlōkō, empa ha kea ka ka e fumana; ka batla batšeliseli, ka se ke ka ba fumana. Bakeng sa lijo ba 'neile leshokhoa, ha ke nyoriloe ba 'nea asene.'" Pesalema 69:21,22. Ba neng ba shoa ka lefu la sefapano, ho ne ho lumeletsoe hore ba fuoe moriana o thethefatsang ho bolaea bohlōkō. Empa Jesu eitse hoba A o latsoe, A o hana. Tumelo ea Hae e tšoanela ho itšoareleletsa ho Molimo,

Eena feela matla a Hae. Ho thethefatsa kelello ea Hae, ho ne ho tla fa Satane monyetla.

Baprista, babusi le bangoli, ba tlatsana le sechaba ho soma Mopholosi ea shoang. Lentsoe la Ntate, le tsoang leholimong, ho paka bo-Molimo ba Krete, le ne le khutsitse. Ha ho bopaki bo Mo emelang, bo ileng ba utloahala. A hlomolisoa A le mong.

Ba re, “Haeba u le Mora oa Molimo, theoha sefapanong!” “O pholositse ba bang; haeba e le Krete, mokhethoa oa Molimo, a ipholose!” Satane le mangeloi a hae, ba ne ba le teng sefapanong, ka sebōpeho sa botho, ba tlatsane le baprista le babusi, ba kopane ka bohale bo hlanyang ba bosatane.

Jesu A utloa baprista ba re, “O pholositse ba bang, empa eena o sitoa ho ipholosa! Krete, khosi ea Iseraele, ha a ke a theohe sefapanong joale, e le hore re bone, ‘me re lumele!” Krete O ne Aka theoha sefapanong. Empa kahobane ha A ka ba A ipholosa, moetsalibe o na le tšepo ea tšoarelo le mohau ho Molimo.

### **Lesholu Le Le Leng Le Thakhisitsoeng La Lumela**

Jesu ha A le sefapanong A tlcloa ke lehlaseli le le leng la tšeliso -thapelo ea lesholu le nang le pako. Banna ba babeli ba thakhisitsoeng le Jesu, qalong ba ne ba Mo nyefola; ‘me e mong ka lebaka le bohlokō, a totisa ho tsieleha le ho tella. Empa molekane oa hae e ne e se sesinyi se thatafetseng; molato oa hae o ne o fokola ho feta oa ba bangata ba neng ba eme pel’a sefapano, ba rohaka Mopholosi. O ne a ile a bona a ba a utloa Jesu, empa a kheloso ho Eena ke baprista le babusi. Ha a ntse a leka ho fumana kholiseho, a tlōlela kahar’a sebe, ho fihlela a tšoaroa ‘me a tsuoa.

[501]

Ha a le sefapanong, a bona batho ba bolumeli bo boholo ba soma Jesu. A utloa motsoalle oa hae a tlatsana le lipuo tseo tse nyefolang, a re: “Na ha u Krete na? Ipholose, le rōna u re pholose.” Ho ba fetang ka tsela, a utloa ba bangata ba pheta mantsoe a Jesu, ‘me ba bolela mesebetsi ea Hae. A boela a kholiseha hore enoa ke Krete. A retelohela ho motsoalle oa hae oa sesinyi, a re, “Na uena ha u tšabe Molimo, empa le le kahlōlong e tšoanang?” Masholu a lekhateng la lefu, a ne a se a sa tšabe letho. Empa ho e mong oa bona, ha tiea kholiseho ea hore Molimo O teng, Ea lōkelang ho tšajoa, le bokamoso bo mo kenyetsang thōthōmelo. ‘Me joale pale ea bophelo

ba hae e qetellong. A re, “Rōna re hlile re ahlōtsoe ka toka, hobane re amohela moputso oa liketso tsa rōna; athe eena ha aa ka a etsa letho le sa lokang.”

Ha le ahloloa ka lebaka la tlōlo ea lona lesholu lena le ile la nyahama; empa joale la fihleloa ke mehopolo e makatsang, e molemo. Moea o Halalelang oa khantšetsa kelello ea hae, ‘me bopaki ba kopana butle-butle. Ho Jesu Ea neng A sonngoa, A leketlile sefapanong, a bona Konyana ea Molimo. Tsepo e ne e kopane le bohlokō mantsoeng a hae, ka moea oona o shoang a itahlela ho Mopholosi ea shoang, a re, “Jesu, ak’u nkhopole ha u e-tla ka matla a hao a borena.”

Kapele karabo ea tla, e le bonolo e le monate, e tletse lerato le matla, ka mantsoe ana: “Ruri kea u bolella kajeno, u tla ba le’na paradeising.” Jesu O ne A mametse ka pelo e chesehang, hore barutuoa ba pake tumelo. O ile A utloa feela mantsoe a hlirileng a reng, “Rōna re ne re tšepile hore ke eena ea tla lopolla Iseraele.” Luka 24:21. Ho bile monate hakaakang ho Mopholosi, ha lesholu le lekhateng la lefu le bua ka tumelo le lerato! Esita le barutuoa ba ne ba se ba belaela, empa lesholu lona la bitsa Jesu “Morena.” Ha ho le a mong ea kileng a Mo paka ha A le sefapanong, haese lesholu le fumaneng pako, la pholosa ka matšotso oa ho qetela.

[502] Lentsoe la monna eo ea bakileng le hapa likelello tsa ba lebellet-seng. Ba neng ba ntse ba tsekisana liaparo tsa Krete, ba khaotsa, ‘me ba mamela le ho lebella karabo e tla tsoa molomong oa Krete ea shoang.

Eitse ha A bua mantsoe a tšepiso, leru le letšo le neng le bonahala le aparetse sefapano la hlajoa ke leseli le phelang. Krete A tlotlisoa kahar’a nyeliso ea hae. Eena eo mahlong a bohle A neng A bonahala eka O hlōtsoe, ea e-ba Mohlōli. A tsebahala e le Mojara-libe. Ba ne ba ka Mo hlobolisa liaparo tsa Hae empa ba ne ba ke ke ba Mo amoha matla a Hae a ho tšoanela libe. Ke tšoanelo ea Hae ea borena ho pholosa bohle ba tlang ho Molimo ka Eena!

Ke re ho uena kajeno, U tla ba le’na paradeising. Krete O ne A sa tšepise lesholu hore le tla ba le Eena paradeising ka letsatsi lona leo. Eena ka boena, ha A ka ba A ea paradeising ka lona letsatsi leo. O ile A robala lebitleng, ‘me hoseng ha letsatsi la tsōho A re, “Ha ke e-s’o nyolohela ho Ntate.” Johanne 20:17. Empa ka letsatsi lona leo ho neng ho bonahala eka ho hlōloa ho teng, tšepiso e ile

ea fanoa. “Kajeno” ha a e-shoa sefapanong e le sesinyi, Kreste A tiisetsa moetsalibe hore, “U tla ba le ‘na paradeising.”

Boemo ba Kreste ba ho ba lipakeng tsa masholu bo ne bo entsoe ka taelo ea baprista le babusi, ho bontša hore ke Eena sesinyi se sehlohali ho ba bararo bao. Empa Jesu ha A behoa “hare” le sefapano sa Hae joalo feela, se beiloe hare ho lefatše le shoang le robetse kahar’a sebe. ‘Me mantsoe a tšoarelō a boletsoeng lesholu le bakileng, a khantšitse leseli le tla khanyetsa liqola tsohle tsa lefatše. Nyelisong ea Hae, Jesu joaleka moporofeta a bua le barali ba Jerusalema; joaleka moprista le ‘muelli A kōpa Ntate hore A tšoarelē babolai ba Hae; joaleka Mopholosi O ile A tšoarelē libe tsa lesholu le bakileng.

Maotong a sefapano ho ne ho eme ‘M’ae, a tšhelitsoe ke Johanne. O ne a sitoa ho mamella ho ba sieo ho Mora oa hae, ‘me Johanne, ka ho tseba hore qetello e haufi, a mo tliša hape. Jesu ha A bona sefahleho sa hae se hlomohileng, A re ho eena, “‘Mè, mora oa hao ke eo.” A nt’o re ho Johanne: “‘M’ao ke eo.” Johanne a utloisisa le ho amohela boikarabelo. Ho tloha ka nako eo, a hlokomela Maria haholo. Mopholosi O ne A se na chelete eo A ka thusang ‘me oa Hae ka eona, empa O ile A mo thusa ka seo a se hloka haholo, e leng kutloelo-bohlōkō ea motho ea mo ratang, hobane o ne a rata [503] Jesu. ‘Me Johanne a fumana lehlohonolo le lehlo, ka ha ka linako tsohle ‘mè enoa o ne a mo hopotsa Morena eo a mo ratang.

Ka lilemo tse batlileng ho ba mashome a mararo, Jesu O ne A thusa ho jara mathata a lelapa, ka tšebetso ea letsatsi le letsatsi. ‘Me joale, esita le mahlomoleng a Hae a qetello, O ne A ntse a hlokometse ‘mè oa Hae oa mohlolohali, ea mesarelong. Bao ba latelang Kreste, ba tla hlonepha le ho hlokomela batsoali ba bona. Pelong eo lerato la Hae le ahetseng, ntate le ‘mè ha ba phetse ho hlokomeloa hantle le ho utloeloa bohlōkō. Joale Morena oa Khanya O ne A e-shoa. Tsohle e ne e le lefifi le tetebetsang. Ha se ho tšaba lefu, ha se bohlōkō ba sefapano, tse baketseng Kreste bohlōkō. Mahlomola a Hae a ne a bakoa ke ho tseba botšabeho ba sebe. Kreste A bona hore ke ba fokolang haholo ba tla ikemisetsa ho khaohana le matla a sona. Kantle ho thuso e tsoang ho Molimo, botho bo ka shoa, ‘me A bona ba bangata ba timela ba le haufi le thuso.

## **Boima Bo Tsabehang Boo Kreste A Bo Jereng**

Kreste e le Eena moemeli le tiiso ea rōna, A jarisoa bokhopo ba rōna bohle. Molato oa litloholo tsohle tsa Adama o ne o hateletse holim'a pelo ea Hae. Bophelong ba Hae bohle, Kreste O ne A phatlalatsa litaba tse molemo tsa lerato la Ntate le tšoarelang, empa joale boima bo tšabehang ba molato bo Mo hatile, A sitoa ho bona sefahleho sa Ntate se boelanyang. Hona ha hlaba pelo ea Hae ka masoabi a ke keng a lekanngoa ke motho. Mahlomola a Hae a ne a le maholo hoo le bohlōkō bo 'meleng A neng A sa bo utloe.

Satane a sisinya pelo ea Jesu ka liteko tse bohale. Tšepo ea e-ba sieo a supang hore O tla tsoa lebitleng A hlōtse, kapa e bolelang hore Ntate oa Mo amohela. Kreste A utloa bohlōkō boo moetsalibe a tla bo utloa, ha ho se ho se mohau o buellang molōko o molato. Ho robileng pelo ea Mora oa Molimo, ke kutloisiso ea sebe, se tlišang bohale ba Ntate holim'a Hae e le moemeli oa motho.

[504] Makhotla a leholimo a ikhurumetsa lifahleho, a ipatela pono eo e tšosang. Letsatsi la hana ho sheba pono eo e tšabehang. Mahlaseli a lona a ne a chabetse lefatšeng hantle, e le motšhare o moholo, empa hang-hang la tšireha. Lefifi le letšo la aparela sefapano. "Lefifi la aparela naha eohle ho fihlela ka hora ea boraro motšare oa mantsiboea." Ho ne ho se lebaka la tlhaho le bakileng lefifi leo, le neng le tebile joaleka khitla ea bosiu, ho se khoeli kapa linaledi. E ne e le bopaki ba mohlolo bo fanoeng ke Molimo, hore tumelo ea melōko e tlang e tle e tiisoe.

Boteng ba Molimo bo ne bo patiloe lefifing leo le boima. Molimo le mangeloi a halalelang ba ne ba le pel'a sefapano. Ntate O ne A na le Mora oa Hae. Empa boteng ba Hae ba se ke ba senoloa. Nakong eo e tšabehang, Kreste O ne A sa lokela ho tšelisoa ka boteng ba Ntate.

Ka lefifi le letšo le leholo, Molimo A khurumetsa ma-hlomola a ho qetela a botho, a Mora oa Hae. Bohle ba ileng ba bona Kreste mahlomoleng a Hae, ba ile ba kholiseha ke bo-Molimo ba Hae. Linakong tse telele tsa mahlomola, O ne A shebeletsoe ke bongata bo nyelisang. Joale O ne A patiloe ka mohau ke seaparo sa Molimo.

Tsabo e sa boleloeng ea tšoara sehlopha se bokaneng pel'a sefapano. Mahlapa le linyeliso tsa khaotsa. Mahalima a fokolang a ne a hlaha marung ka nakoana, 'me a bonahatse Molopoli ea thakhisitso-



eng. Baprista le babusi, baahloli le sechaba, kaofela ba nahana hore nako ea bona ea phetetso e se e fihlile. Ba bang ba seba hore joale Jesu O tla theoha sefapanong.

Ka hora ea borobong lefifi la apoha bathong, empa la sala le apesitse Mopholosi. Ha ho leihlo le neng le ka phunyeletsa masoabi a tebileng, a neng a apesitse moea oa Krete o mahlomoleng. Joale “Jesu o meketsa ka lentsoe le phahameng, o re: ‘Eloi, Eloi, lama sabakthani?’ e leng ho re: ‘Molimo oa ka, Molimo oa ka, u ntahletse’ng na?’” Ba bangata ba re: Phetetso ea leholimo e holim’a Hae, hobane O ipoletse e le Mora oa Molimo! Ba bang ba neng ba lumetse ho Eena, ba utloa sello sa Hae sa tsieleho. Ba felloa ke tšepo. Haeba Molimo A lahlile Jesu, balateli ba Hae ba ka tsepa eng?

### **Monyetla Oa Ho Qetela Oa Ho Bontša Kutloelo-bohlōkō Ea Botho**

[505]

Ha lefifi le apoha, Krete A boela A utloa mahlomola a ‘mele, ‘me A re, “Ke nyoriloe.” E mong oa masole a Roma, a tlala khauho, a nka semonyametsi a se tlatsa asene, a Mo neheletsa. Baprista bona ba phoqa mahlomola a Hae. Mantsoe a Hae a reng, “Eloi, Eloi, lama sabakthani?” a tolokoa hampe. Ba re, “O bitsa Elia.” Ba hana monyetla oa ho qetela oa ho imolla mahlomola a Hae. Ba re, “Lesang, re ke re bone hore na Elia o tla mo pholosa.”

Mora oa Molimo ea se nang sekoli A leketla sefapanong, ‘mele oa Hae o tabotsoe ke ho shapuo, matsoho a Hae a thakhisitsoe lithupeng, maoto a Hae a khokhotheletsoe sefateng, hlooho ea Hae ea borena e hlabiloe ka meutloa. Tsena tsohle A li mamella -bohlōkō bo neng bo sohloka sebōpeho sa Hae, le mahlomola a sa boleloeng a neng a tletse moeeng oa Hae, ka hobane Ntate oa Hae A ne A patile sefahleho sa Hae -tsena tsohle li bua le ngoana e mong le e mong oa motho, li phatlalatsa hore, ka lebaka la hau Mora oa Molimo O lumela ho jara moroalo oona oa molato; ka lebaka le hau O senya ‘muso oa lefu; ka lebaka la hau O bula likhorro tsa Paradeisi; ka lebaka la hau O ikentse sehlabelo -li tsoa leratong li tla ho uena.

### Jesu O Shoa A Hlotse

Hang-hang lefifi la apoha sefapanong. Ka lentsoe le kang molumo oa terompeta, le kang le utloahala tlholehong eohle, Jesu A maketsa, A re, “Ho phethahetse!” “Ntate, ke bea moea oa ka matsohong a hau.” Khanya ea potoloha sefapano, ‘me sefahleho sa Mopholosi sa khanya ka khanya e kang ea letsatsi. Eaba O kebisa hlooho ea Hae, ‘me A shoa.

[506] Kahar’a lefifi le tšabehang, Krete O ile A menyeletsa ho setseng ka senolong sa botho sa mahlomola. Lihoreng tseo tse thata O ne A tšepile bopaki boo A bo filoeng ba hore Ntate O Mo amohetse. Ka hobane A tloetse semelo sa Ntate oa Hae, ka tumelo A phomola ho Eena eo kamehla A neng A thabela ho Mo hlonepha. ‘Me eitse ha A inehela ho Molimo, maikutlo a hore O lahlehetsoe ke mohau oa Ntate oa Hae, a nyamela. Ka tumelo, Krete ea e-ba mohloli.

Lefifi la boela la aperela lefatše, ‘me ha ba le ho reketla ho hoholo ha lefatše. Ha hlaha pherekano e tšabehang. Lithabeng tse pota-potileng mafika a petsoha, ‘me a thetshela fatše. Mabitla a buleha, ‘me bafu ba tsoa ho ‘ona. Baprista, masole, baahloli le batho, ba tšapalla fatše.

Ha selo se seholo se reng, “Ho phethahetse,” se tsoa molomong oa Krete, e ne e le nako ea sehlabelo sa mantsiboea. Konyana e tšoantsang Krete e ne e tlisitsoe ho tla hlajoa. Moprista a eme a phahamisitse thipa, batho ba shebeletse. Empa lefatše la thothomela hobane Morena ka sebele O ne A atametse haufi. Ka lerata le leholo, lesela la tempele la taboloa ho tloha holimo ho fihla tlase, ke letsoho le sa bonoeng, ‘me ha hlahela pontšeng ea sechaba, sebaka se kileng sa tlala boteng ba Molimo. Sehalalelisiso sa tempele ea lefatše se ne se se se sa halalele.

Hohle ea e-ba matsoalo le pherekano. Moprista o ne a le lekhateng la ho hlaba phofu; empa thipa ea chopoha letsohong la hae le shoeleng methapo, ‘me konyana ea baleha. Sebele se ne se kopane le seriti. Sehlabelo se seholo se ne se entsoe. Tsela e ncha, e le tsela e phelang, e ne e lōkiselitsoe bohle. Ho tloha moo ho isa khale, Mopholosi A lokela ho sebetsa e le moprista le ‘muelli leholimong la maholimo. “O kene hanngoe feela Sehalalelong se halalelang ka ho fetisisa,...a nkile mali a hae ka sebele, ‘me a re fumanela topollo e sa feleng.” Baheberu 9:12.

## KHAOLO EA 79—KAMOO LEFU LA KRESTE LE HLOTSENG SATANE

[507]

Kreste O ne A phethile mosebetsi oo A neng A tletse ho tla o etsa, ‘me ka phfumoloho ea ho qetela A re, “Ho phethahetse!” Johanne 19:30. Ntoa e ne e hlōtsoe. Leholimo kaofela le ne le thabetse tlhoho ea Mopholosi. Satane a tseba hore ‘muso oa hae o lahlehile. Mosebetsi o moholo oa topollo, o phethiloe ka lebaka la mangeloi, la mafatše a sa oelang sebeng, hammoho le la rōna. Ho fihlela Kreste A shoa, Satane o na a ikhakantse ka thetso, hoo le libōpuoa tse halalelang li neng li e-s’o utloisise melao ea hae, kapa hona ho bona sebōpeho sa hae hantle.

Lucifere (Mphatlalatsane) e ne e le lengeloi la mosireletsi, sebōpuoa se kaholimo ho tsohle. E ne e ile ea e-ba ea ka pele eena oa ho senolela lefatše merero ea Molimo. Kamor’a hoba a etse sebe, matla a hae a ho thetso a eketseha, ‘me ha e-ba thata ho lemoha sebopeliso sa hae, ka baka la litulo tse phahameng tseo Ntate A neng A ‘meile ho tsona.

Molimo A ka be A ile A timetsa Satane hammoho le ba mo utloelang bohlokō, empa ha A ke A etsa joalo. Qobello le matla a hatellang li fumanoa feela ‘musong oa Satane. Matla a Morena a lutse holim’a tōka, mohau le lerato, ‘me mekhoha ena ke eona e lokelang ho sebelisoa. ‘Muso oa Molimo ke oa boitšoaro bo botle ‘me ‘nete le lerato ke tsona tse lokelang ho busa.

Makhotleng a leholimo ha etsoa qeto ea hore, Satane a fuoe nako ea ho phethahatsa tsamaiso ea ‘muso oa hae. O ne a boletse hore tsamaiso ea hae e phahametse ea Molimo. Ha fanoa ka nako hore tsamaiso ea Satane e sebetse, e le hore baahi ba leholimo ba e bone. Ka lilemo tse 4,000, Kreste O ne A sebeletsa ho phahamisa motho, ‘me Satane eena a sebeletsa ho mo senya. ‘Me baahi ba leholimo ba li bona tsohle.

[508]

Ho tloha nakong ea ha Jesu A tsoaloe e le lesea Betlelehema, Satane haesale a sebeletsa ho Mo timetsa. A leka ho Mo sitisa ho holeng ha Hae e se be ngoana ea phethahetseng, a leka ho Mo

hlolisa ho ba monna oa hlokang letheba, hape a leka ho mo sitisa ho ba moruti ea halalelang, a leka ho thibela hore A be sehlabelo se hlokang sekoli. Empa o ile a hloloa. A sitoa ho khannela Jesu sebeng. Maleke 'ohle a Satane a ho Mo hlōla, a ile a mpa a hlahisa leseli le khanyang la semelo sa Hae se se nang letheba.

Ka thahasello e kholo, leholimo le mafatše a sa oelang sebeng, ba latella lipono tsa ho qetela tsa toantšano eo. Ba utloa sello sa Hae se bohlōkō, se reng: “Ntate, haeba ho ka etsahala, senelo sena a se ke se mphete.” Matheu 26:39. Ba 'mona A hlomohile ka masoabi a fetang a toantšano ea ho qetela le lefu. Likhoro tsa mali tsa tsoa 'meleng oa Hae, 'me thapelo ea ho lopolloa ea tsoa molomong oa Hae hararo. Leholimo la sitoa ho mamella pono eo ho feta moo, 'me morōmuoa ea tšelisang a rōmcloa ho Mora oa Molimo.

### **Lefatše Ke Sethala, Leholimo Ke Phutheho**

Leholimo la shebella ha Phofu e ekoa 'me e khothometsoa ka matla ho tloha lekhotleng lena ho ea ho lane. La utloa linyefolo tsa bahlorisi ba Hae, le ho itatola ka mahlapa ha e mong oa barutuo ba Hae. La bona Mopholosi A hulangoa A isoa koana le koana, ho tloha tlung ea borena ho ea ntlung ea lekhotla, A qōsoa habeli kapele ho baprista, habeli ka pele ho lekhotla la Sanhedrin, habeli ka pele ho Pilato, le hang ka pele ho Heroda, A songoa, A shapuo, A tsuo, 'me A ntšetsoa ntle ho ea thakhisoa.

[509] Leholimo la lebella ka ho makala ha Krete A leketlile sefapanong, mali a keketla litlhafunelong tsa Hae tse ntšitsoeng maqeba, le matsohong a Hae, le maotong a Hae. Maqeba ao a ahlama ke boima ba 'mele oa Hae, ha o nyehla o thefula matsoho a Hae. Leholimo lohle le ile la tlala ho makala, ha Krete A rapela ka har'a mahlomola a Hae a tšosang, A re, “Ntate, ba tšoarele, hobane ha ba tsebe seo ba se etsang.” Luka 23:34.

Matla a lefifi a potileng sefapano, a akhela seriti sa lihele sa ho sa lumele lipelong tsa batho. Mahlahana a Satane a khannela batho hore ba lumele hore Krete ke morena oa baetsalibe, 'me ba Mo etse ntho ea ho nyatsuo. Ba neng ba soma Krete, ba ne ba tšetsoe ka moea oa mokoenehi e moholo oa pele. A susumetsa litlhoriso tsa bona. Empa ho tsena tsohle ha a atleha ka letho.

Hoja Krete A ka A inehela ho Satane ka ntlha e le ‘ngoe feela, ho phonyoha litlhōkōfatso tse bohōkō, sera se ka be se hlōtse. Krete A kebisa hlooho ea Hae ‘me A shoa, empa A tiiselitse tumelong ea Hae. “Leholimong ka utloa lentsoe le phahameng, le re: ‘Joale tlhōlo, le matla, le puso, e se e le tsa Molimo oa rōna, le borena ke ba Mesia oa hae, hobane ho lihetsoe fatše moqosi oa bana babo rōna, ea neng a ba qosa kapele ho Molimo oa rōna, motšoare le bosiu.’” Tšenolo 12:10.

Satane a bona hore boikhakanyo ba hae bo senyehile. O itšenotse e le ‘molai. Ka ho tšolla mali a Mora oa Molimo, o intšitse ka boena khauhelong ea litho tsa leholimo. Ho tloha joale ho isa khale, o se a ke ke a hlōla a emela mangeloi ha a tsoa mabaleng a leholimo, hore a qōse ho ‘ona bana babo Krete ka hore ba apere litšila tsa sebe. Lehokela la ho qetela la kutloelo-bohlōkō pakeng tsa Satane le leholimo la khaoha.

Ho fihlela moo, mangeloi a ne a sa utloisise tsohle tse amehang ntoeng eo e khōlo. Melao e tsietsing e ne e lōkela ho senoloa haholoanyane. Motho joaleka mangeloi o lokela ho bona phapang pakeng tsa Morena oa leseli le morena oa lefifi. O lokela ho ikhethela eo a tla mo sebeletsa.

Qalehong ea ntoea ena e khōlo, Satane o ile a bolela hore molao oa Molimo ke o ke keng oa hlomphuo, ebile tōka ha e lekane le mohau, ‘me ha moetsalibe a ka roba molao, a ke ke a tšoareloa. Haeba Molimo A ka fokotsa kotlo ea sebe, etlaba ke Molimo Ea se nang tōka, ho rialo Satane. Ha batho ba roba molao oa Molimo, Satane a re, Ho bonahetse hore molao oa Molimo o ke ke oa hlomphuo; le motho a ke ke a tšoareloa. Kahobane eena Satane, kamorao ho ntoea ea hae, o ile a lelekoa leholimong, o batla hore molōko oa botho o koalloe kantle ho mohau oa Molimo ka ho sa feleng. A bolela hore Molimo e ke ke eaba O lokile, ha A ntse A hauhela moetsalibe.

[510]

Empa boemo ba motho bo ne bo fapane le ba Satane. Lucifere o ile a etsa sebe a le leseling la khanya ea Molimo. A utloisisa semelo sa Molimo; Satane a ikhethela ho latela thato ea hae ea boikhōhōmōso. Ho ne ho se letho le leng leo Molimo A neng A ka le etsa ho mo pholosa. Haele motho o thetsitsoe, kelello ea hae e fifalitsoe ke maqiti a Satane. Ha a ka a tseba bophahamo le botebo ba lerato la Molimo. Ha a ka a bona semelo sa Molimo, mohlomong a ka hapeloa ho Eena.

**Tōka E Tsoakoa Le Mohau**

Ka Jesu, Mohau oa Molimo o phethahalitsoe ho motho; empa mohau ha o behelle tōka kathōko. Molao o ke ke oa fetoloa, empa Molimo O ikentse sehlabelo ka Krete, sebakeng sa pholoso ea motho. “Molimo o ile a boelanya batho bohle ba lefatše le eena ka Krete, ka ho ba leballa libe tsa bona.” 2 Bakorinthe 5:19.

Molao o batla bophelo ba ho lōka, le semelo se phethahetseng, ‘me motho ha a na tsona. Empa Krete, e le motho, O phetse bophelo bo halalelang ‘me A ba le semelo se phethahetseng. Tsena O li fana e le mpho ea mahala ho bohle ba Mo amohelang. Bophelo ba Hae bo emela bophelo ba batho. Ka hona ba fumana tšoarelō ea libe tse fetileng. Ho feta moo, Krete O apesa batho ka limelo tsa Molimo. O aha semelo sa botho ka ho tšoana le semelo sa bo-Molimo. Joale ho “lōka ha molao” ho phethahatsoa ka ho molumeli ka Krete. Molimo O bontsa “hore eena o lokile, ‘me o lokafatsa ea lumelang ho Jesu.” Baroma 3:26.

E ne e le morero oa Satane ho arohanya mohau ho ‘nete le tōka. Empa Krete A bontša hore morerong oa Molimo li kopane ‘moho; ha ho ho ka phelang kantle ho ho hong. “Ho loka le khotso li tla akana.” Pesalema 85:11.

Ka bophelo ba Hae le lefu, Krete A paka hore toka ea Molimo ha e senye mohau oa Hae, empa sebe se ka tšoarelōa, hape molao o lōkile, ‘me o ka hlonephua ka ho phethahala. Liqōso tsa Satane tsa hlōloa.

[511] Thetso e ‘ngoe oa tlisoa. Satane a bolela hore lefu la Krete le hlakotse molao oa Ntate. Haeba ho ne ho ka etsahala hore molao o fetoloe kapa o hlakoloe, ho ka be ho sa hlokahala hore Krete A shoe. Empa ha ho hlakoloa molao, ho ne ho tla etsa hore tlolo ea molao e be teng ka ho sa feleng, ‘me e be ho beha lefatše pusong ea Satane. Kahobane molao ha o fetohe, Jesu O ile A fanyehoa sefapanong. Athe mokhoa oo Krete a tiisitseng molao ka oona Satane o o hlahisa e le ho hlakola molao. Ke ena taba e tla hlahisa qabang ea ho qetela ea toantšano e kholo pakeng tsa balateli ba Krete le ba Satane.

### Leshano La Satane “Le Lecha”

Joale Satane o eteletse pele taba ea hore ho khetheha ha molao oo Molimo A o buileng ka lentsoe la Hae ho beheletsoe ka thōko. Ha ho hlokahale hore a loantše melao kaofela; ha a ka khelosa batho hore ba hompholle molao o le mong, morero oa hae o tla be o phethahetse. “Ha motho a bōlōka molao oohle, haese feela ntlha e le ‘ngoe eo a e tloang, o molato oa ho tlola molao kaofela.” Jakobo 2:10. Ka ho lumela ho roba molao o le mong, batho ba oela matleng a Satane. Boporofeta bo bolela ka mokoenehi e moholo oa ‘musi moemeli oa Satane: “E tla bua ka boikakaso ho Ea Holimo-limo, e hlorise bahalaleli ba Ea Holimo-limo. E tla leka ho fetola linako tsa selemo le melao. Ho tla neelanoa ka bahalaleli matsohong a eona.” Daniele 7:25. Batho ba tla etsa melao e sa lumellaneng le molao oa Molimo, ‘me ha ba habile hore melao ea bona e amohelehe, ba tla tlatlapa batho ba bang.

Ntoa e loantšang Molimo e tla tsoela pele ho isa qetellong ea nako. Bohle ba tla biletsoa ho khetha pakeng tsa Molao oa Molimo le melao ea batho. Ho tla ba le lihlopha tse peli. Semelo se seng le se seng se tla phethahala. Bohle ba tla bontša hore na ba khethile lehlakore la botsepehi kapa la bokoenehi.

Ebe bofelo bo a fihla. Molimo O tla tōtōbatsa molao oa Hae, ‘me A lopolle batho ba Hae. Satane le bohle ba mo latetseng bokoenehing ba tla khaoloa. Sebe le baetsalibe ba tla timela motso le lekala. Sheba Malakia 4:1.

Hona ha se ketso ea ho hloka molao ka lehlakoreng la Molimo. Ba lahlang mohau oa Hae, ba tla kotulo seo ba se jetseng. Molimo ke seliba sa bophelo, ‘me ha motho a ikhethela sebe, o ikhaola bophelong ka boena. Krete O re, “Bohle ba ntlhoileng bona ba rata lefu.” Maele 8:36. Molimo O ba neha ho phela nako e itseng, hore ba tle ba bope limelo tsa bona ‘me ba hlahise melao ea bona. Hona ha ho phethiloe, ba amohela litholoana tsa boikhethelo ba bona. Satane le bohle ba ikopanyang le eena, ba ipeha hole le kopano le Molimo, hoo boteng ba Hae eo e leng lerato, bo tla ba timetsa.

Qalehong ea toantšano eo e kholo, mangeloi a ne a sa utloisise hona. Hoja Satane le lebotho la hae ba hla ba timetsoa, ho ne ho tla sala khoao likelellong tsa ‘ona, ea hore na ebe Molimo O lōkile,

‘me e ne e tla ba peo ea bokhopo e tla tsoala litholoana tse bolaeang tsa sebe.

Empa ha ho na ho ba joalo ha toantšano e kholo e felile. Ka nako eo, ha morero oa topollo o phethiloe, semelo sa Molimo se tla senoleloa libōpuoa tsohle. Melao ea molao oa Hae e tla bonoa e phethahetse ebile e sa fetoha. Sebe se bonahalitse sebōpeho se sona, le Satane sebōpeho sa hae. Pheliso ea sebe e tla totobatsa lerato la Molimo ‘me e tiise tlōtla ea Hae kapele ho lefatše lohle.

Hase feela, mangeloi a lokelang ho thaba ha ba shebile sefapano sa Mopholosi: hoba le hoja ba ne ba sa utloisise tsohle ka nako eo, ba ne ba tseba hore pheliso ea Satane e phethahetse, ‘me topollo ea motho e tiisetsoe, joale lefatše le maholimo li tsitsitse ka ho sa feleng.

Kreste ka boena O ne A shebile pele litholoaneng tsena tsohle, tsa sehlabelo sa Hae, ha etlare ha A le sefapanong A hoeletse A re, “Ho phethiloe!”



## KHAOLO EA 80—JESU O PHOMOLA LEBITLENG LA JOSEFA

[513]

Letsatsi la tlontlollo le tšotleho le ne le fihlile qetellong. Ha letsatsi le likela, Sabatha e fihla, Mora oa Molimo A phomola lebitleng la Josefa, A phethile mosebetsi oa Hae.

Tsimolohong Ntate le Mora Ba ne Ba ile Ba phomola ka Sabatha, kamora' mosebetsi oa bona oa ho hlōla. Sheba Tšimoloho 2:1. Libōpuoa tsohle tsa leholimo tsa na tsa thabela ho bona pono eo e khanyang. Joale Jesu O ile A phomola mosebetsing oa Hae oa ho pholosa; 'me thabo e ne e le kholo leholimong, le hoja ba neng ba mo rata lefatšeng, ba ne ba hlorile. Molimo le mangeloi, ba ile ba bona sechaba se pholositsoeng, se neng se sa tl'o hlōla se e-oa, hobane se ne se hlotse sebe -tsena e ne e le litholoana tse neng li hlalisoa ke mosebetsi o phethehileng oa Krete.

Ho tla be ho fihle “mehla ea tokiso ea lintho tsohle.” Liketso 3:21, Sabatha e hloliloeng, letsatsi leo Jesu a neng a phomotse lebitleng la Josefa e tla ba letsatsi la phomolo le monyaka. “Ka Sabatha se seng le se seng” (Esaia 66:23) lichaba tse pholositsoeng li tla khumamela Molimo le Konyana ka thabo.

Liketsahalong tsa ho qetela, letsatsing leo Jesu A neng A thakhisoa ka lona, ho ile ha hlaha bopaki bo bocha, bo supang boMolimo ba Krete. Kamora' hore Mopholosi A hoee, nakong eo A neng A e-shoa, lentsoe le leng le ile la utloahala, le reng “Kannete enoa e ne e le Mora oa Molimo.” Matheu 27:54.

Mantsoe ana a ne a buuo a sa sejo. A ne a buuo ke mang? E ne e le molaoli oa lekholo oa masole a Roma. Mamello ea boMolimo ea Mopholosi, lefu la Hae la sekhahla, mohoo oa Hae oa tlholo o melomong ea Hae, li ne li hloletse mohedene enoa. 'Meleng oa Hae o robiloeng, o leketlileng sefapanong, musisi o ile a lemoha le ho elleloa Mora oa Molimo. Letsatsing leo A neng A e-shoa ka lona, banna ba bararo ba ne ba bontšitse tumelo ea bona — Molaoli oa lekholo oa Roma, ea neng a jere sefapano sa Hae, le ea ileng a shoa lehlakoreng la Hae.

[514]

Ha nako ea mantsiboea e atamela, ho ile ha e-ba le ho khutsa ho sa tloaelehang Gologotha. Batho ba bangata ba ne ba khobokane ho tla shebella thakhiso, ba batla ho bona ho tla etsahala, eseng hobane ba ne ba hloile Krete. Le ha ho le joalo, ba ne ba ntse ba talima Krete e le ‘maki oa meferefere. Ka baka la pherekano e sa tloaelehang ba ne ba ile ba ikopanya le ba neng ba Mo soma. Ha lefatše le se le aparetsoe ke lefifi, ba ile ba iphumana ba le molato o moholo. Ha lefifi le apoha ba khutlela hae ka masoabi le khutso e mahlonoko, ba khotsoe hore liqoso tsa baprista ke leshano, le hore Jesu ha se moikaketsi. Kamora’ liveke li se kae ha Petrose a ruta, letsatsing la Pentekonta, batho bana ba ile ba e-ba har’a likete tse ileng tsa sokolohela ho Krete.

Empa baetapele ba Bajuda bona ha ba ka ba fetoha; lehloeo la bona ha lea ka la kokobela. Lefifi le neng le koahetse nakong ea thakhiso, le ne le fokola ha le bapisoa le le neng le koahetse likelello tsa bona. Tlhaho e ne e tsebile Krete, ‘me e fane ka bopaki ba hore ke Molimo. Empa baprista le babusi ba Iseraele ba ne ba sa tsebe Mora oa Molimo. Ba ne ba bolaile Krete. Empa le ka eona nako eo ho neng ho bonahala eka ba Mo hlotse, ba ne ba ntse ba jeoa ke matsoalo. Ebe joale ho tla etsahala eng? Ba ne ba ile ba utloa ha A hōoa A re “Ho phethehile.” Johanne 19:30. Ba ne ba ile ba utloa tšisinyeho e kholo ea lefatše, ‘me ba hloka khotso. Ba ne ba tšaba Krete ea shoeleng ho feta ea phelang. Ba ne ba tšaba ha ho ka eloa hlōkō liketsahalo tsa ha A thakhisoa. Ba se ke ba lakatsa hore ‘mele oa Hae O sale sefapanong ka Sabatha. E ne e tla ba ho silafatsa letsatsi leo ha ho ne ho ka tlohella ‘mele eo e leketlile sefapanong. Baetapele ba Bajuda ba ile ba sebelisa lebaka lena hore ba tsebe ho

[515] kōpa Pilato hore a potlakise lefu la batho bana, me litōpō tsa bona li tlosoe pele letsatsi le likela.

Kamora’ hore tumello e fanoe meomo ea masholu a mabeli e ile ea rojoa ho potlakisa lefu la bona; empa Jesu O ne A se A shoele, masole ao a lipuo li sa lokang, a ne a nolofalitsoe ke tseo ba li utloileng le tseo ba li boneng ho Krete, ba ile ba sitoa ho roba meomo a Hae. ‘Me joale, molao oa Paseka o ne o phethehile, “Ba se ke ba itšielana letho bakeng sa hosasane, ho se be le lesapo le rojoang.” Lipalo 9:12.

Baprista le babusi ba ile ba makala ha ba fumana Krete a shoele. E ne e le ntho e e-song ho utluoe, hore motho ea thakhisitsoeng A

ka shoa pele lihora tse tseletseng li feta. Baprista ba ne ba batla ho ikholisa hore efela Jesu A shoele, ‘me ba ile ba laela lesole ho mo hlaba ka lerumo lehlakoreng. Leqebeng le entsoeng ke lerumo ho ile ha tsoa mali le metsi, li arohane.

Johanne o re “e mong oa bahlabani a mo hlaba lehlakoreng ka lerumo la hae, ‘me hang-hang ha tsoa mali le metsi. Ea boneng o pakile, ‘me bopaki ba Hae ke ba ‘nete,...Tsena li etsahetse hore ho tle ho phethahale temana ea Mangolo e reng: ‘Ha ho lesapo la hae le tla rojoa.’ Temana e ‘ngoe hape e re: ‘Ba tla talima eo ba mo hlabileng.’” Johanne 19:34-37.

Kamora’ tsoho ea Hae, baprista ba ile ba tlatsa tlaleho ea hore Krete ha A ka A shoa sefapanong, empa O ile A akheha feela, ‘me O ile A tsoha hamorao. Ketso ea lesole la Roma e bontšitse hore O ne A se A shoele. Ebang bophelo bo ne bo e-s’o fele, leqeba leo la lerumo le ka be le Mo bolaile kapele.

Empa e ne e se lerumo kapa bohlokō ba sefapano, tse bakileng lefu la Jesu. Mohoo oo o ileng oa etsoa “Ka lentsoe le leholo” (Matheu 27:50; Luka 23:46), nakong ea lefu la Hae, le seliba sa mali le metsi, li ne li bontša hore O bolailoe ke pelo e robhileng — e robiloeng ke mahlomola a keello, E tabotsoe ke libe tsa lefatše.

### **Ho Nyahama Ha Barutuoa**

Kreste ha A e-shoa, barutuoa ba Hae ba ile ba lahlehelo a ke tšepo. Ho fihlela qetellong ba ne ba ntse ba sa khloe hore O tla shoa; le joale ba ne ba sitoa ho lumela hore O fela A shoele. Ka [516] lebaka la masoabi a neng a ba aparetse, tsohle tseo A neng A ile a ba bolella tsona, li ne li sitoa ho ba khotatsa. Le hoja tumelo ea bona ho Jesu e ne e shoele, joale ba ne ba Mo rata ho feta pele, ‘me ba ne ba e-na le tlholohelo e fetang ea hore eke A ka be A le har’a bona.

Ba ne ba lakatsa ho Mo pata ka mokhoa o hlomphehang, empa ba ne ba sa tsebe hore na sena ba ka se fihlela joang. Batho ba qoselitsoeng ho tsohela ‘muso oa Roma matla, ba ne ba patoa le batloli ba molao. Johanne ‘moho le basali ba tsoang Galelea, ba ne ba sa batle hore sctōpō sa Mong’a bona se tsoaroe ke masole a se nang mohau, le hore se patoe lebitleng le nyelisehang. Empa, ba ne ba ke ke ba fumana mohau ho baetapele ba Bajuda, ‘me ba ne ba sena matla a ho buisana le Pilato.

Barutuoā ba ile ba thusoa bothateng bona ke Josefa oa Ari-mathea le Nikodema. Batho bana ka bobeli, ba ne ba ruile, ba na le tšusumetso e kholo sechabeng, ba tsebana le Pilato, e bile e le litho tsa lekhotla la puso la Bajuda. E ne e le sepheo sa bona hore setōpō sa Jesu se epeloe ka mokhoa o hlomphehang.

### **Ba Fumana Thuso Moo Ba Sa Lebellang**

Josefa o ile a ea ka sebete ho Pilato, ‘me a mo kōpa hore a mo lokollele sctōpō sa Jesu. Pilato o ne a qala ho utloa hore Jesu O shoele. Ho ne ho reriloe hore a pateloe lefu la Jesu. Ha a utloa kōpo ea Josefa, o ile a bitsa lesole le neng le lcbetse, sefapanong, ‘me a le botsa ka tsohle tse ileng tsa etsahala, ho tiisa litaba tsa Josefa.

Josefa o ile a tla ka taalo ea Pilato ka setōpō sa Jesu, ‘me Nikodema eena o ile a tla a nkile linoko tsa mira tse theko e thata, tsa boima ba liponto tse lekholo, ho Mo tlotsa. Har’a bohle ba hlomphehang Jerusalema ha ho ea kileng a etsctsoa hlonepho e kaalo lefung la hae. Barutuoā ba ile ba hlolloa haholo.

[517] Josefa le Nikodema ba ne ba sa ka ba amohela Mopholosi pepeneneng, Ha a sa ntse A phela. Bohato bo joalo, bo ka be bo entse hore ba ntšuoē lekhlotleng, ‘me ba ne ba lakatsa ho Mo sirelctsa ka tšusumetso ea bona lekhlotleng. Empa baprista ba ile ba nyopisa merero ea bona. Eitse ha ba le sieo, Jesu A ahlōloa. Joale Josefa le Nikodema ba ne ba se ba bontša phatlalatsa likamano tsa bona le Eena. Ba ile ba tla ka sebete, ho tla thusa barutuoā bao ba batho.

Ba ile ba tlosa setōpō sa Jesu sefapanong, ka bonolo le ka ho bontša boikokobetso. Likhapha tsa kutloelobohlōkō li ile tsa keketla marameng ha ba talima ‘mele oa Hae O tletseng matetetso le maqeba. Josefa o ne a e-na le lebitla le lecha, le chekiloeng lefikeng, leo a neng a icheketse lona. Empa le ne le le pel’a Gologotha, ‘me o ile a le lokisetsa Jesu. ‘Me barutuoā ba bararo ba ile ba otlolla maoto a Hae a kokobaneng, ‘me ba phutha matsoho a Hae sefubeng. Ba ile ba koala lebitla ka lejoe le boima, ‘me ba siea Mopholosi phomolong ea Hae.

Ha meriti ea mantsiboea e thea, Maria oa Magadala le bo-Maria ba bang, ba ile ba ema moo, moo Morena oa bona A neng A pho-

motse teng, ba itšela ka likhapha tsa masoabi. “Ba khutla...’ me ba phomola ka Sabatha ho ea ka Molao.” Luka 23:56.

Sabatha eo e ne e le e kekeng ea lebaloa ke barutuo, baprista babusi, bangoli le sechaba. Letsatsi la Paseka le ile la ketekeloa joaloka mehleng, empa Eo mokete ona o neng o le sebakeng sa Hae, O ne A robotse ka lebitleng la Josefa. Makhotla a tempele a ne a tletse ba tiileng ho rapela. Mopriska e moholo o ne a le teng, ka liaparo tse khanyang. Baprista ba ile ba tsoela pele ho etsa litšebeletso.

Empa ba bang ho ba bokaneeng moo, ba ne ba sena khotso, ka mali ao a lipholo le lipoli a neng a tšolleloa sebe. Ba ne ba sa eelleloe hore seo tsebeletso tsena li neng li se supa se se se fetile, le hore sehlabelo se sa feleng se ne se se se hlabetsoe libe tsa lefatše. Lekhetlong lena, maikutlo a batho ba tiileng Pasekeng a ne a loebehlana ho feta kamoo ho kileng ha eba kateng pele. Lintho tsohle li ne li bona-hala li etsahala ka mokhoa o sa tloaelehang. Ka sehalalelisisong, ho ne ho sa kenoe, ho sa bonoe, empa joale, lesela le koahetseng le tabohile ho tloha holimo ho isa tlase, ‘me mahlo ‘ohle a ne a bona ka hare. Sebaka sena se ne se se se tsuoe ke Morena. Baprista ba ne ba tšohile hore kotsi e kholo e tla etsahala, ha sehalalelisiso se koaholotsoe.

### **Ba Bangata Ba Ithuta Biblele**

[518]

Ho tloha nakong ea thakhiso ho isa ho ea tsoho, batho ba bangata ba ile ba batlisisa boporofeta, ba bang e le ka sepheo sa ho fumana bopaki ba hore Jesu e ne e le moikhakanyi, ha ba bang ba ne ba batla ka sepheo sa ho fumana bopaki ba hore efela E ne e le Mesia. Le hoja sepheo sa bona sa ho batla se ne se sa tšoane, bohle ba ile ba fihlela ‘nete e tšoanang ea hore boporofeta bo phethahetse. Eo ea thakhisitsoeng, E ne E le Mopholosi oa lefatše. Ba bangata ba ile ba khaotsa ho kena litšebeletsong tsa Paseka. Ba bangata, ‘moho le baprista, ba ile ba batlisisa boporofeta, ‘me kamora’ tsoho ea Hae, ba ile ba Mo amohela e le Mora oa Molimo.

Nikodema o ile a hopola mantsoe a neng a buuoe ke Jesu bosiu thabeng ea mehloare A reng, “Joalokaha Moshe a ne a phahamise nōha feelleng, eka khona Mor’a Motho a phahamiso joalo, hore e mong le e mong ea lumelang ho eena a be le bophelo bo sa feleng.”

Johanne 3:14,15. Moelelo oa mantsoe ana ao Jesu A neng A a bue ho eena, o ne o se o sa ipata. O ile a eelloa hore o lahlehetsoe ke lintho tse ngata ka ho se ikamahanye le Mopholosi ha A sa phela. Pelo ea setho sena sa lekhotla se rutehileng, e ile ea nahana ka thapelo eo Kreste A ileng A e etsetsa babolai ba Hae, le ka karabo ea Hae ho lesholu le neng le e-shoa. Molumo oa mantsoe A Hae a ho qetela a reng, “Ho phethehile,” a neng a buuo a joaloka a motho ea hlotseng, o ne o ntse a utloahala litsebeng tsa Hae. Tumelo ea hae e ile ea tiea. Ketsahalo ena e ileng ea felisa tšepo ea barutuo, e ile ea kholisa Josefa le Nikodema hore Jesu ke Molimo.

Kreste ha A le ka lebitleng, O ile A hohela matšoele A mangata ho feta ha A sa ntse A phela. Batho ba ile ba tlisa bakuli ba bona makhotleng a tempele. Ka hohle ho ne ho utloahala mohoo ona, “Re batla Kreste mofolisi!” Matsoho A Jesu a setsoalle, A neng A sa hane ho folisa, esita le balepera ba nyonychang, A ne A phuthiloe sefubeng sa Hae. Molomo o neng o ile oa arabela likōpo tsa bona ka hore, “kea rata, hloeka” (Matheu 8:3) o ne o se o thotse. Ba ile ba mo batla ka sepheo, le ka ho qophella. Empa ba tebeloa mabaleng a tempele, me masole a laeloa hore a thibele matšoele ana ‘moho le bakuli le ba shoang, hore ba se ke ba kena.

[519]

Ba matšoenyehong ba ile ba soaba haholo. Ba kulang ba ne ba e-shoa, hobane Jesu ea folisang O ne A le sieo. Ba ile ba batleloa lingaka, empa thuso e ne e le sieo; hobane ho ne ho se ea nang le tsebo e tšoanang le ea Eo ea robetseng lebitleng la Josefa.

Ho ile ha fihla likelellong tsa likete tsa batho hore leseli le tlohile lefatšeng. Ka ntle ho Kreste, lefatše le ne le tletse lefifi. Ba bangata ba neng ba ile ba hoeletsa ba re, “A thakhisoe, A thakhisoe,” joale ba eelloa kotsi e ba hlahetseng.

Batho ha ba utloa hore baprista ba bolaile Jesu, ba ile ba etsa lipatlisiso. Lintlha tsa kahlōlo ea Hae li ile tsa patoa, empa litlaleho tsa bokhopo ba baprista le babusi, li ile tsa potoloha hohle. Banna ba bohlale ba ile ba tla ho baprista le babusi, ba batla tlhaloso ea boporofeta bo buang ka Mesia. Likarabong tsa bona ba ile ba leka ho qapa mashano, empa ba bonahala eka ba lahlehetsoe ke likelello. Ba ne ba sitoa ho hlalosa boporofeta bo neng bo supa ho hlōkofatsoa le ho shoa ha Kreste.

Baprista ba ne ba tseba hore batho ba a ba nyatsa. Le bao ba neng ba ba susumelitse hore ba be khahlanong le Jesu, ba ne ba

tšohile ha ba hopola mosebetsi oo oa bona o lihlong. Baprista bana ba ne ba tšohile hore Krete ka bo-Eena O tla tsoha bafung, ‘me A hlahe ka pel’ a bona. Ba ile ba hopola ha A re, “Qhaqhang tempele ena, ‘me ke tla e tsosa ka matsatsi a mararo.” Johanne 2:19. Judase o ne a ile a ba bolella mantsoe a ileng a buuo a ke Jesu leetong la Hae la ho qetela la ho ea Jerusalema: “Mor’ a motho o tla neeloa matsohong a baprista ba baholo le Litsei tsa Molao. Ba tla mo ahlōlela lefu, ba neelane ka eena ho balichaba...ba mo thakhise sefapanong, a nt’ o tsoha ka letsatsi la boraro.” Matheu 20:18,19. Ba ile ba lemoha hore tsohle tse lekantsoeng ke Krete, li phethahetse. Ke mang ea neng a ka bolela hore na polelo ee, eona e ke ke ea etsahala?

Ba ne ba lakatsa ho iphanyetsa mehopolo ena, empa ba ne ba sitoa. Setšoantso sa Krete Ha A ipotlile A sa belaele, ka pel’ a lira tsa Hae, se ne se sa tsoe ka likelellong tsa bona. Ba ne ba hopola ha A ne a utloisoa bohlokō, A songoa, A etsuo a hampe, empa A sa belaele. Ba ile ba kholoa ka matla hore E ne E le Mora oa Molimo. Ba ile ba hopola hore ba ka ‘na ba ‘Mona neng kapa neng, A eme ka pel’ a bona, Eena moqosuo, A se A fetohile moqosi, Eena ea bolailoeng, A tllile ho iphetetsa babolaing Ba Hae.

[520]

Ba ne ba ke ke ba hata lebaleng la molichaba, hobane ba ne ba tšaba ho silafala. Empa, ka Sabatha ba ile ba tšoara seboka ho buisana ka setōpō sa Krete. “Baprista ba baholo le Bafarisi ba phuthehela ho Pilato ba re: ‘Morena, re hopotse hore mothetsi eane ha a sa phela, o ile a re: “Ke tla tsoha kamora’ matsatsi a mararo.” Ka baka leo, ak’ u laele hore lebitla le lebeloe ka thata ho fihlela letsatsi la boraro, esere mohlomong barutuo a ba hae ba tla mo utsoa, ‘me ba re ho sechaba: “O tsohile bafung!” Leshano lena la morao le tla ba lebe ho feta la pele.’ Pilato a re ho bona: ‘Nkang balebeli, le e’ o lebela ka thata joalokaha le tseba.’” Matheu 27:62-65.

Baprista ba ile ba laela hore lebitla le lebeloe. Monyako oa lona o ne o koetsoe ka lejoe le leholo. Ba ile ba tlamella lejoe lena ka likhoele tse nang le letšoao la Roma. Molaoli oa masole a lekholo o ile a beoa ho lebela lebitla leo, ho thibela hore le se ke la tšoengoa. Jesu O ne A tlamelletsoe ka thata lebitleng la Hae, joaloka ha eka O ne A loketse ho lula kamoo, ka mengoaha eohle.

Empa liteko tsohle tsa ho thibela Krete ho tsoha ke tsona tse ileng tsa fana ka bopaki bo matla hore O fela A tsohile. Ka lebaka la masole a mangata a neng a lebetse lebitla, ho ile ha eba le bopaki

bo matla ba hore O tsohile. Libetsa tsa Baroma li ne li hloka matla a ho koalla Morena oa Bophelo ka har'a lebitla. Nako ea ho lokolloa ha Hae e ne e atametse.



## KHAOLO EA 81—MORENA O TSOHILE

[521]

*[E itsetlehile ka Matheu 28:2-4, 11-15.]*

Bosiu ba letsatsi le qalang veke, bo ile ba feta butle. Kreste e ne e ntse e le motšoaruoa lebitleng la Hae. Tiiso ea Maroma e ne e tiile; masole a Roma a ne a ntse a lebetse. Hoja e ne e le ntho e ka etsahalang, khosana ea lefifi e ka be e koetse lebitla le tšetseng Mora oa Molimo ka ho sa feleng. Empa mangeloi a leholimo a matla ka ho fetisisa a ne a emetse ho khahlanyetsa Khosana ea bophelo.

“Bonang, tšisinyeho e kholo ea lefatše ea e-ba teng, hobane lengeloi la Morena le ile la theoha leholimong.” Mahlaseli a hlak-ileng a khanya ea Molimo a bonesa tsela ea Hae. “Sebōpeho sa lona se ne se ka lehalima, ‘me seaparo sa lona se le sesoau joaloka lehloa. Balebeli ba thōthōmela ke ho tšaba, ba e-ba joaloka bafu.”

Moromuoa enoa, ke eena ea nkileng sebaka se siiloeng ke Satane ha a e-oa. Eitse ha a phikolosa lejoe eaka leholimo le kopane le lefatse. Masole a ile a mo bona ha a tlosa lejoe ha bobebe, joalekaha eka ke lehlohlojane, ba utloa a re, Mora oa Molimo tsoa; Ntat’ao Oa U bitsa. Ba bona Jesu A e-tsoa ka lebitleng, ‘me ba Mo utloa a phatlalatsa A le holim’ a lebitla le butsoeng A re, “Ke ‘Na tsoho le bophelo.” Eitse ha A etsoa ka borena le khanya, lekhotla la mangeloi la Mo amohela ka lipina le lithoko.

Balebeli ba Roma ha ba bona mangeloi ana, le Mopholosi ea khanyang, ba ile ba akheha, ‘me ba tšoana le ba shoeleng. Ha pono ena ea leholimo e se e patehile mahlong a bona, ba ile ba tsoha ‘me ba thekesela joalokaha eka ba tailoe, ‘me ba potlakela motseng, ba bolella bao ba kopanang le bona litaba tsena tse molemo. Ba ne ba e-ea ho Pilato, empa baprista le babusi ba ile ba ba khaoletsa pele ba fihla moo. Masole a ile a ba bolella tsohle tse etsahetseng, ka tšabo le thōthōmelo. A ile a re, Enoa ea neng a thakhisitsoe, ke Mora oa Molimo; Re utloile lengeloi le phatlalatsa hore ke Morena oa leholimo, le Morena oa khanya.

[522]

### **Kaiafa A Ba Susumetsa Ho Bua Leshano**

Kaiafa o ile a leka ho bua. A bebenya melomo empa lentsoe la hana ho tsoa. Masole a ne a se a tsamaea, ha Kaiafa a bua a re, Butleng, butleng, le se bolelle motho ntho tseo le li boneng.

Baprista ba re: “Le tle le re: ‘Barutuoa ba hae ba ile ba tla bosiu, ‘me ba mo utsoa ha re ntse re robetse.’” Mona joale baprista ba ile ba itšoaseletsa. Haeba masole a ne a robetse, a ne a ka tseba joang? Haeba barutuoa ba ne ba le molato oa ho utsoa setōpō sa Krete, ebe baprista e ka be e se bōna ba pele ho ba tsoa? Kapa haeba balebeli ba ne ba robetse, ebe baprista ba ka be ba sa ba qosa ho Pilato?

Masole a ile a nyaroha. Kahlōlo ea ho robala mosebetsing e ne e le lefu. Ebe ba ka bua leshano, ba bea bophelo ba bona tsietsing? Ebe ba ne ba tla ema joang kahlōlong, leha ba ne ba filoe tjotjo joalo hore ba itšoaseletse?

Baprista ba ba tšepisa hore ba tla buella balebeli, ba bolela ka hore Pilato le eena o ne a ke ke a thabela phatlalatso ea litaba tse joalo. Masole a Roma a ile a rekisa botšepahi ba ona ka chelete. Ba tlile ka pel’a baprista ba nkile litaba tse makatsang, empa ba tlohile moo ba nkile chelete, ‘me maleme a bona a jere tlaleho ea leshano.

Leha ho le joalo tlaleho ea tsoho ea Krete e ile ea fihla ho Pilato. Le hoja a ne a ahlōtse Mopholosi ka lekhonono, o ne a e-s’o ho itšoabele ho fihlela joale. O ile a ikoalla ka tlung ea Hae a tšohile, a ikemiselitse ho se teane le mang kapa mang. Empa baprista ba ile ba itshohlometsa, ba fihla ho eena ba kōpa hore a iphapanyetse ho hloka botšepahi mosebetsing ha masole. Empa o ile a bitsetsa balebeli lekunutung ‘me a ba botsa. Ha ba ka ba mo patela letho, ‘me Pilato o ile a utloa ka bona tsohle tse etsahetseng. Ha a ka a latelisa litaba tsena empa ho tloha nakong eona eo a hloka khotso.

[523] Baprista, ka ho bolaea Krete, ba ne ba ikentse lisebelisuo tsa Satane. Joale ba ne ba se ba sebelisoa ke eena ka ho tlala, ba tšoasitsoe sefing seo ba neng ba sitoa ho itokolla ho sona, ha ese feela ho tsoela pele ho loantša Krete. Tšepo ea bona feela e ne e le ea ho tiisa taba ea hore Krete ke mothetsi, ka ho latola litaba tsa hore O tsohile. Ba ile ba fa masole tjotjo, ‘me ba qekisa Pilato hore a thole.

Empa ho ne ho e-na le lipaki tseo ba sitoang ho li khutsisa. Ba bangata ba ne ba utloile bopaki ba masole, ba tsoho ea Krete.

‘Me le bafu ba bang ba ileng ba tsoha le Krete, ba ile ba hlaha ho batho ba bangata, ‘me ba phatlalatsa tsoho ea Hae. Baprista le babusi ba ne ba phela ka matsoalo, hore esere mohlomong ha ba ntse ba tsamaea, kapa sephiring mahaeng a bona, ba tšoana ba re ptjoang-tjoang le Krete. Linotlolo li ne li ke ke tsa thibela Mora oa Molimo. Kamehla, motšoare le bosiu, pono e tšosang ha ba ne ba hoa ba re “Mali a hae a botsoe rōna le bana ba rōna,” e ne e sa tlohe mehopolong ea bōna. Matheu 27:25.

### **Bopaki Ba Hore Le R5na Re Tla Tsoha**

Ha lentsoe la lengeloi le matla le utloahala lebitleng la Krete, le re, Ntat’ao oa U bitsa, Mopholosi O ile a tsoa ka lebitleng, ka bophelo bo neng bo le ka hare ho Eena. Krete O ne A ile a phatlalatsa ka tlholo A re, “Ke ‘na tsoho le bophelo.” Mantsoe ana a ne a ka buuo a ke Eo e leng Molimo. Tse hloliloeng tsohle, li itšetlehile ka bophelo boo li bo fumanang ho Molimo. Eena feela eo E neng e le ntho e le ‘ngoe le Molimo O ne A ka re, “Ke na le tokelo ea ho bo tela, ke na le tokelo ea ho bo fumana hape.” Sheba Johanne 10:18.

Jesu O tsohile bafung e le selelekela ho bohle ba robetseng, ‘me tsoho ea Hae e ile ea etsahala ka lona letsatsi leo kotulo ea pele e neng e hlalisoa ka pel’a Morena. Ka lilemo tse fetang sekete, ha batho ba ne ba e-ea Jerusalema Pasekeng, litholoana tse neng li butsoa pele, li ne li hlalisoa ka pel’a Morena, e le linyehelo tsa teboho. Lijalo li ne li sa kotuloe pele nyehelo tsena li fano. Mangata a neng a tšoaetsoe Molimo a ne a emetse kotulo. Ka mokhoa o joalo tsoho ea Krete ke mokhoa le leano la tsoho ea bohle ba lokileng, ba shoeleng. “Haeba re lumela hore Jesu o ile a shoa, a ba a tsoha bafung, le ba ithobaletseng ho Jesu, Molimo o tla ba tsosa bafung joaloka Jesu.” 1 Bathesalonika 4:14.

[524]

### **Ba Bangata Ba Ile Ba Tsosoa Le Jesu**

Ha Krete a tsoha, o ile a tsoa lebitleng, le ba hapiloeng ba bangata. Sheba Matheu 27:25. Ke ba ileng ba bolaeloa ho paka ka ‘nete. Joale e ne e tla ba lipaki tsa Hae, Eena ea ba tsositseng bafung.

Nakong ea bosebeletsi ba Hae, Jesu o ne a ile a tsosa bafu. Empa bana ba tsositseng ba ne ba sa fuoa ‘mele e sa shoeng. Empa ba

ileng ba tsoha le Krete tsohong ea Hae, ba ile ba tsoetsoa bophelo bo sa feleng. Ba ile ba nyoloha le eena e le moputso oa Hae oa ho hlōla lefu le lebitla. Ba ile ba kena har'a motse 'me ba hlaha har'a batho ba bangata, ba ba bolella hore Krete o tsohile bafung, 'Me rōna re tsohile le Eena. Bahalaleli ba tsohileng e ile ea e-ba lipaki tsa mantsoe a reng, "Bafu ba lōna ba tla boela ba phele, litōpō tsa bona li tla boela li tsoha." Esaea 26:19.

Ka Mopholosi oa rona, bophelo bo lahlehileng ka sebe bo ea buseletsoa. O filoe tokelo ea ho fana 'mele e sa shoeng. O itse "ke tlike hore li be le bophelo, 'me li be le bophelo ka ho tlala." Johanne 10:10. "Ea jang nama ea ka, a e-noa mali a ka, o na le bophelo bo sa feleng, 'me ke tla mo tsosa ka letsatsi la ho qetela." Johanne 6:54. Ho mokreste, lefu ke boroko feela, motsotsoana oa khutso le lefifi. "Mohla Krete eo e leng bophelo ba lona a bonahatsoang, le lona le tla bonahatsoa le eena ka tlotla." Bakolose 3:4.

Lentsoe le ileng la hōoa sefapanong le re, "Ho phethehile," le tla kenella mabitleng, le bule mabitla, 'me ba shoetseng ho Krete ba tla tsoha. Tsohong ea Mopholosi, mabitla a mang a ile a buloa, empa ha a e-tla khetlo la bobeli, bafu bohle ba bohlokoa ba tla utloa lentsoe la hae, 'me ba tsohele bophelo bo khanyang, bo sa feleng. Matla ao a ileng a tsosa Krete bafung, a tla phahamisa kereke ea Hae holim'a matla a mang, eseng feela lefatseng lena, empa le lefatšeng le tlang.

## KHAOLO EA 82—“MOSALI, U LLELANG NA?” [525]

*[E itšellehile ka Matheu 28:1, 5-8; Mareka 16:1-8; Luka 24:1-12; Johanne 20:1-18]*

Hoseng ha letsatsi le qalang veke, basali ba neng ba ile ba ema pel’a sefapano, ba ile ba leba lebitleng ho ea tlotsa ‘mele oa Mopholosi. Ba ne ba sa nahana letho ka ho tsoha ha Hae bafung. Tsepo ea bona e ne e felile. Ba ne ba se ba sa hopole mantsoe a Hae a reng, “Ke tla boela ke le bona.” Johanne 16:22.

Ba ile ba atamela pel’a tšimo, ba sa tsebe le letho ka se neng se ntse se etsahala ka eona nako eo, ‘me ba botsana ba re, “Ke mang ea tla re phikolosetsa lejoe le monyako oa lebitla?” Empa bonang, hang ka ho panya ha leihlo, maholimo a ne a ile a tlala khanya. Lefatše la thothomela. Lejoe le lehola la phikoloso, ‘me lebitla le ne le se le se na letho!

Maria oa Magadala ke eena ea ileng a fihla moo pele, ‘me eitse ha a bona lejoe le phikolositsoe, a potlaka ho tsebisa barutuoa. Ka nako eo basali ba bang le bona ba ile ba fihla. Lebitla le ne le koahetsoe ke khanya, empa setopō sa Jesu se ne se le sieo.

Ha ba ntse ba qeneheletse ho ema moo ba lemoha hang hore ha ba sa le bang. Mohlana o ne a le teng, ea apereng liaparo tse khanyang, a lutse pel’a lebitla. E ne e le lengeloi le phikolositseng lejoe. Le ne le ikhakantse, le nkile sebōpeho sa botho, e le hore le se ke la tšosa metsoalle eo ea Jesu. Empa khanya e tsoang leholimong e ne e bonesitse sebaka seo le leng ho sona, ‘me basali ba tšoha. Lengeloi le ile la re ho bona “Lona le se ke la tšoha; kea tseba hore le batla Jesu ea thakhisitsoeng. Ha a eo mona, hobane o tsohile, joalokaha a ne a bolele. Tloong, le bone sebaka seo a neng a le ho sona. Le phakise le e’o bolella barutuoa ba hae, le re: ‘O tsohile bafung.’” [526]

Ba sheba ka lebitleng, ‘me ba bona lengeloi le leng le nkileng sebōpeho sa botho ‘me la re, “Ea phelang le ‘matlela’ng har’a bafu? Ha a eo mona, o tsohile bafung. Hopolang kamoo a neng a le bolelle

kateng a sa le Galelea, ha a re: ‘Eka khona Mor’ a Motho a neeloe matsohong a baetsalibe, ‘me a thakhisoe, a nt’o tsoha ka tsatsi la boraro.’”

Joale Basali ba hopola hore — O itse O tla tsoha hape! A letsatsi la mohlolo! Ba tloha ba potlakile. “Ba tloha kapele lebitleng, ka tšabo le ka thabo e kholo, ba matha ho ea tsebisa barutuo ba hae.”

Maria o ne a e-s’o utloe litaba tsena tse molemo. O ile a ea ho Petrose le Johanne ka molaetsa oa mahlomola, a re, “Ba tlositse Morena lebitleng, ‘me ha re tsebe moo ba ‘meileng teng!’” Barutuo ba mathela lebitleng, ‘me ba fumana masela a neng a koahetse setōpō, empa Morena oa bona Eena ba se ke ba Mo bona. Leha ho le joalo hona e ne e le bopaki ba hore o tsohile. Masela a neng a Mo koahetse a ne a sa lahluoa feela, empa a ne a phuthiloe ka makhethe, le leng le le leng le ntse le le litulong tsa lona. Johanne “a bona, ‘me a lumela.” Ka nako ena, o ile a hopola mantsoe a Mopholosi a bolelang ka tsa tsoho ea Hae.

Ke Krete, ka sebele, ea neng A bea masela ao ka hlōkō. E ile ea re ha lengeloi le matla, le theohang leholimong, le phikolosa lejoje, le leng le ile la kena, la tlosa masela a neng a tlamile setōpō sa Jesu. Empa Mopholosi ka letsoho la Hae, O ile A mena masela ao, ‘me A a bea litulong tsa ona. O nka lintho tsohle e le tsa bohlokoa, Eena ea tataisang linaleli le tsohle.

Maria o ne a ile a latela Johanne le Petrose ho ea lebitleng. Ha ba khutlela Jerusalema, a sala. O ne a hlomohile haholo. Ha a talima ka lebitleng, a bona mangeloi a mabeli, le leng le le ka hlohong, ha le leng le le ka maotong, moo Jesu A neng A beiloe. A ile a ‘motsa a re “‘Mosali, u llela’ng?’ A re ho oona, ‘Ba tlositse Morena oa ka, ‘me ha ke tsebe moo ba ‘meileng teng.’”

[527]

O ile a reteleha, a hopotse hore a fumane motho ea ka mo hlalosetsang hore na setōpō se isitsoe kae. Lentsoe le leng le ile la bua le eena, la re, “Mosali u llelang? U batla mang?” Maria a talima ka mahlo a tletseng meokho, ‘me a bona monna, ‘me ka ho hopola hore ke molemi oa tšimong a ‘motsa a re, “Monghali, haeba ke uena ea mo tlositseng, mpoelle moo u ‘meileng teng, ‘me ke tla ea mo nka.” O ne a nahanne hore, haeba lebitla lena la morui le ne le sa tšoanela Jesu, eena o ne a tla Mo batlela sebaka. Ho ne ho e-na le lebitla le senang motho, leo Jesu ka boeena A neng A ile A tsosa motho ka hare ho lona, e leng la Lazaro.

Empa joale Jesu A bua ka lentsoe le tloaelehileng, A re ho eena, “Maria!” Ha a hetla a bona Krete ea phelang! A eme pel’a Hae. A Mo fofela a lakatsa ho aka maoto a Hae, ‘me a re “Rabbuni!” Empa Krete A phahamisa letsoho la Hae A re, “U se ke ua ntšoara, hobane ha ke e-s’o nyolohela ho Ntate, empa e-ea ho bana beso, ‘me u ba bolelle, u re: ‘Ke nyolohela ho Ntate, le Ntat’a lōna, Molimo oa ka, le Molimo oa lona!’” Maria a isa molaetsa ona, a tletse thabo.

Jesu O ile A hana ho amohela khumamelo e tsoang ho batho bana ba habo, ho fihlela a nyolohetse makhotleng a leholimo le ho Molimo, ho utloa hore na sehlabelo sa Hae seo A se etselitseng libe tsa batho, se lekane, le hore na ka mali a Hae bohle ba ka khona ho fumana bophelo bo sa feleng. Ntate O ile A tiisa selekane seo A neng A se entse le Krete, sa hore O tla amohela batho ba bakileng libeng, ba Mo mamelang, ‘me O tla ba rata joalokaha A rata Mor’a Hae. Khosana ea bophelo E filoe matla ‘ohle a leholimong le lefatseng e le hore A tle A fe balateli ba Hae matla le khanya ea Hae.

Nakong eo Mopholosi A ne A le ka pel’a Molimo, ho amohela limpho tsa kereke ea Hae, barutuo ba ne ba soabile ‘me ba lla. Letsatsi lena leo e neng e le la nyakallo leholimong, ho bona e ne e le la pherekano le matsoalo. Hore e be ha baa ka ba lumela bopaki bo fanoeng ke basali ho bontša kamoo tumelo ea bona e neng e se e tetebetse ka teng. Ba ne ba sitoa ho lumela litaba tsena. E ne e ka ke toro. Litlhaloso tseo ba li utloileng ho Basaduke tseo ho thoeng ke tsa bohlaledi li ne li ba ferekantse, ‘me ba se ba sa tsebe hore na tsoho e bolelang. Mangeloi a ne a ile a re ho basali, “Le mpe le e’o bolella barutuo ba hae le Petrose, le re: ‘O le etella pele ho ea Galelea; le tla ‘mona teng, joalokaha a le boleletse!’” Molaetsa ona oa mangeloi o ne o tšoanetse hore ebe o ile oa kholisa barutuo hore ke oa ‘nete. Mantsoe a molaetsa oo a ne a ka buuo ke Morena oa bona Ea tsohileng feela.

Esale Krete a e-shoa, Petrose o ne a soabile haholo. Kamehla o ne a hopola mahlabisa-lihlong ao a ileng a a etsa a ho latola Morena. Har’a barutuo bohle ke eena ea neng a utloile bohlokō ka ho fetisisa. O ile A mo qolla ka lebitso e le ho mo tiisetse hore o tšoaretsoe.

Maria oa Magadala, ha a se a bolelletse barutuo hore o bone Morena, o ile a boela a pheta a ba hopotsa hore ba laetsoe ho ea Galelea. Ba ile ba boela ba fumana molaetsa ona lekhetlo la boraro. Hoba A nyolohela ho Ntate Jesu O ile A itlhaisa ho basali ba bang,

A re “E-eang le tsebise bana beso hore ba ee Galelea, ‘me ba tla mpona teng.”

Mosebetsi oa Kreste oa pele kamora’ tsoho ea Hae, e ne e le ho kholisa barutuo ba Hae hore O ntse A ba rata ‘me A ba hlokomela joaloka pele. O ne A tla ba bokella haufinyane le Eena ka lerato. O ile A re, “E-eang le tsebise bana beso hore ba ee Galelea, ‘me ba tla mpona teng.”

Empa le joale barutuo ba ne ba ntse ba sitoa ho tlosa pelaelo le ho nyahama ho bona. Le ha basali ba ba bolella hore ba bone Morena ba ne ba ba nka ba le torong.

Ho ne ho bonahala litsietsi tsa bona li latellana. Ba ne ba bone Mong’a bona A e-shoa; joale setōpō sa Hae se lahlehile; ‘me ba boetse ba qosoa ka hore ba se utsoitse hore ba thetse batho. Ba lahlehelo ke tšepo ea hore ba sa tla tseba ho hlakola litaba tsena tsa leshano tse neng li ntse li ata. Ba ne ba tšositsoe ke bora ba baprista le khalefo ea sechaba ‘me ba laba-labela hore eka Jesu A ka be A e-na le bona.

Hangata ba ne ba lomaloma ba re, “Rōna re ne re tšepile hore ke eena ea tla lopolla Iseraele.” Luka 24:21. Ka masoabi le bolutu, ba ile ba kopana ‘moho, ka phaposing e ka holimo ‘me ba notlela mamati. Ba ne ba tseba hoba le bona ba ne ba ka ‘na ba bolauoa joaloka Moruti oa bona ea ratehang.

[529] Nakong ena eohle eo ba neng ba le masoabing, e ka be e ile ea eba nako ea thabo ho bona, hoja ba ne ba ile ba lumela litaba tsa hore Mopholosi O tsohile. Batho ba bangata ba etsa ntho e tšoanang le ena e neng e etsuo ke barutuo. Mopholosi O pel’a bona empa ha ba ‘mone hobane mahlo a bona a tletse meokho; O bua le bona empa ha ba utloisise.

“Le phakise le e’o bolella barutuo ba hae, le re: ‘O tsohile bafung.’” Le se ke la talima ka lebitleng le butsoeng le senang letho. Empa tsanyaolang lipina tsa thabo, ka lipelo tse tletseng thabo, le melomo e amiloeng ke mollo o halalelang, le re, Kreste O tsohile! O tsohetse ho ba Muelli oa rōna.



## KHAOLO EA 83—LEETO LA HO EA EMMAUSE [530]

*[E itšetlehile ka Luka 24:13-23.]*

Mantsiboeeng a letsatsi leo Jesu A neng A tsohile ka lona, barutuo ba babeli ba ne ba le leetong la ho ea Emmause, e leng motsana o monyenyanane o neng o le bohole ba limaele tse robeli ho tloha Jerusalema. Barutuo ba bana, ba ne ba e-tsoa moketeng oa Paseka, ‘me ba ne ba tšoenyehile haholo ke lintho tse etsahetseng. Ba ne ba ile ba utloa litlaleho tsa ho tlosoa ha setōpō sa Jesu, esita le tsa basali ba neng ba bone mangeloi ba ba kopana le Jesu. Nakong ena eo ba neng ba khutlela hae, ba ne ba buisana ka tse etsahetseng nakong ea kahlōlo le thakhiso ea Jesu. Haesale e le bona ba ne e-s’o nyahame hakaalo!

Ha ba ntse ba tsamaea ba kopana le moeti e mong, empa ha baa ka ba Mo shebisisa kaha ba ne ba tšoenyehile haholo. Ba ile ba tsoela pele ho buisana ka se neng se ba khathalitse likelello le ka lithuto tseo Krete A neng A ile a li fana tseo ba neng ba utloahala ba sa li utloisise. Jesu O ne A laba-labela ho ba tšelisa. O ne A utloisisa mehopolo ea bona e neng e loebehlana; e neng e baka hore ba ipotse hore na ebe Monna enoa, Ea inehetseng hore A tlontlolloe, ekaba Eena Krete na? Ba lla. Jesu O ne A laba-labela ho phumola meokho ea bona, le ho ba tlatsa ka nyakallo le thabo. Empa O ne A tšoanetse hore pele A ba fe thuto eo ba ke keng ba e lebala le khale.

“A re ho bona: ‘Litaba tseo le tsamaeang le buisana ka tsona ke life?’ Ba ema tlekelele! Ba soabile. E mong oa bona, ea bitsoang Keleopase, a mo araba, a re: ‘Na ebe ke uena feela u leng moeti moo Jerusalema, ea sa tsebeng tse etsahetseng teng matsatsing aa?’” Ba Mo qoqela ka tse ba soabisitseng, ka Mong’a bona, “Eo e neng e le monna oa moporofeta ea matla liketsong le lithutong pel’a Molimo le pel’a sechaba sohle,” empa “baprista ba baholo le babusi ba rōna ba neelaneng ka eena hore a ahlōleloe lefu kateng, ba bileng ba mo thakhisa.” Ba eketsa ho bua ka melomo e thothomelang ba re, “Rōna [531]

re ne re tšepile hore ke eena ea tla lopolla Iseraele. Ntle ho tsena tsohle, lena ke letsatsi la boraro tsena li etsahetse.”

Ho ne ho makatsa hore ebe ba ne ba sa hopole mantsoe a Kreste le hore O ne A ile A ba bolella pele hore O tla tsoha ka letsatsi la boraro. Baprista le babusi bona ba ne ba sa leba la!

### **Jesu O Hlalosa Mangolo Hona Hoo**

“A re ho bona: ‘Jo, lithoto tse pelo li liehang ho lumela tsohle tseo baporofeta ba ileng ba li bolela! Na Kreste o ne a sa tlameha ho hlōkōfatsoa tjee, a nt’o kena tlōtleng ea hae?’” ‘Ebe Eo ke mang ea buang ka cheseho le mohau? Ba ile ba qala ho ikutloa ba tlala tšepo. Ba ne ba talima moeti enoa khafetsa, ka cheseho, ‘me ha fihla likelellong tsa bona hore mantsoe a Hae a tšoana hantle le ao Kreste A ka beng A a buile.

Kreste O ile A ba hlaloesetsa mangolo ka bophara, ka lintlha tse neng li Mo ama, ho tloha ho Moshe eena e leng qalo ea pale ea Bibe. Hoja A itšenola ho bona hore na ke mang, ba ka be ba ile ba lahlehela ke takatso ea ho hlaloesetsoa. Empa, ho ne ho le bohlokoa hore ba utloisise boporofeta ba Testamente ea Khale. Tumelo ea bona e ne e tšoanela ho thehoa holim’a bona. Kreste Ha A ka A etsa mohlolo ho ba kholisa hore na Ke mang, tšoanelo ea Hae ea pele e ne e le ho hlalosa mangolo. O ile A ba bontša boporofeteng hore lefu la Hae e ne e le bopaki bo matla tumelong ea bona.

[532] Jesu A bontša hore Testamente ea Khale e na le bohlokoa bo boholo ho Mo pakela, thōmong ea Hae. Testamente ea Khale e senola Mopholosi ka mokhoa o hlakileng joaloka e ncha. Leseli le hlhisoang ke boporofeta bo fetileng, le hlhisa bophelo ba Kreste le lithuto tsa Testamente e Ncha ka mokhoa o hlakileng, le bokhabane. Bopaki bo matla le ho feta mehlolo e entsoeng ke Kreste, bo fumanoa ka ho bapisa boporofeta ba Testamente ea Khale, le liketsahalo tsa Testamente e Ncha.

Barutuo ba ne ba lahlehile, ka ho lebella hore Mesia O tšoanetse ho lula teroneng A nke matla a borena, ho latela takatso ea batho. Barutuo ba ne ba tšoanetse ho utloisisa hore O ne A khethetsoe ho noa mohope oa mahlomola. O ile a ba bontša hore ntoa ena e tšosang e ne e phethahatsa selekane se ileng sa etsoa pele lefatše le thehoa. Kreste O tšoanetse ho shoa, joalokaha e mong le e mong ea

tlolang molao a tšoanetse ho shoa, ha feela a ntse a phela sebeng. Tsena tsohle li ne li tšoanetse ho phethahala, empa qetello e ne e tla ba tlhōlo e khanyang e seng ho hlōlela. Jesu O ile A ba hlalosetsa hore sohle se ka etsoang se tšoanetse ho etsoa, ho pholosa lefatše sebeng. Balateli ba Hae ba lokela ho phela bophelo bo tšoanang le ba Hae, ba sebetse joaloka Eena ka mamello.

Kreste O ile a buisana le barutuo ba Hae joalo hore ba utloisise Mangolo. Ha A ba hlalosetsa ka ho oa ha Jerusalema, ba ile ba talima motse oo o neng o tleloa ke tsietsi, ‘me ba lla. Empa le motsotsong ona ba ne ba ntse ba sa hlalohanye hore na Eo ba tsamaeang le eena ke mang, hobane Kreste O ne A ikhakantse. O ne A qoba majoe, tseleng, joaloka bona. E ne e re ha ba phomola le Eena A phomole.

### **Pelo Tsa Bona Tsa Hoheloa Ke Motho Enoa Eo Ba Sa Mo Tsebeng**

Ha ba ntse ba tsoela pele leetong la bona, letsatsi la likela, ‘me le batho ba neng ba ntse ba sebetsa masimong, ba ne ba se ba orohile. Ha barutuo ba atamela hae, moeti enoa A bonahala eka O batla ho tsoela pele leetong. Empa barutuo ba ne ba labalabela ho mamela litaba tsa Hae hape. Ba Mo kōpa ba re, “hlola le rōna.” A bonahala eka Ha A amohle memo ea bona, empa ba phehella. “Letsatsi le se le rapame, ‘me e se e tla ba mantsiboea.” Kreste O ile A amohela memo ena ‘me “Eaba oa kena, o hlola le bona.”

Hoja barutuo ba se ke ba qophella ho Mo mema, ba ka be ba sa ka ba tseba hore Eo ba neng ba ntse ba tsamaea le Eena, ke Morena [533] ea tsohileng. Kreste Ha A qobelle mang kapa mang ho Mo amohela. O etela esita le malapa a bohloking bo boholo ka thabo, empa ha batho ba sa Mo tsotelle, ba sa Mo kope ho ba le bona Oa iphetela.

Lijo tse bobebe tsa mantsiboea tsa lokisoa, ‘me tsa behoa ka pel’a moeti enoa Ea neng A lutse hlohong ea tafole. Joale A otlolla matsoho ho hlohonolofatsa lijo, ka mokhoa o neng o tšoana le o neng o ee o etsoe ke Mong’a bona. Barutuo ba chechella morao ke ho makala. Ba Mo talima ‘me ba bona mabea a lipekere ka matsohong a Hae. Bobeli ba bona ba hoa ba re, Ke Morena Jesu!

Ha ba raoha ba re ba itihela maotong a Hae, A ba nyamella. Ba ile ba sheba setulo seo A neng A lutse ho sona, Eena eo ‘mele oa Hae O neng O le ka lebitleng, ‘me ba bolellana ba re “Ana pelo tsa

rona li ne li sa chese ka ho rōna ha a bua le rōna tseleng, a ntse a re hlalosetsa Mangolo na?”

Ha ba qeta ho fumana litaba tsena tse kholo, ba lebala mokhathala le tlala tseo ba neng ba ena le tsona. Ba siea lijo ba sa li ja ‘me ba potlaka ho khutlela Jerusalema ho tsebisa barutuoa ba bang. Ba ne ba e-hloa meepa, ba tsamaea ba thella, empa takatso ea bona e ne e le ho potlaka. Ba ne ba tsamaea ba lahleha, empa ba boele ba fumane tsela hape. Ka nako e ‘ngoe ba ne ba matha, ka e ‘ngoe ba khoptjoe, empa ba ‘na ba tsoela pele leetong, ‘me Eo ba neng ba sa ‘Mone O ne A ntse A le lehlakoreng la bona, leetong lohle la bona.

Ho ne ho le lefifi empa leseli la ho loka le ne le ba chabetse. Ba ne ba bonahala ba le lefatseng le lecha. Krete O tsohile -ba ne ba ntse ba pheta mantsoe ana. Ba ne ba tšoanela ho tsebisa ba mahlomoleng litaba tse molemo tsa leeto la ho ea Emmause. Ba lokela ho ba tsebisa ka Ea ileng A kopana le bona tseleng. Ba ne ba tšoere molaetsa o moholo ho feta eohle e kileng ea fanoa -litaba tsa thabo, tseo tebello ea lelapa lohle la botho e neng e itšetlehile ka eona ho isa ka ho sa feleng.

## KHAOLO EA 84—KRESTE EA TSOHILENG O ITLHAHISA HO BŌNA

[534]

*[E itšetlehile ka Luka 24:33-48; Johanne 20:19-29.]*

Barutuoana bana ba babeli ha ba fihla Jerusalema, ba ile ba kena ka khoro e ka bophirima, ba tsamaea litseleng tse tšesane ba bone-selitsoe ke khanya ea khoeli, ba fetela phaposeng e kaholimo, moo Jesu A neng A ile A hlōla mantsiboea a ho qetela pele A e-shoa. Ba ne ba tseba hoba ba habo bona ba hona moo. Lemati le ne le koetsoe ka mokhoa o thata. Ba ile ba kokota, empa ha hlokeha karabo. Ho ne ho thotse ho itse tu! Ba ile ba ipolela hore na ke bo mang. Lemati la buloa butle, ‘me ba kena, ‘me le E mong Eo ba neng ba sa ‘Mone le Eena O ile A kena. Lemati la boela la koaloa ka thata ho thibela lihloela.

Batsamai bana ba ile ba fumana ba ka tlung ba hloletsoe ke thabo. Ho ile ha utloahala mantsoe ka tlung a reng, “Morena o fela a tsohile, ‘me o iponahalitse ho Simone.” Joale barutuoana ba babeli ba tsoang Emmause, ba ntse ba hemusela, ba phetela ba bang kamoo Jesu A ileng A itlhahisa ho bona. Ba bang ba ne ba sa lumele, ba re ntho e molemo hakaalo e ke ke ea etsahala. Ka eona nako eo Motho e mong A ema har’a bona. Ho ne ho se motho ea ileng a kokota ‘me ba sa ka ba utloa liqi tsa maoto tse neng li ile tsa utloahala. Barutuoana ba tšoha. Empa ba utloa lentsoe la Mong’a bona, le hlakileng, le re “Khotso e be le lōna!”

“Empa ba tšoha, ba tšaba, ba hopola hore ba bona sethotsela. A re ho bona: ‘Le ferekanetse’ng? Ke ka baka la’ng le hlaheloang ke lipelaelo lipelong tsa lōna Bonang matsoho a ka le maoto a ka, hore ke ‘na ka sebele. Ntoboketseng le utloe, hobane sethotsela ha se na nama le masapo, kamoo le mponang ke e-na le tsona kateng/Hoba a rialo, a ba bontla matsoho le maoto a hae.’”

[535]

“Eare ha ba ntse ba sa lumele ke thabo, ba maketse, a re ho bona: ‘Na le na le ho ka jeoang moo?’ Ba mo nea leqa la tlhapi e besitsoeng. A le nka, a le ja ba mo shebile.” “Barutuoana ba thaba ha

ba bona Morena.” Tumelo ea nka sebaka sa ho se lumele, ‘me ba amohela Mopholosi oa bona Ea tsohileng bafung.

### **Re Tla Tseba Baratuo a Ba Rona**

Mopholosi ha A se A tsohile, O ne A ntse A tšoana le pele. Mokhoa oa Hae le puo ea Hae, li ne li ntse li tšoana le kamoo barutuo a ba neng ba li tseba kateng. Joalokaha Jesu A ile A tsoha bafung, batho bohle ba robetseng ho Eena, ba tla tsoha hape. Re tla tseba metsoalle ea rōna, joalokaha barutuo a ba ile ba tseba Jesu. Sebōpeho sa bona se tla ‘ne se bonahale ‘meleng ea bona e tlotlisitsoeng. Re tla tseba barutuo a ba rōna.

Jesu O ile A hopotsa barutuo a ba Hae mantsoe Ao A neng A a bue pele A e-shoa. “Eaba o ba bula likelello hore ba utloisise Mangolo. A re ho bona: ‘Ho ngotsoe joalo hore eka khona Krete a hlōkōfatsoe, a tsohe bafung ka tsatsi la boraro, le hore ka lebitso la hae, lichaba tsohle li phatlalletsoe pako le tšoarello ea libe, ho qala Jerusalema. Lōna le lipaki tsa litaba tsena.’” Bophelo ba Krete, lefu la Hae le tsoho ea Hae, boporofeta bo neng bo supa tsena, le khalalelo ea molao oa Molimo, liphiri tsa leano la pholoho, matla a Jesu a ho folisa libe -tsena tsohle, barutuo a ba ne ba tšoanetse ho li tsebisa lefatše.

“Hoba a rialo, a bululela moea ho bona, a re: ‘Amohelang Moea o Halalelang! Bao le tla ba tšoarella libe, ba li tšoaretsoe; bao le ba ballang tsona, ba li baletsoe.’” Ha ba ka ba fumana Moea o Halalelang ka bongata ho fihlela kamorao ho hore Jesu A nyolohele leholimong. Empa Krete O ile A ba bululela Moea oa Hae O Halalelang ho ba elelloisa hore ba ke ke ba tseba ho phetha mosebetsi oa bona oa kereke ha ba se na Moea o Halalelang.

[536] Ho abeloa Moea ke ho abeloa bophelo ba Krete. Ho hlomelia ea O amohelang ka semelo sa Krete. Ke feela ba sebelisoang ke Moea ka hare, bao maphelo a bona a senolang bophelo ba Krete ke bona ba feela tšoanetseng ho sebeletsa kereke.

Krete O itse “bao le tla ba tsoarelang libe, ba li tšoaretsoe; bao le ba ballang tsona, ba li baletsoe.” Ka mantsoe ana, Krete ha A fe mang kapa mang matla a ho ahlola ba bang. Hona ke tokelo ea Molimo. Empa O fa kereke e hlophisitsoeng boikarabello holim’a setho ka seng. Kereke e na le boikarabello holim’a ho ba oelang

sebeng, ho ba hlokomelisa, ho ba laea le ho ba busetsa litulong ha ho lumelleha. Sebetsana le liphoso ka botšepahi. Bitsa sebe ka lebitso la sona. Phatlalatsa seo Molimo O se buileng ka leshano, ho tlola molao oa Sabatha, ho utsoa, le bokhopo bohle. Haeba ba tsoela pele ho etsa sebe, kahlōlo eo u ba neileng eona, e tsoang Lentsoeng la Molimo, leholimo le tla ba ahlola ka eona. Kereke e lokela ho bontša hore ha e emele liketso tsa bona tse mpe, hoseng joalo e tlabe e tlontlolla Morena oa eona. E lokela ho sebetsana le sebe joalekaha Molimo O laetse, ‘me leholimo le tla tiisa qeto e entsoeng.

Empa taelo ena e na le karolo e khothatsang “bao le tla ba tsoarelang libe, ba li tšoaretsoe.” Bea mohopolo ona kaholimo. Molisa a ke a bolelle ba fosang ka mohau o tsoarelang oa Mopholosi. Moetsalibe a ke a khothaletsoe ho baka, le ho lumela ho Ea ka tsoarelang. “Ha re ipolela libe tsa rona, Molimo o tla re tšoarela tsona, ‘me a re hloekise bokhopo bohle, kaha oa tšepahala, ‘me o lokile.” 1 Johanne 1:9. Beha letsoho le thothomelang la ea sokolohang ka letsohong le nang le lerato la Jesu. Leholimo le amohela pako e joalo.

### **Ke Molimo Feela O Ka Tsoarelang**

Ke ka mokhoa ona feela, kereke e nang le matla a ho lokolla moetsalibe. Ke ka makhabane a Kreste feela tšoarelo ea libe e ka fumanoang. Matla a ho lokolla moea molatong ha a fuoa motho leha a le mong kapa sona sehlopha sa batho. Lebitso la Jesu ke lona feela, “hobane ha ho na lebitso le leng lesele tlas’a letsatsi, le neiloeng batho, leo re tšoanelang ho pholoso ka lona.” Liketso 4:12.

Lekhetlong la pele, ha Jesu A kopana le barutuo a ka moahong o kaholimo, Thomase o ne a le sieo. O ile a utloa ha ba bang ba tlaleha hore Jesu O tsohile empa pelo ea hae e ne e tletse masobi le ho se lumele. Haeba Jesu A ne A fela A tsohile, ho ne ho ke ke ha ba le tšepo ea hore ‘muso oa lefatše o tla ba teng. Kelello ea hae e fokolang ea utloisoa bohlōko ke hore ebe Mong’a hae O itlhabisitse ho ba bang bohle haese ho eena feela. A itherela hore a ke ke a lumela, ‘me o ile a qeta veke a ntse a lohotha ka ho kheseha ha hae.

O ne a pheta mantsoe ana khafetsa, “Ha ke sa bona maqeba a lithakhisa matsohong a hae, ka kenya monoana oa ka masobeng a lithakhisa, ‘me ka kenya letsoho la ka lehlakoreng la hae, ha nka ke ka lumela.” O ne a sitoa ho lumela bopaki ba baena ba bang. O ne a

rata bana babo empa o ne a lumeletse mona le khoao ho lula pelong ea hae.

Mantsiboeeng a mang, Thomase a rera ho kopana le barutuo ba bang, ntlong e kaholimo, moo ho neng ho tloaetsoe ho phuthehelo teng. O ne a na le tšepo e fokolang ea hore litaba tsena tse molemo ekaba 'nete. Ha ba ntse ba e-ja lijo tsa mantsiboea, barutuo ba ne ba buisana ka bopaki boo Krete A neng A fane ka bona boporofeteng. “Jesu a kena, menyako e ntse e notletsoe, a ema hare, a re: ‘Khotso e be le lona!’”

A retlehela ho Thomase A re, “Tlisa monoana oa hao mona, u bone matsoho a ka; u tlise le letsoho la hao, u le kenye lehlakoreng la ka, ‘me u se ke ua hloka tumelo, u mpe u be le tumelo.” Morutuo enoa ea sa lumeleng o ne a tseba hore ha ho e mong oa balekane ba hae eo ekabang o tsebisitse Mong’a hae ka ho se lumele ha hae. O ne a sa hloke bopaki bo bong. Pelo ea hae ea tloa ke thabo, ‘me a itihela maotong A Jesu a ntse a hōoa a re “Morena oa ka le Molimo oa ka!”

Jesu O ile A amohela kholiseho ena ea hae, empa A mo khalemella ho hloka tumelo. A bua ka bonolo a re “Na u lumetse kahobane u mpone? Ho lehlohonolo ba lumelang leha ba sa ka ba bona.” Haeba lefatše mehleng ena le ne le ka latela mohlala oa Thomase, ho ne ho se motho ea ka lumelang, hobane bohle ba amohelang Krete, ba lokela ho etsa joalo ka bopaki ba bang. Ba bangata bao, joaloka Thomase, ba emelang hore khoao eohle e tlosoe, ba ke ke ba hlōla ba fumana seo ba se lakatsang. Ba ea ba ntse ba tiea ho se lumeleng. Ba jala peo ea khoao ‘me ba tla kotula khoao. Nakong eo tumelo le sebete li hlokahalang haholo, ba bangata ba tla iphumana ba se na matla a ho tšepa le ho lumela.

Mokhoa oo Jesu A sebellelitseng Thomas, O re bontša kamoo le rōna re tšoanetseng ho sebellelsa ba bontšang pepenene hore ba a belaela. Thomase o ne a se na mabaka a hore ebe o laela hore na ho etsahaleng pele a ka lumela, empa Jesu, ka ho talimisisa litaba ka mokhoa o lokolohileng, O ile A thuha marako ‘ohle. Ho se lumele ha se hangata ho ka felisoang ka khang. Empa etsang hore Jesu A senolehe leratong le mohaung oa Hae, e le Mopholosi ea thakhisitsoeng, ‘me melomong e mengata e neng e sa lumele ho tla utloahala boipolelo bona bo tšoanang le ba Thomase bo reng, “Morena oaka le Molimo oa ka!”



## KHAOLO EA 85—LEBŌPONG LA LEOATLE HANG HAPE

[539]

*[E itšetlehile ka Johanne 21:1-22.]*

Jesu O ne A khethile ho kopana le barutuo ba Hae Galelea. Ha barutuo ba ne ba ka ba sieo Jerusalema vekeng ea Paseka, ketso eo e ne e tla nkoa e le ho ikarola le bokhelohi. Empa erekaha Paseka e ne e fetile ba ile ba ea hae ka thabo ho ea kopana le Mopholosi joalekaha A ne A laetse.

Barutuo ba supileng ba ne ba tšoana. E ne ele mafutsana linthong tsa lefatše lena empa e le barui tsebong ea ‘nete. Ba ne ba ile ba rutoa ka lilemo tse tharo ke moruti e moholo ho feta bohle ba kileng ba e-ba teng lefatseng. Ba ne ba hlalefile, ba ntlafetse, e le lisebelisuo tseo ka tsona batho ba neng ba tla tseba ‘nete.

Barutuo ba ne ba phutsehile sebakeng seo ho neng ho se bonolo hore ba ka ‘na ba khathatsoa. Haufi le bona ho ne ho le lebōpo la leoatle lane la hore batho ba likete tse leshome ba fepuoe ka lingoathoana le litlhapi tse fokolang. Sebakana le bona, e ne e le motse oa Kapernauma oo ho ona ho neng ho entsoe mehlolo e mengata.

Petrose ka hobane a ne a ntse a ithatela likepe le ho tsoasa litlhapi, a etsa tlhahiso ea hore ba ke ba ee leoatleng, ba lahlele matlooa a bona teng. Ba ne ba hloka lijo le liaparo, ‘me ha ba ne ba ka atleha ho tsoasa litlhapi, bohloki ba bona bo ne bo tla fela. Ba ile ba tsoa ho ea leoatleng empa ba sebetsa bosiu bohle ba sa fumane letho. Ba qetile lihora tseo tsa mokhathala ba ntse ba buisana ka Mong’ a bona ea sieo. Ba ne ba ipotsa hore na bokamoso ba bona bo tla ba joang; ba nyahama ha ba nahana ka tse tlang.

Qetellong bosiu ba e-sa. Seketsoana se ne se sa le holenyana le lebōpo ha barutuo ba bona motho eo ba sa mo tsebeng a erne lebopong. Motho enoa o ile a ba botsa potso a re: “‘Bana ba ka, na le na le tlhapi?’ Ba mo araba, ba re: ‘che.’ A re ho bona: ‘Akhelang

[540]

letlōoa lehlakoreng le letōna la sekepe, ‘me le tla tšoasa.’ Eaba baa le akhela, ‘me ba sitoa ho le hula ka baka la bongata ba litlhapi.”

Johanne a tseba moeti enoa ‘me a hōeletsa Petrose a re, “Ke Morena.” Petrose a thaba hoo a ileng a ikakhela ka har’a metsi ‘me a ema pel’a Mong’a hae. Barutuo a ba bang ba fihla ka seketsoana sa bona, ba hula letlōoa le tšetseng litlhapi. “Joale ha ba e-tsoa ka sekepeng ba fihla lebopong, ba bona mollo oa mashala, le tlhapi e besitsoeng holim’a oona, le bohobe.”

“Jesu a re ho bona: “Tlisang tse ling tsa litlhapi tseo le tsoa li tšoasa.”” Petrose a potlakela letloeng leo a neng a ile a le nyahlatsa, ‘me a thusa ho le hulela lebopong. Kamora’ mosebetsi ona, Jesu A ba arolela lijo, A tsejoa, A ba A pakoa ke bohle ba supileng. Empa ba ne ba aparetsoe ke tšabo ea mohlolo, eaba ba talima Mopholosi ea tsohileng bafung ba khutsitse.

Ba ile ba hopola hantle mohla ba neng ba le pel’a leoatle ‘me Jesu A ba bitsa hore ba Mo latele. O ne A ile A re ba sise liketsoana tsa bona tsa litlhapi, ‘me A ba tšepisa hore O tla ba etsa batšoasi ba batho. Joale Jesu O boela A etsa mohlolo ona e le ho ba hopotsa liketsahalo tseo tsa mohla A ba bitsang le ho etsa hore ba e nahane ka botebo, ‘me A nchafatse thōmo ho barutuo a ba Hae. Lefu la Mong’a bona le ne le sa nyehliša tlameho ea bona ea ho phetha mosebetsi oo A ba romileng ho o etsa. Lehoja ba ne ba lahlehetsoe ke mesebetsi ea bona ea pele ea boipheliso, Mopholosi ea tsohileng O ne A tla ba fumantša seo ba se hlokang. Ha feela ba ne ba ka sebetsa ba ipapisitse le Eena ba ne ba keke ba hloleha.

### **Petrose O Boetse A Khothatsoa**

[541] Hona le thuto e ‘ngoe eo Krete A lokelang ho e fana. Ho latola Morena ha Petrose e bile ntho e lihlolong, e hanyetsang boipolelo ba hae ba hore o tla tšepahala. O ne a tlontlolotse Krete, ‘me barutuo a ba bang ba ne ba hopola hore ha a sa tla lumelloa ho boela litulong tsa hae tsa pele, har’a bona. Le eena o ne a ikutloa a itsenyellelitse. O ne a lokela ho fana ka bopaki bo pepenene ba hore o sokolohile pel’a bohle. Ha a ne a ke ke a etsa joalo, sebe sa hae se ne se tla senya tšusumetso ea hae joaloka moruti oa Krete. Mopholosi A mo fa monyetla oa hore a boele a tšeptjoe ke bana babo, le hore a tlose sekhobo seo a se tlišelitseng Lentsoe la Molimo.

Hona ke thuto ho balateli bohle ba Krete. Libe tse entsoeng ka lekunutu li lokela ho bolelloa Molimo lekunutung; empa tse entsoeng pepeneneng li lokela ho boleloa pepeneneng. Sebe se etsoang ke morutuo, se etsa hore Satane a hlole ‘me meea e fokolang e khoptjoe. Morutuo o lokela ho tlosa sekhobo sena ka ho fana ka bopaki ba hore o sokolohile.

Ha Krete A ntse A e-ja ‘moho le barutuo ba Hae O ile A re ho Petrose: “Simone, mor’a Johanne, na u nthata ho feta baa na?” O ne A bua ka barutuo ba bang. Petrose a raba a re “E, Morena, ua tseba hore kea u rata.” Jesu A mo rōma A re “Alosa likonyana tsa ka!” Petrose ha a ka a tiisa ka matla hore lerato la hae ho Krete le feta la barutuo ba bang.

Jesu A boela A ‘motsa hape A re “Simone, mor’a Johanne, na ua nthata na?” Karabo ea bobeli e ne e tšoana le ea pele, ho se tiiso e entsoeng ka mantsoe a mangata “E, Morena, u tseba hore kea u rata.” Jesu A re ho eena: “Lisa linku tsa ka!”

Mopholosi A boela A ‘motsa potso ena ea teko: “Simone, mor’a Johanne, na ua nthata na?” Petrose a utloa bohlokō. O ne a tseba hore Morena oa hae O na le lebaka la ho se mo tšepe. ‘Me a araba ka pelo e bohlokō a re: “Morena, u tseba tsohle, ua tseba hore kea u rata.” Jesu A boela A re: “Alosa linku tsa ka.”

Petrose o ne a ile a latola Morena oa hae pepeneneng, ‘me Jesu O ‘motsa potso ena ka makhetlo a mararo. Potso ena ea hlaba joaloka terata e metsu pelong ea hae e maqeba. Jesu O ile A senola botebo ba pako ea Petrose ka pel’a barutuo ba neng ba phuthehile moo ‘me A bontša boikokobetso bo phethehileng, ba morutuo enoa ea neng a ikalatisa pele.

Pele Petrose a khoptjoe, Jesu O ne A ile A re ho eena “empa ke u rapeletse hore u se ke ua felloa ke tumelo. Joale uena, ha u se u bakile, u matlafatse bana beno.” Luka 22:32 Phetoho e ho Petrose e ne e bonahala. Ka lebaka la boikokobetso ba hae le tšokoloho ea hae, Petrose o ne a loketse ho ba molisa oa mohlape ho feta pele.

Mosebetsi oa pele o ileng oa tšepeloa Petrose ke Krete e ile ea e-ba ho alosa “likonyana” -ho sebeletsa ba bacha tumelong, ho ruta ba sa tsebang, ho ba phetlela Mangolo, ho ba ruta hore ba tsebe ho sebeletsa Krete. Mathata ao a neng a fetile har’a ona, esita le pako ea hae li ne li mo lokiselitse mosebetsi ona.

Pele a khoptjoa, Petrose o ne a tloaetse ho tšoaeba ba bang liphoso, le ho bua sohle se ka kelellong ea hae. Empa Petrose ha a se a sokolohile, o ne a fetohile haholo. O ne a ntse a tletse mafolo-folo, empa mohau oa Krete o ne o laola cheseho ea hae. Joale o ne a ka tseba ho alosa likonyana le linku tsa mohlape oa Krete.

Mokhoa oo Mopholosi A ileng A sebelletsa Petrose ka 'ona o ile oa ruta barutuo hore, ha ba sebetsana le ea tlotseng molao, ba be le mamello, qenehelo, le lerato le tsoarelang. Petrose o ne a lokela ho hopola bofokoli ba hae, 'me a alose mohlape ka bonolo joalekaha Krete A mo entse.

### **Kreste O Mo Bolella Mokhoa Oo A Tla Shoa Ka 'Ona**

Pele Jesu A e-shoa, O ne A ile A re ho Petrose: “Moo ke eang teng u ke ke ua ntatela hajoale, feela u tla ntatela hamorao.” Petrose o ne a ile a araba tjena: “Morena, ke ka baka la'ng nke keng ka u latela hajoale? Ke tla u tella bophelo ba ka! Johanne 13:36,37. Empa eitse ha teko e fihla a hloloa. O fuoa monyetla o mong hape ho bontša lerato la hae ho Krete. Mopholosi O ile A mo phetlela bokamoso ba hae ho mo matlafaletsa teko ea ho qetela ea tumelo ea hae. Kamorao ho bophelo bo tsoetseng ba bang molemo, ha a se a tsofetse, a feletsoe ke matla, o ne a tla latela Mong'a hae. Jesu A re: “‘Ha u ne u sa le mocha u ne u ikapesa, u tsamaea moo u ratang teng, empa ha u se u tsofetse, u tla otlolla matsoho a hao, 'me e mong o tla u apcsa, a u ise moo u sa ratang teng.’ O ne a bolela hona ho supa hore na o tla tlotlisa Molimo ka lefu le joang.”

[543] Ho tjee, Jesu A porofeta hore Petrose o tla otlolla ma-tsoho sefapanong. A boela A laela morutuo enoa oa Hae A re: “Ntatele!” Taba ena eo a e senoleloang ha ea ka ea tepeletsa Petrose. O ne a ikutloa a ikemiselitse ho shoa lefu la mofuta ofe kapa ofe, a le shoela Morena oa hae.

Ho tla fihla mona, Petrose o ne a rata Krete e le motho; joale o se a Mo rata e le Molimo. Joale o loketse ho nka karolo borōmuoeng ba ho ba sehlabelo le Morena oa hae. Qetellong ha a thakhisoa, o ile a kopa hore a thakhisoe a shebisitsoe tlase. A nka hore ekaba tlotla e kholo haholo ho utloisoa bohlokō ka tsela e tšoanang le ea Mong'a hae.

Ho tla fihla mona Petrose o ne a ile a leka ho etsa leano la mosebetsi oa Molimo bakeng sa hore a eme le ho latela leano la Molimo leo O le lokisitseng. Empa Jesu O ile A mo laela A re: “Ntatele.” Se ke oa nketella pele. Ntese ke u etelle pele ‘me u ke ke oa hloloa ke sera.

Eare ha Petrose a ntse a tsamaea lehlakoreng la Jesu, a eelloa hore Johanne o ba latetse. A lakatsa ho tseba bokamoso ba Johanne, “a re ho Jesu: ‘Morena, eo o tla fella kae?’ Jesu a re ho eena: ‘Ha ke rata hore a phele ho fihlela ke khutla, u tšoenngoa ke’ng? uena, ntatele.’” Petrose o ne a lokela hore ebe o ile a eelloa hore Morena oa hae o ne a ka mo senolela sohle seo a neng a loketse ho se tseba, se molemo ho eena. Jesu O ne A sa tiise hore Johanne o tla phela ho fihlela Morena A etla khetlo la bobeli, ha A ne A re: “Ha ke rata hore a phele ho fihlela ke khutla, u tšoenngoa ke’ng?” empa leha e ne e-ba ke thato ea Krete hore ho etsahale joalo, hona ho ne ho ke ke ha ama mosebetsi oa Petrose ka letho. Se neng se hlokoa ho bona ka bobeli ke ho mamela.

Ba bangata hakae kajeno ba lakatsang ho tseba hore na ho tla etsahala joang ka ba bang le mosebetsi oa bona empa ba tlohetse oa bona! Ke mosebetsi oa rōna ho sheba ho Krete le ho Mo latela. Ha re Mo talima re tla fetoha.

Johanne o ile a phela ho fihlela tšenyeho ea Jerusalema ‘moho le ea tempele -eleng letšoao la tšenyeho ea ho qetela ea lefatše. A latela Morena oa hae haufinyane ho fihlela matsatsi a hae a ho qetela. Petrose o ne a khutliselitsoe litulong tsa hae tsa boapostola, empa tlōtla eo a neng a e fumane ho Krete, e ne e sa mo bea hore a phahamele ba bang. Krete O ile a totobatsa ntlha ena ha A ne A araba potso ea Petrose, e reng, “Morena, eo o tla fella kae?” O ne A ile A re “u tšoenngoa ke’ng? Uena, ntatele!” Petrose ha a ka a fuoa

[544]

hlompho ea ho ba hlooho ea kereke. O ile a ba le tšusumetso e kholo kerekeng empa thuto eo Krete A neng A mo rutila eona lebōpong la leoatle la Galelea e ile ea lula ka kelellong ea Petrose bophelo ba hae bohle.

Ha a ngolla likereke, Petrose o itse “ke khothatsa baholo ba leng teng har’a lona, ‘na ke le e mong oa bona, ke bile ke le paki ea mahlōkō a Krete,...Alosang mohlape oa Molimo...le se ke la ba busa ka thata, le mpe le be mohlala ho mohlape oa lōna. Etlare

mohla Molisa oa balisa a iponahatsang, le tla amohela mofapahlooho  
oa tlōtla, o sa senyeheng.

## **KHAOLO EA 86—E-EANG LE RUTE LICHABA TSOHLE**

[545]

*[E itšetlehile ka Matheu 28:16-20.]*

Ha ho setse mohato o le mong feela A fihla teroneng ea Hae ea leholimo, Krete A fana thōmo ena: “Ke neiloe matla ‘ohle leholimong le lefatšeng. E-eang ke hona, le lichaba tsohle.” “E-eang ka lefatšeng lohle, le phatlalletse libōpuoa tsohle molaetsa o molemo.” Mareka 16:15. Mantsoe ana a ile a phetoa makhetlo-khetlo hore barutuo ba utloisise bohlokoa ba ona. Leseli la leholimo le ne le lokela ho chabela baahi bohle ba lefatše ka ho hlaka.

Thomo ena e ne e ile ea fuoa ba leshome le metso e ‘meli, phapusing e kaholimo, ‘me joale e ne e lokela ho fuoa batho ba bangata. Balumeli bohle ba neng ba ka bitsoa ho ba ‘moho ba ne ba bokane kaholim’ a thaba Galelea. Lengeloi le neng le le lebitleng, le ile la hopotsa barutuo tšepiso ea Hae ea hore O tla kopana le bona Galelea. Tšepiso ena e ile ea phetoa hape ho balumeli Jerusalema, vekeng ea Paseka, ‘me bona ba ile ba e fetisetsa ho batho ba bang ba bangata ba neng ba ntse ba le bofifing ba Morena oa bona. Bohle ba ne ba lebelletse kopano ena ka cheseho e kholo. Ba ile ba tla, ba hlaha ka likhoro tsohle, ba ipotsa lipotso ka pelong.

Ka nako e baliloeng, batho ba ka bang makholo a mahlano ba phutheha ka lihlotšoana pel’ a thaba, ba chesehella ho ithuta sohle se ka fumanoang ho ba ‘nileng ba bona Krete ho tloha esale A tsoha bafung. Barutuo ba ile ba ea sehlopheng ka seng ba ba phetela tsohle tseo ba li boneng le tseo ba le utloileng ka Jesu ‘me ba paka ka Mangolo joalokaha A ile A etsa ho bona.

Hang-hang Jesu A ema har’ a bona. Ho ne ho se ea ka bolelang hore na O tlile joang A hlaha hokae. Ba bangata ba ne ba qala ho ‘Mona, empa ba ile ba bona ka matsohong le maotong a Hae mabote a ho thakhisoa; ‘me eitse ha ba ‘mona ba Mo khumamela.

[546]

Empa ba bang ba belaela. Ho tla ‘ne ho be joalo kamehla. Ho na le ba bang ba fumanang ho le thata ho lumela me ebe ba ipeha

lehlakoreng la babelaeli. Ba lahlehelo a haholo ka baka la ho hloka tumelo.

Ena e bile eona feela kopano eo Jesu A ileng A ba le eona, le balumeli ba bangata kamorao ho tsoho ea Hae. Ba ile ba thabisoa ke ho utloa mantsoe a Hae, a neng a e-tsoa melomong e neng e ile ea koaloa ke lefu. ‘Me joale A phatlalatsa hore O neiloe “matla ‘ohle.” Likelello tsa ba neng ba Mo utloa li ile tsa phahamisetsoa holimo-limo, ba leka ho utloisisa bokhabane le tlotla ea Hae.

Mantsoe a Krete e ne e le tsebiso ea hore sehlabelo sa Hae se etselitsoeng motho se lekane ‘me se phethahetse. Mosebetsi oo A neng A o tletse lefatseng o ne o phethiloe. O ne A le tseleng e eang teroneng ea Molimo. O ne A se A kene mosebetsing oa Hae oa ho ba ‘Muelli. Matleng ana a senang moeli ao A a apesitsoeng A fana ka taelo ena, “E-eang ke hona le lichaba tsohle, le li etse barutuo, le ba kolobetse ka lebitso la Ntate, le la Mora, le la Moea o Halalelang, le ba rute ho boloka tsohle tseo ke le laetseng tsona. Bonang, ke na le lona kamehla eohle ho isa bofelong ba lefatše.” Matheu 28:19,20. O ile A rōma barutuo ba Hae ho phatlalatsa tumelo e neng e sa tl’o khetholla sehlopha se itseng sa batho, kapa naha e itseng, tumelo e ipapisitseng le batho bohle, lichaba tsohle, le lihlopha tsohle tsa batho.

Kreste O ile A totobatsa sebōpeho sa ‘Muso oa Hae. Sepheo sa Hae e ne e le ho haha ‘muso oa moea, e seng hore Eena A lule teroneng ea Davida ‘me A buse e le morena hona teng. O ile A re, Lea bona hore tsohle tseo ke le senoletseng tsona malebana le ho se amoheloe ha ka ke le Mesia ho etsahetse. Tsohle tseo ke li boletseng tsa hore ke tla feta har’a masoabi, le mokhoa oo Ke tla shoa ka ‘ona li netefalitsoe. Ke ile ka tsoha hape ka letsatsi la boraro. Linthong tsena tsohle, boporofeta bo phethehile.

[547] Kreste O ile A rōma barutuo ba Hae ho etsa mosebetsi oo A neng A O siile matsohong a bona, ho qala ka Jerusalema. Jerusalema ke hona moo Krete A ileng A bontša ho itheolela tlase ho makatsang molemong oa batho. Ke ba seng bakae feela ba ileng ba ekeloa kamoo leholimo le ileng la theohela haufi le lefatše kateng, ha Jesu A le har’a batho. Jerusalema ke moo mosebetsi oa barutuo o ne o lokela ho qala teng.

Barutuo ba ka be ba ile ba kōpa ho sebetsa moo mosebetsi oa bona o neng o tla atleha, empa ha ba ka ba etsa kōpo e joalo. Krete



O ne A hasitse peo ea ‘nete, ‘me peo ena e ne e tla hlahisa kotulo e kholo. Batho ba pele ba neng ba lokela ho hauhelo a e ne e le babolai ba Mopholosi.

Batho ba bangata Jerusalema, ba ne ba lumetse ho Jesu ka lekunutu, hape ba bangata ba ne ba thetsitsoe ke baprista le babusi. Ba ne ba lokela ho biletsoa pakong. Nakong ena eo Jerusalema eohle e neng e sisintsoe ke litaba tse monate tse etsahetseng livekeng tse fokolang tse fetileng, thuto ea evangeli e ne e tla kena ka botebo likelellong tsa batho.

Empa mosebetsi o ne o sa tšoanela ho khaotsa moo. O ne o tšoanetse ho fihla le libakeng tse potelletseng tsa lefatše. Ho barutuo a ba Hae Krete O ile A re, lehoja Iseraele e hanne ho nkamohela, joalekaha mangolo a ne a boletse pele, ba tla boela ba fumana monyetla o mong hape oa ho amohela Mora oa Molimo. Ho lona barutuo a ba Ka, Ke siea molaetsa ona oa mohau. O tšoanetse ho fuoa Iseraele pele, ‘me joale o fuoa lichaba tsohle, maleme le batho. Bohle ba lumelang ba tšoanela ho bokelloa kerekeng e le ‘ngoe.

### **Moea O Halalelang O Atlehisa Mosebetsi Oa Bona**

Ka Moea o Halalelang bopaki ba barutuo a bo ne bo tla tiisoa ke lipontšo le mehlolo. Mehlolo e ne e tla etsoa eseng ke baapostola feela empa esita le ke bao ba amohetseng evangeli ho bona. “Ba tla leleka bademona ka lebitso la ka, ba bue lipuo tse ncha, ba tšoare linōha ka matsoho, ‘me leha ba ka noa chefo efe kapa efe, e ke ke ea ba etsa letho; ba tla bea bakuli matsoho, me ba tla fola.” Mareka 16:17,18.

Mehlang eo batho ba soele ba ne ba sa qea-qea ho bolaea ba ba emeng pele litakatsong tsa bona. Ba ne ba ba tšella chefo. Jesu O ne A tseba hore ba bangata ba tla nahana hore ba etsa mosebetsi oa Molimo ha ba bolaea lipaki tsa Hae. Kahoo O ile A ba tšepisa hore ba tla sireletsoa kotsing ena.

Eaba ba fuoa matla a macha: Barutuo a ba ne ba lokela ho ruta har’a lichaba tse ling, ‘me ba ne ba tla fuoa matla a ho buoa ka maleme asele. Baapostola le bao ba neng ba sebetsa le bona, e ne e se batho ba rutehileng, empa ka ho tšolleloa Moea, ka letsatsi la

[548]

pentakonta, maleme a bona a ile a manama ha ba bua puo ea habo bona, esita leha ba bua puo tsa balichaba.

Ho tjee, Kreste O ile A fa barutuo ba Hae tsohle tseo ba neng ba tla li hloka ho etsa mosebetsi, 'me Eena A nka boikarabello ba ho o atlehisa. O ile A ba rōma A re, E-eang lichabeng tsohle. E-eang le libakeng tse hole ka ho fetisisa tsa lefatše, moo batho ba leng teng le tsebe hore Ke tla ba le lona. Le sebetse ka tumelo le sebetse.

Thōmo ea Mopholosi e akarelletsa balumeli bohle, ho fihlela bofelong. Ke ntho e kotsi ho nahana hore mosebetsi oa ho pholosa meea ke oa baruti ba beiloeng matsoho feela. Kereke e thehetsoe ho etsa mosebetsi ona 'me bohle ba nkang kano ea eona, ba ikanne ho ba basebetsi 'moho le Kreste. Hore na motho o bilelitsoe mosebetsi ofe bophelong, takatso ea hae ea mantlha e lokela ho ba ho hapela Kreste meea. Mohlomong a ka sitoa ho bua le phutheho empa a ka sebeletsa batho ka bo-mong. Haufi le hole ho na le batho ba imetsoeng ke melato. Ha se mathata kapa bofutsana tse theolelang motho tlaase. Ke melato le liphoso. Kreste O lakatsa hore bahlanka ba Hae ba sebelletse batho ba kulisoang ke sebe.

### **Moo Re Ka Qalang Teng**

Motho e mong le e mong o tšoanetse ho qala moo a leng hona teng. Ka hare ho malapa a rōna e ka 'na eaba ho na le meea e lapetseng bohobe ba bophelo. Bahedene ba teng le hona menyakong ea rōna. Haeba mosebetsi ona o etsoa ka tumelo, o tla finyella libakeng tsohle tsa lefatše. Mosebetsi ea tlase ho feta bohle, ha a tsamaisoa ke Moea o Halalelang, o tla sisinya likhoele tse sa bonoeng, me molumo oa tsona o tla utloahala ho fihla le pheletsong ea lefatše, 'me o tla etsa pina e monate ho isa ka ho eo molumo oa eona o tla utloahala mengoaheng e sa feleng.

[549]

Limpho tsa Moea li tšepisitsoe molumeli e mong le e mong ho latela bohloki ba hae mosebetsing oa Morena. Tšepiso ena e ntse e tšepahala kajeno joaleka nakong ea baapostola.

Kreste O tlile ho folisa ba kulang, ho bolella batšoaruo ba Satane pholoho. O ile A fana ka bophelo ba Hae ho bakuli le ba neng ba e-na le bademona. O ne A tseba hore ba neng ba kōpa thuso ho Eena, ba ne ba ipaketse ho kula ka bo-bona, empa ha A ka A hana ho ba folisa. 'Me batho ba bangata ba ne ba folisoa mafu a

moea le a ‘mele. Evangeli e sa ntse e e-na le matla a joalo le kajeno. Krete O utloisisa masoabi a mobabi e mong le e mong. Ha bophelo ba motho bo chesoa ke feberu, O a utloisisa. O ntse A ikemiselitse ho folisa, feela joaleka nakong eo A neng A le lefatseng. O lakatsa ho sebelisa matla a Hae ka basebeletsi ba Hae.

### **Melao Ea Bophelo Bo Botle Ke Karolo Ea Molaetsa O Molemo**

Mokhoa oa Mopholsi oa ho folisa, o ne o fupareletse barutuo ba Hae thuto. Pholiso e tla feela ka matla a Mofolisi E Mehola (eleng Jesu) empa Krete O ile A sebelisa meriana e bonolo ea tlhaho. O ile A ruta hore lefu le bakoa ke ho tlola melao ea Molimo ea tlhaho le ea moea. Masoabi ana a maholo a ka be a le sieo lefatseng hoja batho ba ne ba ka phela ba ipapisitse le leano la ‘Mopi. O ile A ruta hore bophelo bo botle bo tlišoa ke ho hlomphe melao ea Molimo. Ngaka e kholo E ne E ile ea bua le batho E le marung ea re “Haeba le hlile le mamela lentsoe la Morena Molimo oa lōna, ‘me le etsa ho lokileng mahlong a hae;...nke ke ka le otlala ka mafu ‘ohle ao ke ileng ka otlala Baegepeta ka ‘ona, hobane ke ‘na Morena, Mofolisi oa hao.” Phallo Exoda 15:26.

Ha re thusa bakuli re lokela ho sebelisa meriana ea tlhaho eo Molimo O e entseng, ‘me re ba supise ho A leng mong ea ka folisang. Re lokela ho ba ruta hore ba lumele ho Ngaka e Kholo ‘me ba itšoarelle ka matla a Hae.

Ke ha feela re nka karolo leratong la Krete ka tumelo, matla a fanang ka bophelo a ka tšolohang ho rōna a ea bathong. Ho na le libaka tse ling tseo Mopholosi ka bo Eena A ileng A sitoa ho etsa mesebetsi e meholo, ka lebaka la ho hloka tumelo ha batho ba moo. Ka tsela e tšoanang kereke e arohantsoe le Mothusi oa eona ea Halalelang ke ho se lumele. Ka lebaka la ho hloka tumelo ha kereke Molimo oa soabisoa, le tlōtla ea ‘Ona ea thibelo. Moo batho ba sa sebeletseng ba bang ka cheseho, lerato lea fokotseha ‘me tumelo e time. [550]

Mangeloi a hlolloa ke ho hloka teboho leratong la Molimo ho bonahatsoang ke batho. Ak’u nahane feela hore na ntate le ‘m’e ba ka ikutloa joang ha ba ka ba tseba hore ngoana oa bona, ea lahlehileng har’a serame le lehloa, batho ba ka tsebang ho mo thusa ba mo tlohelletse hore a shoe. Ho sotleha ha motho e mong le e

mong ke ho sotleha ha ngoana oa Molimo; ‘me batho ba sa otlolleng matsoho a bona ho thusa ba sotlehang ba halefisa Molimo.

Kreste O ile A fa barutuo ba Hae boqosa ba bona, A re rutang batho “ho bōlōka tsohle tseo ke le laetseng tsona.” Mona ho akarellelitsoe le tseo A li buileng, eseng ka molomo oa Hae feela, empa le ka Testamente ea Khale. Ha ho moo neeletsano ea litaba, kapa lipolelo tsa batho leha e le matla a kereke kapa melao e entsoeng ka matla a kereke, li ka kenang teng. Se lokelang ho neoa lefatše ele letlotlo ke “Molao le baporofeta,” hammoho le lingoliloeng tse re fang mantsoe a Hae le liketso tsa Hae.

Molaetsa o molemo o se ke oa neelanoa ele lipolelo feela, tse senang bophelo, empa ebe matla a phelang a fetolang bophelo. Bao litsela tsa bona e bileng tse nyonyehang ka ho fetisisa ho Eena, O a ba amohela. Ha ba baka O ba fa Moea oa Hae o Halalelang ‘me a ba rōmelle litenteng tsa ba sa tšepahaleng hore ba ba bolelle ka mohau oa Hae o senang moeli. Ka lereko la Hae batho ba ka rua semelo se tšoanang le sa Kreste, ‘me ba nyakalla Leratong la Hae le leholo.

[551]

Ha A khotsofalle ho tsebisa ka mahlohonolo ana feela’ empa O a hlahisa ka mokhoa o hohelang ka ho fetisisa, e le hore batho ba be le takatso ea ho a rua. Ka mokhoa o joalo, bahlanka ba Hae ba tšoanetse ho hlahisa matlotlo ana a Mpho e ke keng ea hlaloso. Lerato le makatsang la Kreste le tla qhibilihisa ‘me le kokobetse lipelo, moo ho pheta-pheta lithuto ho neng ho ke ke ha atleha. Mantsoe feela, ha a lekana ho le hlalosa. Ha le ke le bonahatsoe maphelong a rōna. Kreste O lutse morutuoeng e mong le e mong ho fihlela setšoantšo sa Hae se ka sa bonahala morutuoeng ea joalo. Ho morutuo e mong le e mong, lefatše le lokela ho bona lerato la Hae le mamellang, mohau oa Hae, le ‘nete.

Barutuo ba pele ba ile ba itlhophela mosebetsi oa bona. Pele ho Pentakonta ba ile ba kopana ‘moho ‘me ba tlosa likhohlano tsohle. Ba ile ba rapela ka mohopolo o le mong ka tumelo, ba imetsoe ke moroalo oa meea. Eaba joale Moea o Halalelang O oa tšoloha, ‘me likete-kete tsa batho tsa sokolloa ka letsatsi le le leng.

Sena se ka ‘na sa etsahala le hona joale. A Lentsoe la Molimo le ke le rutoe. A Bakreste ba ke ba behelle likhohlano tsa bona ka thōko, ‘me ba inehele ho Molimo e le hore ba lahlehileng ba pholosoe. A ba ke ba kōpe mahlohonolo ka tumelo, ‘me a tla tla. Tsollelo e ileng ea etsahala mehleng ea baapostola, e ne e le “lipula

tša hoetla,” ‘me e ile ea fana ka litholoana tse tlotlehang, empa “pula ea morao” e tla ba kholohali. Sheba Joele 2:23.

Bohle ba nehelanang ka moea le ‘mele ho Molimo ba tla ‘ne ba tsoele pele ho fumana tlatsetso e ncha ea matla a ‘mele le a kelello. Ka ho sebetsa ‘moho le Krete ba tla thusoa ho etsa liketso tsa ea Matla ‘ohle ka bofokoli ba bona ba botho.

Mopholosi O laba-labela ho bontša mohau oa Hae, ‘me A hatise semelo sa Hae lefatšeng lohle. O lakatsa ho lokolla batho, ba hloeke ba halalele. Ho na le tlhōlo e tšoanetseng ho fihleloa, ka mali a tšolletsoeng lefatše, a tla tiisa khanya ho Molimo le ho Konyana. Krete ” o tla bona tholoana tsa ho hlōkōfatsoa ha hae.” Esaea 53:11.

[552]

## **KHAOLO EA 87—KRESTE O KENA LEHOLIMONG KA TLHŌLO**

*[E ilsellehile ka Luka 24:50-53; Liketso 1:9-12.]*

Nako e ne e se e fihlile ea hore Krete A nyolohela teroneng ea Ntat'ae e le Mohlōli ea halalelang. O ile A phomola lefatšeng ka nakonyana, kamora' tsoho ea Hae, e le hore barutuo ba Hae ba tloaele 'mele oa Hae o khanyang. Joale O ne A se A loketse ho tsamaea. Barutuo ba Hae ba ne ba ke ke ba hlōla ba Mo nahana A le ka lebitleng. Joale ba ne ba ka Mo nahana A tlōtlisitsoe ka pel'a leholimo.

Jesu A khetha ho nyoloha A tloha sebakeng seo A neng A atisa ho se chakela, ha A sa lula har'a batho -Thabeng ea Mehloaare. Thaba ena e ne e hlohonolofalitsoe ke lithapelo le meokho ea Hae. O ne A ile A rapela 'me A sotleha A le mong, serapeng sa Gethesemane se neng se le mosikong oa Thaba ea Mehloaare. Maoto a Hae a tla hata tlhorong ea thaba ena mohlang A tlang hape, e le Morena ea khanyang, 'me lihaleluja tsa Baheberu li tla binoa li kopane le lihosanna tsa Balichaba, 'me makhotla a matla a tla hōoa phatlalatso e reng, "Mo roeseng Khau Morena oa bohle!"

[553]

Eaba Jesu O leba thabeng le barutuo ba Hae ba leshome le motso o mong. Ha ba e-tsoa ka likhoro tsa Jerusalema, batho ba bangata ba ile ba sheba sehlotšsoana sena ka ho makala, se neng se etelletsoe pele ke Ea neng A thakhisitsoe ke babusi livekeng tse fokolang tse fetileng. Barutuo ba ne ba sa tsebe, hore ena e ne e tla ba puisano ea ho qetela ea bona le Mong'a bona. Jesu A qeta nako A buisana le bona, A boetse A ba laea joaleka pele. Ha ba atamela Gethesemane A emisa. Eaba O sheba sefate sa morara, seo A neng A ile A bapisa kopano ea kereke ea Hae le Eena le Ntat'ae ka sona. A boela A pheta linnete tseo A neng A ile A ba bolella tsona.

Jesu O ne A ile A mamella litšomo le lithohako lilemo tse mashome a mararo a metso e meraro ha A le lefatšeng. O ne A ile A latoloa, A ba A thakhisoa. Na joale ha A hopola ho hloka

teboho ha batho bao A neng A tlil’o ba pholosa, ebe O ne a tla ba amoha mohau le lerato la Hae? Che. Tšepiso ea Hae e re, “Ke na le lona kamehla eohle ho isa bofelong ba lefatše.”

Jesu ha A fihla Thabeng ea Mehloaare, A ba etella pele ho feta tlhorong ea eona, ho isa nq’ a Bethani. Ha A fihla teng A emisa, ‘me barutuo a ba ile ba ‘Mokanela. A ba sheba ka lerato. Ha A ka A ba tšoea liphoso ka bofokoli le liphoso tsa bona. Mantsoe a Hae a ho qetela ho bona, a ne a tletse bonolo bo tebileng. O ile A otlolla matsoho a Hae ho ba hlohonolofatsa, joalekaha eka O ba kholisa hore O tla ba hlokomela, me A ba sireletse. Eaba O nyoloha har’ a bona butle, A huleloa leholimong ke matla a fetang ‘ohle lefatšeng. Ha A ntse A nyolohela holimo, barutuo a ba ile ba talima Morena oa bona ea nyolohang, lekhetlo la ho qetela. Leru la khanya la Mo koahela, ‘me eare ha koloi ea mangeloi e Mo amohela, ba hopola mantsoe ana a reng, “ke na le lona kamehla eohle.” Ka eona nako eo ha fihla litšebeng tsa bona ‘mino o monate ka ho fetisisa, o tsoang ho libini tsa mangeloi.

### **o Amoheloa Ke Makoloi A Mangeloi**

Ha barutuo a ba ntse ba lelaletse holimo, mangeloi a mabeli a nkileng sebōpeho sa batho, a ile a bua, a re “banna ba Galelea, le emetse’ng le shebile leholimong? Jesu enoa ea nyolletsoeng leholimong, a tloha har’ a lona, o tla boela a khutla ka mokhoa oo le ‘moneng a nyolohela leholimong ka oona.”

Mangeloi ana, e leng a phahameng ka ho fetisisa har’ a a mang, ke ona a mabeli a neng a tlile lebitleng, tsohong ea Jesu. A ne a lakatsa ho ba mokhopping oa mangeloi a neng a amohela Jesu, empa ka ho hauhela bao A neng A ba siile, a ile a emisa, ho ba khothatsa.

Kreste O ne A nyolohile A nkile sebōpeho sa botho — Eena Jesu [554] ea ileng A ngoatha bohobe le bona, ea neng A ile a fufuleloa ‘moho le bona ho hloa Thaba ea Mehloaare, hona tsatsing leo. Mangeloi a ile a ba tiisetsa hore Eena eo ba Mo boneng A nyolohela leholimong, O tla tla hape ka mokhoa oo A nyolohileng ka ona. O tla tla “A le har’ a maru, ‘me mahlo a bohle a tla ‘mona.” “Mohla ho hlahang taelo, ka lentsoe la lengeloileholo, ka terompeta ea Molimo, Morena ka sebele o tla theoha leholimong, ‘me ba shoetseng ho Kreste ba tla tsoha pele.” “Mohla Mor’ a Motho a tlang ka tlōtla ea hae, a ena

le mangeloi ‘ohle, o tla lula teroneng ea hae ea botlotlehi.’ Tšenolo 1:7; 1 Ba-Thesalonika 4:16; Matheu 25:31.

Kamora’ kahlōlo le thakhiso ea Jesu, lira tsa barutuoana li ne li lebeletse ho ba bona ba le lifahleho tse tletseng masoabi le ho hlōloa. Empa sebakeng sa tsena, ho ne ho e-na le thabo le tlhōlo, lifahleho tsa bona li ne li khanya ke thabo eo e seng ea lefatše lena. Ba ile ba pheta pale e makatsang ea tsoho le nyolohelo ea Jesu, ‘me bopaki ba bona ba amoheloa ke batho ba bangata.

### **Tsabo E Ne E Felile**

Barutuoana joale ba ne ba se ba sa hloke tšepo ka bokamoso. Ba ne ba tseba hore Jesu O leholimong le hore O ntse A ba utloela bohlokō. Ba ne ba tseba hore ba na le motsoalle teroneng ea Molimo, ‘me ba ne ba chesehella ho etsa likōpo ka lebitso la Jesu. Ba ne ba inamisa lihlooho tsa bona thapelong ka ho tšoha, ba pheta tšepiso ena, “eng kapa eng eo le e kōpang ho Ntate ka lebitso la ka, o tla le nea eona....Kōpang, ‘me le tla fuoa, hore thabo ea lona e be e phethehileng.” Johanne 16:23,24. Boteng ba motselisi ka letsatsi la Pentakonta, bo ile ba ba tlišetsa thabo e khaphatsehang joalekaha Krete A ne A ba tšepisitse.

Leholimo lohle le ne la emetse ho amohela Mopholosi. Ha A nyoloha, O ne A etelletse pele matšoele a batšoaruoana, ba ileng ba lokolloa tsohong ea Hae. Ha ba atamela motse oa Molimo, mangeloi a neng a tsamaea le eena, a ile a etsa qholotso ena.

“Lona menyako, bulehang!  
Ipuleng, lona menyako ea boholo-holo,  
Ho tle ho kene Khosi e tlōtlehang.”

[555] Ba lebitseng ba ne ba botsa ka thabo ba re —

“Khosi eo e tlōtlehang ke mang?”

Ba ne ba sa botse hobane ba sa tsebe hore na Ke mang, empa ba ne ba batla ho utloa karabo eo e rorisang --

“Ke Morena ea matla, oa mohale,  
Morena eo e leng mohale ntoeng.



Lona menyako, bulehang!  
Ipuleng, lona menyako ea boholo-holo,  
Ho tle ho kene Khosi e tlōtlehang.”

**Pesalema 24:7-9**

Joale likhoro tsa motse oa Molimo tsa buloa, ‘me makhotla a mangeloi a kena har’a litlatse tsa ‘mino. Batsamaisi ba makhotla a mangeloi, le bara ba Molimo ba neng ba tloha mafatseng a sa oelang sebeng, ba ne ba khobokane ho amohela Mopholosi le ho ketekela tlhōlo ea Hae.

Empa O ile A re ba ke ba be butle. O ile A kena ka ho Ntat’ae. A Mo supisa maqeba a hloohong ea Hae, lehlakoreng moo A hlabiloeng, le maoto a Hae a mabote; A phahamisa liatla tsa Hae tse neng li e-na le maqeba a lipekere. A hlahisa batho ba ileng ba tsosoa bafung ‘moho le Eena, e le baemeli ba matšoeletšoele a tla tsoha mabitleng ha A tla khctlo la bobeli. Le pele lefatše le theoa, Ntate le Mora Ba ne Ba ile ba tšoarana ‘moho, ‘me Ba etsa kano ea hore Kreste A fetohle tiiso ea batho. Kreste Ha A ne A hoeletsa sefapanong A re “Ho phethehile” O ne A buisana le Ntate. Selekane se ne se phethiloe ka ho tlala. Joale A re “Ntate, bao u ‘neileng bona, ke rata hore moo ke leng teng le bona ba be hona teng.” Johanne 17:24.

Lentsoe la Molimo le ile la phatlalatsa hore toka e phethiloe, le hore Satane o hlōtsoe. Batho ba Kreste ba sebelitse ka thata, ba sokola mona lefatseng, eleng ba “hauhctsoeng ka oona, ka Mora oa hae ea ratoang.” Baefese 1:6. Ntate O ile A kōpa Mora oa Hae ka liatla tsa Hae, ‘me A bua mantsoe ana, “Mangeloi ‘ohle a Molimo a mo khumamele.” Baheberu 1:6

Thabo le thoriso li ne li khaphatseha leholimong. Lerato le ne le hlotse. Ba lahlehileng ba ne ba fumanoe. Leholimong ho ne ho utloahala mantsoe a phahameng a hōoang a re “Ho ea lutseng teroneng le ho Konyana e be thoriso, le hlompho, le tlotla, le matla, kamehla le mehla.” Tsenolo 5:13.

Pono eo ea thabo ea leholimo, e re hopotsa rona ba mona lefatšeng, molumo oa mantsoe a Kreste a reng “ke nyolohela ho Ntate, le Ntat’a lona, Molimo oa ka, le Molimo oa lona.” Johanne 20:17. Lelapa la leholimo le la lefatše ke ntho e le ‘ngoe. Morena oa rōna O nyolohetse leholimong ka baka la rōna, ‘me Oa re phelela. “Ka hona o na le matla a ho pholosa ka ho tlala bohle ba tlang ho

Molimo ka eena, kaha a phela kamehla ho ba buella.” Baheberu 7:25.

\* \* \* \* \*